



ANTONII STÖRCK,

*Sacræ Cæsar. Reg. Apost. Maj. Consil. Aulici Arch.
& in Nosocomio Civico Pazmariano Physici,*

NEC NON

HENR. JOS. COLLIN,

Medici Viennens. ac ejusdem Nosocomii Physic.

ANNI MEDICI,

ATQUE

OBSERVATIONES

CIRCA MORBOS ACUTOS
AC CHRONICOS,

*Adjiciunturque eorum Curationes, & quædam
Anatomicæ Cadaverum Sectiones.*

EDITIO NOVISSIMA, CORRECTIOR.

Præfatus est B. AUBERT, Doct. Med. Monsp.



TOMUS SECUNDUS.



AMSTELODAMI,

Sumptibus Fratrum DE TOURNES.

M. DCC. LXXIX.

THE NEW YORK PUBLIC LIBRARY

ASTEN LENOX TILDEN FOUNDATION

500 FIFTH AVENUE NEW YORK CITY

1911

AMERICAN LIBRARY

NEW YORK

1911

1911

1911

1911

1911

1911

1911

1911

1911


1911

1911

1911

1911

1911



PRÆFATIO.

LAUDABILI, quod felicibus auspiciis, applaudente unanimi eruditorum conventu, prædecesor meus Antonius Storck: (cujus, nonobstante Archiatri munere, frequenti adhucdum præsentia gaudet nostrum nosocomium) inchoavit, satisfactorius instituto, morborum historias, eorumque curationes, ea, qua ipse olim fecit, simplicitate, referam.

Quingenti nonaginta & aliquot ægri a mense Julio anni 1760. ad mensem Julium 1761, acute apud nos decubuerunt, ex quibus quadraginta septem mortui

sunt : reliqui autem omnes sanitati restituti fuerunt.

Fuit ergo acutorum numerus minor, quam annis præcedentibus : remisit nempe epidemia, quam celeberrimus nosocomii hispanici physicus Dominus Hase-nohrl in tractatu, quem de illa edidit, cap. 2. pag. 5. mensibus Novembri & Decembri, anni 1757. incepisse refert, & in epistola dedicatoria ejusdem opusculi vix non integro triennio durasse asserit.

Omni mense describendis præpue morbis, qui vel maxime graves fuerunt, vel in nosocomio frequentiores, occupatus fui : & ut repetitionibus lectori tædium non parerem, ubi morbus uno mense descriptus, aliis etiam mensibus observatus est, illius historiam omisi : nisi peculiaribus

*symptomatis stipatus diversam
exegerit medendi methodum.*

*Quas sequentibus annis circa
morbos acutos feci, observationes
successive non longa interposita
mora, typis mandabo: adjunctis
etiam iis, quæ cum Colchico,
Hyosciammo, & Aconito feci,
experimentis.*

*Bonum vero, & publico gra-
tum opus præstiturum me credidi;
si præcipua, quæ trium, & ultra,
annorum tempore cum cicuta ins-
titui, experimenta. in hac prima
observationum mearum parte com-
municarem. Curantur enim hac
planta multi, qui ante illius usum
fere ab omnibus omni arte medica
superiores habebantur morbi:
curatos vidi, & viderunt necum
plures, scirrhus inveteratos &
cancros, quorum curationem ante
detectam cicutæ virtutem periti*

medici vix unquam sperare ausi sunt. Tale medicamentum desideravit omnis ætas, & forte semel inventum iri speravit Illustrissimus L. B. van. Swieten, qui in commentariis ad aphorism. §. 509. postquam in præcedentibus varia de scirrho & cancro differuit, ac se, & Hildanum fallaci spe in curando cancro delusos fuisse retulit, ait: « forte tamen & inde » aliqua spes affulget, non penitus impossibilem esse cancri separationem a partibus sanis, » licet hætenus ignoretur, qua » methodo, quibusve remediis hoc » fieri possit. Quam felix ille, » qui hoc inveniret! Quanta » pœna dignus, qui inventum » celaret, turpis lucri causa.»

Invenit Magnificus Storck & generosissime promulgavit egregium illud medicamentum, quo tot miseri jam morti erepti fue-

P R Æ F A T I O.

v

runt , & eripiuntur quotidie :
cujusque successum in dies majorem evasurum , omnium proborum medicorum , quibus salus proximi cordi est , blanda spe eriguntur animi : modo plures fuerint qui unita opera omnes suos de cicuta casus (sive ei felices sive infelices fuerint) fideliter adnotarint , diversitatemque symptomatum ejusdem morbi in diversis subjectis , ut & exinde pendentium medicamenti effectuum , curationumque differentias inter se attento animo contulerint , ut ex his omnibus evidens conclusio deduci possit , & demum clarius patefcat : cur cicuta morbos omnibus aliis medicamentis pertinaciter resistentes in plerisque subjectis celeriter & facile curet , quos in aliis tam lente aliquando aggreditur , ut medicus in exhibendo & æger in assumendo suam patientiam ferme amittant ? cur demum in qui-

*busdam muet prorsus nihil ,
licet diu & magna dosi sumatur ?
ex horum vera & exacta cogni-
tione in firmum & debitum redi-
getur ordinem res cicutaria : vo-
veo speroque fore , ut omnes boni
medici salutari huic operi suum
laborem , suamque industriam non
denegent. Interim contingit ali-
quando , ut ab externo cicutæ
usu juventur ægri , qui diu cicu-
tam sine ullo effectu assumpserunt :
sic Cl. ac celeb. Hoffmannus, Pro-
fessor Eisenfurtensis solo cicutæ
balneo sanavit plures , quibus
internus hujus remedii usus non
profuerat. Idem & nos in nostro no-
socomio confirmatum vidimus plu-
ribus experimentis. Studio nempe,
& indeffesso labore acquirit ars
incrementum & salus ægrotan-
tium promovetur.*



HENR. JOSEPH. COLLIN,

Nosocomii Pazmarianni Physici Ordinarium, & Sacrae Cæsareo-Reg. Apost. Majest. Reg. infer. Aust. Confiliarii,

OBSERVATIONUM

CIRCA

MORBOS ACUTOS


ET

CHRONICOS FACTARUM.

PARS PRIMA.

TOMUS SECUNDUS.





D E

MORBIS ACUTIS.

MENSIS JULIUS.

QUI febre acuta simplici decubuere, facile morbum superarunt; pulsum habebant febrilem sat æqualem, respirationem naturali paulo celeriore, non dolentem, sitim sat magnam, & levia alimenta libenter assumebant; alvus liquida jam ab initio morbi bis ter de die deponebatur, sine virium labefactione; urina naturali coloratior, in aliquibus nubeculam in fundo gerebat, in aliis nullam, cutis erat sicca, lingua albescens; somnus paucus, & fere omnes capite dolebant.

His ægris, si tres excipias, quibus
Collin Pars I. Tom. II. A

2 *De Morbis acutis.*

pulsus nimis plenus & fortis deprehendebatur, vena non secta fuit.

Medicamenta emollientia, aperientia, qualia sunt decoctum N. 1. & emuls. N. 2. cum lenioribus paregoricis, vespere ad somnum faciliorem conciliandum exhibitis, toto morbi tempore suffecere: his enim brevi cutis mollescebat, & leniebatur capitis dolor, nec de alvo sistenda cogitavi, cum ægri inde mali nihil paterentur.

Circa septimum morbi diem alvus mutabatur in pultaceam, flavam, criticam, morbum tollentem, vel omnino filebat oborto copioso sudore, multum levante, vel morbum penitus tollente: raro post talem sudorem ultra triduum duravit morbus. Talis sudor etiam in iis, quibus septimo die febris cessavit, 8. & 9. die sæpius erumpebat: urina futuram crisin non denotavit, immutata enim mansit toto morbi tempore, donec præsentē evacuatione critica in aliquibus sedimentum sat copiosum, album, leve deponeret, & sequenti die omni nota naturalis deprehendebatur.

Finito morbo ægros alimentis levibus refeci, donec viribus ita pollerent, ut facile extra lectum manere, & in cubiculo deambulare possent, ac tunc

Rhei Elect. dr. i. assumpta carnes concessi, & brevi integras vires recuperarunt.

Binæ feminæ hoc mense in nosocomio exanthematibus laborarunt.

Prima ex his puella erat sedecim annorum, menstruo fluxu necdum gavisa; hæc jam initio Junii anasarca laborans de doloribus ventriculi; appetitu deleto & alvo immorigera conquerens ad nosocomium nostrum delata fuerat. Datis per mensem remediis, in tali casu indicatis, anasarea disparuerat; respiratio libera erat, ac ita appetebat, ut cibis ipsi concessis non contenta furtim ab amica acceptis cibis duræ digestionis avide vesceretur tertia Julii; quo facto eadem die lassitudine correpta est, anxiosa fuit, valde sitivit, ac sequenti die multum febricitabat, & de magnæ oris amaritudine conquerebatur; pulsus nec durus, nec nimis plenus erat.

Scr. i. Ipecacuanhæ assumpsit ægra, unde multa indigesta rejecit tanto cum levamine, ut anxietas fere penitus disparuerit; ac tum quoque pacatum somnum, quo nocte præcedenti caruerat, habuit.

Copiosum decoctum factum ex hordeo crudo. Rad. Bardan. & Acetos. cum

4 *De Morbis acutis.*

oxym. simpl. sumendum & mixturam ex Rob. Sambuci cum sale polychr. exhibui, nocte sequenti inquirere dormivit. Tertio morbi die febris aucta erat; copioso sudore madebat; urina erat rubra sine nubecula, diarrhæa foetidissima ægram pessundabat, ac nonnisi precibus victa iusculum assumebat. Ipsi tunc clarctum N. 8. & decoct. N. 6. alternis horis data sunt, ac decoctum supra dictum copiose hausit: præterea ter Nychthemeri spatio Syr. diacod. unc. 1. exhibui, quo etiam diarrhæa ita compescebatur, ut per diem & noctem tantum bis vel ter purgaretur.

Mansit tamen in eodem fere statu ægra ad quintum morbi diem usque, quo cum sudore magno eruperunt petechiæ purpureæ cum virium dejectione majori & respiratione magis laboriosa, pulsu debilissimo, inæquali; accessit delirium, ac licet lingua nigra, arida foret, non sitiebat; alvus foetidissima, inscia ægra, effluebat in lectum.

Acrida epispastica tunc pedibus applicata sunt, & loco clareti mixt. N. 18. & mixt. cum extract. corr. peruv. usa est. Verum hæc nullum levamen attulerunt, & sexto die petechiis li-

Mensis Julius.

ventibus subito admodum mortua est.

Alteram femina sexto morbi die ad nosocomium delata fuerat, postquam sanguis binis venæ sectionibus ita copiose eductus fuerat, ut Alexipharmacis postea ob nimiam debilitatem refocillari debuerit, pulsus enim valde debilis, parvus, inæqualis, respiratio brevis, celeris, delirium continuum, lingua sicca, sitis sat magna aderant, licet enim potum non peteret, oblatum avidissime hauriebat; alvus in lectum foetidissima dimittebatur, urina paucissima, fusca cum enæoremate spisso, suspensio reddebatur, cutis humescebat.

Illico quatuor vesicantia furis & brachiis applicata sunt, ac emulsum N. 17. & mixt. N. 14. ipsi alternatim sumenda præscripsi, commendavique ut ipsi copiosus potus propinaretur.

Sequenti die prodire miliaria copiosissima, optime elevata, urina copiosior mittebatur cum enæoremate fundum petente, copioso, filamentis intermixto, alvus quoque bis eo die prodiit, verum nec pulsus nec respiratio inde emendata fuerunt, imo delirium increfcebat cum integra virium prostratione, & soporosa evadebat.

Vesicans tunc nuchæ applicatum fuit, sed incassum, nam octavo morbi die convulsa periit.



MENSIS AUGUSTUS.

HOC mense multi homines morbis acutis inflammatoriis decubuerunt.

Plerumque prægressis lassitudine spontanea inappetentia, horripilatione oriebatur febris, calor, insomnia, siccitas linguæ & cutis, sitis magna, alvus semel vel bis de die exonerabatur foetida, non levans, urina erat rubra sine enæoremate, oculi turbidi, flavescentes, ac eodem die vel sequenti dolor acutus, pleuriticus in parte lateris dextra vel sinistra oriebatur, cum tussi molesta, sicca; pulsus fiebat celerior, durus, respiratio densa, parva.

Venæ sectio ad Lib. 1. facta, licet simul decoctum N. 1. cum nitro & diacodio copiose exhibitum sit, ac cataplasma ex emmollientibus loco dolenti applicatum, symptomata non levavit; hinc eadem die vespere eadem sanguinis quantitas vena educebatur: unde levati sunt ægri quoad dolorem

febremque, & respiratio faciliior, tussisque minus frequens facta est; nox tamen inquieta fuit, & in binis recruderunt symptomata omnia, quæ facta tertia venæ sectione iterum leniora reddebantur.

Ægri continuarunt iisdem medicamentis uti, & vespere Syr. Diacod. unc. i. cum Laud. liq. Grt. sumpserunt.

Nox fuit pacatior, per plures horas dormierunt, ac tertio morbi die alvus liquida emanerat; urina rubra in aliquibus nubeculam in fundo gerebat, sitis eadem, respiratio licet adhucdum laboriosa, pleniori pectore peragebatur, pulsus erat liberior, minus durus, oculi minus turbidi.

Nihil in methodo medendi mutatum est, ægrique ad diem morbi quintum fere in eodem statu permanserunt præterquam quod aliqui alvum levantem egefferint; illis autem, quibus alvus sponte non cessit, si vel abdomen tensum esset; vel doleret, enemate injecto semel vel bis cum levamine movebatur.

Quinto die plures, prægresso magno cutis pruritu sudore copioso per totum corpus æquali per tres vel quatuor horas maduerunt, sub quo dolor lateris penitus evanuit, & tussis ferme integre siluit;

lingua humida facta est, ac pulsus liber & plenior.

Hi ægri decocto N. 1. nitrato uti perrexerunt, ac sponte sine paregorico tranquillas noctes habuerunt; alvus hoc die & præcedente semel vel bis deposita est cum levamine.

Septimo die iterum sudarunt, pluries alvum pultaceam flavam habuerunt, & octavo die nullum febris indicium aderat. Unicus fuit æger, in quo febris ad diem undecimum protracta est: continuavit tamen eodem medicamento uti, & die undecimo sine ulteriori evacuatione sensibili febris desiit.

Brevi vires recuperarunt, ac præter dr. 1. Rhei, quam post aliquot dies a sublata febre assumpserunt, nullo medicamento amplius indiguere.

Tres vero qui quinto morbi die non sudarunt, sexto die difficilius spirarant, pulsus celerior, inæqualis, durior evasit, & tussis præ doloris vehementia fere supprimebatur: deglutitio difficilior erat, sitis major & lingua ficca, alba. Accedebat quoque magnus capitis dolor: hinc post meridiem illis sanguis ex pede ad unc. VIII. eductus est, qui brevi crusta phlogistica tegebatur.

Cum dolor & reliqua symptomata

Mensis Augustus.

vespere nondum remitterent, ac ægri valde debiles essent, nec ultra ideo venam secare auderem, latum vesicans dolenti plagæ applicatum est, ac omnibus Syr. diacod. unc. i. cum laud. liq. syd. gtt. iv. exhibebatur.

Mane circa 8. accedens binos inveni cum parvo admodum lateris dolore, respiratio erat facilior, pulsus magis plenus, liber, & tussi paucum gluten ejiciebant, difficile tamen ob tenacitatem expectorabant: urina subfusca nubeculam in fundo gerebat & cutis mollis, perspirans deprehendebatur.

His præter decoctum N. i. dabatur pulvis N. 15. quater de die sumendus.

Vespere dum auferebantur vesicantia, dolor lateris penitus defierat, & noctem sine paregorico quiete transegerunt.

Matutino tempore septimi diei, unus semel, alter vero his alvum pul- taceam habuit cum levamine, cutis humida erat, lingua quoque incipiebat humescere; sputa copiosiora prodibant, semper glutinosa, & urina fere naturalis erat: febris erat adhuc sat validâ, pulsus tamen liber, æqualis, & respiratio non multum impedita; hinc in medicamentis nil mutatum est.

Hoc modo ægri perrexerunt sensim se melius habere, ac undecimo die morbi ab omni febre liberi erant. Continuarunt tamen uti pulvere expectorante usque ad diem decimum quartum, quo & expectoratio & tussis desierunt.

Hi ægri sat brevi vires recuperaverunt.

Tertius vero a vesicante nullum levamen habuit, & septimo morbi die inter magnas angustias fato cessit, cum per 12. horas de nullo dolore signum dedisset. In cadavere inventa est pars pleuræ in dextro thorace, ubi perceptus fuerat dolor, ad imperialis fere magnitudinem gangrænosa, pulmo quoque ejusdem lateris hinc inde filamentis pleuræ accreverat sanguine infarctus.

Fuere etiam plures pleuritici, qui statim primo vel secundo die sputa mucosa ejecerunt.

Eadem tamen medendi methodus adhibita fuit, cum hac differentia, quod tam copiosa sanguinis extractione non indiguerint.

Plerumque enim post primam venæ sectionem symptomata ita lenia facta sunt, ut in detrimentum ægri secunda administrata fuisset.

Vidi enim sæpius, dum per solas venæ sectiones integra doloris ablatio (id quod eo modo sæpe fieri nequit) tentatur, ægros ita debilitari, ut morbo succumbant, vel saltem nonnisi difficillime evadant.

Hinc dum dolorem post V. S. ita vidi minutum, ut respirationem parum læderet, & ægri sine magno dolore tussirent, ac sputa ejicerent, de ulteriori M. S. non cogitavi.

Quando pulsus liberior & æqualior deprehendebatur, licet adhuc duriusculus esset, copioso potu & medicamentis emollientibus, aperitivis, antiphlogisticis facile dolor superabatur, externe simul applicatis cataplasmatibus emollientibus.

Sæpius sic post 12. vel 24. horas dolor desit, ac pulsus sensim mollitiem naturalem acquisivit.

Si accidit, ut dolor lenitus, vel jam sedatus recrudesceret, repetita venæ sectio juvabat.

In omnibus his ægris circa quintum vel septimum diem sputa cocta prodierunt, quorum ejectio dum difficilior erat & vires sufficiebant pulvere N. 15. simul cum decocto N. 1. alternatim sumpto juvabatur : si vero debiliores

erant ægri, & nullam in pulsu duri-
tiem habebant, præter pulverem N. 15.
dedi claretum, quod maxime conduce-
bat illis, qui os amariuscule habebant.

Solis sputis nullus curatus est, omnes enim circa septimum & nonum diem morbi alvum criticam pluries deposuerunt, qua tussis multo rarior fiebat.

Undecimo morbi die omnes & a febre & a tussi liberi erant, ac brevi vires recuperarunt.

Unicus ex his ægris habuit die septimo & octavo urinas cum sedimento albo, levi, sat copioso: reliqui habuerunt urinas initio rubras, sub finem morbi naturales, ac fere semper nube-
cula in fundo conspiciebatur.

His, qui circa vesperras tussi frequentissima defatigabantur, nec somnum capere poterant, profuit unc. 1. Syr. diacod. cui sæpius aliquot gtt. laudan. liq. syd. addebantur: raro per diem indigebant paregoricis.

Puellam 25. annorum die pleuritidis quinto pro ratione morbi sat bene habentem invisit mater, & triste nuncium illi attulit, unde morbi facies ita mutata est, ut sexto die febris esset valde aucta, dolor acutus lateris continuus,

tussis frequens, difficilis, sicca, cutis sicca; urina erat aquosa, alvoque per 30. horas caruerat, ægra quoque continuo delirans subinde lachrymabatur, & noctem egerat insomnem.

Vena sanguis mittebatur ad unc. VIII. brevi crusta tenui phlogistica rectus, ac enema emolliens injiciebatur, & præter decoctum N. 1. cum nitri dr. j. β, ter eo die unc. j. Syr. diacod. assumpsit, unde sensim dolor & reliqua symptomata remiserunt, & noctem pacatam habuit. Mane erat animi compos, pulsus liber & major deprehendebatur, atque penitus desierat lateris dolor. Tussi aliquid mucosi ejiciebat, cutis erat mollis, humescens ac urina subrubra nubeculam fundum petentem gerebat.

Hunc diem ut & octavum sine mutatione transegit, & noctu somno plurimum horarum sine paregorico refecta est, alvus quoque omni die adfuit levans.

Nono die ante meridiem respiratio facta est difficilior, ac sub tussi stertor in pectore audiebatur, sputa pauca admodum glutinosa ejiciebantur; pulsus erat inæqualis, mollis, debilis; lingua alba, humida tamen, oculi tristes, humidi; leniter sudabat, ac urina sedi-

mentum copiosum, mucosum deposuerat.

Applicata sunt furis bina vesicantia, ac cum priori decocto pulv. N. 15. usa est.

Noctu multum sudavit; parum dormivit, ac mane dum accessi, inveni totum collum, & pectus præcipue circa scrobiculum cordis miliaribus albis obstitum, sputa facilius prodibant, respiratio libera pleno thorace peragebatur; pulsus erat plenior, æqualior, oculi vividiores: post meridiem ultra bihorium tranquille dormivit.

Nox sat tranquilla fuit.

Undecimo die prostantibus pulcherrime miliaribus sputum paucum coctum facile ejecit ægra, ac alvum bis deposuit pultaceam, coctam.

Duodecimo die tussis rara erat, sputa pauca, respiratio bona; febris vix animadvertēbatur; miliaria opacabantur, ægra facile sola in lecto sedebat; & decimo quinto morbi die desquamatis miliaribus nihil de morbo supererat, ac rogabat ægra, ut ipsi liceret extra lectum manere. Vigesima sexta ab initio morbi die ex nosocomio sanissima discessit.

Qui febre acuta simplici laborarunt

methodo mense præcedenti dicta facile curati sunt.

Binæ vero aliæ feminæ morbo exanthematico laborarunt.

Prima in morbum inciderat post comestam copiosam carnem suillam sale dudum conditam & exsiccatam. Eadem enim die anxia facta fuit, frequenti horripilatione correpta est, corpus grave factum, & præ calore vix noctu in lecto jacere potuit, sequenti die accessit capitis dolor, oris amaror, nausea.

Accersitus Medicus ilico sanguinis missionem jussit, & emeticum, quo se multum levatam fuisse ægra afferebat, præscripsit.

Pro medicamento usa est speciebus decocti pectoralis, & pulvere antispasmodico, donec 6. morbi die ad nostrum nosocomium deferretur.

Dum ipsam primo vidi, respiratio erat celeris, brevis, pulsus celer, inæqualis, sat magnus, alvo a biduo carebat, appetitus erat nullus, & sitis magna, urina prodibat fuscescens cum enæoremate copioso, suspenso, oculi erant tristes, & ægra soporosa vix per aliquot momenta se erectam in lecto sustinere poterat.

Data est ipsi mixtura N^o. 12. ac

commendavi ut copiose potaret. Enema quoque injectum multa scybala dura eduxit.

Nox inquieta fuit.

Septimo morbi die minus soporosa erat, alvus liquida, flava sponte prodiit; urina subrubra nubeculam in fundo gerebat, respiratio profundior erat. Cæterum reliqua in eodem statu permanebant ac die præcedenti.

Noctu sat pacate variis intervallis per plures horas dormivit.

Octavus dies fere similis fuit septimo, ac nihil in medicamentis mutatum est. Cum tamen abdomen tensum esset, & alvus emaneret, circa vespertas enema injectum multis flatibus viam aperuit, & alvum bis movit semi-coctam.

Nox fuit minus tranquilla.

Nono die circa septimam matutinam valde anxia facta est; pulsus evasit parvus, mollis, subinde intermittens; sudabat, urina erat subfusca cum enæo-remate crasso, subfusco, facies livecebat: oculi turbidi & tristes erant: ægra delirabat, difficilis erat linguæ usus.

Bina furis vesicantia & unum nuchæ applicata sunt, ac loco mixt. N. 12. emulso N. 17. usa est, simul copiosus potus ipsi propinabatur.

Circa quintam pomeridianam videbatur respiratio paulo facilior, pulsus erat major, linguæ usus non tam difficilis.

Noctu tamen, licet ultra unc. j. Syriacod. vespere sumpserit, parum admodum dormivit, ac circa quintam matutinam omnia iterum in pejus ruerunt. Dum vero circa octavam accessi, ægram melius spirantem inveni ac die præcedenti, pulsus quoque major erat, & vesicantia optime operata erant. Ægra sat apte ad interrogata respondebat, magnamque sitim, licet crusta linguam tegens humesceret, conquerebatur.

Dedi simul cum emulso mixt. N. 14. ut uno bihorio unc. j. β. ex hac sumeret, & altero bihorio solitam dosin emulsi.

Dies infomnis transactus est, noctu quoque parum dormivit, leni sudore maduit, ac alvum semel deposuit.

Undecimo die mane, inveni copiosa miliaria alba, collum & pectus obsidentia multaue hinc inde per abdomen dispersa, ægra mente sibi constabat, respiratio pleniore pectore ac minus celeriter peragebatur, pulsus erat æqualis, major; facies & oculi colore magis naturales.

Repetita est mixt. N. 14. & emulso claretum N. 8. substitui.

Ab hac die omnia sensim ita in melius mutata sunt, ut decima quarta morbi die, dum miliaria jam inciperent desquamari, pulsus naturalis esset, respiratio liberrima, appetitus bonus, alvus & urina naturales, & ægra sat diu in lecto sedere posset.

Continuavit tamen iisdem medicamentis uti ad diem morbi decimum septimum, quo vires ita increverant, ut posset extra lectum manere, rogaveritque ut major ipsi ciborum copia concederetur.

Post diem morbi vigesimum assumpta prius rhei. dr. j. carnes licuit concedere, ac die vigesimo sexto recusavit diutius inter ægros commorari.

Altera, quæ exanthematibus affecta fuit, femina erat 30. annorum, quæ licet sanguinei temperamenti esset, fluxum tamen sanguinis menstrui parcissimum semper habuerat. Hæc postquam per plures dies membra lassa vix trahere potuisset, 5. Augusti valde nauseavit, ac demum pluries sponte vomuit, & incepit febricitare: die hujus mensis 6. ad nosocomium delata est.

Pulsus erat plenus, mollis, celer,

respiratio paulo celerior naturali ; tempora ipsi admodum dolorifica erant ; lingua crusta alba humida obducebatur ; oris magnus amaror ; nausæ continuæ & præcordiorum anxietas ægram valde torquebant ; cutis erat mollis , & urina rubedine paulisper naturalem excedebat ; instituebatur venæ sectio , & data circa meridiem ypecacuanhæ dr. β. quater vomitum excitavit , quo multa , glutinosa , foetida , ejecta sunt magno cum præcordiorum levamine.

Pro medicamento habuit mixt. N. 19. ac vespere assumpta unc. j. fyr. diacod. noctem sat tranquillam egit.

Sequenti die nihil mutatum inveni.

Quarto morbi die febris eadem erat , & licet respiratio vix impedita videretur , conquerebatur circa præcordia anxietatem & pondus , ac subinde tussicula sicca vexabatur : cutis manebat mollis ; oris amaror disparuerat , lingua sicca erat , alvum sponte liquidam deposuerat ; in urina nulla mutatio facta erat.

Dedi tunc pro medicamento decoctum N. 1. , noctu non dormivit.

Quinto die , pulsus celeritas aucta est , reliqua vero eadem permanebant , subinde per diem levem somnum habuit , quem nox sat tranquilla secuta est.

Sequentibus diebus ad decimam tertiam morbi diem usque omnia in eodem fere statu permanferunt, nec tamen multum debilitari videbatur.

Verum decimo tertio morbi die obtusum in artubus dolorem conquesta est; capitis dolor auctus erat, & pulsus subinde inæqualis, respiratio minus profunda peragebatur, tussis sicca ipsam sæpius invadebat, sitis major erat, ac lingua tenui crusta, flava tegebatur, alvus omni die liquida aderat, urina rubra, cruda, & cutis sicca erant.

Decocto N. 1. emuls. N. 17. substitui, & syr. diacod. cochleare omni quarto horio sumpsit, noctem tamen insomnem transegit.

Decimo quarto morbi die respiratio parva, celeris, anxiosa erat, & pulsus debilis, inæqualis, facies & oculi tristitiam exprimebant; ægra delirabat, urina fere naturalis erat, cutis mollis, lingua vero sicca.

Suris applicata sunt bina vesicantia, & noctu ultra bihorium dormivit.

Sequenti die mane pulsus magis elevatus, æqualior fuit, respiratio minus laboriosa.

Post meridiem aliquantulum sudavit, ægra inquieta fuit, noctem in sudore

moderato transegit, & 16. morbi dies fere eodem modo transacta fuit.

Decima septima morbi die hinc inde miliares pustulæ in collo & pectore conspiciebantur. Tussicula minus frequens erat, alvum semel deposuerat semicoctam, & urina nubeculam fundum petentem gerebat.

Pluries per diem sat pacate dormivit, noctemque sat quietam habuit.

Decimo octavo morbi die copiosis miliaribus parvis scatebant collum, pectus & brachia; pulsus erat æqualis, minus celer; respiratio libera; tussis nulla; anxietas disparuerat & delirium; lingua humescebat.

Emulso N. 17. claretum N. 8. substitui, quo usa est ægra usque ad diem morbi vigesimum tertium, quo & exanthemata disparuerunt & omnia ad statum naturalem redierunt: brevi vires recuperavit, & sanissima ad suos rediit undecima Septembris.





MENSIS SEPTEMBER.

QUI hoc mense acute decubuerunt , fere omnes febre continua remittente laborarunt.

Antequam febricitare inciperent per plures dies prostrato appetitu , & virium debilitatione affecti fuerunt ; sæpius frigeant , succedenti calori adjungebatur anxietas , sitis magna , oris amaror , nausea ; capite dolebant , & brevi , in aliquibus accedebat delirium ; urina erat valde rubra sine enæoremate.

Secundo die febris erat lenior , & reliqua symptomata leviora.

Tertio die sine percepta refrigeratione febris exacerbabatur ; quarto die cum leni sudore , non diu durante , iterum remissura.

His ægris , si statim ab initio non sumpserunt vomitorium secundo vel tertio morbi die alvus torminosa , foetida , quater , quinquiesve nychthemeri spatio accidit , illos multum debilitans : quibus vero emeticum statim primo die datum est , hoc symptomate liberi manserunt.

Hinc cura emetico erat incipienda : dum tamen alvi fluxus jam aderat , nihil amplius proderat , imo alvus frequentior , & dolores majores in abdomine inde excitabantur.

Unico ex his ægris , qui pulsum valde plenum habebat , & feroci delirio afficiebatur , vena secta fuit ; non autem reliquis cum pulsum nec durum , nec nimis plenum haberent.

Illis , qui alvo fluxa debilitante non laborarunt , optime profuit rob. N. 4. Illo enim remanens post vomitum oris amaror , & nausea , plerumque intra 24. horas disparuit , & sitis moderatior facta est. More tamen nobis in acutis solito copiose potare debuerunt.

Hoc medicamento usi sunt ad diem morbi quintum , donec tertia exacerbatio remitteret : fere quotidie alvum deposuerunt liquidam , semi-coctam ; urina vero cruda mansit : omni die aliquoties somno unius , vel alterius horæ refecti sunt ægri , & excepto exacerbationis tempore , quo difficilius spirabant , & anxii erant , pectus sat liberum mansit.

Defervescente tertia exacerbatione quibusdam mixt. c. spir. sulphuris , aliis tantum claret. N. 9. exhibui.

Suasum enim perill. ac Magnifici Do-

mini *Storck* in febribus tertianis hanc mixturam.

℞. Aq. flor. rhæad. unc. ij.

spir. sulph. percamp. dr. β.

fyr. diacod. dr. vj.

ægris febris tertiana nullo alio symptomate stipata laborantibus aliquot horas ante futurum paroxysmum exhibueram uno haustu sumendam, ac plures hoc medicamento a febre liberati sunt. Aliquando binæ doses suffecerunt ad febrim penitus tollendam: quandoque etiam tertia dosis necessaria fuit.

Hac observatione ductus in hac febre continua remittente, cujus exacerbationes typum tertianæ servabant, cum nec magnæ obstructions in corpore esse viderentur, experiri volui, quid spiritus sulphuris per camph. efficeret.

Inde factum est, ut exacerbatio die septima contingens in plerisque lenior quoad omnia symptomata fuerit. Bini vero tussi sat molesta in paroxysmo affecti sunt. Verum omisso spirit. sulph. decoct. N. 1. sumpserunt, unde tussis brevi sedabatur.

Quinta autem exacerbatio hos binos ita debilitavit, ut metus fuerit, ne alia accedens illos occideret: hinc præter decoctum N. 1. mixt. N. 14. ipsis exhibita

bita fuit, qua sequens paroxysmus multum lenitus, postea non amplius redivit.

Finita ergo sexta exacerbatione, quæ die 11. contigit, morbus erat febris acuta, simplex, quam ægri facile ferebant; cæterum in excretis nullum signum criseos apparebat: cutis tamen mollis erat; diutius dormiebant, & libero pectore respiratio peragebatur; pulsus erat mollis, sat æqualis, nec debilis.

Continuarunt ægri mixt. N. 14. uti ad diem 14. usque, in eodem fere statu permanentes.

Decimo quarto morbi die ambo copiose per plures horas sudarunt, unde unus perfecte apyretos factus est; alter vero multo minus febricitavit, & simul urinam misit, quæ brevi sedimentum album, copiosum, leve deposuit.

Loco mixt. N. 14. sola mixt. N. 12. usus est, appetebat, nulla sitis aderat, optime dormiebat, & circa 17. morbi diem oborto leni sudore, depositaque pluries alvo copiosa cocta integre iudicatus est.

Qui spir. sulph. ferre potuerunt, leviores paroxysmos experti sunt. Sed quia ob recurrentes exacerbationes sensim debiliores fiebant, mixt. N. 14. illis exhi-

bui , quæ sequentem paroxysmum omnino præcavit.

Circa duodecimum morbi diem , ut & 13. sæpius sudarunt , ægri cum levamine tanto , ut 14. pulsus tantum paulo majori celeritate peccaret. Quoad reliqua symptomata bene habuerunt ægri , & 15. morbi die nullum febris indicium adfuit.

Omnes hi ægri sat cito vires recuperarunt.

Qui omisso in initio morbi emetico ad nosocomium deferebantur , jam alvo foetida , frequenti , torminosa laborantes majus negotium nobis facesserunt.

Unus tertio morbi die hoc modo affectus allatus , alii vero duo die quarto : verum omnes iisdem fere symptomatibus afficiebantur.

Respiratio erat celeris , pulsus celer , inæqualis ; vires debiles , continuo delirabant ; vix per horæ quadrantem dormire poterant , licet in somnum propenderent , visus erat debilis , lingua nigra , sicca ; sitis insatiabilis , & appetitus omnino prostratus ; cutis sicca , aspera.

Dedi illis clar. N. 8. cui addebatur mucilag. gum. trag. dr. iij. & emulsum

N. 5. alternis vicibus sumenda, ac simul bis de die enema ex solo oleo lini injectum est.

Hac methodo ille, qui tertio morbi die advenerat, intra 24. horas a diarrhæa liberatus fuit. Ast accedentem die 5. exacerbationem valde difficulter tulit. Videbatur enim omni momento suffocandus, & pulsus inæqualis sæpe intermittebat.

Alii duo, quibus diarrhæa integre nondum potuerat sisti, præterquam quod pessimam respirationem, & pulsum valde malum haberent, simul subsultibus tendinum adficiiebantur.

Omnibus vesicantia ad furas applicata sunt, ac pro medicamento data est binis ultimis mixt. N. 14. cui laudan. liq. Syd. gtt. XXX. addebantur, & emulsum N. 17. alternis vicibus omnis sesqui hora sumenda, alter vero sola mixt. N. 14. usus est.

Exacerbatio ultra 8. horas in suo vigore permansit, antequam remitteret, & ægri parum admodum noctu dormierunt; nullus tamen noctu amplius purgatus est.

Sexto die morbi ablata sunt vesicantia, quæ in omnibus optime operata erant; binus minus delirabant, respira-

tionem majorem , & liberiores habebant , pulsus major erat , non intermittens , ac assatim decoct. hordei hauriebant , & unus illorum , qui antea tempore paroxysmi tendinum subsultibus vexatus fuerat , ab his quoque liber deprehendebatur , cutis tamen manebat in omnibus sicca , & in urina subfusca enæorema ejusdem coloris dispersum erat.

Tertius sublimis spirabat , pulsus debilem , parvum , inæqualem habebat , urinam in lectum dimittebat , & omnino sui ignarus potum , & medicamenta , quæ ipsi ingerebantur , vix deglutiēbat , ac manus continuo tremore agitabantur.

Huic terna vesicantia unum ad nu-
cham , altera ad brachia applicata sunt ,
omissum est laudanum , quod mixt.
N. 14. ob alvum symptomaticam addi-
tum erat.

Sub vesperam pulsus paulo major , &
fortior factus est , ac ultra horam dor-
mivit , multo melius spirans , subsultu
tamen tendinum etiam in somno afficie-
batur. Noctu alvum adhuc in lectum di-
misit , & aliquoties per breve temporis
spatium somno captus est.

Septimo morbi die potum , & medi-

camenta melius assumebat, respiratio paulo profundior peragebatur, & pulsus erat major, minus inæqualis, vesicantia in magnas bullas cutim elevarant sero plenas.

In eodem statu fere toto die permansit æger, donec vespere inceperit tumere parotis dextra; nox valde mala fuit.

Sequenti die mane dum accessi, æger nec minimum deglutire poterat, inspectæ fauces, imo ipsa lingua, tumidæ admodum erant, livescebant.

Parotis ad pugni magnitudinem elevata, erat, oculi lachrymosi, respiratio sublimis, celeris, & pulsus frequenter intermittens, ac æger supine jacebat immobilis, factæ sunt injectiones ex antiseptis, abstergentibus in fauces, cataplasma emolliens parotidi applicatum est, ac circum collum emplastrum vesicans.

Ob magnam debilitatem enemata purgantia dare non ausi sumus, enema tamen emolliens injectum est, quo bis alvum habuit; verum nihil juvit, & circa meridiem suffocatus periit.

Alii duo noctem sexti diei ad septimum sat bene transegerunt, per plures

enim horas placide dormierunt , & mane aberat delirium , pulsus videbatur minus debilis , respiratio erat sat libera , lingua humescebat , & cutis minus aspera deprehendebatur , ambo alvum deposuerunt fuscescentem , pul-
taceam.

Unus circa decimam matutinam , alter post meridiem incepit pejus habere , lene delirium iterum accessit , respiratio evasit laboriosior , & pulsus debilis , celerior , per vices intermittebat : hæc autem per tres , vel quatuor horas tantum durarunt , quibus elapsis ægri in somnum brevem inciderunt , & toto corpore ultra horam leniter sudarunt , unde se quoad omnia levatos perceperunt , & noctu quoque per intervalla dormierunt.

Die octavo pulsus adhuc celer erat , verum nulla intermissio , & vix aliqua inæqualitas in illo percipi poterat , respiratio libera erat , & urina naturalem imitabatur , cutis continuo humescebat. Nulla amplius exacerbatio accessit , sed sudore sensim magis levati sunt ægri , alvum quotidie coctam dimiserunt , leviora alimenta libenter assumebant , sitis non erat magna , ac sæpius diu , noctuque somno reficiebantur.

Decimo quarto morbi die penitus
desiit febris. •

Erant autem valde emaciati, & vires
adhuc tam parvæ erant, ut se soli ex-
tra lectum sustinere nequirent. Hinc
præter juscula, & alia levia alimenta
uterque lactis lib. j. β. cum anatica de-
coct. hord. quantitate quotidie hau-
riendam acceperunt, ac cort. peruv.
unc. β. omni die continuarunt ad diem
morbi 24, assumere. Tunc, cum in cu-
biculo facile deambulant rhei dr. j.
assumpserunt, unde aliquoties purgati
carnibus tenerioribus vesci potuerunt,
& brevi post ex nosocomio discessere.



MENSIS OCTOBER.

MULTI quoque hoc mense febre
continua remittente laborarunt, quidam
omni die exacerbationes patiebantur,
alii vero omni altero die.

Quidam etiam ante augmentum ca-
loris perfrigerabantur, alii minime.

Qui quotidianas exacerbationes ha-
bebant, tussi sicca, non frequenti, res-
piratione celeri, difficili afficiebantur,
pulsus erat celer, subdurus, lingua ari-

da, sitis magna, appetitus nullus, cutis sicca.

Sub exacerbatione, quæ plerumque per 5, vel 6. horas durabat, fiebant anxii, tussis sicca valde frequens erat, & defatigans, & de dolore in variis pectoris partibus conquerebantur, caput illis valde dolebat, facies rubore tingebatur, & oculi flavescebant; pulsus celeritatem, & duritiem majorem habebat, & illi, quibus ante exacerbationem sanguis non fuerat eductus, tempore paroxysmi delirabant.

Hinc fere omnibus tunc hoc modo affectis sanguis e vena eductus est sat magna quantitate, diversus in diversis subjectis: in multis enim crustam phlogisticam habebat, in aliis sanguis erat optimi coloris, siccus tamen, & paucam admodum aquam dimittens.

Optime omnibus conducebant medicamenta solventia, antiphlogistica, & lenia paregorica ad tussim leniendam.

Quarto die plures urinam miserunt, quæ brevi sedimentum album, leve deposuit, & in his exacerbationes sequentes minus graves fuerunt, pulsus mollis, respiratio facilior, minus dolens fuit, alvus omni die semel liquida, cutis humida facta est, capitis tamen

dolor gravis, & sitis magna, pondus in ventriculo conquerebantur.

Hoc viso sal. polychr. dr. j. simul cum decoct. N. 1. omni die exhibita fuit.

In eodem fere statu manserunt ad diem septimum usque, quo alvo frequenti, pultacea, flava a febre continua liberati sunt omnes, imo bini nullum amplius febris intermittens paroxysmum passi sunt, & brevi vires integras recuperarunt.

Sed reliquos omni die per quinque, vel sex horas sat validus paroxysmus occupabat, cum tamen præter febrim nullum malum symptoma adesset, de ea tollenda non multum fui sollicitus, & pro medicamento solam conserv. N. 25. assumpserunt.

Hoc modo intra aliquot dies in aliquibus febris sponte desiit: ubi autem ultra 12. diem protracta non minuebatur, vel validior fiebat, mixt. N. 14. illis data est, qua febris facile fugabatur, & ægri solis postea alimentis aptis resecti sunt.

Quibus quarto die urina rubra sine sedimento fuit, in iis morbus valde increvit, pulsus durior, contractus, inæqualis factus est, respiratio celeris, anxia:

tussicula sicca, & capitis dolor præcipue exacerbationis tempore ægros acerbissime affliciebat.

His hoc die sanguis iterato educi debuit, qui brevi crusta inflammatoria tenaci, non tamen adeo densa tegebatur: pro medicamentis præter decoctum N. 1. cui addita era nitri dr. j. β , emulsum N. 3. sumpserunt, simulque ad alvum, quæ emanebat, ciendam enema injectum est.

His adhibitis levamen habuerunt quoad omnia symptomata, & aliqui sat pacatum somnum post enematis operationem habuerunt: nox quoque sequens sat tranquilla fuit.

Dies quintus sat bonus fuit, exacerbatio multo lenior fuit, quam die præcedenti, & extra eam respiratio non erat valde impedita; pulsus sat plenus, liber; tussis rarior, sicca tamen permanens, dolor capitis, & oculorum minor; in urina nubecula ad fundum cadens conspiciebatur.

Iis, quibus alvus sponte non secessit, denuo enema injici curavi.

Manferunt ægri in eodem fere statu iisdem medicamentis utentes ad finem octavi diei, vel initium noni, quo oborto copioso sudore, & prodeunte

urina brevi sedimentum copiosum album deponente admodum levati sunt.

Posthac enim respiratio libera, tussis nulla, & pulsus licet celer admodum tamen liber erat: capitis gravitas disparuerat, oculi fere naturalem colorem habebant, lingua minus sicca erat, ac vix postea exacerbationes passi sunt.

Solum tunc decoctum N. 1. sine nitro datum est, subinde interpolata dosi emuls. N. 2. & ægri morbum facile tulerunt, cutis humida mansit, & alvus fere quotidie sponte adfuit, noctu pacate dormierunt.

Circa decimum quartum morbi diem sudarunt iterum per totum corpus, & si simul alvum pluries habuerunt, penitus judicati sunt.

Unicus sudavit sine ulla facta per alvum evacuatione, & hic post sudorem debiliior factus est, pulsus parvus inæqualis fuit, accessit dolor capitis, obtusus, & oculi tumebant, manibus tremebat, respiratio tamen non multum læsa, & lingua humida erat. Exacerbatio cujus à nono die vix signum adfuerat, prægresso per quadrantem horæ frigore ægrum ultra sex horas valde anxium reddidit, durante quoque exa-

cerbatione pulsus valde celer, & inæqualis erat, ac æger delirabat.

Finivit paroxysmum paucus sudor, post quem æger mentis compos factus est, & facile spiravit: verum pulsus mansit malus, & vires valde collapsæ erant.

Data est ægro mixt. in qua extract. cort. peruv. dr. v. solutæ erant, ut eam divisis dosibus ante decimam matutinam decimi quinti diei absumeret, & bina vesicantia suris applicata sunt: laudan. quoque liq. Syd. gtt. xij. ad somnum, quem capere non poterat, conciliandum, vespere ipsi datæ sunt: nox tamen inquieta fuit.

Decimo quinto die licet vesicantia optime operata essent, & pulsus magis elevatus, æger videbatur æque debilis: alvum tamen sponte deposuerat: & urina omni dote naturalem imitabatur.

Frigus circa decimam non rediit, & toto die vix mutatio in ægro animadversa est.

Sumpsit tunc emuls. N. 17. & mixt. N. 14. alternatim omni bihorio, & bina alia vesicantia brachiis applicata sunt: vespere laud. liq. Syd. gtt. xv.

ipsi datæ sunt : unde noctu per plures horas dormivit.

Decimo sexto die mane pulsus erat paulo major, & urina iterum naturalis. Post meridiem accessit anxietas, & celerius spirabat, subinde tussitabat, delirando lachrymabatur, & vix ad interrogata respondens in dorsum immobilis decumbebat; cutis erat sicca; iisdem tamen petrexit medicamentis uti, & noctem insomnis transegit, leni sudore perfusus.

Decima septima morbi die, dum ægrum invisi, illum inveni miliaribus albis pulcherrime pellucetibus; non modo pectus, sed etiam abdomen occupantibus copiosis scatentem; tremor manuum aberat, mente optime valebat, ac de debilitate tantum conquerebatur: pulsus erat liber, æqualis, vix febrilis, respiratio bona, tussis nulla, oculi erant vivaces, sitis pauca, & æger juscula, & similia levia alimenta libenter sumebat.

Continuavit mixt. N. 14. uti & loco emuls. N. 17. clareto N. 8. usus est; æger sine paregorico noctes tranquillas habuit, & 23 morbi die, quæ miliaria nullo amplius superstitie morbi vestigio desquamata erant, omni me-

dicamento abstinuit, ac 34. ab initio morbi die viribus valens ad suos rediit.

Quibus vero febris lenior facta est secundo morbi die, & tertio die post horripilationem exacerbata fuit, ii non tussiebant, verum continuo nauseabant, os amarum conquerebantur, lingua crusta tenui, fusca tegebatur, & valde sitiebant: verum potus, sicut & alimenta ipsis amara videbantur: alvus sine enemate primis diebus non secedebat: urina erat rubra, in aliis nubeculam suspensam gerens, in aliis enæoremate carens, pulsus erat subinde inæqualis, celer, respiratio sat bona, dolor vero capitis continuus.

Tempore exacerbationis respiratio erat difficilior, celerior, & reliqua omnia pejora fiebant, imo delirabant: exacerbatio autem ultra 12. horas durabat, qua finiente ægri sensim mentis compotes fiebant, & respiratio, & pulsus meliores.

Qui emeticum statim initio morbi assumpserant, vix capite dolebant, & brevi post nausea, & oris amaror disperebant, ac sequens exacerbatio præcedentem vehementia symptomatum non superabat.

Illis vero, quibus emeticum non

datum est, vel qui recusarunt illud assumere, exacerbationes diuturnitate, symptomatum vehementia semper increverunt, quorum tempore valde delirabant, continuis vomendi conatibus defatigabantur, ac valde inquieti jacebant.

Quocunque tamen die datum emeticum semper profuit, hinc ubi ægros hoc modo affectos vidi, prima cura fuit, ut quamprimum fieri posset ypecacuanhæ dr. β. fumerent. Unde pluries vomuerunt varia indigesta, glutine tenaci variis coloris intermixta.

Peracta vomitione lene paregoricum exhibebatur.

Omnibus profuit post vomitum mixt. N. 14. quæ cum copioso decocti hordei, & bardanæ oxymelle simplici mixti potu brevi omnem amarorem, & nauseam sustulit. Quibusdam etiam loco hujus mixturæ datum est rob. N. 4. Et alvus, dum sponte non cessit, & abdomen tensum deprehendebatur, enemate omni altero die sollicitata est.

His medicamentis utentes ægri 4. primas exacerbationes bene tulerunt; verum post quartam urina, quæ semper sat bona fuerat, fiebat fusca, & brevi enæorema crassum sublime in illa cons-

piciebatur, pulius fiebat multo debili-
 or, mollis, inæqualis, ac vires mul-
 tum collabebantur, & tristes fiebant
 ægri.

Omnibus bene perpenſis nihil contra
 indicans cortici inveni, ac illis ideo
 mixt. N. 14 exhibui, qua utentes ægri
 poſt morbi diem undecimum ab omni
 exacerbatione liberi fuerunt, & circa
 decimum quartum morbi diem ſudore
 copioſo oborto, ac ultra 24 horas ſæ-
 pius repetente penitus judicati ſunt.

Continuarunt tamen uſque ad diem
 vigefimum mediam doſim prioris mixt.
 aſſumere, ac poſtea aptis alimentis
 brevi vires recuperarunt. Unus, qui
 diutius corticem aſſumere recuſaverat,
 die vegiſimo primo morbi febre inter-
 mittente tertiana correptus eſt.



MENSIS NOVEMBER.

FERE iidem morbi obſervati ſunt, ac
 menſe præcedenti, & methodo eadem
 fere omnes curati ſunt.





MENSIS DECEMBER.

NON multi hoc mense acute in nosocomio decubuerunt; adfuere tamen septem, qui graviter affecti fuerunt.

Hi ægri per plures dies, antequam in morbum inciderent, lassitudine spontanea, appetitu deleto laborarunt, & noctes inquietas habuerunt. Hæc symptomata excepit frigus, tremor, quæ capitis dolor, & anxietas comitabatur; successit demum calor urens. Sex initio morbi, nempe secundo, vel tertio die ad nosocomium allati sunt, alter serius, de quo postea.

Hi sex, qui statim ad nos delati sunt, habebant calorem magnum, pulsum parvum debilem, & inæqualem, respirationem tantum naturali paulo celebriorem, linguam crusta tenui, nigra obductam, aridam, sitim magnam, appetitum nullum, cutim siccam, oculos tristes, urina erat flammea, quibusdam alvus bis, ter de die sponte deponebatur foetidissima; omnes ad omnia indifferentes, & debilissimi vix ad interrogata respondebant. Statim ab initio

42 *De Morbis acutis.*

claretum N. 8. & mixt. N. 14. alternis horis sumenda ipsis præscripsi.

Nihilominus his medicamentis sive secundo, sive tertio die inceperint uti, permanferunt fere in eodem statu ad diem morbi sextum, quo continuo quasi sopore sepulti videbantur; potus, & medicamenta non nisi magna cum labore ipsis ingerebantur; sed & alvum tunc in lectum foetentem admodum dimittebant, & urina admixtis ægris in vitrum quandoque missa, ex flammea in subfulcam, enæorema crassam, fundum petens, gerentem mutabatur; reliqua omnia symptomata manebant eadem, & oculi livescabant. Suis, ac nuchæ vesicantia applicata sunt, & sequenti die sopor in quibusdam minor, & oculi clatiores erant, ac oblata quæque melius assumebant. In aliis vero nulla mutatio. Dedi tum loco clareti emulsum N. 17. cum mixt. N. 14. quibus effectum est, ut pulsus æqualior; paulo major fieret, & oculi decimo die nitorem fere naturalē haberent; manebat tamen in somnum propensio.

Die undecimo circa vesperam bini inceperunt tussitare.

Tertius sine tussi magis anxius erat.

Quartus vero incepit subito ronchos.

edere, & die duodecimo mane mortuus est.

Bini alii in eodem statu permanserunt.

Illis, quibus tussis molesta erat præter dicta medicamenta, syr. diacod. & althææ aa. partes æquales dedi, ut subinde parvum cochlear sumerent. Illi vero, qui anxietate sine tussi premebatur, duo vesicantia brachiis applicata sunt, in aliis nihil mutavi.

De nocte tres priores parum sudarunt, & urina in omnibus fere naturalis coloris erat, tussis, & anxietas fere eadem: noctem tamen sequentem somnus aliquot horarum sat pacatam reddidit.

Decimo tertio die cum prioribus symptomatibus luctabantur, donec circa initium decimi quarti in binis tussientibus petechiæ rubræ, in altero autem miliaria alba in collo, & pectore cum omnium symptomatum levamine eruperint: etenim tussis rara erat, anxietas multum imminuta, pulsus major, æqualis, lingua humida, oculi clariores & ægri minus soporosi ad interrogata apte respondebant.

Loco emulsi N. 17. dedi claretum

N. 8. & mixturam N. 14. continuarunt sumere.

Qui miliaria habebat, alvum deposuit sat copiosam, coctam: bini vero, quibus erant petechiæ, nullam dejectionem per alvum habuerunt, nec tamen aliquid incommodi inde exurgebat, abdomen enim erat molle, minime tensum.

Decimo septimo petechiæ jam flavescens incipiebant disparere, ac simul cum illis febris, & reliqua symptomata minuebantur, & vigesima die de omnibus his nihil omnino supererat.

Ille autem, qui miliaribus laborabat, decimo septimo mane magis febricitabat, & nova miliaria prioribus jam siccescentibus proruperunt, incepit quoque tussire, & sputa tenacia difficulter ejicere: tum claret. N. 8. cui addita erat mucilag. gum. trag. unc. β , & pulv. N. 15. exhibui.

Noctu dormivit quidem, sed tantum per intervalla, nam tussis sæpius a somno excitabatur, & sputa copiosa tunc facilius, quam de die prodeuntia ejiciebat cum quodam levamine.

Postea nulla amplius facta mutatio, ad vigesimam morbi diem usque, qua tussis rarissima evasit, & sputis semper

prodeuntibus glutinosis, & paucis, miliaria in squamas abibant, reliquis omnibus symptomatis integre disparentibus.

Vigesimo quarto nihil quidem de morbo supererat, sed æger, qui antea torosus, nunc debilitatus, & multum emaciatus erat.

Abstinent tunc omni medicamento, & lac cum potu ordinario, ac jusculum cum cremore hordei quater, vel quinque de die sumpsit, quibus intra quinque dies ita refectus est, ut surgere, & sat diu extra lectum manere potuerit & 32. ab initio morbi die, cum viribus utcumque valeret, assumpta dr. j. rhei aliquoties purgatus est, unde appetitus ita excitatus, ut sequenti die parum carnis cum aliis levioribus alimentis ipsi concedi debuerit: postea, aucta sensim alimentorum copia, prius robur acquisivit, & quadragesima ab initio morbi die ex nosocomio discessit.

Qui autem petechiis laborarant, brevi vires recuperavere, & citius nosocomio vale dixerunt. Bini vero alii, quibus nec petechiæ, nec miliaria proruperunt, decimo quarto die magis soporosi facti sunt, & oculos tristissimos vix aliquando aperientes nullum verbum proferebant: habebant auditum gravissi-

mum, & alvum valde foetidam continuabant in lectum dimittere, os non nisi magno custodis molimine aperiebant, dum vero illud semel aperuerant, quæcunque celeriter deglutiebant.

His duo vesicantia eodem die brachiis applicata sunt, & prioribus medicamentis continuarentur uti.

De nocte inquieti fuerunt, se hinc inde continuo jactitarunt: attamen circa quartam matutinam unus ultra horam dormivit, & evigilans audiebat, loquebatur, & potum, ac medicamenta avide assumebat, pulsus erat plenior, liberior, sopor evanuerat, & alvum tota nocte non deposuerat.

Alter qui non dormiverat, etiam audiebat, sed difficulter ad interrogata respondebat, & licet animi compos esset, alvus pluries in lectum effluxerat: pulsus celer, inæqualis erat, cum manuum tremore, & magna debilitate.

Data sunt ipsi laudan. liq. Syd. gtt. xv. absque effectu: claretum vero, cui mucilag. gum. tragant. dr. iij. & boli armen. unc. β , laudan. liq. Syd. gtt. xxx. addebantur, de quo omnibihorio unc. j. sumpsit cum interpolata subinde dosi emulsi camph. adeo profuit, ut nocte sequenti somno plurimum

horarum captus non dimiserit alvum in lectum, & semel tantum in excipulum deposuerit, ac hæc erat spissior, minus foetens.

Die decimo sexto pulsus erat æqualior, minus debilis, respiratio sat bona, ac alvus pultacea flavescent, & urina circa meridiem missa, post quatuor horas sedimentum copiosum, glutinosum, album deponebat: nox fuit tranquilla.

Decimo septimo mane totum corpus sudore madebat; in urina noctu missa enæorema fundum petens, tertiamque vasis partem occupans conspiciebatur, respiratio optima, lingua humida, pulsus major, mollis, undulosus, & oculi colore naturales erant.

Solo tunc clareto N. 8. usus est, & decimo octavo, ac decimo nono morbi die pluries adhuc sudavit, noctes tranquillas habuit, ac vigesimo die nihil amplius de morbo superfuit, & viribus postea sensim bona diæta intra duodecim dies restitutis sanus ad suos rediit.

Alter vero, qui die 15. levamen habuerat, sine ulla sensibili evacuatione facta die 17. a morbo liber fuit, & citius nosocomio exivit.

Septimus dum ad nos deferebatur, jam petechiis copiosissimis, aliis rubris,

aliis etiam livescantibus, affectus erat ; habebat pulsum rythmo , & tempore inæqualem , non tamen debilem , magnam sitim , linguam siccam , tremulam cum continuo delirio , & dolore totius corporis. Sequens medicamentum datum est :

R. Aq. decocti hord. libr. j.

Spirit. Sulph. per camp. dr. j.

Syr. althææ unc. j. β.

M. S. omni trihorio duo cochleria sumat.

Quamdiu antea ægrotaverit , scire non potui , sed secundo die , ex quo erat in nosocomio , prorumpabant miliaria alba , quibus sequenti die disparentibus , ægrotantis vires vehementer dejiciebantur , lingua fiebat magis sicca , nigra , fordida ; sitis major , pulsus celerior , debiliorque , & his subinde tussis sicca sese adjungebat.

Cum præcedenti mixturam datum est emulsum N. 17.

Quarto die miliaria confertissima iterum prostabant , atque tussis strepens orta est. Tunc vero claretum , & pulv. N. 15. ipsi data sunt ; sensim tamen incresebant symptomata , & die sexta copiosissimis miliaribus , simul cum petechiis prostantibus , respiratio celeris inæqualis ;

inæqualis , pulsus plane inordinatus evasit.

Duo vesicantia tunc furis applicata sunt.

Mansit in eodem statu ad undecimum usque diem , miliaria sensim in vesiculas admodum magnas attollebantur , alvus quotidie liquida , cruda egerebatur.

Undecimo die omnes petechiæ , & miliaria pro maxima parte disparuerunt : mox respiratio facta est anhelosa , facies ruberrima cum loquelæ defectu , & delirium increvit ; duo vesicantia denuo applicata sunt.

Decimo tertio numerosissima iterum miliaria prostabant : respiratio erat facilior , delirium minus , pulsus magis elevatus , constantior.

Verum sequenti nocte novies purgatus fuit , & omnino miliaria disparuerunt.

Tum respiratio iterum anhelosa , dolorifica , pulsus inordinatus , celerior evasit cum delirio majori , & summa anxietate , siti magna ; & lingua crusta , nigra , admodum crassa obducebatur ; verbo , omnia symptomata magis intendebantur.

Clareto , cui mucilag. gum. trag. unc. β & laudan. liq. svd. ser. j. addi-


Collin. Pars I. Tom. II. C

deram alternatim cum emulso N. 17. usus est, ac duo vesicantia femoribus applicata sunt.

Decimo quarto die quater adhuc purgatus est: sequenti nocte, quæ fuit inquietissima, sexies vomuit, nihil tamen in illa materia rejecta conspiciebatur præter medicamenta: & mane dum accessi, toto corpore miliaribus confertissimis rursus scatebat, atque tunc respiratio facilior, delirium multo minus; facillime loquebatur, pulsus plenior, non adeo febrilis; sitis non magna erat, nec facies adeo rubra: solo tunc clareto usus est.

Sequenti die lingua mundabatur, delirium aderat nullum, bene dormiverat, & decimo septimo miliaria incipiebant desquamari, nihilque conquerebatur æger. Sumpsit adhuc per aliquot dies claretum, & vigesimo tertio, quo apud nos decumbebat, die, e lecto surrexit, & 36. nosocomio exivit bene valens.





MENSIS JANUARIUS.

PLEURITIS hoc mense frequentior fuit, quam quicunque alius morbus acutus; verum ad hujus curationem nihil peculiare requirebatur, & methodo antea mense Augusto dicta fere omnes evaserunt.

Una tantum fuit femina, quæ aliter curari debuit.

Hæc administratis venæ sectionibus, & medicamentis antiphlogisticis die quarto multum levare videbatur. Etenim dolor lateris multo minor, respiratio facilior, pulsus liberior erat. Urina sedimentum album leve deposuerat, & per plures horas noctu dormiverat, ita ut omnia fausta sperarem.

Die quinto in eodem statu permansit.

Verum die sexto præter omnem expectationem ejus facies horrendum in modum tumore duro, rubro, renitente occupabatur, & labiis eodem modo tumentibus vix ipsi liquida ingeri poterant, oculique sub tanto tumore ita reconditi erant, ut ne digitis quidem

aperiri potuissent , pulsus erat magnus ; febris vehemens , respiratio cita , profunda , & ægra pedibus , manibusque ob nimium calorem lecti levia tegumenta removebat.

Sanguis tunc ex brachio detractus brevi in pellem coriaceam , densam concrevit , & alvus enemate bis sollicitata fuit.

Pro medicamento sumpsit decoct. tamarindorum : & externe applicabantur lintea quadruplicata fomento ex floribus sambuci parato , intincta , sæpius renovata.

Post meridiem facies paulisper concidit , labia facilius aperiebantur , febris minor , & respiratio aliquantulum melior erat.

Noctu pluries alvum egeffit , & parum dormivit.

Die septimo mane faciei tumor ita conciderat , ut jam oculos aperire posset ; tantum in genarum parte inferiore , & sub maxilla in utraque parte renitentia , & dolor permanebant ; respiratio bona , lingua humida , cutis mollis , febris admodum moderata erat , & vespere assumpta syr. diacod. unc. j. noctem sequentem habuit pacatam.

Die octavo adhuc paulisper febrici-

tabat , & tumor fere totus conciderat : hinc solo decocto N. 1. usa est.

Nocte sequenti bene dormivit , & die nono febris defierat , ac tumor maxima parte disparuerat , pars tantum supererat tumoris , ab angulo maxillæ dextræ ad mentum usque continuata , durissima , maxillæ adhærens , & vix dolens.

Applicata sunt fomenta solventia per sex dies sine ulla mutatione ; verum datis bis de die pilull. N. 11. gr. iv. extracti cicutæ , & emplastro ejusdem nominis externe applicato intra decem dies tumor penitus fusus disparuit : & ægra , quæ sub usu cicutæ cum bonis alimentis vires refecerat , paucis post diebus ad suos rediit.

Lara vesicantia pectoris loco dolenti applicata , multos quoque hoc mense ex orci faucibus eripuerunt.

Dum hæc ferre nolebant ægri , rube-faciens ex fermento panis , & seminibus sinapi , cui quandoque pulvis cantharidum pro ratione necessitatis inspergebatur , eodem cum effectu applicatum fuit.

Femina 36. annos nata sexto morbi die , ut aiebat , ad nos delata est : hæc habebat respirationem brevem , cele-

rem , & magnam pectoris anxietatem ; appetitus deletus erat , vires debiles , pulsus mollis , non valde celer , sitis non multa.

Datum est ipsi solum decoctum N. I.

Per quatuor dies in hoc statu fuit : die undecimo autem prorumpcebant miliaria alba , parva , quæ die sequenti copiosissima fuerunt : hæc tamen nullum levamen attulerunt : atque perstiterunt ad 18. morbi diem sine ulla symptomatum mutatione.

Decimo nono autem omnia miliaria disparuerunt , & ægram in magnum soporem , cum majori spirandi difficultate , & anxietate conjecerunt : pulsus erat debilior , & celerior.

Dedi tunc emulsum N. 17. & decoct. N. I.

Vigesimo secundo morbi die nova miliaria numerosissima prorupere : respiratio quamquam melior , multum tamen adhuc impedita erat ; pulsus vero liberior , & fortior ; sopor fere penitus disparuerat , anxietas fere eadem remansit.

Vigesimo quarto miliaria denuo disparuerunt pro maxima parte , & hæc diarrhæa excepit , quæ initio videbatur

levamen afferre. Verum spes, quam ex hac evacuatione conceperam, brevi excidebat: nam sequenti die vires dejiciebantur magis, respiratio laboriosa, & pulsus debilior erat cum majori siti, urina admodum rubra.

Cum emulsione N. 17. decoctum N. 8. exhibui, quo id obtinui, ut nocte sequenti tantum bis purgata fuerit, & die vigesimo sexto duo vesicantia furis applicata sunt.

Eodem die ad vesperam iterum incœperunt miliaria prorumpere, & die sequenti copiosissima prostabant: urina erat naturalis, ægrotaque tunc erat sine ullo sopore, respiratio fere naturalis, pulsus adhuc parum febrilis, sed plenior: disparuerat anxietas, & sitis, & placidissime interdum dormiebat.

Post quatuor dies hæc miliaria in squamas abiverunt, nihilque de morbo superfuit, & decem postea diebus elapsis sanissima discessit.



MENSIS FEBRUARIUS.

BINOS tantum hoc mense pleuriticōs habuimus, & hi facile curati sunt.

Adfuere autem octo alii, qui tussicula molesta torquebantur; præter spumam nil ejicere poterant; febricula in omnibus præsens, vespertino tempore augebatur; noctes erant inquietæ, cum continuo capitis dolore obtuso; & alimenta, licet appetitus utcunque vigeret, intendebant febrem, & ægros anxios reddebant, quocunque tempore assumerentur: alvus erat tarda.

Hos ægros decoctum emolliens magis anxios reddidit, nec tussim lenivit: infusa quoque ex herbis pectoralibus nullum levamen attulere.

Optime autem conducebat purgans N. 9, quo magna glutinis tenacis copia alvo educebatur.

Inde enim tussis minus frequens fiebat, anxietas minuebatur, & ægri facilius ferebant alimenta; febris tamen eodem modo pergebat.

Post purgationem conserv. N. 25. vel decoctum N. 19. sine spiritu exhibebatur. Sub his alvus quotidie bis, vel ter exonerabatur tanto cum levamine, ut vix ultra quatuor dies ab assumpto purgante tussicula duraverit; imo die nono sex ex illis à febre penitus liberi erant.

Binæ autem feminæ, eodem modo

affectedæ, licet a methodo dicta levamen habuerint, non tamen penitus convalescerunt.

Una ex his, cum sibi melius esse perciperet, nobis insciis domum rediit; verum elapsis quatuor diebus ad nos iterum deferrebat.

Habebat faciem tunc colore ex flavo viridescenti tinctam; adnatæ oculorum livescebant; artus superiores continuo tremore agitabantur, omnibus artubus, ac lumbis, & capite dolebat; respiratio erat celeris, frequens, pulsus parvus, celer, magna sitis, appetitus nullus: alvus liquida, foetida, & totius corporis debilitas.

In hoc statu dedi ipsi emulsum camphoratum, & vesicantia suris applicata sunt; simul copiose potabat ægra decoctum hordei, rad. bardan. & acetosæ.

Subinde per diem dormivit, sed nec tunc cessabant tremores, alvum ter dimisit in lectum.

Hinc vespere tum ut somnus pacatior fieret, tum etiam ut alvus debilitans sisteretur, data est unc. j. syr. diacod. cum gtt. v. laudan. liq. syd. quò quidem alvus sistebatur, ast nox nequaquam fiebat tranquillior.

Sequenti die, cum eadem indicatio adhuc esset, nil in medicamentis mutavi, respiratio, & pulsus videbantur parum liberiore.

Circa tertiam pomeridianam cum sudore, emerferunt petechiæ rubræ, per universum corpus numerosissimæ.

Sequenti die non amplius tremebat, nisi dum manus aliquid prehensura elevabat; nullum amplius dolorem conquerebatur; pulsus, & respiratio majores, æqualiores, & minus celeres erant, alvus nulla; urina erat naturalis: verum inter petechias rubras, plures vibices livescentes conspiciebantur. Hinc licet ab exanthematibus manifestum levamen conspicerem; metui tamen, ne forte adhuc aliquid corrupti in massa sanguinea latitans illam denuo corrumpere, aut etiam ne deposita ad cutim materia morbosa forte retrocedens idem efficeret.

Hinc ut naturæ vires fervarentur, & contra corruptionem munirentur humores; præter claretum N. 8. præscripsi.

℞. Aq. flor. rhæad. unc. vj.
extract. cort. peruv. dr. v.
vin. boni austriac. unc. ij.
fyr. diacod. unc. j. ℞.

M. ut uno bihorio duo cochlearia hujus mixt. sumeret, altero bihorio clareto uteretur.

Commendavique, ut semper copiose potaret.

Noctu sat bene dormivit sine paregorico.

Die decimo tertio petechiarum livefcentium numerus minor erat, nox quoque sequens pacata fuit.

Decimus quartus dies fuit decimo tertio similis, nisi quod alvus bis prodierit sponte, & levans, & parum noctu sudaverit ægra.

Die 15. adhuc minor erat petechiarum numerus, & quæ supererant, pallebant.

Nox fuit optima, & alvum coctam fere naturalem deposuit.

Die decimo sexto penitus disparuerant petechiæ; respiratio naturalis erat, & pulsus tantum debilitate peccabat; continuavit adhuc eadem medicamenta per sex dies; appetitus viguit, vires cito redierunt, & dato die 27. purgante ex rheo, carnes ipsi concessæ sunt, & brevi nosocomio exivit.

Altera, autem femina, quæ quoque omnibus, quæ videbantur indicari, adhibitis a febre catharrali non potuerat cu-

rari, die 13 mensis, cum jam nonum diem in nosocomio ageret, incepit valde acute decumbere.

Pulsus erat celerior, fortis, respiratio cita, tussis valde frequens sicca, defatigans, lingua arida, nigra, sitis magna, urina subfuca, cutis sicca.

Instituebatur venæ sectio, & dabatur decoctum N. 1. cui nit. dr. j. β. addebatur; noctu per intervalla dormivit: sequenti die vesperti major accessit anxietas, nox fuit inquietissima.

Tertio ab exacerbatione morbi die abdomen utcumque tensum erat, & vagos ibidem dolores conquerebatur, qui injecto enemate, cujus ope magna fecum copia & multi flatus prodire,, penitus cessarunt.

Post meridiem pacatum somnum habuit, alacrior fuit, & noctem quoque bonam transegit. Sputa pauca glutinosa, tunc tussi incepit ejicere.

Ut expectoratio facilius redderetur, præter decoctum N. 1. pulvis N. 15. ipsi datus est, unde sputa quidem facilius prodierunt, reliqua autem manserunt immutata.

Nox inquieta fuit, & ægra per intervalla deliravit.

Die totius morbi 13. mane prægresso

magno cutis pruritu per totum corpus leniter sudavit, pulsus liberior evasit, & tussis faciliior; sed de pondere in ventriculo conquerebatur.

Alvus enemate denuo moveri debuit.

Die 14. urina erat cruda, magis rubra, & pulsus videbatur debilior.

Noctem quiete admodum transegit.

Die 15. respiratio erat multo difficiliior, anxietas major, tussis frequens, expectoratio fere nulla, pulsus inæqualis, debilis, urina minus rubra sine sedimento, & alvus sponte egesta, solito magis foetebat. Interim multum potabat, & levia alimenta utcumque assumebat.

In hoc statu furis, & brachiis vesicantia applicata sunt, ac pro medicamento emullum N. 17. assumpsit.

Circa vespèram multo melius spirabat, & pulsus major, æqualior erat, omni momento autem se hinc inde jactitabat.

Hinc ut noctu pacatior esset, vespere fyr. diacod. unc. j. cui additæ erant laudan. liquid. Syd. gtt. v. assumpsit bono cum effectu: siquidem blando plurium horarum somno resecta est, & die 16. tranquillior fuit: anxietas

tamen & tussis æque, ac antea illam torserunt.

Urina circa vesperam sedimentum album glutinosum deposuit: nox fuit in-somnis usque ad quartam matutinam; post quartam vero eruperunt miliaria alba numerosissima in collo, abdomine, & pectore, imo his brachia obsita erant.

Facta hac eruptione tussis facillima, & minus frequens fuit, respiratio tamen adhuc naturali paulo celerior, pulsus erat sat plenus, liber; sub decimam matutinam alvum deposuit pultaceam, flavam, & urina coloris fere naturalis nubeculam in fundo gerebat.

Tunc loco emulsi N. 17. claretum N. 8. ipsi præscripsi.

Exinde nihil novi in ipsa, accidit ad diem vigesimum usque: noctes fuerunt pacatæ, febris moderata, subinde tamen superveniebat tussis.

Die vigesimo primo autem, dum miliaria incipiebant in squamas abire, tussis fuit frequentior, defatigans, sicca; dedi ergo clareti loco decoctum N. 1. ac simul unc. j. syr. diacod. vespere sumpsit.

Noctu per plures horas dormivit;

mane tussis erat humidior, & subinde sputa pauca glutinosa ejiciebantur.

22. Sputa erant cocta, facilia, respiratio bona; & vix febris indicium animadvertebatur.

Continuavit decocto N. 1. uti ad diem morbi 28. qua tussis disparuerat, ægra optime habente. Hinc ab omni medicamento abstinuit, & brevi vires recuperavit.



MENSIS MARTIUS.

IN morbis acutis hoc mense nihil peculiare observavi; duo tantum fuerunt, quorum historiam dabo; femina nempe una, quæ diu cum febre intermittente luctata demum incepit delirare, ita ut sæpissime e lecto exsiliret, & custodibus, aliisque adstantibus varia minaretur. In hoc statu ut maniaca ex alio nosocomio dimissa, ad nos adducta est.

Hæc erat torosa: facies, & oculi videbantur sani, dum vero ad illam accedere volui, manibus me fortiter repulit, ac ultro minas adjecit: blandis tamen verbis furorem lenire potui, ac dein illam examinavi.

Lingua erat humida, & coloris naturalis; respiratio bona, pulsus plenus, minime celer, color tamen faciei naturali magis ruber: alvum a triduo non deposuerat.

Præter enema, & mixt. N. 10. nihil exhibui.

Circa quartam pomeridianam incœpit soporosa fieri, respiratio erat difficilis, in pulsu autem præter plenitudinem nihil animadvertebatur: venam secari jussi; unde symptomata levata sunt.

Sequenti die mane missa urina rubra erat, ægra minus ferociter delirabat, & vix videbatur febricitare, pulsus tamen æque plenus erat, ac die præcedenti; hinc vena iterum secta fuit, & sanguis detractus spissus erat; pulsus tunc febrilis evasit, & ægra sensim animi compos facta post meridiem in priorem soporem collapsa est, qui sequenti die mane disparuerat, & post meridiem denuo accessit cum majori spirandi difficultate.

Enema denuo injectum est, & sequenti die emulso N. 3. & mixtura N. 14. usæ est.

Inde vero magis anxia fiebat, & febris, quæ matutino tempore moderata esse solebat, validior fuit, ac vespere

ita increvit, ut, ægra huic ferendæ impari visa, venæ sectio rursus instituta fuerit: post hanc ægra levamen habuit: abstinuit tunc a cortice, ac solo decocto N. 1. cui addita erat nitri dr. j. β. usa est, simul cum copioso decocto hordei, bardanæ &c. noctu per plures horas dormivit, & sequenti die exacerbatio multo minor fuit.

Continuavit ægra solo hoc decocto uti per quatuor dies, redibat tamen quotidie exacerbatio illam semper magis debilitans: hinc cum nihil corticem veta- ret, denuo præscripsi mixturam N. 14. optimo cum successu, illam enim bene tulit, & tertio die post, paroxysmus pomeridianus emanfit, remanente tamen febre continua, quæ die 13 quo in nosocomio decumbibat, alvo, & sudore per totum corpus æquabili abortō, penitus sublata est. Sumpsit adhuc per aliquot dies corticem peruvianum, & facito vires recuperavit.

Alter erat juvenis 20. annorum, qui jam diu domi ægrotaverat, antequam ad nos deferretur: dolebat toto corpore, pulsus erat celer, parvus, quandoque intermittens: magna debilitas, dolor capitis cum pondere gravativo ventri-

culi aderat, amaritudo oris, nausea, & sitis.

Data est statim dosis ypecacuanhæ : qua materia tantum mucosa rejecta est.

Postea aliquot laudani liquid. Syd. gtt. exhibitæ sunt, & decoctum N. 1.

Die secundo, a quo in nosocomio erat, habuit hæmorrhagiam narium, quæ capitis dolorem multum lenivit : manebant iidem dolores, pulsus celeritas aucta erat : neque levamen doloris capitis constans fuit ; nam sequenti die eadem cum vehementia redibat, ac pulsus multo celerior, & debilior erat, somnus nullus ; & continuus sudor tunc ægrum debilitabat.

Tum data fuit mixtura N. 12.

Quarto die cessavit sudor, sed reliqua manserunt, atque per biduum nulla ulterior mutatio facta est.

Die septimo autem capitis dolor erat multo minor, pulsus magis elevatus, nec adeo celer, & vires meliores videbantur.

Nocte vero sequenti iterum sudor exortus est, qui ægrum multum debilitavit.

Die 9. tussis admodum frequens, sicca orta est ; pulsus tum æqualior erat, non multum febrilis : dolores, quos initio

conquerebatur, disparuerant, & alvum bis deposuit liquidam: urina erat fere naturalis.

Datum est tunc decoctum N. 6.

Hoc in statu fuit adhuc per quatuor dies, sine ulla mutatione, subinde dormiebat, sed minus tranquille.

Decimo quarto autem pectore valde anxius erat: auditus erat gravis, & tussis frequentior somnum omnino turbabat.

Dedi decoctum N. 1. & subinde syr. diacodii.

Sequenti nocte novies purgatus est sine ullo levamine.

Die 15. sputa pauca, spumosa magno cum labore ejiciebat: pulsus erat valde acceleratus, & debilis, magna sitis, subsultus tendinum cum levi mentis alienatione, & majori pectoris opprefione.

Simul cum præcedenti decocto datum est emulsum N. 17.

Circa meridiem quædam miliaria alba proruperunt in pectore, quibus die sequenti disparentibus respiratio celeris, brevis evasit, & tussis aucta est.

Die 17. alvum iterum ter deposuit liquidam, crudam: idem die 18. evenit.

Tunc præter alia medicamenta bis per diem syr. diacod. unc. j. sumpsit.

Die vigesimo miliaria copiosa eruperunt in collo, pectore, abdomine: ter adhuc alvum deposuit crudam: urina quoque cruda erat, respiratio fere naturalis: subsultus tendinum cessaverant, pulsus magis elevatus erat, sputa facilius prodibant, & æger mente sibi constabat.

Dedi loco emulsi N. 17. claret. N. 8.

Die 22. urina rubra gerebat enæorema dispersum, atque sic se habuit æger. ad 24. usque diem, quo miliaria omnia disparuere: tum tussis frequentior, & sputa iterum spumosa evaserunt: respiratio brevis, & celerior cum majori pectoris oppressione, ac pulsus valde celer, & auditus gravissimus erat.

Data est mistura N. 13. & emulsum N. 3.

Inde pulsus paulo major factus est.

26. Pulsus erat iterum æque febrilis, & debilior, omnia alia symptomata erant eadem.

Duo vesicantia furis applicata sunt.

Verum hæc, licet optime operata fuerint, nihil juverunt, & die 28. sum-

me soporosus factus est : pulsus erat valde debilis , omnino inordinatus ; sputa parum majori copia , tenacia ejiciebantur : lingua erat humida , sed nigra , sordida.

Alternatim sumpsit pulv. N. 15. & mixt. N. 13. & tria vesicantia adhuc applicata sunt.

Die 30. sputa cocta magno cum labore ejiciebat : præcedenti nocte sudaverat , sudorem tamen nullum secutum est levamen.

Continuavit iisdem medicamentis uti.

Sequenti die alvus continuo in lectum effluebat , & omnia symptomata aucta sunt cum tanta virium prostratione , ut brevi moriturus videretur æger.

Dedi ipsi mixtur. quæ ad aquæ unc. viij. extract. cortic. peruv. dr. v. & laud. liq. syd. dr. β. continebat , ut alternatim cum dosi emuls. N. 17. cui boli armen. unc. β. addita erat , duo cochlearia sumeret omni altero bihorio , ac bina vesicantia de novo applicata sunt.

Sub his sistebatur alvus tam feliciter , ut nocte sequenti semel tantum dimissa fuerit in lectum , & die 32. miliaria confertissima , alba in collo , pectore , abdomine , & brachiis proruperunt , quæ paucarum horarum spatio maxima

symptomata depulerunt : sopor , & anxietas penitus disparuerant ; respiratio erat facilis , pulsus liberrimus , debilis tamen , oculi vivaces , urina naturalis , tussis nulla.

Sequenti nocte optime dormivit : post quatuor dies in squamas abiverunt miliaria nullo amplius superstite symptomate , appetitus erat bonus , ac aptis alimentis , vires sensim restauratæ sunt.

Verum cum duriores cibi ipsi recusarentur , furtim ab amicis varia fercula acquisivit , quæ avide abligurivit , & in dysenteriam incidit nulla arte sedandam , quæ trium dierum spatio miserum ita exhaustit , ut fato functus fuerit.



MENSIS APRILIS.

MULTI hoc mense acute decubuerunt.

Incipiebat in plerisque morbus cum horripilatione frequenti , ingenti virium prostratione aliquando per binos dies durante , donec accederet anxietas , calor magnus , sitis magna , & dolor fere universus per totum corpus.

Pulsus erat in omnibus celer, minime durus; cutis sicca, lingua arida, plerumque fusca: oculi dolebant.

Febris in multis primis diebus circa vespertas exacerbabatur, quo tempore dolor capitis, & oculorum, ac tussicula sicca, quandoque etiam delirium se reliquis symptomatibus adjungebant. Illi quoque, qui cibis duris, & difficile digerendis soliti erant ali, nauseabant, & magis tussiebant. Permanebant hæc nova symptomata in quibusdam per 7. vel 8. horas, in aliis autem diutius.

Hi ægri statim ab initio decoct. N. 1. pro medicamento habuerunt, & copiose potarunt.

Venæ sectioni locus non fuit, pulsus enim nec plenus, nec durus deprehendebatur. Pluribus hoc modo intra 4. vel 5. dies cutis humescebat, ac simul disparuit omnis dolor, ac exacerbationes vespertinæ; verum tussis mansit sicca: plerumque ad septimum diem usque, quo incepere sputa tenacia, glutinosa prodire, quæ ubi difficilia erant, pulv. N. 15. vel conf. N. 16. ægris porrigebatur, unde expectoratio multo facilior reddebatur, & ægri, & a febre, & a tussi brevi liberi fiebant.

Illis vero, qui nauseas patiebantur,

methòdus dicta nullo modo profuit; licet enim magnam diluentium, & involventium copiam sumerent, augebatur omnidie anxietas, & nausea, & valde debilitabantur.

Hinc ubi nihil contra indicabat, lene vomitorium exhibendum fuit, quo eiciebatur materia variegata, glutine tenaci mixta cum magno ægrorum levamine.

Quibus vero aliquid vomitum prohibebat, dedi rob. N. 4. cui pulveris folior. alexandr. dr. ij. addebantur: unde mota pluries alvo ægri quoque levabantur, licet tardius, & minus commode.

Sic expurgatis primis viis anxietas multo minor fuit, & tussis moderata, ac loco decocti N. 1. sumpserunt rob. N. 4. & infus. hæder. terrestr. veron., quibus utentes ægri primis diebus videbantur melius habere: verum plerumque circa quintum morbi diem pulsus fiebat debilis, inæqualis, respiratio celeris cum anxietate præcordiorum, cuti sicca, & mentis alienatione.

Emulsum ipsis N. 17. exhibui, ac præterea furis vesicantia applicata sunt: vespere vero unc. 1. syr. diacod. assumpserunt,

sumpserunt, undē nox satis pacata sequebatur.

Sexto die pulsus erat fortior, minus inæqualis, respiratio liberior, in reliquis vix mutatio aderat.

Iisdem medicamentis usi sunt ægri ad diem nonum, quo in binis prægresso copioso sudore miliaria alba circa collum, pectus, & abdomen copiosa prodierunt, cum levamine omnium symptomatum: etenim respiratio erat libera, febris multum imminuta, & ægri mentis compotes erant, ac nocte sequenti somno protracto reficiente gavisi sunt. Loco emulsi N. 17. clar. N. 8. exhibui.

Die 14. miliaria in squamas abierunt, ac febris in uno penitus desiit, nil mali in corpore relicto, ac brevi vires recuperavit.

Alter autem, licet prostantibus exanthematibus optime spirasset, ac vix tussi affectus fuisset, incepit denuo difficile spirare, tussi sicca defatigari, ac febris, quæ ante lenis erat, exacerbata fuit.

Decoct. N. 1. copioso, ac aliquoties de die syr. diacod. sumpto tussis lenita est, ac circa 17. morbi diem prodeunte magna sputorum coctorum copia insigniter levatus est.

Vigesimo die febris penitus desiit :
continuarunt tamen sputa pauca per ali-
quot dies facile prodire , & æger brevi
convaleuit.

In his , qui exanthemata non habue-
runt , crisis varia via facta est : plerique
tamen oborto die 7. sudore , ac sæpius
repetito undecimo die a febre liberi
fuerunt.

Quidam & sudore , & alvo circa 14.
diem judicati sunt , & omnes , qui
hoc modo affecti fuere , feliciter curati
sunt.



MENSES MAIUS.

et **ET**

JUNIUS.

HISCE duobus mensibus febris continua
remittens cum exacerbationibus omni
alternis die recurrentibus multos pletho-
rici temperamenti tam viros quam fe-
minas affecit. Verum cum jam antea
dicta methodo ad illos curandos usus
fuerim , plura de illis dicere superfluum
foret.

Fuere etiam hisce mensibus in noso-

comio multi morbi inflammatorii, quos methodo jam ante dicta fere omnes curavi.

Allatæ sunt vero tres feminæ, quæ prægressa aliquorum dierum lassitudine ingentem calorem, & sitim habere incœperunt, donec demum sub finem primi diei, vel secundo die accesserit validissima cordis palpitatio.

Binæ tertio morbi die ad nosocomium delatæ sunt, jam instituta venæ sectione; verum pulsum adhuc plenum, durum, ac celerem admodum habuerunt, ac ideo utrique unc. x. sanguinis vena educatæ sunt, ac vespere cum omnia fere in eodem statu deprehenderentur, eadem sanguinis quantitaseducta fuit. Pro medicamento habuerunt rob. sambuc. cum nitro, & emuls. cum diacod.

Nox fuit inquieta, insomnis, ac sequenti die eadem in pulsu durities, & celeritas, anxietas, & cordis palpitatio eadem, urina flammea sine nubecula. Hinc iterum e vena mitti debuit sanguis qui æque phlogisticus erat, ac in prioribus venæ sectionibus. Hora tamen elapsa a venæ sectione remisit cordis palpitatio, pulsus minus durus apparuit, ac anxietas multum imminuta est:

post meridiem somno pacato ægræ re-
fectæ sunt, nox quoque sat tranquilla
fuit.

Quinto die cordis palpitatio erat lenis,
pulsus minus celer, & ad mollem acce-
dens; urina minus rubra nebeculam in
medio suspensam gerebat; sitis quoque
minuebatur.

Noctu per plures horas dormiverunt,
ac mane fere in eodem statu inveniebantur
ac die quinto. Post meridiem vero
incepit iterum cor valide, ac citissime
pulsare, anxietas magna erat, pulsus
debilis, inæqualis, & ægrarum vires
prostratæ. Hinc loco ulterioris venæ
sectionis vesicans sub mamma sinistra
applicui eo cum effectu, ut cessarent
palpitationes, & respiratio facta fuerit
libera, pulsus quoque liberior, æqua-
lior.

Diem 7. & 8. sat bene transegerunt,
ac die 9. exonerata pluries alvo bona
critica a febre liberatæ sunt, ultra bi-
nas hebdomadas finito morbo in nosoco-
mio eas retinui, ut se ex morbo confir-
marent.

Tertia ex his feminis statim secunda
die morbi ad nosocomium delata ter
repetita venæ sectione, & medicamen-
tis antiphlogisticis, copiose sumptis,

die quinta & a febre, & cordis palpitatione sine sensibili evacuatione liberata fuit.

Vir quoque 35. annorum torosus, & plethorici temperamenti ad nos delatus est jam secundo die ægrotans. Morbus cum valido frigore subito illum mane, dum surgere vellet, sine cognita causa corripiente inceperat.

Manerat illud frigus in suo vigore ultra semi-horam, dein sensim minutum calori urenti locum fecerat: accessit magna sitis, capitis dolor, delirium. Circa vesperras paulisper sudavit æger, & cessavit delirium: calor, & sitis minus vehementes factæ sunt, noctu tamen æger non potuit dormire.

Circa quartam matutinam incepit acutissimum dolorem in dextra dorsi parte, circiter sesqui pollicem infra axillam percipere: accessit quoque tussis, & difficilis respiratio. Hoc in statu ad nos deferabatur.

Pulsus habebat sat plenum, durum, valde celerem: unde ilico lib. i. sanguinis vena educebatur, brevi crusta densa, phlogistica tectus. Loco dolenti cataplasma emolliens applicatum est, omni bihorio renovandum: medicamen-

to illi fuit decoctum N. 1. cui nitri dr. j. ꝑ. addebatur.

Post venæ sectionem dolor paulisper minutus est, & pulsus durities minor videbatur, tussis faciliior erat: manebat tamen sicca.

Vespere præter decoct. N. 1. cum nitro mediam partem emuls. N. 3. haufit, ac noctu variis intervallis per 2. vel 3. horas dormivit.

Circa quartam matutinam tertiæ diei correptus est frigore, & totius corporis tremore; frigus verò, & tremor ultra horæ quadrantem non durarunt: postea calor auctus est, febris, & doloris acuties multum increverunt: ac dum accessi, inveni ægrum delirantem cum respiratione admodum celeri, interrupta subinde celeritate per inspirationem tribus, vel quatuor partitis inspiratiunculis peractam, tussis quoque frequens erat, & sicca: pulsus erat durus, inæqualis, lingua alba, sicca, & æger potum valde expectabat.

Hoc in statu venæ sectione eadem sanguinis quantitas, ac die præcedenti, educta est: erat sanguis æque phlogisticus. Respiratio post venæ sectionem major, liberior facta est, & pulsus minus inæqualis.

Cataplasmati emollienti, loco dolenti substitui fermentum panis cum seminibus sinapi, & pauco aceto: ac enemate emolliente alvus educebatur cocta.

Paroxysmus febris tertianæ circa meridiem deferbuit, ac æger per horam sudavit: finito sudore aberat delirium: respiratio inulto facilior erat, ac tussi subinde gluten paucum ejiciebatur: pulsus erat plenior, mollis, & dolor multum imminutus.

Noctu per plures horas dormivit.

Die morbi 4. respiratio non multum erat impedita, ac rubefaciens loco dolenti applicatum epidermidem in vesiculas elevaverat, & dolorem tantum obtusum tunc percipiebat æger: tussis erat rarior, & sputa semi-cocta sat facile prodibant: post meridiem bis alvum habuit pultaceam, flavam, & sub vesperras ultra bihorium dormivit, noctem quoque sat quiete transegit.

Quinto tamen die mane rediit paroxysmus febris intermittens: verum inde dolor moderatus, qui supererat, non fuit exacerbatus: abfuit delirium: respiratio sat libera mansit, celeritate tamen multum excedens tussis erat frequentior, magis sicca: pulsus quoque

celerior, subinde inæqualis, minus liber.

Quinques alvus cocta prodiit durante paroxysmo, qui circa vespertas copiosissimo sudore finitus est: abfuit tunc omnis dolor tussis, rara admodum facta est, & æger fere tota nocte dormivit.

Sexto die vix febris indicium in pulsu percipiebatur, & omnia pleuritidis symptomata aberant: in sudores autem valde pronus erat æger: ut solo assumpto iusculo totus maderet.

Hoc die pro medicamento solum emuls. N. 3. ipsi datum est: per diem non dormivit, verum noctem sat pacatam habuit.

Septimo morbi die mane cum leni frigore rediit paroxysmus febris intermittentis: verum nec dolor lateris, nec tussis inde recruderunt: pulsus, & respiratio sat libera manserunt: & vespere more solito copioso sudore desiit paroxysmus ægrum valde debilem relinquens. Cum vero nulla amplius prægressi morbi inflammatorii indicia conspicerentur, potuit cortex peruvianus exhiberi: hinc die octavo incepit omni bihorio unc. j. sumere sequentis mixturæ.

℞. Extract. cort. peruv. dr. v.

Cap. II. De Febr. intermit. 81
Aq. flor. rhæad. unc. vj.
Vin. bon. austriac. mont. unc. ij.
Syr. diacod. unc. j. β.
M.

Hoc die minus sudavit æger, noctu
ultra 5 horas dormivit, & die nono
paroxysmus vix sensibilis fuit: continua-
vit tamen in usu hujus mixturæ ad diem
14 quo cum optime valeret, omni me-
dicamento abstinuit, & sola bona dicta
utens brevi vires recuperavit.



C A P U T I I.

*Pauca de Febris intermittentibus
continens.*

MEDICAMENTIS in arte usitatis sat
facile curati sunt febribus intermitten-
tibus laborantes. Qui quotidiana tam
autumnali, quam vernali affecti sunt,
ab rob. N. 4. citius levati, & curati fue-
runt, quam ab aliis medicamentis. Ubi
pectus affectum erat tussi sicca, vel hu-
mida, solum decoct. N. 1. plures cu-
ravit.

Medicamenta salina, & confery. ex

Medicamenta salina, & confery. ex
D. 5

antiscorbuticis maximam tertianarum partem sustulerunt. Accidit tamen, ut cortex peruvianus dari debuerit.

Quatuor ægros tertiana laborantes sequenti mixtura curavi.

R. Spir. sulphur. p. camp. dr. β.

Aq. flor. rhæad. unc. ij.

Syr. diacod. dr. vj.

M. S. tribus horis ante tempus paroxysmi sumatur uno haustu: & de-
super decoctum hordei pro libitu
hauriat æger.

Quibus autem hoc medicamentum datur, debent habere corpus purum, ab omni instructione liberum, & pulmones bonos. Aliter sub paroxysmo oritur tussis, & febris vehementia augetur.

Debet repeti hæc dosis bis, vel ter, antequam paroxysmus emaneat.

Quartana febris nulli alteri medicamento melius cessit, quam continuo usui decocti N. 19. sæpe tamen post hoc debuit cortex peruvianus exhiberi.

Ubi respiratio extra paroxysmum, etiam difficilis erat in quartanis, multos curavi intra 7. 8, vel 9. dies, dando illis quater de die kermes mineral. gr. ij. super poro decocto hordei. radic. bardanæ, & aceros. cum oxymelle simplici.

Plures, qui kermes minerale non bene ferebant: infuso stipit. dulcamaræ

æque brevi temporis spatio curati sunt.


Tacere non possum casum feminæ in octavum mensem gravidæ, quæ 20 Januarii anni 1761. ad nos delata est.

Hæc jam ab anno febris laborabat, modo quartana, mox quotidiana, quæ subinde etiam in tertianam mutabatur: plures medicos consuluerat, & cortice peruviano jam sexies fugata fuerat febris; verum post paucos dies semper redibat, typum æque inconstantem servans, ac antea; postquam demum omnem substantiam in solvendis medicamentis consumpserat, ad nostrum nosocomium delata est, febris tunc tertianæ typum jam a 15. diebus servante.

Habebat respirationem valde laboriosam sine tussi, & circa tertiam pomeridianam ingruens tertianæ paroxysmus ægrum continuo videbatur trucidaturus: duravit ad sequentem diem mane, antequam deferbuisset.

Ob difficilem extra paroxysmum respirationem cortice peruviano jam toties incassum adhibito non licebat uti, unde infusum stipit. dulcamar. ipsi exhibui, quo sensum respiratio facilior facta est, & paroxysmus 22 Januarii ingruens multo lenior fuit: postea bis tantum denuo rediit, dein penitus emanfit: &

sub usu stipit. dulcamar. respiratio omni die ita emendata est, ut intra 10. dies liberrima fuerit, & brevi post domum rediit ab omni morbo libera. De febribus autem intermittentibus postea pluribus agam.



C A P U T I I I .

DE mira *Cicutæ* efficacia in difficillimis ac multis olim pro incurabilibus habitis morbis.

C A S U S P R I M U S .

MENSE Martio anni 1760. dum magnificus Archiater Antonius *Storck*, vir labore indefessus, & in determinandis medicamentorum viribus & efficacia in morbis curandis, animi perspicacia adeo felix, ægris nosocomii solus adhuc medicinam faceret: allata est femina 35. annorum jam in tertium mensem ascite laborans: tactu tunc præter aquam in abdomine nihil deprehendebatur, & ægra doloris experta erat.

Dedit ipsi magnificus vir ea, quæ evacuandis aquis idonea erant, quæ ego quoque, dum ipsi mense Aprili adjungerer eo cum effectu continuavi, ut initio Junii ab ascite omnino libera esset, & in functionibus læsio nulla animadverteretur: curato ascite in abdomine tumor durus circiter duorum pugnorum virilium magnitudine ex hypochondrio sinistro emergens, pollicem circiter infra cristam ossis ilii, dum sedebat ægra, extensus, in decubitu minus descendens, mobilis manui tangenti se obtulit: sumpsit ægra varia medicamenta solventia: verum nullo modo mutatus est tumor: unde omnia cum incassum adhiberentur, ad cicutam confugi, & 14 Julii ægræ extracti cicutæ gr. xij bis de die per triduum exhibui, ut viderem, an bene ferret: nihil autem inde mutabatur.

Hinc 17. incoepit scr. j. bis de die sumere: tantum levia alimenta ipsi exhibebantur, & monebatur, ne vel cibi titulo, vel potus, talia ingereret, quæ stimulo suo circulationem nimium excitarent, & acrimoniam in corpus inducerent.

Urina copiosa prodibat, & alvum liberam reddebat enema omni alterno

die injectum; erat enim per sex primos dies, quibus cicuta utebatur, valde adstricta. postea vero sponte omni die solvebatur: reliquæ autem functiones bonæ erant.

29. Circa vespertinam levem dolorem conquesta est in loco tumoris, & minus bene dormivit.

30. Dolor ille levis adhuc aderat, sed tumoris moles paulisper minui videbatur.

Sumpto leni purgante cessavit dolor, & somnus denuo optimus subsequutus est.

Perrexit in solita cicutæ dosi: quotidie semel, aliquando etiam bis de die alvum coctam mollem deponens, donec 11. Augusti ob appetitum prostratum dr. j. rhei electi in pulvere sumpsit, unde pluries purgata est cum appetitus emendatione: manifeste autem tum temporis tumor in omni dimensione minuebatur, quod & mecum observavit magnificus *Storck*.

Sub usu cicutæ continuato ita minus est tumor, ut 30. Augusti media sui parte disparuisset, & residuum multo mollius esset; facile sursum sub costas movebatur, dextro versus vero & sinistro minus facile.

Vires adeo bonas habebat ægra, ut veniam petierit ad solitos labores redeundi, promittens se ad me venturam & medicamentis usuram, donec residuum tumoris perfecte dispulsum esset.

Metuens autem ego, ne nimio corporis exercitio sibi noceret, in nosocomio illam retinui, & permisi, ut subinde in libero aere deambularet.

Itaque mensem Septembrem in nosocomio transegit, eadem cicutæ dos utens, ac omni octiduo haustu N. 1. purgata.

Ultima Septembris ægram mecum examinavit magnificus *Storck*, & cum nullum præteriti tumoris vestigium superesset, paucis post diebus licuit ipsi nosocomio discedere: dedi tamen ipsi unc. j. extracti cicutæ in pillul. gr. iv. redacti, ut bis de die N. 3. sumeret.

Mense Februario anni 1762. eandem ægram alio morbo laborantem in nosocomio curavi & abdomen diligentissime examinatum ubique æqualiter molle deprehendebatur.



CASUS SECUNDUS.

JUVENIS 25. annorum ob peripneumoniā, qua affectus erat, ad nosocomium 12. mensis Junii delatus, aptis remediis intra 9. dies morbo hoc liber fuit. Annum autem tumorem, durum, scirrhosum, ovi anserini mediocris magnitudine in latere colli sinistro, angulo maxillæ inferioris continuum, & usque ad posticam auris partem extensum gerebat, cujus curationem enixe optabat, quapropter illum in nosocomio retinui.

28. Junii incœpit cicuta uti, ac bis de die pilul. N. 3. gr. iv. sumpsit: externe vero toto die fovebatur tumor cicutæ decocto, noctu emplastro tegebatur ejusdem nominis.

4. Julii, nulla a dicta cicutæ dosi nec in tumore, nec in functionibus mutatione observata, incœpit bis per diem extracti cicutæ scr. j. sumere: vires optimas habebat, tantumque appetitum, ut loco carnis vitulinæ bubula ipsi concessa fuerit.

12. Calorem majorem & dolores lancinantes in tumore conquestus est:

pulsus utcunque febrilis deprehendebatur : carnibus abstinuit æger , & solis levioribus alimentis nutritus perrexit iisdem medicamentis uti.

13. & 14. Eadem continuarunt symptomata : nec tamen ulla mutatio vel in colore , vel in duritie tumoris adebat : sumpsit æger præter cicutam emulsum cum diacodio.

15. Omissa cicutæ , cum dolores majores essent , solo emulso usus est.

16. Die tumor rubebat , & in medio magis elevatus erat , dolores quoque in eodem fere statu remanebant : pulsus erat febrilis ; sitis utcunque magna ; appetitus sat bonus , alvus naturalis.

Febris , dolor , rubedo , & elevatio molis scirrhusæ nullum metum incusserunt : quin potius spem fecerunt brevi futuram in tumore suppurationem : cicutæ tamen abstinuit , cujus loco emulsis refrigerantibus usus est ad 19. Julii , qua cum febre careret , denuo incoepit eandem ac antea cicutæ dosin sumere : erat tunc tumoris apex livescens.

Dolores sensim minuti sunt , & æger omnes functiones optime peragebat , appetitusque ita increvit , ut præter alia alimenta facile digerenda , leviores

carnes ipsi sub finem Julii concedi debuerint.

4. Augusti aliqua fluctuatio in superiori tumoris parte aderat, & totus tumor suæ duritiæ multum amiserat; color in superiori parte livescens, manebat in ambitu naturalis.

Perrexit ut ante æger in usu cicutæ interno & externo, non multum dolens: sensim magis elevabatur tumoris apex, & moles dura quotidie magis magisque suppurando minuebatur.

11. Augusti sponte apertus est tumor, & magnam copiam puris tenuis, flavescentis, hinc inde striis nigris intermixti, subfoetidi fudit: hoc modo duæ tertiæ partes disparuerunt, remanente in ambitu circulo duro: parum autem admodum dolebat æger, & perrexit scr. j. extracti cicutæ bis de die sumere; tumor emplastro cicutæ continuo tectus, infuso cicutæ per diem diligenter fovebatur.

Omni die bis deligatus tumor pus dabat copiosum sat bonum.

Sub finem augusti suppuratione consumpta erat durities: cicuta tunc abstinuimus, & ulcus emplastro dyachylon cum gummatibus tegebatur: hoc mo-

do circa medium Septembris ulcus cicatrice obductum fuit, & paucis post diebus domum æger rediit sanus.

CASUS TERTIUS.

PUELLA 27. annorum jam a fœsqui anno genu dextrum tumidum & durum habebat; reliquæ erant arthritidis, quæ per tres hebdomadas laboraverat. Illius cruris usu ab eo tempore carebat: cæterum optima sanitate fruebatur.

Præmisso purgante, 4. Augusti dedi ipsi bis de die extractum cicutæ gr. xvj. & externe fomentum plantæ hujus applicabatur.

Octava augusti ter eandem dosin per diem sumpsit: sic continuavit sine ulla mutatione sensibili, licet quoque purgans omni octiduo sumeret, ad 24. ejusdem mensis: cæterum pergebat optime habere, & omnibus in nosocomio usitatis alimentis vesceretur.

Cum autem nullam in tumore mutationem animadverterem, dosin medicamenti auxi, ac quotidie dr. i. extracti cicutæ sumendam in mixtura exhibui.

5. Septembris speciem fornicationis

se in genu percipere aiebat : crus quoque , quod fere immobile hucusque fuerat , paulo melius movebatur ; tumor tamen nec mole , nec duritie mutatus erat.

10. Genu paulisper mollius apparebat , & cruris motus adhuc liberior erat.

Sub usu cicutæ tumoris moles & durities sensim minui postea manifeste conspiciebantur ; cum tamen circa 17 Septembris dolores in genu antea parvi intenderentur , purgans bis ipsi dedi , & interno cicutæ usu abstinuit per aliquot dies : postea vero , si bis purgans datum excipias , sine interruptione bis de die extracti cicutæ scr. i. sumpsit , usque ad 23 Octobris , qua illam cum magnifico *Storck* examinantes , vidimus tumorem disparuisse , crus facile in omnem partem moveri , minus tamen firmum , quam ut illi insistere posset ægra.

Applicatis autem per 15 dies fomentis ex herbis aromaticis paratis robur rediit , & ægra baculo adjuta per cubiculum ambulare potuit : 20 Novembris nosocomio exivit libero cruris usu gaudens. Ab eo tempore sæpius illam in plateis vidi optime valentem : toto tempore curæ functiones omnes optimæ permanserunt.

CASUS QUARTUS.

PUELLA 15 annorum catameniis nondum gavisa, anno 1760. sub finem Augusti ad nos delata est, jam in 11 mensem cruris dextri usu carens ob genu tumorem, qui sine cognita causa ortus sensim increverat, ita ut nunc fere duplo majus esset hoc genu quam alterum.

Crus paulisper retroflectere poterat, verum cum magno dolore: genu circumcirca durum erat & dolens. Purgans bis alterno die sumpsit ægra, & tertia Septembris incoepit cicuta uti.

Dabantur ipsi bis de die pilul. N. 111, gr. IV. & externe fomentum de cicuta applicabatur.

Septima septembris bis de die extract. cicutæ scr. i. sumere incoepit, & post paucos dies jam minui videbatur durities tumoris, qui 17 Septembris tertiam suæ molis partem amiserat, ac ad latus rotulæ internum pressus in latere externo cutim magis elevabat, manifesta que fluctuatio aderat: quæ ostendebat materiam antea spissam, tenacem, pro parte jam fusam esse.

Continuavit ægra cicuta interne & externe uti ad 24 Septembris, qua tumor ubique mollis in parte interna, ubi fluctuatio aderat, magis elevabatur.

Dedi tunc pulv. N. 10. quo optime purgata est cum doloris remissione. Idem pulv. post biduum repetitus est, dum externe foveretur continuo pars decocto cicutæ. Post triduum eundem pulverem sumpfit: verum licet hoc modo magna per alvum evacuatio fieret, nihil tamen in mole tumoris mutabatur.

Applicuit tunc externe Dominus *Haffner* fomentum ex herbis absynthii, marrubii, rutæ, &c. cum addito sale ammoniaco paratum. a 24 Septembris cicuta abstinuit.

5. Octobris adhuc semel purgans sumpfit, verum quamquam adhuc bene purgata sit, & fomentum illud solvens & discutiens diligentissime applicatum fuerit, mansit eadem tumoris moles & dolor in toto genu ortus est sat magnus.

Tumores lymphaticos cum successu sæpius aperuerat expertissimus Dominus *Haffner* curante magnifico Domino *Storck*; hinc cum spem non haberemus evacuandæ alia via materiæ, & metus esset, ne sensim acrior facta, omnia suc-

cessu temporis destrueret, aperturam tentandam esse conclusimus.

Ut tamen materies facilius per parvum foramen efflueret, cicutæ extracti. g. xvj. in pilulas redactis denuo bis de die per octo dies ab ægra sumptis, & fomento cicutæ diligenter externe applicato, quod forte in tumore adhuc nimis tenax supererat, attenuare conati fuimus.

Dolores continuarunt magni esse; minores tamen, quam dum cicuta abstinebat.

14. Ejusdem octobris expertissimus Dominus *Haffner* ad latus internum rotulæ, ubi major elevatio erat, parvam aperturam fecit, per quam magna copia materiæ partim tenuis, partim glutinosæ tenacis effluxit, unde genu valde collapsum est. Deligavit deinde sine turanda, applicato cicutæ emplastro & desuper fomento ejusdem plantæ.

Post paucos dies vulnusculum consolidatum erat, cum tamen hoc genu adhuc paulo majus mole esset, quam aliud, continuavit in — & externe cicuta uti ad 28 qua potuit sine baculo incedere, sensimque ita assuevit deambulationi, ut circa medium Novembris nosocomio egredi potuerit nullo superstite prioris mali indicio.

CASUS QUINTUS.

JUVENIS 17 annos natus, initio Augusti ad nosocomium deferebatur, pertinaci tussi, qua præter mucum tenuem nihil ejiciebatur, jam a 15 diebus laborans: gerebat præterea æger tumorem valde durum, ab angulo maxillæ sinistræ ad mentum fere usque sub maxillam extensum, magnæ molis: jam in tertium annum juveni molestus erat hic tumor, quem variis interne & externe applicatis medicamentis per fessum annum aggressus nullo modo mutaverat.

Primum curanda fuit tussis, quæ spatio trium hebdomadarum remediis cessit demulcentibus. Ablata tussi æger omni medicamento abstinuit per dies, quibus vires optimas acquisivit: quapropter ipsi roganti 6 Septembris cicutam exhibui.

Per 5. primos dies gr. xij. mane & totidem vesperi sumpsit, unde appetitus multum acuebatur. Diurno tempore tumor decocto diligenter fovebatur, noctu vero emplastrum decocti vices præstabat.

Ab

Ab 11. ad 16. diem Septembris pilul. IV. gr. IV. bis de die sumpfit : quo tempore nulla mutatione in tumore observata , & dato 17. purgante N. 10. 18. bis de die pilul. vj. gr. IV. sumendas exhibui.

His per 4. dies usus incoepit formicationem in tumore percipere : continuavit tamen eandem cicutæ dosin sumere per 6. alios dies , quo tempore formicatio in dolorem lenitèr urentem mutata est. Cæterum omnes functiones bonæ erant , & quotidie semel vel bis alvus deponebatur cocta , pultacea : tumor sub angulo maxillæ paulisper elevabatur , ac tactu elasticus , minus durus deprehendebatur.

Continuavit æger ad 7 Octobris eadem cicutæ dosi uti , qua die febricitavit , dolor multum auctus erat : tumor in omni ambitu major , minus renitens , & sub angulo maxillæ mollities percipiebatur : capite dolebat , appetitus tamen manebat sat bonus , & alvum bonam sæpius bis de die continuabat deponere.

Perrexit Dominus *Haffner* decocto cicutæ per diem locum fovere , & noctu ejusdem emplastro tumorem tegere.

Omissis carnibus æger solis levioribus
Collin Pars I. Tom. II. E

alimenti nutriri cepit, & loco cicutaë emulso cum diacodio usus est.

Febris lenis duravit per quatrimum cum siti moderata, ad quam sedandam decocto hordei cum melle utebatur æger. Omni nocte per 4. vel 5. horas variis intervallis dormivit.

12. Octobris penitus apyretos erat: manifesta tunc fluctuatio in medio tumoris percipiebatur: dolores in hoc parvi erant, & cephalalgia defierat, appetitu autem carebat æger, quem sumpta 13. die rhei elect. dr. 1. sensim recuperavit, ac paucis diebus postea carne teneriori vesci denuo incoepit, & priorem cicutaë dosin denuo sumere.

Perrexit quotidie tumor suppuratione magis magisque molliri, & 20 Octobris tantum margines circumcirca duri percipiebantur: reliquum omne suppuratum erat.

Solo tunc emplastro cicutaë diu noctuque tumor tegebatur, ne continua calidi fomenti applicatione nimis cito macerata cutis rumperetur, & pus ad reliqui tumoris maturationem necessarium effunderet: incoepit tunc æger solummodo pilul. iij. gr. iv. bis de die sumere.

27. Cum jam margines tumoris fusi

essent, præter partem parvæ nucis juglandis magnitudine, pollice ab angulo maxillæ remotam, tumor sponte in medio apertus est, unde magna copia puris tenuis subflavescentis, striis subnigris intermixti effluxit, nullo modo foetens: totus tumor sic evacuatus est, præter partem illam prius memoratam. Ulcus tegebatur emplastro diachylon cum gumm. & desuper fomentum de cicuta applicabatur.

Continuavit omni die effluere pus optimæ consistentiæ quantitate sensim minuta, donec circa medium Novembris ulcus cicatrice obduceretur.

Licet toto hoc tempore continuerit dictam extracti cicutæ dosin sumere, nullo modo mutata est pars dura, post suppurationem reliqui tumoris residua, & æger hoc pauxillum nihilo faciens 20 Novembris ad suos sanus rediit.

CASUS SEXTUS.

PUELLA 23. annorum circa medium Junii ad nos venit, catameniis jam ab anno carens, chlorotica, debilis: tumores glandulosos, duros jam a binis annis habens, unum nempe ovi anatis mag-

nitudine sub parte dextra maxillæ inferioris : alium paulo majorem sub mento & unum triplo majorem ex duobus aliis non perfecte divisis constantem sub parte sinistra ejusdem maxillæ.

Prima cura restituendis catameniis adhibita, partim theriacæ diateffaron, partim pilularum ex gummatibus aromaticis usu, per bimestre continuato, adhibito simul sub finem secundi mensis aliquoties balneo pedum ex herbis aromaticis parato.

17. Augusti prodierunt menses sat copiosi, qui per 4. dies optime fluxerunt, quibus elapsis ægra optime habebat : nulla autem a copiosis solventibus, quæ per bimestre spatium sumpserat, in tumoribus mutatio facta fuit.

Hinc 24. Augusti incoepit. gr. xvj. extracti cicutæ bis de die sumere, ac cum per octiduum immutata hanc dosin sumpisset, prima die mensi Septembris ter de die eandem dosin sumpsit, hancque continuavit.

Nulla ad medium usque hujus mensis observata est mutatio : tumores in eodem statu permanserunt indolentes, functiones omnes optime peragebantur, & ægra alvum quotidie semel, quando-

que etiam bis, coctam, pultaceam deponebat.

17. Septembris videbatur moles tumorum, qui in latere sinistro, & sub mento erant, paulo minor, aiebatque ægra, se jam ab hesterno die sæpius sensum animalculorum repentium in horum tumorum substantia habuisse: nulla functionum præternaturalis deprehendebatur.

Eadem extracti cicutæ dosi continuavit uti, & post triduum ille sensus repentium animalculorum fiebat leniter dolorificus, dictosque tumores mole minui, tunc clarius patebat: pulsus erat naturalis, & quoad omnia bene habebat.

20. Dato ipsi masc. pilul. ruffi. scr. i. cum additis scammon. gr. iv. novies alvum deposuit, & noctu menses prodire, qui per 4. dies debite fluxerunt.

Abstinit ægra omni medicamento ad 26. Septembris, qua solita pilul. cicutæ dosi iterum incoepit uti. Erat tunc tumor sinistri lateris multum minutus, & in duos minores perfecte divisus, minus durus; idem observabatur in eo, qui sub mento hærebat; lateris vero dextri tumor immutatus permanebat,

& indolens, in aliis pergebat subinde fornicationem percipere.

Perrexit ægra hoc modo ad mediam Octobris usque, sumebat nempe dictam extracti cicutæ dosin per 5 dies, & omni sexto die mass. pilul. ruffi. ser. 1. unde pluries purgabatur.

Hac methodo eo perventum est, ut circa medium Octobris tumor, qui sub mento erat, penitus disparuerit, & in sinistro latere tantum duo parvi tumores nucis avellanæ magnitudinē superfuerint, valde duri, qui visu nullo modo animadvertiebantur: tumor vero, qui dextrum latus occupabat, ejusdem molis erat, ac ante cicutæ usum. Hoc in statu puellam vidit magnificus *Storck*, qui tempore curæ illi sæpius mecum adfuerat, viderunt & plures alii experitissimi viri.

18. Octobris iterum proruperunt menstrua, quorum fluxus quatuor dierum intervallo absolutus est.

25. Iterum incoepit cicuta uti, & continuavit usque ad 8. Novembris, qua ad solitos labores redire voluit.

CASUS SEPTIMUS.

PUELLA 24. annorum sub finem Augusti 1760. ad nos deferebatur cum tumore duro, tarsum pedis dextri occupante, qui ante 5. menses sine nota causa ortus, brevi temporis spatio ita increverat, ut pedis malleoli a reliquis partibus nullo modo distinguerentur. Initio quidem doloris expers prementi digito cedebat, & cruris usus, licet minus liber esset, non tamen penitus erat impeditus, donec cineribus calidis & similibus applicatis in duram massam dolentem, omnem motum pedis impedientem concreverit. In hoc statua d nos delata est.

Cum in omnibus reliquis sana esset ægra, præmisso purgante statim ad cicutam devenimus. Dosis ab initio fuit extracti cicutæ scr. i. bis de die, & externe decocto cicutæ fovebatur tumor.

Circa medium Septembris incoepit ægra omni die extracti cicutæ dr. i. sumere, cum qua continuavit, interposito omni 12. vel 14. die purgante, usque ad 17. Novembris, qua tumor multum collapsus, & ubique mollis deprehendebatur.

17. Datae sunt ægræ pilul. purg. unde pluries purgata est, has pilulas dein omni quinto die sumpsit, & diebus intermediis solita extracti cicutæ dosi usa est.

Sic tumor in parte pedis externa sensim ita minutus est, ut sub finem Decembris tantum malleolus internus paulisper tumeret.

Omni medicamento interno postea abstinuit: cum tamen, licet pedem fac facile in omnem partem moveret, illi per pauca tantum minuta insistere posset, fomentis ex cicuta, & admixtis variis herbis discutientibus fatus est pes: hoc modo mensem Januarium transegit, quo tempore tantum bis purgans ex rheo assumpsit, & sine ulla arte alia tumor integre disparuit.

Motus tamen valde impeditus manebat, & vix aliquot præ dolore passibus incedere audebat: pedem quoque hinc inde manu movendo audiebatur strepitus in articulo, quasi a ligamentis humido lubricante orbatis.

Ad hanc siccitatem superandam usa est ægra balneo ex herbâ cicutæ & aliis solventibus & emollientibus herbis parato, quo licet exacte per tres menses usa fue-

rit, non facilius incedebat; dolor tamen multo lenior erat.

Initio Aprilis cum hac methodo nihil effici videremus, infusum arnice ipsi exhibui.

Hoc medicamentum toto mense Aprili assumpsit, & tunc sat commode bis vel ter lento passu ab una parte cubiculi ad aliam baculo adjuta ire poterat; strepitus tamen, dum pes manu movebatur, fere æque magnus audiebatur.

Coacti fuimus illam adhuc per aliquod tempus in nosocomio retinere, ubi sensim liberum pedis usum recuperavit, & ex nosocomio sana dimissa fuit.

CASUS OCTAVUS.

FEMINA 25. annorum ad nos 12. Septembris anni 1760. ob ingentes ac fere intolerabiles omnium artuum dolores, quos noctu præcipue patiebatur, delata est.

Hos dolores jam a pluribus annis tolerabat, adeo autem increfcebant, ut tunc diu noctuque lecto affixa manere cogeretur.

Tumores glandulosos, duros, collâ anteriorem partem cingentes jam in quar-

tum menssem gerebat ; in osse bregmatis dextro tophum cum dolore fixo circa futuram coronoidream habebat ; cutis universa a quatuor hebdomadis scabie deturbabatur , & totum corpus valde emaciatum erat.

Simul & fatebatur se jam a sex annis fluore albo admodum acri laborare , ac sæpius ob dolores urentes difficulter urinam mittere.

Pulsus erat febrilis , & per intervalla febris valde intendebar , hinc pro medicamento dedi decoctum sassapar : & potus ordinarius illi fuit copiosum decoct. hord. radicum bardanæ & acetosæ cum lacte mixtum.

Hac methodo intra 8. dies a febre libera fuit , licet dolorum levamen vix ullum animadverteretur.

Continuavit iisdem medicamentis uti ad 27. Septembris , qua incoepit bis de die assumere cochleare sequentis.

℞. Spir. frumenti lib. β.

Mercur. sublim. corros. gr. iij.

Desuper potabat prius decoctum , cuius mensuræ i. lact. mens. β. addebatur , ut totum nycthemeri spatium absumeret.

Jam prima die tussis prehendebat ægrum , & augebatur ita , ut tertio die

a spiritu frumenti abstinere debuerimus. Cum jam toties expertus fueram, cicutam licet summis viribus solventibus præditam nullas tamen in corpore turbas excitare, statui experiri, quid in hac jam adeo provecta lue efficeret: unde incoëpit ægra prima Octobris pilul. N. 3. gr. iv. bis de die sumere: cibus facile digerendis alebatur, & pro potu ordinario prius decoctum sumebat.

8. Octobris cum nihil mutari videretur, pilul. N. 5. gr. iv. extracti cicutæ bis de die illi exhibitæ sunt. Lac recusavit, & maluit decoctum solum sumere.

Diu noctuque ad finem hujus mensis eosdem fere dolores conquesta est, corpus tamen fiebat magis torosum, & vires incresebant: tres tumores in colli sinistra parte manifeste mollebantur: appetitus vigebat, & alvus semel, quandoque bis quotidie liquida exonerabatur: fluor albus æque copiosus, minus acris erat, & rarius, dum urinam mittebat, dolores urentes patiebatur.

Ultimis Octobris diebus dolores diurnos, nocturnosque artuum minores fieri gaudebat.

Initio Novembris bis de die extract.

cicutæ gr. xxiv. sumpfit, qua dosi per integrum mensem usa est.

Toto mensis decursu appetitus fuit bonus, alvumque omni die bis, aliquando etiam ter deposuit; fluor albus minutus est; tres ex tumoribus colli sub finem mensis fere integre suppuratione consumpti aperti sunt, unde pus subflavum, copiosum effluxit: eodem autem tempore ad reliquos tres, qui supererant, & qui jam minus duri videbantur, adjunctus est novus sub mento ortus. Dolores per diem fere integre filebant, & cum noctu quoque multum leniti essent, somnus pacatior diutius protrahabatur.

7. Decembris cum nimiam ciborum ab amicis allatorum quantitatem comidisset, incœpit ventriculo dolere, anxia fieri, valde sitire, & noctem valde inquietam transegit: sequenti die mane accedens eadem symptomata inveni, & pulsus celerem, inæqualem. Abdomen erat tensum, & alvus a matutino tempore præcedentis diei adstricta.

Præscriptus est ipsi haustus N. 10. & ilico injectum est ipsi enema leniter purgans, unde bis alvum habuit. Post meridiem sumpto haustu septies purgata est, unde anxietas fere omnis sublata fuit.

nox tamen fuit inquieta, & fequenti die mane pulsus æque celer, minus tamen inæqualis deprehendebatur: lingua erat sicca, sitis sat magna, temporum quoque dolor magnus aderat, multoque vehementius dolebat capitis parte sinistra circa commissurum ossis frontis cum osse bregmatis, ac dolor attactu augebatur: tophus vero in osse bregmatis dextro fere integre disparuerat, fluor albus, qui hucusque, licet minus copiosus, duraverat, nunc penitus aberat, & urina erat rubra sine nubecula.

Copiosum potum ægræ commendavi & emulum refrigerans præscripsi, ut de hoc omni bihorio unc ij. sumeret: pedum plantis epispastica applicata sunt.

Post meridiem ultra tres horas per intervalla dormivit, & noctem præ doloribus capitis valde malam habuit.

10. Mensis die, quæ ærat 4. morbi, pulsus erat minus febrilis: verum capitis dolor intendi videbatur, ac ideo latum vesicans nuchæ applicatum est. Mane alvum bis egresserat coctam, & urina minus rubra, parvam nubeculam in medio gerebat. Continuavit ægra copiose potare, ac præter emulum dictum, quia tota die insomnis fuerat, ves-

pere unc. i. syr. diacod. cum laud. liq. syd. gtt. v. assumpsit, a quo secutus est somnus quatuor horarum.

5. Morbi die febris admodum lenis erat; lingua humida, cutis antea sicca, nunc æqualiter sudore madebat: dolor tantum in sinistra capitis parte, ubi antea illum attactu augeri memini, permanebat, & miseram eadem sævitie, non obstante valida vesicantis operatione excruciabatur.

Abrasis capillis loco dolenti fomentum calidum ex aqua, aceto, vino & sale ammoniaco applicuit expertissimus Chirurgus, & loco emulsi sumpsit ægræ conserv. antiscorb, cui pulv. cortic. & ligni sassaf. dr. i. β. & stib. diaph. o. abl. dr. i. additæ erant.

6. Morbi die sive 12. Decembris apyretos erat, verum dolor idem permanebat, & paucum somnum capere poterat.

Dictis medicamentis continuatum est ad 20. Decembris absque levamine.

20. Loco dolenti abrasis de novo capillis emplastrum de meliloto applicuimus, & nuchæ alterum vesicans: sequenti die mane haustum purgantem N. 10. sumpsit, unde octies copiosa

alvus mōta fuit , verum hæc omnia nullum levamen attulerunt.

Patebat materiem morbosam tenacem vascula cranii vel pericrarii admodum pertinaciter obstruere , cum hucusque adhibita solventia & revellentia nullam mutationem effecissent. Hinc ad extractum cicutæ quod princeps inter solventia & aperientia toties in aliis casibus , ac etiam in hac ægra deprehenderamus , redire statuimus , & priorem cicutæ dosin pilul. nempe N. 6. gr. iv. bis de die sumendas exhibuimus ; locum dolentem emplastro de meliloto tectum servavimus.

Hac methodo ad finem Januarii continuatum est , & ægra quoad omnia , præter dolorem illum in cranio fixum , sat bene habuit : alvus quotidie semel vel bis prodiit ; parum sitiit , appetitum bonum acquisivit.

Circa medium Januarii , cum prius aperti tumores fere integre cicatrice obducti essent ; aperti sunt duo alii , quique quoque suppurati pus dilutum flavum dederunt ; verum sub finem Januarii alter novus renatus est in latere colli sinistro. His tumoribus emplastrum & fomentum de cicuta ante & post aperituram continuo applicabatur.

Initio Februarii ter de die pilul. N. 6. gr. iv. incœpit sumere, & externe loco dolenti empl. vesicans appositum est, quod multum feri eduxit, unde aliquod levamen percepit ægra: locum apertum & fluentem servavit Dominus HAFFNER per 15. dies: verum dolor permanfit, & renascente epidermide ad priorem acutiem rediit, purgante, quod ob alvum non respondentem ter dari debuit, nullo modo lenitus. Sat tamen pacatas noctes habebat ægra, & in reliquis functionibus vix læsio animadvertatur: locus emplastro de cicuta tectus manebat.

Sic fuit ad finem usque Februarii.

Toto mense Martio eadem in terne & externe adhibita sunt, per quod tempus sequentia observanda fuerunt. Scabies, quæ hucusque perstiterat, imò aucta fuerat, disparuit, sex tumores, quæ aperti erant, cicatricem foedam formarunt: alter apertus est, & eandem materiam dedit, ac priores: dolor capitis obtusior factus est, in loco autem capitis dolente externa mutatio nulla aderat.

Sexta Aprilis, cum eadem medicamento dosi pergeret uti, locus dolens incœpit elevari & tumorem formare

oblongum, duriusculum, figura & crassitie ad ficum mediocrem accedentem: hoc viso locus emplastro cicutæ tectus, decocto ejusdem plantæ incoepit continuo foveri & interne eandem dosin extracti perrexit sumere.

12. Menses, quibus per plures annos caruerat, prodierunt, & per tres dies & medium debite fluxerunt, nec sub horum fluxu ægra cicuta abstinuit.

20. Tumor major erat, mollior & obscura fluctuatio in eo detegebatur.

Sub finem Aprilis sponte facta est parva apertura, ex qua paucum pus dilutum flavescens, subfoetidum, exstillabat cum doloris levamine.

Præter priorem extracti cicutæ dosin incoepit tunc ægra quater per diem unc. iv. decoct. lignor. sumere.

Perrexit tumor magis magisque molliori; paucam tamen fundebat materiæ copiam, quæ cum sensim foetida magis fieret, & metueremus, ne os, quod suæ corruptionis signa manifesta dabat, latius inficeretur a retenta sub integumentis materia acriter putrida. 5. Maii aperturam majorem fecit expertissimus Dominus HAFFNER, ex qua tria frustula ossea friabilia cum pure tenui, flavescente, foetido prodierunt; pro-

funditatem dein ulceris stylo examinans in ipsum cranii cavum penetravit ad duram matrem usque, quam pulsantem sentiebamus.

16. Maii dum ad nosocomium veni, omnia purgaverat Dominus HAFFNER, & corrupta prudenti manu auferendo, foramen in cranio ibi loci integre corrupto & fragili fecerat rotundum circiter magnitudine monetæ, quam septimam dicimus, per quod magna duræ matris pulsatio, pulsui in carpo correspondens conspectui se objiciebat: ac licet tantum ante bihorium deligasset, tamen pulsans dura mater copiosam adhuc materiam ex cranio foras trudebat, tenuem, purulentam, subflavam, subfoetidam. Hæc materia, dum caput in sinistrum latus inclinabatur, fere continuo rivo effluebat, tussis quoque cessantem materiæ effluxum de novo resuscitabat.

Tota pars lateralis sinistra capitis & media frontis pars dolorifica erat; oculi ejusdem lateris palpebræ tumebant; oculus, qui valde retractus ob palpebrarum tumorem videbatur, acute dolebat; oculus dexter sanus erat; integumenta capitis ad pollicis latitudinem a foramine circumcirca abscedebant,

quorum pars propinquior foramini in sphacelum abierat ; reliqua vero , licet male affecta , adhuc aliquid sani conseruabat. Partem sphacelatam abscidit expertissimus Chirurgus & reliquam hinc inde disciditne materies acris sub illis retenta , os magis corrumpere.

15. & 16. Maii pro medicamento tantum dictam dosin decocti lignorum cum media parte lactis habuit ; ac pluries de die ob materiæ copiam ulcus deligari debuit : post quamcunque deligationem linteis carptis balsamo peruviano medicatis tegebatur & lintea quadruplicata decocto cicutæ imprægnata desuper applicabantur.

17. Inveni ægram delirantem cum pulsu celeri , inæquali , molli : respiratione frequenti , lingua arida , siti , & appetitu magnis ; alvum noctu bis deposuerat coctam , urina erat rubra , sine nubecula , cutis humida.

Pro medicamento claretum usitatum habuit , & emulsionem cum diacodio alternis vicibus sumendam ; copiose potavit ægra decoctum hordei , rad. bardanæ & acetosæ.

Per quinque dies sumpta hæc medicamenta nihil in ægra mutarunt , mansit enim delirium , pulsus idem &c. mate-

ries ejusdem notæ ac antea copiose effluxit, delirium quoque continuum non abstulit sensum doloris, quem in ossibus frontis, bregmatis, ac temporis sinistri, oculoque percipiebat hisce diebus a tumore livescente palpebrarum fere obturato, subinde tamen ægra somno per horæ unius spatium & ultra capiebatur minime reficiente.

22. Quæ erat sexta febris, cessavit capitis dolor; materies minori copia ex cranio effluxit, sed ægra incoepit angi, & brevi spirio laborare, pulsus factus est debilis, intermittens, & ægra vix poterat loqui; alvum coctam mane deposuit; urina vero tempore nocturno missa, pallida erat.

Hac die usa est emulsio N. 17. cujus duplex dosis omni trihorio illi propinabatur: bina vesicantia furis applicata sunt, & ter tempore diei unc. j. syr. diacod. assumpsit, ut spasmi forte a materia acri circa vitalia & alibi excitati relaxarentur, & functionum exercitium liberius relinquerent.

Post mediam noctem per trihorium dormivit, ac copiose sudavit.

23. Mane inveni ægram facile spirantem cum pulsu magis pleno non amplius intermittente; minus delirabat,

& obtusum capitis dolorem conquerebatur; lingua humescebat, urina subfusca enæorema nigrescens in fundo gerebat; tota superficies corporis maculis scatebat partim petechias rubras, partim maculas latas scorbuticas, subfuscas referentibus; materies ex cranio effluebat, ut die præcedenti.

Loco emulsi camphorati omni bihorio alternatim cum clareto N. 8. sumpsit duo cochlearia sequentis mixturæ.

R. Aq. flor. rhæad. unc. vj.

Extract. cort. peruv. dr. v.

Aceti vin. dr. vj.

Syr. diacod unc. ij.

M.

Simul copiosum potum continuavit ægra haurire.

His medicamentis utens in eodem statu permansit ægra ad 27. Maj. qua multæ maculæ tam ex rubris quam ex subfuscis disparuerant, & reliquæ omnes flavescebant: post diem tamen hujus morbi septimum urina fuit naturalis & alvus omni die cocta deponebatur.

28. Pulsus erat fere naturalis, delirium aberat, palpebrarum oculi sinistri tumor minor colorisque minus livescens: pergebat tamen obtusus capitis dolor: foramen cranii specie membranæ

ipissæ, mollis fere integre obturabatur, nec ulla amplius ex cranio materies effluebat: ex ambitu autem foraminis continuabat aliquid purulenti prodire.

Diem 29. sine molestia transegit, sæpius pacate dormivit, & cibos leviores cum appetitu sumpsit. In methodo medendi nihil mutatum est.

30. Maculæ omnes disparuerunt, & omnes functiones ad statum naturalem rediisse videbantur.

Perrexit tamen, ut ante, ad quartam Junii clareto & mixtura cum extracto corticis peruviani uti. Dein omni medicamento abstinuit, & cibis aptis per 14. dies nutrita, vires optimas recuperavit.

Paucum toto hoc tempore pus, idque bonum dederunt suppurantia integumenta: foramen in osse factum penitus obturatum erat substantia membranacea molli, sensim magis magisque indurescente, & circa 20. Junii jam quasi cartilago digito prementi resistebat: os nudatum integumentis album erat, & fomento cicutæ diligenter tegebatur. Dolor nullus, nisi in illo loco, ubi os integumentis orbatum erat: oculus optimus, & nullum palpebrarum tumoris vestigium remanebat.

Manferunt autem duo tumores, nu-

ces juglandes italicas magnitudine æquantes; in latere dextro colli, secundum asperam arteriam siti, & duæ cicatrices aliorum tumorum duræ, ob nimiam elevationem aspectu foedæ: unde rogavit ægra, ut darentur ipsi denuo pilulæ de cicuta. Incoepit iterum bis de die pilul. N. 6. gr. 1v. sumere: vitulina & similibus facilioris digestionis cibis nutriebatur: initio Julii bubula ipsi etiam concessa fuit cum appetitus valde magnus & omnes functiones bonæ essent.

10. Julii cicatrices mollitæ pus tenue albescens fundebant, unde loco fomenti, quod ab eo tempore, quo cicuta iterum incoeperat uti, applicatum fuerat, solo emplastro cicutæ tegebantur.

15. Tumor superior integre suppuratus sponte apertus est, & nihil omnino duri post puris subflavescentis, striis fuscis intermixti effluxum superfuit.

20. Alter tumor eodem modo evacuatus est: in cicatricibus antea elevatis & duris duorum prius apertorum tumorum elevatio conciderat, & durities disparuerat; hinc omnia emplastro dyachilon cum gumm. tecta, omni die deligata pus bonum dabant.

Nihilominus dolor in osse denudato

post quemque motum corporis vel animi solito majorem, ægram vehementius afficiebat: os nudum maxima sui parte nigrescebat, & lamina superior in illa parte, quæ substantiæ foramen cranii obturanti & nunc valde duræ adhærebat, elevari videbatur; fomento tamen cicutæ continuo tegebatur.

Omnia hoc modo continuata sunt ad 24 Augusti absque ulla in medicamentis mutatione, si bis ob alvum nimis tardam toto hoc tempore repetitum haustum num. 9. excipias.

24. Augusti laminam ossis, prope foramen olim in cranio existens magis elevatam & hiantem, sine magno molimine ab inferiori lamina separavit egregius nosocomii Chirurgus: sub hac vascula extensa speciem carnis referebant; foramen autem in cranio factum osseam resistantiam habebat: locum valde sensibilem textit Chirurgus linteis carptis fomento cicutæ madidis.

Ægra hoc facto quieta in lecto jaccens cicuta abstinuit uti & carnibus, ac tantum levioribus alimentis usa, pro medicamento habuit emulsionem diacodiatam. Pulsus erat paulo celerior naturali, & capite dolebat, ubi lamina
ablata

ablata erat ; sequenti die aliquid puris linteis carptis adhærebat , nihil tamen nec interne nec externe in methodo medendi mutatum est ad primam Septembris ; qua die , cum omnes functiones optime peragerentur , nullaque ex abscessu cranii amplius materies prodiret , ac parvus tantum dolor adesset , emulso abstinuit : quieta tamen in lecto jacere continuavit , & jusculis , aliisque facilis digestionis cibis ali : ulcus linteis carptis fomento cicutæ imprægnatis tectum servabatur.

Quinta & 6. Septembris alvo caruit : appetitus minor factus est , & dolor capitis increvit : assumpta autem 7. Septembris rhei electi dr. i. alvum quinquies subduxit , appetitum restituit , & capitis dolor quoque minutus est.

9. In omni ambitu ulceris rudimenta cicatricis apparebant : medium autem ulceris paulo minus excrescebat , nihilominus tamen idem externe continuavit applicari.

14. Cicatrix se sensim magis versus medium ulceris extendebat , verum in medio elevatio nimia erat , & vascula in speciem carnis fungosæ degenerabant , ideo fomento cicutæ aqua calcis substituta fuit.

Hoc modo intra quatrimum collapsa est illa eminentia, & quod cicatrice non erat obductum, crusta incepit tegi: solum postea emplastrum cicutæ externe applicatum est, & denuo licuit ægræ surgere & majori ciborum quantitate vesci.

24. Magnificus Dominus *Storck*, qui totam curam vidit, & cum quo sæpius super hac ægra consilium habui, ægram mecum examinavit.

Totus locus capitis post laminæ externæ separationem speciem carnis referens, nunc ubique, parte etiam illa non excepta, quæ crusta tecta erat, valde durus erat, ossisque naturam multum imitans; ægra, licet gracilis esset, bene valebat, nullum dolorem conquerens: omnes colli tumores cicatrice obducti erant, in aliquibus tamen crassa, aspectu admodum foeda: hinc suavit magnificus vir, ut ægra denuo inciperet bis de die extract. cicutæ scr. i. sumere, ac simul quater de die decoct. lignor. unc. iij. cum anatica lactis parte fumeret. Cicatrices denuo emplastro cicutæ tegebantur. His utens optime habuit, & sensim corpori major torositas & vires majores renatæ sunt.

11. Octobris illustrissimus Præses præ-

ter alios ægros cicuta jam per aliquod tempus utentes, vel incipientes uti, hanc etiam examinavit, ac audita partim ab ægra, partim a nobis morbi historia, gaudium testatus est de felici hujus curæ successu.

Ægra pergens dictis medicamentis uti circa medium Novembris menses habuit, qui tunc per quatuor dies, postea vero regulariter omni mense fluxerunt.

Ab eo tempore decocto lignorum non amplius usa est, sed quotidie extracti cicutæ scr. i. ea spe, ut cicatrices, quæ continuo emplastro cicutæ tegebantur, in sua crassitie minuerentur: verum licet 28. Novembris ad medium Decembris usque quædam aliquid aquosi stillarint, non mutabantur; unde cum 17. Decembris illam examinantes omnes cicatrices ficas inveniremus, femina postea cicuta abstinuit.

2. Januarii placuit iterum illustrissimo L. B. *Van Svvieten* ægram examinare cum pluribus, qui aderant, celeberrimis medicis & chirurgis: in loco cranii, ubi os abscefferat, omnia ossea prædita duritie invenit; omniaque in collo consolidata. Ægra cæterum optima sanitate fruebatur: unde brevi postea dimissa

est, & mense Augusto mortuo marito iterum inivit matrimonium, ac octava Januarii 1763. optime valens in Saxoniā profecta est.

CASUS NONUS.

JUVENIS 19. annorum 11. Novembris ad nos delatus est. Hic post frigidam æstuantī corpori mense Julio copiose ingestam, incœpit ventriculo dolere, appetitu languere, & post assumpta grave pondus in ventriculo percipere. Assumpsit quidem varia tum a medicis, tum etiam ab aliis hominibus, ut ventriculi, ut putabat, debilitatem corrigeret: verum nihil ipsi levamen attulit: potuit tamen utcunque opificio sartoris, quo panem lucrabatur, sufficere usque ad finem Augusti, quo tempore incœpit post assumpta valde angi, & ventriculo dolere, subsequente sæpius post duas vel tres horas assumptorum vomitu: cum autem juscula & lactinia ac similia facilioris digestionis alimenta non rejiceret, se his sustentavit ad 6. Novembris usque, qua & hæc quoque levissima vomitu sæpius per diem repetito rejicere incœpit, quod continuavit.

donec ad nosocomium totus emaciatus adferretur.

Aiebat, se omni secundo vel tertio die alvum deponere, pulsus erat debilis; in epigastrio circiter duos pollices infra cartilaginem xiphoideam tangebatur corpus durum, mediocris magnitudinis, profunde situm.

Statim usus est decoct. rad. sal. cum laudano, enema ipsi injectum est, quo alvus cocta educebatur. Cibus fuerunt Juscula carnum, leves panatellæ; potus lac cum decoct. hordei.

Hac methodo effectum est, ut primo die tantum bis vomuerit, 2. die semel, tertium diem sine vomitu transegit: noctu tamen prægressa magna anxietate bis debuit vomere. 4. die 15. Novembris cum de nullo dolore conquereretur, & abdomen utcunque tensum esset, dedi ipsi sequens.

Rx. Aquæ laxat. D. V. unc. v.

Syr. rosarum solut. dr. v.

Spir. nitri dulc. gtt. x.

Sal. polychr. dr. β.

M.

Ut omni $\frac{1}{4}$ horæ cochleare sumeret; donec inciperet purgari.

Enema quoque ipsi injectum est hoc modo: septies vel octies optime purga-

tus est, ac vespere assumpta syr. diacod. unc. i. noctem quietam habuit. Per 4. dies usus est lenissimis solventibus paregoricis, inde autem auctus est ventriculi dolor & vomitus frequentior factus.

23. Novembris dedi ipsi mixturam sequentem intra biduum assumendam.

℞. Extract. cicut. dr. j.

Laud. liq. sid. scrup. j.

Aq. flor. rhæad. unc. vj.

Syr. papav. alb. unc. β.

M.

Æger eadem ac ante diæta usus est : intra quatrimum vomitus penitus cessavit, & alvum omni die sponte deposuit : dolores multum minuti sunt ; corpus illud durum adhuc tamen ut antea in epigastrio percipiebatur.

17. Novembris loco mixturæ incoepit bis de die extracti cicutæ in pilul. reducti gr. xvj. sumere.

Sensim inde ita mutatus est, ut 7. Decembris nullum amplius doloris sensum perciperet, & cibi hucusque concessi appetitui minime sufficerent : comestis autem carnibus valde anxius fuit, ventriculo doluit, ac noctem inquietam transegit ; quapropter præter paucum panem, & leviora olera priori diætæ nihil additum est.

Interim eandem extracti cicutæ dosin omni die sumpsit, & 16. Decembris cum optime quoad omnia haberet, appetitusque validus esset, nec tactu præternaturale quid in regione epigastrica detegeretur, carnes teneriores denuo concessæ sunt, quas æger sine incommodo ferre potuit.

26. Decembris incœpit carne bubula & aliis durioribus cibis vesci, a quibus nec minimum incommodum habuit.

Sumpsit prædictam cicutæ dosin usque ad 6. Januarii: tum habitus corporis & vires optimæ erant, hinc nosocomio discessit, promittens se statim ad nos rediturum, si aliquid prioris mali denuo perciperet.

CASUS DECIMUS.

VIR 40. annorum mense Augusto ad nosocomium venerat cum magno ulcere scorbutico, quod in cruris dextri parte externa jam ab anno gerebat: inferior præterea pars cruris una cum pede tumore duro occupabatur, ita ut æger continuo decumbere deberet.

Om nibus adhibitis in tali casu usitatis medicamentis nihil spatio trium men-

fium effecimus. Hinc, quid cicuta interne & externe applicata in hoc homine efficeret, experiri statuimus.

Itaque 19. Novembris incoepit bis de die extracti cicutæ gr. xvj. sumere; ulceri lintea carpta infuso cicutæ madida applicata sunt, ac desuper linteum quadruplicatum ejusdem decocto imbutum tepide omni bihorio renovandum.

Erant tunc pes & crus æque tumida, ac dum primo illum videramus: ulcus autem magis proferpserat in omni dimensione: margines hinc inde exesi erant, & ex fundo ulceris plura parva tubercula exsurgebant: color variegatus erat, materies ex ulcere effluens faniosa, ac æger magnos dolores patiebatur; functiones tamen vitales & naturales sat bonæ erant.

Sensim ita mutatum est ulcus ut 27. Novembris coloris rubelli fuerit, cum pauca inæqualitate in fundo, pes etiam & crus minus tensi erant.

6. Decembris jam fundus ulceris elevabatur: loco faniei, quæ hucusque effluxerat, pus tenue aderat, tumor pedis & cruris multum minutus erat, & æger extra tempus deligationis nullum amplius dolorem percipiebat.

Eadem methodo tam interne quam

externe usi fuimus ad 20. Decembris , quo tempore centrum ulceris paucum pus bonum fundens cum marginibus in æquali altitudine erat ; margines vero albescentes incipientem cicatricem ostendebant ; omnis quoque tumor pedis & cruris disparuerat.

Cessavit tunc æger cicuta uti , & externe ulcus solo emplastro de cicuta tangebatur ; tantum omni sexto die haustum purgantem sumpsit , quem etiam tempore , quo cicuta utebantur , omni sexto vel saltem septimo die sumpserat.

Hoc modo circa medium Januarii optima cicatrix formata erat ; æger sanus & robustus tota die extra lectum manebat , sæpius ambulans & aliis inserviens & denique sub finem Januarii , cum ad labores aptus esset , discessit.

CASUS UNDECIMUS.

FEMINA nata annos circiter triginta ad nos 31. Decembris anni 1760. delata , habebat mammam sinistram duram , scirrhosam , lividam , dextra volumine triplo majorem , ac tam vehementer dolentem , ut inde respiratio multum læderetur.

Quanto tempore dura fuerit mamma antequam dolor accesserit, ignorabat ægra; aiebat tamen jam dudum se majorem in hac mamma tensionem animadvertere, quam in altera, septimamque nunc esse hebdomadam, ex qua incoeperat dolore & manifeste videre molem augeri.

Dolor initio non erat continuus, sed subinde tantum acutissime lancinans, ut ægra fere in animi deliquium caderet. Sensim adeo increverat, ut jam ab octiduo, dum ad nos deferretur, continuo urens aut lancinans eam diris cruciatibus torqueret; admodum emaciata erat & coloris valde cachectici, viresque ita collapsæ, ut vix superesset curationis.

In hoc statu dedi illi decoctum sarsapar. cum syr. diacod. unc. i. β. & mixturam sequentem.

℞. Aq. flor. rhæad. unc. vij.
 extract. cicut. dr. j.
 syr. diacod. unc. j. β.
 M.

S. Ut omni bihorio duo cochlearia sumat.

Totum assumpsit intra 24. horas, quo tempore diligentissime fomentum cicutæ applicabatur.

His effectum est, ut sequenti die do-

lores multum minuti fuerint, & ægra per intervalla parum dormierit.

Iisdem medicamentis usa est, per sex dies, cum magno dolorum levamine: appetitus, qui duobus primis diebus nullus erat, redivit, juscula, panatellas & alios leviores cibos libenter assumpsit, & protractiorem somnum habuit.

Die 7. sive 6. Januarii mamma pluribus in locis incoëpit exulcerari, ac copiosam faniem valde acrem fundere: fundus & labia ulcerem erant plumbea: rarus tunc lancinans dolor: verum aiebat ægra se in tota mamma præcipue in locis exulceratis dolores admodum urentes pati.

Cum mutationem in melius animadverterem, nec a cicuta aliquid in corpore turbari videretur, duplam cicutæ dosin dr. ij. nempe quotidie absumendas in mixtura præscripsi: usa est præterea ægra copioso lacte aquæ puræ, vel decocto supra memorato sine diacodio, mixto. Externe emplastrum de cicuta applicatum est, & tota mamma fomento cicutæ continuavit foveri.

Hac methodo de die in diem res in melius vertebatur, & 19. Januarii, cum mecum ægræ adesset magnificus domi-

nus *Storck*, materies saniosa in pus dilutum mutata erat, ægraque admodum parvos dolores patiebatur; massa scirrhosa mediam suæ molis partem amiserat.

Ostendit nobis quoque tunc ægra glandulas subaxillares (de quibus antea nullam mentionem fecerat) tumentes, non admodum duras, quas aiebat se jam in tertium mensem multo majores & duriores absque magno incommodo gerere.

Hæc videntes in methodo medendi nihil mutandum esse conclusimus: concessum tantum fuit illi quotidie aliquid levioris carnis.

Sub usu medicamenti vires sensim increverunt: dolor cachecticus disparuit & appetitus ita auctus est, ut circa medium Februarii, quo tempore molis duræ partim resolutione, partim suppuratione consumptæ vix quarta pars supererat, carnes debuerint illi majori copia concedi.

Nulla malo symptomate turbata fuit cura, unde toto mense Februario extracti cicutæ dr. ij. quotidie sumpsit.

Initio Martii cum jam admodum parum de duritie superesset, tantum bis de die extracti cicutæ in pilulas redacti

scr. j. sumpfit, quod continuavit ad 16. mensis, quo tempore omnia mollia erant, & ulcera maxima parte cicatrice obducta unde cicuta non amplius usa fuit.

A 14 Januarii, qua primum adverti-
tus loco saniei ex mamma ulcerata pro-
dire, pus omni die melius evasit, donec
optimum esset: verum ea quantitate
non prodiit, ut posset credi, massam
scirrhouam suppuratione consumi, quin
potius manifeste patebat per resolutio-
nem maximam molis duræ partem dis-
parere.

Intra trimestre spatium penitus curata
fuit & præter cicutam & diætam con-
venientem illi toto curæ tempore admi-
nistratum est nihil, si purgans lene quin-
quies toto curæ decursu excipias, quod-
que tamen ideo tantum adhibitum est,
quia ægra de aliquo gravamine circa
præcordia, forte a cibis ob defectum
exercitii corporis nimis diu in ventriculo
hærentibus orto, conquesta est.

Magnificus *Storck* tempore curæ
hanc ægram sæpius vidit, ac integræ &
celeris curationis testis fuit: vidit quo-
que illam pluries celeberrimus anatomix
professor Dominus GASSER, qui eo
tempore sæpius nostrum nosocomium

accedebat, & cujus consilio in gravibus casibus sæpius usus sum: Viderunt illam & multi alii doctissimi & celeberrimi viri tam Chirurgi quam Medici.

CASUS DUODECIMUS.

JUVENIS 17. annorum 19. Januarii 1760. ad nos venit cum tumore duro scirrroso paroditis dextræ, quem jam a biennio gerebat sine dolore: cum cæteroquin sanus esset, statim primo die incoepit extracto cicutæ uti, cujus dosis per octiduum fuit gr. xvj. bis de die: externe toto diei tempore fomentum cicutæ applicabatur, noctu vero emplastrum diæta nulla peculiaris præscripta fuit, sed cibis solidioribus potuit vesci.

25. Januarii incoepit ter de die extracti cicutæ gr. xvj. sumere, quæ dosis paucis diebus postea ad dr. j. aucta est, eo cum effectu, ut circa medium Februarii formicationes & leviores lancinationes in scirrho subinde perceperit, 24. Febr. sumpsit haust. N. 9.

26. Incoepit denuo ter de die extracti cicutæ scr. j. sumere & perrexit ad 2. Martii: permansit formicatio, & subinde repetens levior lancinans dolor: tumor

de sua duritie multum amiserat, nec mole augebatur. Unde

2. Martii eundem haustum sumpsit, quo optime purgatus est, & sequenti die denuo priorem medicamento dosin.

6. Videbatur tumor mole minui: quod 9. ita manifestum erat, ut de futura resolutione magnam spem haberemus.

Postea omni 6. die ægro purgans datum est: reliquo tempore quotidie dr. j. extracti cicutæ sumpsit.

Hoc modo ita sensim durities & moles tumoris disparuerunt, ut 12. Aprilis locum tumoris penitus mollem viderint magnificus STORCK & doctissimus Medicus Laurentius HOFFMANN, alique plures; flaccida tamen cutis speciem tumoris parum elevati præ se ferebat, quem frustra roborantibus & penetrantibus medicamentis externe applicatis per 15. dies conati fuimus auferre; unde æger lætus de felici cura hanc parvam deformitatem flocci fecit, & ex nosocomio sanissimus discessit: toto tempore, quo cicuta usus est, alacris fuit, & omnes corporis functiones optimæ manserunt.

CASUS DECIMUS TERTIUS.

PUER 13. annorum jam a semi-anno genu sinistrum tumidum durum habebat cum impedito cruris admodum emaciati motu : tentavimus sine effectu fomentum factum ex sale ammoniaco , vino , aceto , & aqua per tres hebdomadas , licet quoque interne varia solventia simul exhiberentur : quapropter statuimus cicutam in opem vocare.

Incœpit 3. Februarii binas pilulas extracti cicutæ mane & totidem vespere sumere , quarum quælibet gr. iv. erat , & externe genu decocto cicutæ diligenter fovebatur.

10. Cum æger medicamentum optime ferret , ter de die eandem dosin sumpsit.

12. Leniores dolores subinde repentes in genu percepit : quoad reliqua autem sat bene habebat.

15. Pergebant illi dolores , & genu minus durum erat , crusque nonnisi cum femore antea movendum retrorsum & antrorsum parum moveri poterat.

16. Purgans sequens sumpsit.

℞. Folior. alexandr. dr. ij. ℞.

sal. polychr. dr. β.

mann. calabr. dr. vj.

flaved. cortic. aurant. gr. xv.

M. inf. c. aq. fervid. q. s. p. $\frac{1}{2}$ hor.

vase clauso, colat. unc. ij. β. d. u.

Ab hoc haustu octies purgatus est ;
sequenti die tantum per intervalla dole-
bat, & cruris motus liberior erat.

Priori cicutæ dosi iterum usus est ad
21. Februarii, quo manifeste patebat
genu molliori, & mole minus fieri. Sump-
sit iterum priorem haustum optimo cum
effectu.

Perrexit sic omni sexto die purgans su-
mere, utens intermedio tempore dicta
pilularum dosi.

Initio Martii facile in omnem partem
manu ducebatur ; crus quoque poterat
parum flectere & extendere, tumorque
ultra mediam partem minutus erat, &
residuum molle.

Eodem tamen modo usus est medica-
mentis usque ad 20. ejusdem mensis,
qua omnis tumor disparuerat, superstitie
tantum partis flacciditate, quæ fomentis
& emplastris roborantibus per quindécim
dies applicatis ita correctæ fuit, ut æger,
qui jam ab initio Martii baculo adjutus leni
gradu per cubiculum ambulare potuerat,
tunc sine baculo incedere posset ; imo &

scalas sat facile ascendere & descendere : mansit tamen in nosocomio usque ad 23. Aprilis, qua sanissimus nosocomium dereliquit.

CASUS DECIMUS QUARTUS.

PUER 19. annorum 10. Februarii ad nos venit, narrans se ante annum plures glandulas in latere colli dextro tumidas habuisse, quæ applicatis variis emplastris & cataplasmatibus ad speciem suppurationis deductæ fuerunt post quatuor menses ab illarum ortu: effluxerat autem pus saniosum & massa dura tantum pro parte consumpta inde fuerat, licet post aperturam continuata sunt varia emollientia & solventia.

Dum primo illam vidimus, plaga affecta in longitudine circiter tres pollices æquabat; latitudo paulisper minor erat; ex tribus parvis foraminibus, quæ examinata veras fistulas monstrabant, materies ichorosa effluebat: interstitia foraminum lignea duritie digitis resistebant.

Ægra cachectica erat, & jam a quatuor mensibus carebat menstruo fluxu.

Ilico datæ sunt illi quatuor pilulæ ex

tracti cicutæ bis de die, quarum quælibet gr. iv. externe diurno tempore fomentum de cicuta continuo applicabatur, ac bis de die in fistulas decoctum cicutæ leniter injiciebatur.

20. Februarii loco ichoris per dilutum albescens ex fistulis effluebat, totus tumor minus durus erat, & fistularum orificium simul cum tumore multum mollium: cum tamen appetitus minueretur, imo carnes recussaret ægra, rhei dr. j. mane ipsi data est, 21 Februarii, dein sequenti medicamento usa est.

℞. Conserv. menih. unc. ij. β.

Cortic. winteran. dr. j. β.

Pulv. rad. helen. dr. ij.

fyr. cort. aurant. unc. β.

M.

S. quater de die dr. ij. sumat.

Sub usu hujus medicamenti appetitus renatus est, & 25 Februarii potuit denuo uti cicuta, cujus usus externus non interruptus fuerat.

Optime tulit ægra cicutam, & sensim totus habitus corporis ita mutatus est, ut color cachecticus ante medium Martii in colorem sanum mutatus esset, tumor quoque multum minutus: disparuerat etiam fistularum callositas & illarum cavitates implebantur.

27. Ejusdem Martii menstrua prodire, quæ per triduum fluxerunt, & de toto tumore tantum supererant tubercula duo, nucis avellanæ majoris magnitudine, quæ duritiem servabant: reliquum tumoris partim suppuratione, partim resolutione sublatum erat: nullus quoque aditus amplius in loca antea cava patebat, licet ulcuscula adhuc pus paucum funderent.

4. Aprilis rudimenta cicatricum in ulcusculis conspicua erant & intra 15. dies cicatrices perfectæ fuerunt; totus locus tumoris collapsus erat, & mollis.

26. Menstrua eodem modo habuit, ac mense Martio, quibus elapsis cum optime haberet, ad suos rediit.

CASUS DECIMUS QUINTUS.

JUVENIS 26. annorum ad nos 25 Februarii delatus habebat horrendum tumorem cancrosum in parte faciei dextra.

Fœdus hic tumor, qui altius pertingebat, quam est angulus oculi, ad duos digitos transversos infra angulum maxillæ inferioris descendebat, totumque spatium a duobus digitis ab occipite ad angulum fere oris occupabat: in medio

exulceratus labiis retorridis fœdissimo livore horrorem pariebat : occupabant quoque artus plures tumores duri, lividi : juvenis iste aiebat , se a nativitate tuberculum pisi magnitudine in media gena gessisse colore rubrum , duobus pilis instructum : nullum tamen se unquam inde habuisse incommodum , donec ante biennium æquus , quem collo prehe-derat , capite nævum maternum contu-derat , unde statim incœperat dolere.

Sensim moles aucta est tuberculi , & pro ratione incrementi intendebatur dolor : quapropter 10. diebus a contusione elapsis levamen quæsiturus balneato-rem accessit miser , qui primo tumorem filo circumduxit : cum autem ob ingen-tes dolores illud ferre non potuisset , variis spirituosis , acribus , imo ipso lapide infernali malum auferre tentavit , & hoc modo effecit , ut brevi spatio magnæ molis cancer faciem occu-parer.

Præfuit tamen solitis laboribus usque ad mensem Octobrem anni 1760 , quo tempore , præ doloribus acutissime lan-cinantibus nec minimam quietem habere valens , auxilium imploravit ab exper-tissimo Domino *Leber* nunc Chirurgiæ professore publico , qui illi bis de die

gr. xv. extracti cicutæ dedit, ac externe per diem partem decocto cicutæ foveri jussit, noctu vero locum emplastro cicutæ tegi: quo modo continuavit fere per quinque menses eo cum effectu, ut dolores multo tolerabiliiores fierent, & per plures horas noctu somno reficeretur.

Cum tamen victus ipsi deficeret, & non posset ea exactitudine mali habere curam, quæ requirebatur, ad nos venit 25 Februarii multum febricitans.

In causam autem febris inquirentes, experti fuimus, illum vesperi diei præcedentis multum vini cum amicis hausisse, ac carnes falsas, fumo induratas copiose comedisse: unde illico ipsi haustus purgans datus est, qui decies alvum movit magno cum febris levamine. Vespere emulso usus est refrigerante, & die sequenti apyretos erat.

Jam die præcedenti applicata fuerant fomentum & emplastrum de cicuta, primum nempe tempore diurno, alterum per noctem, quod continuatum est.

Cum tantos dolores pateretur, & jam cicutæ assuetus esset, gr. lvj. extracti cicutæ in pilulas gr. iv. redacti binis dosibus, quarum una mane altera

vespere ipsi porrigebatur, quotidie absumpsit usque ad 5. Aprilis, quo tempore dolores evanuisse asseruit; noctu quiete dormiverat, & omnes corporis functiones rite peragebat, tumor mobilior erat.

Perrexit æger eadem cicutæ dosi uti ad diem 17. Aprilis: per totum hoc tempus raro doluit, ac optime habuit: erat tunc tumor mobilior, ac in plures lobulos divisus: medium tumoris ad floreni magnitudinem gangrenescebat, & brevi a reliquo tumore separatum iri videbatur.

Dedi tunc ægro mixt. in qua dissolutæ erant extract. cicutæ dr. iij. cum fyr. diacod. dr. vj. intra biduum assumendam.

29. Aprilis pars illa nigrescens penitus excidit relicto foramine, quod nucem juglandem capere potuisset.

30. Aprilis jam illa in parte pus sat bonum incoepit formari.

6. Maii tumor in omni parte ulcerata pus bonum dabat, & manifeste minutus conspiciebatur: æger alacris erat, & quoad omnes functiones bene habebat: nihil in medendi methodo mutatum fuit.

15. Copiosum vinum furtim accep-

tum hausit, unde valde inebriatus est, & sequenti die, licet finita crapula bene haberet, omnis plaga tumoris exsiccata erat, sublata penitus suppuratione: continuavit eadem medicamenti dosi uti ad 22 Maii, sine ullo effectu, unde extracti cicutæ major dosi, drachmæ nempe duæ omni die ipsi datæ sunt: quam dosin quidem sine incommodo tulit: verum inde nulla mutatio in tumore facta est, præterquam quod ex locis minoris ulceratis parum saniei effluxerit.

2: Junii incoepit omni die extracti cicutæ dr. iij. absumere, quas etiam optime tulit sine mutatione.

9. Data est ipsi extract. cicutæ unc. β. quotidie absumenda, quæ demum intra quinque dies suppurationem in tumore denuo produxit: continuavit eadem dosi uti ad 18 Junii, quo tempore, cum tumor in omni plaga optime suppureret, tantum medicamenti dr. ij. per diem iterum incoepit sumere, & sit suppuratio per plures dies optima fuit, licet sæpius clam suillas carnes & alias sale conditas vorarit, & vinum hauserit.

25. Multum febricitabat & capite dolebat, pulsus erat durus & plenus; lingua

lingua sicca ; sitis magna ; appetitus nullus ; alvus naturalis.

Venæ sectione libra una sanguinis educta fuit , qui brevi temporis spatio crusta densa phlogistica tegebatur : pro medicamento assumpsit quotidie partitis dosibus rob. sambuci. unc. ij. cum sal. polychr. dr. j. nitri puri dr. β. & copiosum decoct. hordei cum melle potavit , ac cicuta abstinuit.

Intra quinque dies partim alvo , partim sudore judicatus est ab hoc morbo , qui suppurationem tumoris , qui externe omnia continuarunt applicari , sicut ante hanc febrem , nullo modo interturbavit.

Levioribus cibis debuit vesci ad 8. Augusti , qua carnes iterum incœpit comedere.

12. Augusti suppuratio jam multum tumoris consumpserat , & in omni plaga mollior & mobilis erat : cum vires sat bonæ essent , & sola externa applicatione medicamenti conservatam suppurationem videremus , decrevimus interne denuo data cicuta naturam juvare : sumpsit autem tantum bis de die extract. scr. j.

Tumore de die in diem magis suppurante , & minuto aliquid spei concipi-

piebamus fore, ut hoc modo totus cancer consumeretur, dum 19. Augusti æger sine licentia vespere ex nosocomio discessit ut Baccho secundum beneplacitum litare posset, quod confessus est sequenti die, dum adhuc crapulosus ad nos rediret: examinato ulcere paucissimum pus hinc inde conspiciebatur: 21. Augusti suppuratione omnino defierat, & dolores lancinantes in tumore percipiebat.

Ab hoc tempore non amplius fuit possibile suppurationem bonam revocare, tantum dolores cicuta leniti sunt: subinde tamen validi fiebant; tumor mole augebatur, unde circa initium anni 1762. pulverem ex aconiti extracto ipsi dedimus, cum a cicuta nullum amplius effectum haberemus: ab illo pulvere leniti sunt dolores, non sublati.

Mense Maio tædio diuturnæ curæ affectus ex nosocomio discessit.

Circa medium Julii ad nos denuo delatus est miserrime habens: cancer in duplo majorem molem increverat; & saniem fundebat: vehementissimis doloribus afficiebatur, & totus emaciatus & cachecticus erat.

Media mensura lact. cum potu ordinario quotidie ipsi dabatur, & varia

medicamenta paregorica sine magno effectu assumpsit : vitam demum miseramam sub finem Octobris finivit.

CASUS DECIMUS SEXTUS.

FEMINA 80. annorum ob luxatum os femoris dextri ad nostrum nosocomium sub finem Martii deferebatur.

Tentavit expertissimus Chirurgus omnia quæ repositionem juvari potuissent, verum cum luxatio jam nimis antiqua esset, omnia incassum adhibuit. Ob respirationem laboriosam, & tussiculam, qua afficiebatur, usa est decocto emolliente usque ad 8. Maii, qua cancer mammæ dextræ, quem sollicitè abscondebatur, suo foetore se prodidit. Dolores, quos, ut falsa est, jam dudum patiebatur, semper tacuerat, eo, quod malum sacrum esse crederet, quod omni medicamento exacerbaretur.

Medium mammæ latum ulcus foedum livescens multum saniei fundens cum labiis retorridis occupabat : mamma duplo major erat sinistra, in omni ambitu durissima, livida, & ita dolens, ut ad lenem attactum lacrymaretur. Aiebat ægra, se jam ante triginta an-

nos expertam esse hanc mammam duriorē & maiorem altera, annum autem tantum elapsū, ex quo incœperat dolere : dolorem sensim magis magisque auctum fuisse, donec ante quinque menses incœperit aperiri aliquo cum dolorum levamine : toto hoc tempore mammam texerat emplastro ab aliqua muliercula accepto, cuius compositionem ignorabat.

Ægræ promissimus levamen dolorum, & spem fecimus curationis, & sic illam adegimus ad ea faciendā, quæ ipsi prodesse poterant : pilulas vero assumere recusavit ; hinc mixtura sequens ipsi data est.

℞. Syr. diacod. dr. vj.

Extract. cicut. dr. j.

Aq. flor. rhæad. unc. vj.

S. intra biduum absumat.

Externe lintea carpta ulceri cancroso applicabantur decocto cicutæ imbuta, & tota mamma eodem per diem diligenter fovebatur : noctu autem linteis carptis emplastrum cicutæ imponebatur, sicut & toti mammæ, mane denuo decocto cicutæ fovendæ.

11. Maii dolores erant minores, melius dormiebat & majori cum appetitu carnes teneriores & alios cibos assume-

bat : alvus sponte omni die prodierat & somnus erat multo pacatior, modo in latus dextrum decumberet.

12. Aucta est cicutæ dosi ad scr. ij. per diem : hac dosi usa est ad 20 Maii magno cum dolorum levamine, & sine ulla functionum perturbatione : mole eadem videbatur mamma, verum margines canceri loco saniei pus tenue flavescens fundebant, & medium ulceris nigrescebat.

21. Extract. cicutæ dr. j. omni die sumere incoepit sine corporis mutatione : sensim autem mamma in omni ambitu mollescebat, medium ulceris continuabat nigrescere & ichorem dare, dum margines fat bonum pus fundebant. Sic fuit ad medium usque Junii, quo tempore pars pollicis longitudine pectori contigua in omni ambitu mammæ scirrhosam duritiem servabat, reliqua vero mamma mollescebat.

17. Junii incoepit magis dolere, febricitare, & totam fere mammam gangræna occupabat. Cura externa eadem mansit, ac ante, interne autem habuit sequentem mixturam.

℞. Extract. cort. peruv. dr. vj.

Aq. flor. rhæad. unc. vij.

Vini boni austriaci unc. ij.

Syr. diacod. unc. j. β.

M.

Sumat omni bihorio duo cochlearia :
subinde quoque emulsi paregorici unc.
ij. per diem ipsi dabantur.

21. Vespere sub deligatione omnis
moles scirrhusa mortificata una vice ex-
cidit, & subjacentes partes colore ru-
bello, sano præditas, bonum pus dantes
reliquit; in omni tamen ambitu circu-
lus semi-pollicis crassitie remansit durus:
sequenti die apyretos erat; appetitus
aderat, & carnes, quibus a 16. hujus
mensis abstinerat, denuo sibi conce-
derentur, rogabat; hinc exhibita prius
rhei electi dr. j. qua aliquoties purgata
fuit, carnes facilioris digestionis ipsi
datæ sunt, & denuo extract. cicutæ dr.
j. omni die sumpsit, & cortice absti-
nuit.

Margines duri optima suppuratione
sensim consumebantur, & ægra sat ala-
cris erat, hoc tantum dolendum erat,
quod continuo lecto affixa esse deberet.

Sub finem Julii margo durus fere
ubique consumptus erat, & hinc inde
rudimenta cicatricis conspiciebantur:
unde ab interno cicutæ usu abstinuit,

externe autem eodẽm modo continua-
tum est ac in initio.

Ab eo tempore, quo massa scirrhusa
gangræna a sanis partibus separata fue-
rat, semper sat bene habuit ægra, nisi
quod in latus sinistrum sine incommodo
decumbere numquam potuerit.

10. Augusti cum jam magna pars
ulceris cicatrice obducta esset, post mag-
nam siccitatem copiosissima pluvia toto
die cecidit, vespere apoplexia tacta,
irritò ad illam solvendam omni cona-
mine, die 11 Augusti mortua est.

In cadavere superiorem pulmonis
dextri lobum scirrhusum; & in capite
magnam feri copiam inter duram &
piam matrem effusi invenimus, ven-
triculi quoque cerebri sero pleni erant;
præter hæc in visceribus nihil præter-
naturale reperimus.

CASUS DECIMUS SEPTIMUS.

FEMINA 39. annorum ad nostrum no-
socomium 28 Junii delata est, cum ul-
cere profundo ad malleolum pedis
sinistri externum, se ad trium circiter
pollicum magnitudinem versus furam
extendente, cum marginibus duris &

superficie inæquali , multum ichoris fundente : pes & crus tumore renitente a binis annis distensum erat , & jam a 14. mensibus exulcerari incoeperat. Varia tam a Medicis quam a Chirurgis accepta toto hoc tempore usurpaverat. Verum sub illorum usu ulcus in omni dimensione auctum erat , eo modo ut ægram laboribus omnino ineptam reddiderit.

Cura hoc modo instituta fuit : cavitas ulceris linteis carptis decocto cicutæ imprægnatis implebatur , & his sicut pedi & cruri tumidis per diem imponebatur fomentum de cicuta , noctu autem emplastrum.

Interne primo assumpsit pilulas hydragogas , quæ aliquoties tempore curæ repetitæ sunt ; dosis extracti cicutæ in pilulas redacti fuit scr. j. bis de die assumendus ; diæta fuit ut sanorum , bubulam & farinacea comedit : nihil enim læsum in corporis functionibus animadvertēbatur.

Sensim frustula plura semi-mortua tam ex fundo quam marginibus ulceris a vivis separata sunt , & moles pedis & cruris imminuta. Ulcus tamen continuavit faniem fundere usque ad 22. Julii , qua pus tenue dilutum loco fa-

niei in omni plaga ulceris primo observabatur.

Initio Augusti ex ulcere optimum pus prodibat, & cavitas carne bona incipiebat impleri: margines molliores erant: pars cruris antea tumida detumuerat; pedis quoque tumor ad duas tertias partes prioris molis minutus erat.

Toto mense Augusto optime habuit: ulcus perrexit bonum pus dare, & fundus ulceris sensim magis ac magis ad altitudinem marginum jam nunc mollium ascendebat.

17. Septembris cum illustrissimus L. B. *van Swieten* dignaretur nostros ægros visitare, & plures de initio, incremento, & successu curæ interrogaret, hanc quoque ægram examinavit: vidit nullam amplius cavitatem in ulcere adesse, ac jam circumcirca cicatricem a marginibus circa centrum adhuc parum suppurans extendi: ægra quoque tunc, quæ ut plurimum in lecto manere debuerat, ut fomenta melius applicari possent, potuit extra lectum esse, cum solo tunc cicutæ emplastro externe indigeret, dum tamen interna cura continuaret eadem esse.

Dum 11. Octobris denuo ad nos

rediret illustrissimus Præses, invenit
ulcus optima cicatrice obductum, &
ægram sanissimam, quæ abstinuit tunc
omni medicamento & brevi post e
nosocomio dimissa fuit.

CASUS DECIMUS OCTAVUS.

FEMINA 70. annorum ad nos 29. Julii
venit. Hæc ab annis duobus tumorem
habebat ovi anatis magnitudine durissi-
mum, supra articulationem ossium carpi
cum metacarpis in parte illorum convexa
situm, immobilem, qui manum &
digitos introrsum premebat cum omnium
rigiditate; indolens erat; functiones
naturales & vitales animales quoque, si
motum læsum excipias, bonæ.

30. Julii incoepit bis de die extract.
cicutæ scr. j. sumere, ac tumor tempore
diurno decocto cicutæ fovea noctu em-
plastro ejusdem nominis tegebatur.

9. Augusti poterat manum & digitos
movere & retrorsum flectere; tumor
quoque tertiam prioris molis partem
amiserat.

Continuavit cicuta uti, & tumor
ille ita sensim minutus est, ut 17. Sep-
tembris dum illustrissimus Præses illam

vidit, vix vestigium tumoris superesset,
& libero manus motu gauderet ægra.

CASUS DECIMUS NONUS.

FEMINA 40. annorum 20. Julii ad nos venit; hæc per semi-annum febre, illam modo ad instar quartanæ, modo tertianæ, ac etiam quotidianæ aggrediente laborabat; multum emaciata erat, & tumorem durum integram palmam manus infra costas ex hypochondrio sinistro descendentem circiter fefqui palmam latum jam in tertium mensem habebat: alvus tarda erat; appetitus paucus, somnus turbatus, pulsus extra paroxysmum inæqualis, subinde intermittens; respiratio sat bona.

Apud nos febris tertianæ typum servavit, & pro medicamento decoctum N. 19. ipsi datum est, quo per sex dies usa a febre libera fuit: verum mansit eadem durities & moles tumoris, & si alvum excipias, quæ sub usu prædicti decocti sponte prodibat, functiones nullo modo in melius mutatæ sunt.

Continuavit decocto graminis uti usque ad 8. Augusti sine ulla mutatione.

9. Augusti dedi illi bis de die extracti cicutæ in pilulas redacti gr. xvj.

Alvus quotidie movebatur, & 13 ejusdem mensis, cum ob appetitum auctum reliqua alimenta ipsi non sufficerent, carnes leviores concessæ sunt.

Perrexit eadem cicutæ dosi uti ad 19. qua cum nullam mutationem experiremur, illi ter de die extracti gr. xvj. dedimus.

20. & 27. Sensum fornicationis sæpius repetentem in tumore sentiit: 28. dolores percepit subinde sat magnos, ac ideo ipsi datum est decoctum N. 20. intra biduum assumendum, quod alvum decies movit, & dolores sedavit.

Prima Septembris denuo incœpit priori cicutæ dosi uti, quam per septem dies sine incommodo sumpsit.

8. Iterum de fornicatione dolorifica in tumore conquesta est; quapropter ipsi denuo decoctum herbæ mercurialis præscriptum fuit, a quo per biduum pluries purgata est.

Minutus est inde fornicationis sensus, verumtamen non penitus disparuit, & pulsus leniter febrilis fuit usque ad 14, quo tempore carnibus abstinuit, & loco cicutæ emulsum refrigerans sumpsit.

16. Dum pulsus naturalis esset, ite-

tum bis de die extract. cicutæ in pilul. redacti scr. j. sumere inchoavit: tumor tunc examinatus videbatur mole paulo minor, & optimo appetitu gaudebat ægra, unde licuit ipsi tenerioribus carnibus vesci.

Per totum mensem Septembrem omni die semel vel bis alvum habuit: tumor sub usu cicutæ continuato mansit indolens, & ægra sæpius extra lectum erat sedens, vel in cubiculo deambulans.

Initio Octobris catharro valido laboravit ægra, respiratio valde impedita fuit, & tussis initio frequens & sicca: remediis pectoralibus demulcentibus, & expectorantibus intra quindecim dies a catharro liberata fuit: ventriculus vero debilitatus paucos cibos ferre potuit; assumpta tamen bis intra sex dies rhei elect. dr. j. appetitus restitutus est, & licuit denuo carnibus vesci, quibus ab initio catharri abstinuerat.

24. Octobris denuo incoepit priorem cicutæ dosim sumere: 25. Illustrissimus L. B. *van Svvieten* ægram in nosocomio examinavit, & tumorem invenit qualis supra descriptus est.

Perrexit cicuta uti sine incommodo usque ad 6. Novembris, qua incoepit tumor dolere, pulsus quoque solito celerior esse, & ægra minus appetere.

Abstinent carnibus, & 7. & 8. denuo usa est decocto N. 20. a quo copiose purgata est cum magno doloris decremento, & notabili tumoris collapsu.

Post purgationem per quatrimum emulso refrigerante usa est, sub cujus usu dolor residuus penitus disparuit: unde 15. iterum incoepit cicuta uti & 20. carnes ipsi denuo concessæ sunt.

Reliquo hujus mensis tempore nihil interturbavit cicutæ usum, & 5. Decembris dum feminam in nosocomio vidit illustrissimus Præses, invenit tumorem vix mediam prioris molis partem habentem, faciem bene coloratam, & feminam quoad reliqua sanam.

Ab eo tempore, quo denuo incoepit cicuta uti, purgante non amplius opus fuit: alvus enim sponte omni die semel, quandoque etiam bis prodiit, atque in dies mole tumor fiebat minor, & omnes actiones optime peragebantur, donec 28. ejusdem Decembris magnum oris amarorem, nauseam, & capitis sinistræ partis dolorem conquesta est.

Datum est ipsi tunc decoct. Numero 20. cui spir. sal. acid. scr. i. addebatur, intra biduum assumendum, a quo pluries alvus mota fuit, & oris amaror multum imminutus, nausea disparuit,

& hemicrania minus molesta evasit ; dein per quinque dies acescentibus usa est , quibus oris amaritudo penitus disparuit : dolor vero capitis , licet multum minutus , permanfit.

Postea ab omni medicamento abstinit , & solis cibis facile digerendis usa est ; appetitus tunc vigebar , & actiones omnes cæterum bonæ erant , nisi quod hemicrania quandoque acutius , & subinde otalgia per aliquot horas in eodem capitis latere afficeret ægram.

Cum autem adhuc aliquid de priori tumore superesset , dedi denuo 10. Januarii , bis de die extract. cicutæ gr. xvj. quod continuavit ægra usque ad finem Januarii , quo tempore nullum amplius præteriti tumoris in abdomine vestigium aderat. Cicuta ergo non amplius opus erat : unde illa abstinuit.

Tempore , quo hac ultima vice usa est cicuta , hemicrania & otalgia subinde per plures horas , imo per diem siluerunt , denuo recrudescentes : cæterum ægra sat bene habuit , & initio Februarii incoepit carnibus tenerioribus vesci.

6. Hujus mensis illustrissimus Præses ægram examinavit , & addomen ubique naturalis mollitiei invenit.

Retro aurem sinistram vesicans applicatum est, ea spe, ut dolor auris & capitis leniretur; verum nullum levamen habuit: 11. vero magna puris sat boni quantitas ex aure effluens dolores minuit; puris pauci effluxus duravit usque ad finem Februarii, & sic ægra ab hemicrania & otalgia liberata fuit.

Post hæc omnia femina licet sat benevalens, vires non habebat sufficientes ad solitos labores obeundos: statuimus ideo, illam in nosocomio retinere, donec robustior esset: verum res lente processit.

Sub finem Martii conquesta est de dentium doloribus, & gingivas examinantes, vidimus illas lividas, scorbuticas esse, & digito leniter fricatæ sanguinem fundebant: tonsilla sinistra ulcusculo in ambitu albescente occupabatur.

Sumpsit decoctum herbæ mercurialis solito cum effectu: dein conserva antiscorbutica usa est; melle rosarum cum spiritu salis gingivæ & ulcusculum in sinistra tonsilla natum sæpius per diem illiniebantur.

10. Dierum spatio ulcus illud curatum est, gingivæ vero colorem scorbuticum servabant, & subinde sanguinem fundebant.

14. Aprilis incoepit tussire, & tussi sæpius sanguinem rejiciebat : conservæ antiscorbuticæ loco usa est decocto radicis salab. quo & sputum cruentum & tussis sex dierum spatio sedata sunt.

Incoepit post hoc seri lactis lib. j. cum syr. fumaricæ unc. j. β. & succi semper-vivi major unc. ij. omni die absumere, & tantum alimenta acrimoniæ involvendæ & superandæ apta ipsi concedebantur.

Hac methodo tractata est ægra ad 18. Maii : quo tempore nulla mutatio in melius facta, e contra incoepit artubus superioribus per vices admodum dolere.

Cum hæc vidi, dedi ipsi sequens :

R. Seri lact. lib. j. β.

Extract. cicut. dr. j.

Syr. fumar. unc. ij.

M.

S. intra biduum absumat.

Hoc medicamento usa est tanto cum effectu, ut intra quatuor hebdomadas sanissima facta fuerit, nullo scorbuti superstite signo. Initio Julii vidit illam illustrissimus Præses optime valentem, & 15. ejusdem mensis ex nosocomio discessit : ab hoc tempore feminam hanc bis vidit illustrissimus vir bona sanitate

fruentem, dum in nosocomium grato animo mota accessit, gratiarum actiones pro restituta sanitate repetitura.

CASUS VIGESIMUS.

JUVENIS 20. & aliquot annorum 8. Augusti 1761. ad nos venit. Hic jam a binis annis aiebat se lingua dolere, quæ jam a sesqui-anno exulcerata erat: balbutiebat, & admodum difficile intelligebatur.

Aperto ore vidimus linguam fere penitus cancro exesam; æger magnos dolores patiebatur; difficulter assumpta deglutiebat; somnus tamen sat bonus erat.

Expertissimus Chirurgus statim primo die incoepit linguam linimento ex melle rosarum & extracto cicutæ parato ter quaterve illinire, & infuso cicutæ abluere. 9. Augusti haustum N. 9. sumpsit, & 10. incoepit ter de die extract. cicut. gr. xvj. sumere.

18. Hujus mensis residuum linguæ cancrofæ incoepit bonum pus dare; æger optime quoad cætera se habebat, & dolores multo leniores erant.

Nihil usum cicutæ interrupit, lingua

continuavit bonum pus dare, molliri. Sub finem Septembris sensim minutâ est suppuratio, & hinc inde in ulcere, non amplius canceri nomen merenti, rudimenta cicatricis conspiciebantur. Residuum tamen linguæ licet mollius, quam dum nosocomium intraverat, nondum videbatur mollitie naturalis.

Perrexit itaque cicuta eodem modo interne & externe uti.

25. Octobris illum vidit illustrissimus Præses: ulcus tunc totum cicatrice obductum erat: suasit tamen illustrissimus vir, ut per aliquod tempus continuaret adhuc cicuta uti, ne malum forte successu temporis recrudesceret: verum cum ab omni dolore liber esset, & bona sanitate gauderet, recusavit diutius medicamento uti, & initio Novembris e nosocomio discessit.

CASUS VIGESIMUS PRIMUS.

PUER 8. annorum 29. Julii ad nos-
trum nosocomium venit: narrabat pater,
illum jam a quinque annis scrophulosum
esse.

Examinantes vidimus in utroque colli
latere tumorem ex multis glandulis sibi

arcte cohærentibus compositum, qui a parotidibus incipiens ad cervicem usque posterius pertingebat, per totam colli longitudinem usque in partem capitis capillatam extensus, crassitieque in media parte magnum ovum anserinum adæquabat: & tinea jam dudum caput defœdebatur.

Tumor sinistram colli partem occupans jam a binis annis & ultra apertus, lividus serum acre paucum cum materie calcarea mixtum fundebat: in eo tumore dolores lancinantes jam a pluribus mensibus patiebatur. Glandulæ submaxillares divisos tumores in utroque latere formabant variæ magnitudinis.

Abdomen erat valde durum: color erat cachecticus, flavescens: adnata oculorum cærulescebat: respiratio brevis & post motum celeris peragebatur: pulsus erat celer, inæqualis, appetitus paucus, alvus tarda tantum omni biduo vel triduo prodiens, dura.

Datum est ipsi tunc sequens medicamentum.

R. Aq. laxat. D. U. unc. iv.

Sal sedlicens. dr. ij.

Syr. mannat. unc. ij.

M.

S. Mane duo cochlearia sumat, dein

omni hora cochleare, donec purgetur,
& sequenti die eodem modo pergat.

Hac mixtura per tres dies leniter
purgatus est cum aliqua respirationis
emendatione.

2. Augusti incoëpit mixtura sequenti
uti.

℞. Extract. cicut. scr. ij.

Aq. rhæad. unc. iv.

Syr. flor. rhæad. unc. β.

M.

S. quater de die unc. β. sumat.

Sub usu hujus mixturæ, quæ bis re-
petita fuit, alvum naturalem omni die
habuit: alacrior factus est, & sexta ejus-
dem mensis valde gaudebat puer, quod
loco dolorum pruritum solum perci-
peret: optime dormiverat, abdomen
minus tensum erat: verum quoad reli-
qua nulla mutatio percipiebatur.

8. Pus ex tumore lateris sinistri effluere
observavimus. Tumor lateris dextri ma-
nifeste in plures tumores dividebatur,
& glandulæ submaxillares videbantur
mole minui; alvum quotidie bis terve
copiosam liquidam deponebat: appe-
titus erat optimus: abdomen tamen
fere in eodem statu: cum viderem puero
cicutam adeo conducere, præscripsi
sequentem formulam.

R. Extracti cicutæ dr. j.

Aq. meliss. unc. iv.

Syr. flor. rhæad. unc. β.

M.

Ufus ut prioris.

Ad vigesimam usque Augusti hæc mixtura usus est. Toto hoc tempore bene habuit : viguit appetitus, somnus optimus fuit, alvum quotidie bis vel ter deposuit, & urina solito copiosior erat. Tumor lateris dextri in alios minores variæ magnitudinis divisus est, ac in tumore lateris sinistri, præcipue circa margines animadvertimus plures glandulas separari a reliquo tumore, qui quoque minoris molis erat, & continuabat paucum pus fundere.

Addidi tunc priori mixturæ extracti cicutæ dr. β. ut quotidie extracti grana xlv. absumeret. Primis tribus diebus, quibus hanc dosin absumpsit, quater nychthemeri spatio purgabatur.

24. Augusti alvus minus frequens fuit, verum urinam multo copiosiore reddidit: quod continuavit reliquo mensis Augusti, quo tempore omnia ita mutata sunt, ut 31. in sinistro latere glandula una submaxillaris binarum nucum sibi secundum longitudinem adglutinatarum magnitudinem solum refer-

ret : in dextro latere una quoque supererat paulo minor : reliquæ autem submaxillares multo minores erant, & quædam ita parvæ, ut nucem avellanam magnitudine non superarent.

Tumor dextri colli lateris divisus erat in decem & ultra partes. In tumore sinistri colli lateris tres glandulæ a reliquo tumore penitus separatæ erant, pars quoque ulcerata sat bonum pus continuabat fundere : æger urinam copiosissimam mittere pergebat, & alvum bis vel ter de die deponere : color cachecticus in lætiorem quoque mutabatur.

Hoc in statu eum ad illustrissimum Præsidem adduxi, qui, omnibus bene examinatis, jussit sic continuarem, mandavitque, ut puerum ipsi iterum post aliquod tempus adducerem.

17. Septembris illustrissimus Præses invenit glandulas colli in parte dextra in plures adhuc minores & satis parvæ molis quidem dissiluisse ; in latere sinistro suppurabantur, & pus bonum inde prodire vidit : simul multum minuta erat moles ; abdomen detumuerat, facies florida erat, & tinea capitis fere integre disparuerat.

Perrexit eadem dosi medicamento uti sine ullo incommodo, & dum 11

Octobris in nosocomio illum denuo videret illustrissimus vir, notavit sequentia.

In parte dextra multum denuo minuti erant dolores: in parte sinistra levis adhuc suppuratio aderat, & moles tumorum plurimum minuta; facies bene colorata, oculi vividi, tinea capitis sanata, abdomen detumescere pergebat.

13. Octobris binos novos tumores sub axilla dextra deteximus ovi gallinacei mediocris magnitudine. Interrogatus puer, a quo tempore illos gereret, respondit eos æque antiquos esse, ac reliqui, quos circa collum habebat, verum se nunc tantum ab aliquibus diebus dolorem ibi percipere, tactu experiebamur illos mollescere. Cæterum omnes functiones sat bonæ erant.

20. Incœpit æger iterum valde copiosam urinam mittere, quod per tri-duum duravit, quo tempore alvus tarda fuit.

25. Illustrissimus L. B. *van Svvieten* puerum vidit bene valentem; tumores in utroque latere sensim magis minui, & tumores sub axilla mollescere.

4. Novembris unus tumor sub axilla sponte apertus pus optimum fudit, alter vero multo minor fiebat.

14. Vidit illustrissimus vir totum abdomen detumuisse, & in lecto, dum jacebat puer, omni modo tangere potuit, nec ullam amplius duritiem deprehendit: tumor in sinistra colli parte penitus mollitus, & in dextra fere integre solutus erat, & qui sub axilla dextra aderat, pariter multum minutus.

30. Conquestus est capitis dolorem, qui sumpto purgante evanuit, & æger continuavit cicuta uti.

Dum 5. Decembris iterum adesset illustrissimus Præses, vidit tumorem in parte sinistra colli sponte apertum, pus satis bonum dare, multumque minui, & tumorem sub axilla valde parvum, puero quoad reliqua sano.

15. Incœpit febricitare, quod per tri-duum duravit, quo tempore parvus tumor, qui sub axilla supererat, multum elevatus est; puer abstinuit a cicuta per quinque dies, dein incœpit iterum illa uti.

30. Tumor ille sub axilla totus mollis sponte apertus est, & pus dedit: alvus fere omni die bis deponebatur; diuresis erat minus copiosa.

2. Januarii anni 1762. notavit illustrissimus vir tumorem in sinistra parte non multum minutum, suppurare ta-

men : in dextra parte dissilire residuum in minores partes , & tumorem sub axilla suppurando consumptum esse.

Æger postea tantum omni die extracti cicutæ dr. β. sumpsit : verum ab hac dosi nulla mutatio in melius facta est , & dum 6. Februarii denuo augere medicamenti dosin mentis essem ; parentes promissione celerioris curationis nescio a quo ipsis facta , seducti , puerum noluerunt diutius in nosocomio relinquare.

Domi puerum detinuerunt fere per binos menses , & varia externe applicuerunt , interne sumenda dederunt , quæ pueri sanitatem ita labefactarunt , ut dum initio Aprilis ad nos denuo deferretur , vix cognoscendus esset : totus exsiccatus erat , febricitabat , continua siti afficiebatur , & alimenta respuebat : collum circumcirca ulceratum & triplo magis tumidum , quam antea , foedissimum aspectu erat.

Omni artis molimine conati fuimus : per 12. dies ægro levamen adferre : verum omnibus incassum adhibitis æger tabefactus periit.

CASUS XXII.

FEMINA 50. annorum Viennam initio Augusti petiit, ut a tumore magno duro, quem in mamma sinistra gerebat, curaretur.

Verum nec Medicum nec Chirurgum accessit usque ad 21 Septembris, qua ad celeberrimum Chirurgiæ Professore *Leber* venit, dum fortuito casu apud illum eram.

Narravit femina se per 20. annos omni mense, antequam menstrua prodirent, mamma sinistra doluisse, ac plura parva tubercula in eadem orta esse, quæ tamen elapso menstruorum tempore sensim disparebant.

Hinc hoc non multum curavit; jussit tamen domina, apud quam tunc in famulatu erat, ut consilium rogaret a Medico, qui factò examine commendavit ipsi, ut sui curam sollicite gereret, aitque cancrum præcipue cessantibus menstruis metuendum esse: interim affirmabat femina, se nullam permanentem duritiem animadvertisse, nec recordabatur, quo anno cum illo Medico locuta fuisset, aiebat tantum mul-

tos ab eo tempore annos elapsos esse.

Jam a tribus annis menstruorum fluxus cessaverat, nec quid in mamma incommodi inde perceperat, donec ante 9. vel 10. menses infans apud illam in lecto jacens caput fortiter in eandem mammam sinistram impegisset.

Magnum tunc dolorem percepit, & elapsis aliquot diebus in sinistro mammæ latere tumor durus ortus est, nucem moschatam figura referens, qui postea sensim increvit, nullam ipsi molestiam creans.

Elapsis vero tribus circiter mensibus ab initio mali incoepit dolores lancinantes subinde percipere, tumor continuo increvit, unde & doloribus sæpius repetentibus & crescente tumoris mole territa demum Viennam venit.

Primis septimanis, quibus hic fuit, præ metu sectionis artis peritos non consuluit: sed ab aniculis accepta varia unguenta & emplastra mammæ applicuit; unde moles tumoris aucta, & dolores majores & frequentiores orti.

Initio vero hujus mensis suavit ipse aliquis, ut pilulas de cicuta hoc modo fumeret, ut primo die mane 3. vespere vero 4. sequenti die mane 4. vespere vero 5. absumeret, donec dosis esset

pilul. N. 10. deinde sensim minueret dosin ; herbam quoque cicutæ contusam externe applicuit ; verum hanc non potuit ferre : ac ideo unguento aliquo externe usa est. Ab eo tempore ait dolores minores, & minus frequentes esse, molèmq; & duritiem tumoris minui.

22. Septembris eam ad illustrissimum Præsidem duxi, qui invenit tumorem durum, scirrhosum in mamma sinistra, qui sub papilla incipiens axillam versus tendebat, quinque pollices longum, & duos latum a parte inferiori a subjectis liber, & mobilis erat, sub papilla adhærebat integumentis: in illa parte, quæ versus axillam tendebat, liber erat & mobilis, & subinde lancinationes patiebatur. Fassa est præterea, quod ante 4. menses per octiduum sumpserit tres pilulas extracti cicutæ mane & totidem vesperi ; dein abstinuit, crevit postea tumor, & applicato emplastro, quod quale fuit, ignorat, vocat *Mirackel Pflaster*, *emplastrum miraculosum*, magis intumuit mamma, & durior facta est.

Dedi ipsi bis de die extract. cicutæ in pilulas redacti scr. j. & externe infuso cicutæ mamma fovebatur.

Illam denuo illustrissimus vir vidit II

Octobris : scirrhi longitudo per pollicis & medii longitudinem decreverat ; latitudo fere eadem , altitudo seu crassities scirrhi minor , hinc planior apparebat , & papillæ adhæfio ad scirrhum suppositum minor : vidit simul aliquid sanguinis ex papilla effluxisse.

14. Iterum aliquot guttulæ sanguinis ex papilla exstillarunt.

Idem accidit 16. 18 & 19. ab eo tempore continuo papilla emplastro de cicuta tecta servabatur.

14. Adhuc aliquid sanguinis exstilla-
vit ; cæterum toto hoc 15. dierum spa-
tio ægra quoad omnes functiones conti-
nuavit bene se habere.

Illustrissimus L. B. *van Svvieten* ite-
rum vidit illam 25. scirrhus in omni
dimensione erat minor , mollior , pla-
niorque , & incipiebat in minores partes
dividi.

Ab eo tempore aliquoties adhuc gut-
tula sanguinis ex papilla effluxit. Cæ-
terum bene habuit , & omnia perrexe-
runt mutari in melius , quod vidit ipse
magnificus vir 14 Novembris.

5. Decembris observavit scirrhum
mole magis minui , planiorem fieri , &
in minores partes magis magisque sece-
dere , quæ tamen ad tactum adhuc

duræ erant : eadem notavit 2 Januarii.

Per tres primos mensis Januarii dies diarrhæa laboravit , ac ideo loco cicutæ decoctum radicis salab. cum laudano ipsi datum est , cui diarrhæa facile obtemperavit , & 8 Januarii potuit denuo cicuta uti.

6. Februarii notavit illustrissimus vir tumorem insigniter minui , & dissilire in partes parvas , oblongas.

Perrexit ægra cicuta uti sine incommodo : sexta vero Martii non invenit illustrissimus vir tumorem magis minutum esse , quam ultima vice , qua illam viderat ; tumor tamen tribus quartis ejus molis , quam habebat , dum ad nos venerat , partibus minor erat , nec ullos amplius dolores patiebatur , ita ut spes magna foret integræ resolutionis : verum ægra lautiori dietæ assueta , de cibis , quos in nosocomio adquirebat , non contenta ad suos rediit.

24. Octobris vidi illam aspectu sanam , in platea celeriter incedentem.

CASUS XXIII.

FEMINA 29. annos nata 28. Julii ad nos venit , & retulit , se ante quinque

annos tumore & induratione glandularum finistri colli lateris laborasse, quæ cineribus calidis applicatis minutæ fuerant, verum a 3 $\frac{1}{2}$ annis licet vari externe applicuisset, sensim increverant, ita ut tunc adesset tumor livescens ex duobus sibi cohærentibus compositus, valde elevatus, circiter quatuor digitos latus, longitudine latitudinem paulo superante; glandula quoque thyreoidea, præcipue in parte dextra tumorem strumofum formabat ovi semi compressi figura: collum vix movere poterat.

Ægra emaciata erat, & coloris cachectici subflavescentis; appetitus erat parvus, & de doloribus hypochondriorum subinde repetentibus conquerebatur: abdomen tamen examinatum nullam præ se duritiem ferebat.

Post lene purgans assumptum incoepit bis de die extracti cicutæ in pilulas reducti scr. j. uti, quo intra mensis spatium id effectum est, ut colli tumores manifeste minui viderentur, & dolores rariores in hypochondriis facti fuerint.

Nihil interrupit cicutæ usum, nisi subinde interpolatum lene purgans; ægra carnibus tenerioribus & aliis facile digestionis cibis nutrita est: ventriculus enim duriora non ferebat, & paulo majori

quantitate assumptaangebatur: sensim tamen tumores ita mutati sunt, ut illustrissimus Præses, qui illam viderat antè ipsius ingressum in nosocomium, notaverit.

12. Novembris, tumorem glandulæ thyreoideæ fere integre disparuisse & alium tumorem insigniter minutum in plures minores dissiliisse, illiusque colorem livescentem in rubicundum mutatum; cæterum habitus corporis in melius non erat mutatus, ac hypochondriorum doloribus subinde continuabat vexari: simul tunc cum solita cicutæ dosi incœpit decocto graminis, taraxaci &c. uti, qua methodo continuavimus interpolato subinde leni purgante usque ad finem Februarii, quo tempore tumor glandulæ thyreoideæ penitus disparuit, & alter tumor fere integre resolutus est: ægra quoque tunc collum liberrime movebat.

Ultimo Februarii die cum jam a plurimis diebus appetitu solito majori gauderet, & cibos duriores, qui ipsi denegabantur, expeteret, clam ab amicis acceptas carnes sale conditas, & fumo induratas magna copia comedit, ac de super vinum vile copiose hausit, unde in dysenteriam incidit, quæ nulla arte

curari potuit, & ægra initio Aprilis mortua est.

In cadavere invenimus hepar admodum parvum, durum, coloris, cinereo-flavescentis: vesicula fellea erat bile spissa plena; mesenterium innumeri parvi scirrhi occupabant: in intestini colli sinistri cavitate millena parva tubercula fusca visui se offerebant: in reliquis visceribus nihil morboſi repertum est.

CASUS XXIV.

TRIGINTA duorum annorum femina nosocomium 22. Augusti 1761. ex platea delata fuit, jam per octo dies dysenteriae symptomata pessima patiens.

Dum illam primo examinavimus, fere omni horæ quadrante diro tenesmo ad alvum deponendam cogebatur: tormina fere continua erant, pulsus erat celer, debilis, vires collapsæ, respiratio sat bona, lingua ficca, sitis multa, appetitus nullus: totum corpus scabies deturpabat. Morbo acuto laboraverat hæc femina tempore quadragesimæ, a quo tempore parotis sinistra erat tumida, dura scirrhusa, multæque glandulæ colli a parte capillata capitis ad claviculam

usque tumorem formabant superius ex aliquibus glandulis unitis compositum : inferius vero versus humerum plures erant tumores disjuncti, durissimi, nunc juglandum magnitudinem fere omnes æquantes. Color totius corporis erat ex fusco flavescent.

Ilico huic feminæ præscriptum est decoctum mucilaginosum, cui laudanum purum admiscebatur, interne assumendum; abdomen cataplasmate emolliente involutum est, ac enema e mucilagine gummi tragac. & laudani puri gr. iij. aq. unc. vij. injiciebatur.

His pro ratione repetitis intra sex dies dysenteria & reliqua symptomata disparuerunt, sola superstite debilitate. Conatus sum dein ægram congruis alimentis reficere.

Dominus Chirurgus statim primo die vetante dysenteria ne curam tumorum internam aggrederer, illos mundavit ac vidit ex parotide saniem tenuem per parvam aperturam fistulosam exstillare; applicuitque externe fomentum de cicuta de die, noctu vero emplastrum ejusdem plantæ.

13. Septembris cum vires jam multum refectas viderem, ipsi mane iv. pilul. gr. iv. sumendas præscripsi & vespere toti-

dem : continuavitque quotidie eam dosim fumere : injectiones quoque tunc cum decocto cicutæ singulis diebus in ulcus fistulosum mane & vespere factæ sunt.

17. Eam cum aliis ægris illustrissimus Præses vidit, quo tempore vix aliquid in tumoribus mutatum erat.

Nullam quoque mutationem notabilem observavimus ad 28 usque, qua parotis paulo minor & minus dura bonum pus fundebat, & in qua nihil amplius fistulosi deprehendebatur : reliqui vero tumores nullam mutationem exhibebant : ex manibus autem squammulæ multæ scabiosæ decidebant.

Sumpsit tunc omni die extracti cicutæ dr. j. 3. Octobris incoepit dolore parotide & reliquis tumoribus. Cæterum nec in functione vitali, nec in reliquis aliquid mutatum est. Hinc in eadem medendi methodo perreximus.

11. Notavit L. B. *van Swieten* parotidem ultra mediam suæ molis partem amisisse, residuumque mollius esse, & pus bonum licet paucum inde prodire.

25. Videns illam denuo vir illustrissimus, observavit omnes tumores pergere minui, & cutim a scabie sensim mundari.

8. Novemb. bini tumores in collo

aperti sunt pluribus foraminibus, ex quibus pus optimum effluxit.

14. Novembris denuo in nosocomio adfuit illustrissimus vir; scabies tunc fere tota evanuerat; tumor parotidis & glandularum colli fere totus subsederat, blanda in apertis tumoribus aderat suppuratio; sed 1. Decembris advertimus scabiem, quæ fere integre disparuerat, repullulare, quæ 7. ejusdem denuo minuebatur, & 16. penitus disparuerat.

18. Incidit in febrim intermittentem quotidianam, quæ dato decocto graminis cum sale polychresto post quartum paroxysmum sublata est: superfedit usui cicutæ usque ad 2. Januarii, qua denuo incoepit illius dr. j. quotidie absumere.

5. Patefecit nobis custos ambas hujus feminae mammas male affectas esse, quod sollicite tacuerat, metuens ne Chirurgus scalpello aperturam faceret.

Ambæ mammae erant tumidæ molles, materialiquida plenæ.

In dextra durities nulla percipiebatur; in sinistra autem supererat circulus durus, pollicis fere altitudine.

Non potuimus a femina expiscari, a quo tempore hæc mamma indurata esset, tantummodo dixit, quod jam ante 20,

annos in illa abscessum habuisset, qui tunc temporis curatus fuerat.

9. Januarii mamma dextra sponte aperta est & magnam puris boni copiam fudit, tumore integre collabente.

Mamma sinistra incoepit quoque 25. materiem ichorosam fundere, & circulus durus fere totus disparuerat.

Perrexit assumere quotidie dr. j. extracti cicutæ ad 26. qua cicuta & carnibus ob diarrhæam, qua affecta fuit, abstinere debuit, datis vero demulcentibus intra biduum cessavit diarrhæa, & 30. iterum potuit solita cicutæ dosi uti.

6. Februarii vidit illustrissimus Præses omnia magis & magis in melius pergere: vultus erat melior, tumor in latere sinistro colli vix aliquid reliquum monstrabat; ambarum mammarum moles supuratione consumpta erat.

Carne vitulina & similibus facilioris digestionis cibis vescebatur, & ita sensim omnia in melius mutata sunt, ut sub finem Februarii mamma dextra mollis esset, & illius ulcus cicatrice obductum, in sinistra quoque cicatricis rudimenta conspiciebantur, & in collo vix vestigium tumoris supererat.

2. Martii ægra valde appetens clam

ab amica accepta varia alimenta magna quantitate comedit, ac circa vespertas ter copiose vomuit, & incoepit febricitare, aptis medicamentis per sex dies applicatis febris sedata est, & ægra denuo incoepit multum appetere.

9. Hujus mensis cum vinum & carnes petiisset, quæ custos ipsi recusavit, ira ita exarsit, ut inde convulsio totius corporis orta fuerit, in qua mortua est.

CASUS XXV.

VIR 60. annos natus 12. Septembris 1761. ad nos delatus narravit, se ante octo annos in parte externa cruris sinistri in inferiori parte furæ sclopeto ictum fuisse, unde ulcus nascebatur, quod toto 8. annorum tempore apertum saniem fuderat cum magnis sæpe doloribus: illa vero æstate tam acris evaserat sanies, ut late & profunde crus exedisset: mense Augusto multi vermes ex illo prodierant.

Dum prima vice illum vidimus ulcus fordidissimum ita foetebat, ut vix non concederim, illud propinquius examinans: appetitu carebat æger, febricitabat, emaciatus erat, valde cachecti-

cus , ac jam per tres dies ob nimios dolores absque fomno.

Externe ulcus decocto cicutæ cum paucō spiritu salis statim incœpit diligenter foveri : interne habuit mixturam vinosam.

Hoc modo intra tres dies foetore multum imminuto ulcus incœpit mundari , & nausea simul ac febricula disparuerant.

17. Septembris sumpsit rhei elect. dr. j. unde appetitus optimus renatus est , & 18. carnes ipsi concessæ sunt , ac simul incœpit bis de die extracti cicutæ scr. j. sumere ; tunc quoque fomentum cicutæ sine spiritu salis ulceri applicatum est.

Cicutam optime tulit , & ulcus initio Octobris mundum pluribus in locis pus paucum tenue dabat.

Vidit illum illustrissimus Præses 25. Octobris : color cachecticus cum in lætiores mutabatur ; ex omni plaga ulceris optimū pus prodibat , & cavitas illius omni die minuebatur.

Perrexit bene habere & sensim ita mutatum est ulcus , ut dum. 14. Novembris illustrissimus Præses denuo adfuit in nostro nosocomio , medium ulceris adhucdum parum suppurantis æquale esset

marginibus, & jam rudimenta cicatricis conspicerentur; color cachecticus disparuerat, & omnes functiones bonæ erant.

Solo cicutæ emplastro ulcus tegebatur, & licet propter ulcus interno cicutæ usu non amplius esset opus, illa perrexerit uti, ut sanguinis acrimonia magis magisque vel corrigeretur, vel ex corpore eliminaretur.

Vigesima cum alvum per tres dies non habuisset, haustum purgantem sumpsit, unde pluries purgatus est.

Continuavit bona sanitate frui, & dum quinta Decembris denuo illum examinavit illustrissimus L. B. *van Swieten*, totum ulcus, excepta parva plaga in medio mariani magnitudine cicatrice obductum erat, & æger sat libere poterat per cubiculum incedere.

2. Januarii anni 1762. vidit illustrissimus vir ulcus integre curatum, & ægrum tunc optime valentem; illum tandem mense Martio ex nosocomio dimisi, commendans illi, ut oleraceis & herbis antiscorbuticis copiose tota æstate vesceretur, & statim me accederet, si sanitas illius vel minime labefactaretur.

CASUS XXVI.

VIRGO 30. annorum ad nos anno 1761. 14 Septembris venit cum ulcere supra malleolum externum cruris sinistri lato, profundo, quod jam ab anno a contusione ortum nullis remediis potuerat curare, & multum saniei fundebat; crus circum malleolum tumebat, & ægra jam per sex menses admodum difficile crure uti poterat, menstruis jam in quartum mensem carebat: aspectu tamen sat sana videbatur.

Externe more solito linteis carptis decocto cicutæ madidis cavitationem ulceris implevit expertissimus Chirurgus & de super fomentum cicutæ applicuit.

15. Septembris pulvere hydragogo purgata est, & 16. incœpit bis de die extracti cicutæ in pilulas redacti scr. j. fumere.

Omni octavo vel nono die tempore curæ sumpsit pilul. N. 22.

Dum 25. Octobris illam vidit illustrissimus Præses, tumor cruris paulo minor erat; non multum dolebat; pus tamen in ulcere nullum.

30. Octobris pus tenue paucum exul-

cere prodire advertimus, quod sensim ita in melius mutatum est, ut 14. Novembris optimum esse videret, illustrissimus L. B. *van Swieten*: tumor quoque penitus conciderat, & cavitas ulceris fere omnino impleta erat, puella optime habente.

18. Novembris mēstrua prodire, quæ debite per 4. dies fluxerunt, nec eo tempore cicuta abstinuit.

25. Cum jam inciperet cicatrix formari, solo cicutæ emplastro ulcus tegebatur: continuavit tamen eandem extracti dosin sumere, quandiu apud nos fuit.

5. Decembris cicatricem perfectam vidit illustrissimus vir, & puellam optima sanitate gaudentem, quæ vigesima ejusdem mensis nosocomium reliquit.

CASUS XXVII.

FEMINA 33. annorum 6. Octobris nosocomium accessit.

Ante binos annos pustulas copiosas habuerat in palato posteriori, quæ brevi post suum ortum albæ evadebant, & materiem albam dabant.

Paulo post ortæ sunt aliæ similes in posteriori linguæ parte, magnum ipsi dolorem creantes, quæ quoque brevi albescebant, & eandem ac priores materiem fundebant.

Ab eo tempore semper doluit, & lingua incoepit sensim magis magisque tumere, hinc inde findi.

Dum prima vice illam vidimus, vix cavitas oris tumentis cancris linguæ sufficiebat, in qua ultra decem fissuras profundas conspiciebamus: interstitia durissima fissurarum tenacissima pelle alba tegebantur, & tantos dolores patiebatur ægra, ut fere omnes noctes jam a 15. diebus insomnis transigeret; valde emaciata erat, appetebat tamen, verum solidos cibos manducare impar, liquida nonnisi magno cum dolore deglutiebat; alvus cæterum jam per plures dies emanebat.

Datum est ipsi sequens.

℞. Aq. laxat. d. u. unc. v.

sal. polychr. dr. j.

syr. rosar. solut. unc. β.

M.

S. omni $\frac{1}{2}$ hora duo cochlearia sumat.

Hoc modo octies purgata est.

Dominus Chirurgus sæpius per diem linguam decocto cicutæ abluit, & dein

extracto cicutæ, melli rosarum admixto totam linguam illinivit, jussitque, ut ægra linguam immotam teneret, quandiu posset.

Septima Octobris inchoavit ægra sequenti mixtura uti.

Aq. flor. rhead. unc. iv.

extract. cicut scr. ij.

fyr. papav. alb. unc. β.

M.

S. diurno tempore quatuor dosibus absumat.

Sub usu hujus mixturæ dolores sensim minuti sunt, ita ut undecima Octobris incoeperit noctu somnum pacatissimum habere, & levissima alimenta facilius deglutire.

15. Inchoavit omni die extract. cicutæ dr. j. in mixtura absumere.

Hac methodo effectum est, ut dum illustrissimus L. B. *van Swieten* illam 25. examinavit lingua minus dolens, & paulo minus tumida esset; reliqua autem omnia invenit, uti supra descripta sunt, nisi quod juscula, panatelas, olera &c. facile deglutiret.

Dedit tunc ipsi annuente illustrissimo Præsidente extract. cicut. dr. j. β. omni die absumendam, quam dosin optime tulit.

Omni die advertimus pelliculam fissurarum interstitia tegentem sensim magis magisque molliori, & hinc inde a lingua separari & fissurarum labia minus retrorrida fieri.

Decima Novembris pro prima vice pus optimum in variis linguae partibus observavimus: externe & interne eadem continuata sunt.

14. Illustrissimus Præses vidit optimum fere ex omnibus fissuris pus prodiens, & notavit fissurarum labia magis ad se invicem appropinquare, linguam multum detumuisse; pelliculam antea linguae tenaciter adhærentem fere omnem separatam, & ægræ faciem multo melius coloratum esse, commendavitque, ut methodo, qua incoëptum fuerat, exacte pergeremus.

Dum 5. Decembris denuo adfuit illustrissimus vir, pergebat optima esse suppuratio, lingua mole fere naturalis erat, & ægra nullos dolores conqueratur, nisi sub linimenti applicatione, ac denuo corpori carnes incipiebant renasci.

Eadem interne & externe adhibita sunt ad 24. qua ægra quoad linguam optime pro ratione mali habens, incoëpit gravis fieri, capite dolere, febrici-

tare ; pulsus tamen erat æqualis , non nimis plenus , sitis mediocris , appetitus quoque sat bonus.

Abstinuit ægra a cicuta & emulso refrigerante usa est.

25. Vespere eruperunt menstrua , quibus jam per quinque menses caruerat , & 26. febrî carebat , optime fluentibus mensibus , qui 29. cessarunt , femina optime valente.

1. Januarii 1762. denuo incoepit priorem cicutæ dosin fumere : & sequenti die videns illam illustrissimus Præses lætus observavit , omnia semper magis in melius verti , suavitque ut ægræ admodum appetenti leviores carnes concederentur ; cum lingua mole fere naturalis maxima sui parte mollis esset , carnes lente potuit masticare , & illas optime tulit femina.

16. Ligna in area nosocomii flante borea in ordinem jovit disponere ; frigore capta est , quod excepit color magnus , continuus cum magna siti , & noctu accessit faucium dolor.

17. Erat pulsus plenus , durus , celer ; fauces tumebant inflammatae.

Sanguis ad lib. i. vena eductus brevi crusta densa phlogistica tegebatur.

Enema injectum bis alvum subduxit,

& pro medicamento datum est sequens.

R. Tamarind. unc. ij.

coq. c. aq. q. S. per $\frac{1}{2}$ horam sub finem
addendo folior. alexandr. dr. iij.

rad. fœnicul. unc. j.

Relinque in fervida digestionem per $\frac{1}{2}$
horam

vase clauso colat. lib. j. β. adde

nitri puri dr. j.

fyr. rosar. solut. unc. j. β.

S. omni bihorio unc. ij. fumat.

Pro potu habuit decoctum commune
ægris nosocomii ex hordeo crudo, radi-
cibus acetosæ & bardanæ cum oxymelle
simplici; gargarismate ex speciebus
emollientibus & resolventibus facto sæ-
pius usa est: loco linimenti, quod hu-
cusque linguæ applicatum fuerat, datus
est linctus ex mucilagine althææ, &
melle rosarum, & cataplasmate emol-
liente totum collum involvebatur.

Intra binas dies sæpius purgata est
cum integro fere faucium collapsu, &
magna febris remissione, unde postea
solo emulso usa die 21 Januarii ab an-
gina & febre libera fuit.

22. Linimentum ex melle & extracto
cicutæ linguæ denuo applicatum est,
& vespere menstrua denuo adquisivit
minus

minus copiosa tamen, quam mense præcedenti.

27. Sumpsit rhei dr. j. quæ sexies alvum movit, & sequenti die licuit ipsi carnibus tenerioribus vesci.

30. Incoepit bis de die extract. cicutæ in pilul. redacti scr. j. sumere; tunc hinc inde tantum in variis linguæ fissuris aliquid puris advertebatur.

6. Februarii invenit illustrissimus Præses feminam bene valentem, & vidit rudimenta cicatricum fissurarum plurimum linguæ cavitates incipientia obducere; supererant tamen adhuc aliqua interstitia dura, & semina de dolore obtuso sine tumore ad radicem nasi conquerebatur, cæterum bene habebat.

Continuata fuit dicta cicutæ dosi omni die, & commendavi, ut sæpius lac aquæ mixtum cum melle naribus attraheret, ad leniendum narium dolorem.

11. Dedi ipsi haustum purgantem, unde optime purgata fuit sine levamine doloris nasi, qui attactu externo augebatur, plures fissuræ linguæ cicatrice fere integre obductæ erant, & ægra quoad reliqua sana erat.

Perrexit interne & externe cicuta uti,
Collin Pars I. Tom. II. I

& simul quater de die decocti lignor.
unc. iij. sumpsit.

Hoc modo continuatum fuit toto mense Februario & Martio, quo tempore omnes fissuræ linguæ cicatricæ obductæ fuerunt, dolor nasi disparuit, & femina tam bene habebat, ut vellet ad solitos labores redire.

Illustrissimus Præses, 3. Aprilis omnia rite examinans, invenit adhuc aliquid duri in medio linguæ, & suavit, ut ægra adhuc per aliquod tempus cicuta in nosocomio uteretur; externe autem nihil amplius applicatum est.

Eadem ergo cicutæ dosi perrexit uti; bubula, aliisque solidis cibis nutrita egregie custodes laborando sublevabat.

Initio Junii rogavit denuo, ut liceret ex nosocomio discedere; cumque substantiam linguæ naturalem inveniret illustrissimus L. B. *van Swieten*, illam dimissimus cum scatula pilulis de cicuta plena, ut adhuc per aliquod tempus continuaret uti hoc remedio.

Pluries ab illo tempore illam vidit illustrissimus Præses, & ultima vice mense Februario anni 1763. illam reperit optime valentem, cum ad nos grato animo mota denuo accessisset.

CASUS XXVIII.

FEMINA 53. annorum 24 Novembris ad nos rure venit. Huic glandula thyreoidea valde tumida admodum dura erat; totum colli latus dextrum late antrorsum & prostrorsum a clavicula usque in partem capitis capillatum rigidissimum & durissimum erat; retro angulum maxillæ inferioris elevabatur tumor ovi anserini figura, cujus apex obtusus cuti quasi innatus videbatur, dum acutior apex foris alte prostabat, hic tumor durissimus scirrhusus erat, lividus & a decem diebus valde dolens; dolor urens continuus, lancinansque vehementissime per intervalla ægram ita afficiebat, ut præ doloribus somno careret, febricitaret, & appetitum fere omnem amississet; stando vel sedendo dolores augebantur, hinc continuo decumbere debebat.

Causam mali quærentibus narravit ægra se 25 Junii hujus anni noctem in agro transegisse ac dormivisse per plures horas capite supra lapidem reclinato, evigilantem valde friguisse, & collum jam tunc rigidum fuisse; elapsis vero ab

eo tempore tribus hebdomadis jam omnia fuisse in eo statu, in quo nunc conspiciebantur, nisi quod præter liberum capitis motum impeditum, nihil mali passa fuisset, donec 14. Novembris post validum corporis exercitium dolere incoepisset.

Curam hujus feminae incoepi haustu purgantē, & statim primo die, more in talibus casibus apud nos solito, partes duræ decocto cicutæ diurno tempore diligenter fotæ sunt, & noctu emplastro cicutæ tectæ.

25. Novembris dolores æque magni ac antea noctem inquietam fecerunt, appetitus tamen melior erat.

Incoepit ægra bis de die extracti cicutæ scr. j. sumere, ac simul emulso paregorico usa est, diæta fuit ex cibis levibus facile digerendis.

Quatuor primis diebus nullum a cicutæ levamen habuit, unde 29. Novembris ter de die extracti cicutæ scr. j. sumpsit.

Hac dosi dolores sensim paulisper leniti sunt, & 3. Decembris aiebat ægra, se magnum levamen percipere, melius dormiebat, magis appetebat, & alvus naturalis omni alterno die deponebatur.

Quinta Decembris feminam vidit illustrissimus Præses & omnia invenit, ut prius descripta sunt; pulsus tamen tunc fere omnino erat naturalis.

Nunquam integre cessarunt dolores, & tumorem immutatum adhuc invenit illustrissimus vir 2. Januarii 1761. ægra tamen quoad reliqua satis bene habuerat, colore sat naturalis erat, & carnes teneriores sub finem Decembris ipsi concesseramus: ob augmentum doloris dum stabat, vel paulo diutius erecta sedebat fere continuo lecto affixa manere cogeatur.

3. Januarii incoepit omni die extracti cicutæ dr. j. β. in mixtura absumere.

7. Dolores paulo majores fuerunt in scirrho, qui magis elevari videbatur, & in apice molliri, ægra quoque febricula afficiebatur, & magis sitiebat solito, quapropter carnibus abstinuit: cicutæ tamen perrexit uti simul cum emulso paregorico.

9. Cutis in apice scirrhi erosa est, ex cujus ulcusculo sanies acris prodiit, spatio trium dierum tria talia ulcuscula sibi vicina orta sunt eandem materiem fundentia, nulla tamen nec in rigiditate musculorum, nec in tumore glandulæ thyreoideæ mutatio observabatur.

14. Totus apex scirrhi exulceratus pus subflavescentis tenuis dabat; ulcus texit expertissimus chirurgus linteis carpitidis decocto cicutæ imprægnatis, ac de super fomentum per diem applicuit, noctu autem emplastrum cicutæ. In cura medica nihil mutatum est.

Suppuratio hæc, cujus tempore dolores leniores fuerunt, duravit per quinque dies, donec 19. ulcus jam ad tertiam circiter pollicis partem in substantiam scirrhi excavatum incoepit subito gangrænescere: ægra multum febricitare & dolores ingentes pati.

Eadem externe applicata sunt, interne autem sola emulsa paregorica copiose sumenda habuit.

20. Magna copia materiæ amurcosæ cum fibris nigris mixtæ effluxit: ulcus multo latius & profundius erat & totum gangrænosum, dolores autem ut die præcedenti, noctu tamen per intervalla dormiverat, pulsus sat æqualis erat, minus celer, & massa scirrhusa satis facile sedebat digito tangenti.

Externe applicatum est fomentum ex cicuta & cortice peruviano factum, addito spiritus salis acido.

Interne præter emulsa paregorica data est sequens mixtura.

℞. Aq. flor. rhæad. unc. v.
vini boni austriaci unc. ij.
extract. cort. peruv. dr. v.
fyr. diacod. unc. j. β.

M.

S. omni bihorio duo cochlearia fumat.

Hac methodo tractata est ægra per tres dies , quo tempore continuavit talis materies ex ulcere effluere , reliqua autem fere in eodem statu permansere.

Quarto die sive 23. Januarii dum chirurgus manē ulcus deligare vellet , massa nigra facile in consistentiam pulveraceam pressione redigenda simul excidit , sic totus scirrhus ablatuſ est , superſtite tantum circulo duro vix septimam partem prioris tumoris faciente.

Vidi in tota ſuperficie ulceris pus bonum : ægra parum febricitabat , & ob magnum dolorum levamen alacris erat , abſtinuit ergo medicamentiſ internis , & externe denuo incœpit deligatio cum decocto cicutæ fieri , ſæpius juſcula carniū & alia leviora alimenta per diem exhibita ſunt , ut vires a magnis doloribus & febris debilitatæ reſtituerentur.

Senſim ægra hoc modo vires recuperat

ravit , margines duri circum ulcus perrexerunt optimum pus dare , sensim minui , & ægra lenissimis tantum doloribus affecta noctes tranquillas transigere , & appetitu bono frui.

6. Februarii vidit gaudens illustrissimus L. B. *van Swieten* , sicut & multi alii illum comitantes medici & chirurgi expertissimi , qui ægram quoque cum illustrissimo viro quinta Decembris viderant , nunc de tanto scirrho vix aliquid superesse , mulier tunc bono animo erat & optimo appetitu gaudebat ; unde data ipsi prius rhei dr. j. 8. carnes ipsi denuo concessæ sunt.

13. De novo incoepit bis de die extracti cicutæ gr. xvj. sumere , ut quod de circulo duro supererat , celerius consumeretur.

Toto mense Februario ægra sat bene habuit , subinde e lecto surrexit , & dum initio Martii denuo adfuit illustrissimus Præses , tantum parva portio dura in parte superiori ulceris supererat , reliquum circuli penitus vel fufum , vel supuratione consumptum erat , medium ulceris marginibus æquale erat , & rudimenta cicatricis ubique conspiciantur.

Licet tamen tam feliciter sublatus

fuërit magnus ille scirrhus, nulla in glandula thyreoidea nec in musculis induratis dextri lateris colli mutatio facta est.

Perrexit ergo ægra cicuta uti ad 13. Martii, quacum ulcus a scirrho relictum jam perfecta cicatrice obductum esset, & præter impedimentum liberi capitis motus nullo incommodo afficeretur, rogavit, ut liceret ipsi cicuta abstinere, quod ipsi concessum est, fateor enim, me vix spem ullam habuisse, fore, ut cicuta aliquid contra pertinacem in hac femina musculorum duritiem & immutatum hucusque glandulæ thyreoideæ tumorem efficere posset, ac ideo viribus augendis, & corpori jam dudum emaciato humectando & nutriendo studui, quod debitis alimentis eo effectu tentavimus, ut quarta Aprilis, dum ægram vidit illustrissimus Præses, habitum corporis quoad colorem & torositatem in melius notabiliter mutatum invenerit: cicatrix cæterum tunc erat perfecta, emplastro cicutæ tecta.

Per binos menses, quibus sana mansit femina variis solventibus & emollientibus externe applicatis musculorum colli rigiditatem tollere frustra tentavimus.

Initio Junii sine nota causa femina angina inflammatoria correpta fuit, & statim primo die deglutitio fuit admodum difficilis.

Per tres dies omni artis molimine conati fuimus ægræ levamen adferre: verum omnia incassum adhibita sunt, & quarto morbi die mortua est.

Post mortem in abdomine præternaturale invenimus nihil, pulmones erant boni, cor magnum erat, & in aorta ascendente plures circuli ossei deprehendebantur, in collo omnes partes usque ad œsophagum lignea fere duritie præditæ erant, & œsophagus tertia sui parte tumidus, & inflammatus: glottis quoque multum tumebat & rubebat.

CASUS XXIX.

FEMINA 31. annorum ad nostrum nosocomium 8. Januarii 1762. delata jam a semi anno menstruis carebat, quibus emanentibus statim incoeperat magnos pati dolores in pelvi, qui raro intermittebant; a quatuor mensibus animadvertenterat hypogastrium plus solito elevari, tumere, & jam per tres menses effluebat ex pudendis materies glutinosa,

acris, admodum urens, reliquæ tamen corporis functiones sat bonæ manserant, donec circa medium Decembris incœperit dysuria laborare.

Abdomen examinantes invenimus corpus durum extra pelvim ad trium circiter pollicum altitudinem prominens, transversim oblongum, ad tactum multum dolens.

Causam mali dicebat ægra esse, quod tertio die menstruum, quæ ordinario per quinque dies habere solebat, ex scamno, supra quod stabat, aliquid parieti applicatura, ceciderit, unde ter-rita fuit admodum, multum doluit, suppressa sunt menstrua, quæ ab eo tempore non apparuerunt.

Curam mali tentavi optimis medicamentis solventibus, emmenagogis, diureticis & purgantibus usque ad initium Febr. cataplasmata varia externe applicata sunt, nihil autem mutatum est; ægra perrexit dolere, tumor idem mansit; fluxus materiæ acris eodem modo ac ante continuavit, & ægra non facilius urinam misit.

Cum irrita hucusque viderem alia medicamenta, cicutam tentare decrevi, ac ægræ tertia Februarii bis de die extract. scr. j. sumendum dedi: externe

fomentum de cicuta applicatum est.

8. Februarii sine dolore potuit urinam copiosam mittere, fluor albus copiosior erat, minus acris, & dolores in pelvi minui videbantur: ægra appetebat, & alvus sponte omni die prodibat; sic continuavit ægra habere toto hoc mense, quo corpus illud durum multum minus est.

2. Martii incoepit pluries per diem purgari cum torminibus, ac ideo cicuta abstinuit, cujus loco usa est decocto radicis salab. quod dolores brevi lenivit, & intra triduum alvum omnino naturalem reddidit.

8. Sumpsit rhei elect. dr. j. ut languens appetitus denuo excitaretur: optime purgata est, & die sequenti bonus erat appetitus, carnibus tamen debuit adhuc per aliquot dies abstinere.

10. Denuo incoepit cicuta uti, tumor omni die minor factus est, dolores leniores, & fluor albus, licet adhuc copiosus, minus acris evasit.

19. Nihil de tumore tactu poterat amplius percipi; dolores penitus evanuerant, fluor albus parcior erat, & ægra bene valebat.

Continuavit eandem extracti cicutæ dosin sumere, ast fomentum omissum.

fuit : ægra potuit extra lectum esse , & in cubiculo deambulare; sensim minutus est fluor albus , & 29. Martii penitus cessavit , ægra optime habente.

Quarta Aprilis illustrissimus Præses , qui ægram in cubiculo jacentem , in quo exanthematicis morbis laborantes decumbere solent , propter aulam videre nondum potuerat , illam examinavit , nunc bene valentem , & ab illa morbi historiam audivit.

Cicuta adhuc usa est ad 12. Aprilis , qua nosocomio exivit sana. Mense maiodum illam vidi , ait sub finem Aprilis menstrua se habuisse ac optima sanitate frui.

C A S U S X X X.

PUELLA 19. annorum initio Decembris anni 1761. dolores pungentes validos in mamma dextra sub papilla percepit , mammamque tangendo tuberculum durum parvi ovi gallinacei magnitudine deprehendit , quod antea nunquam adverterat : paucis diebus postea tota mamma valde tumebat : tuberculum durum mole valde auctum

erat, & dolores acutissimos lancinantes patiebatur.

Sumpto purgante dolores parum leniti sunt: verum brevi post æque vehementes redierunt.

Variis usa est medicamentis ab aniculis & balneatoribus acceptis, & externe varia applicuit emplastra, quæ malum non exacerbarunt.

Circa medium Januarii 1762. adivit Chirurgum qui malum emplastris variis & quodam pulvere interne dato tentavit auferre.

Ab eo tempore malum magis magisque in pejus mutatum est, & 20. Februarii ad latus internum papillæ mamma exulcerata est cum dolorum augmento: per tres vel quatuor dies aiebat ægra materiem viridem pauca quantitate ex ulcere effluxisse, manente eadem tumoris mole & duritie. Quinta Martii illam ad nostrum nosocomium misit illustrissimus L. B. *van Svvieten*.

Puella tunc cachecticum colorem habebat, emaciata erat, appetitus languebat; alvum autem naturalem fere omnidie secedere aiebat: menstrua jam bis emanferant; mamma valde tumida erat, & moles scirrhosa durissima, magnum ovum anserinum magnitudine superans,

medium mammæ lobum occupabat : cutis supra scirrhum livescebat : ulcus quoque ad latus internum papillæ ortum livescentis coloris erat, & paucam faniem dabat ; jam per plures noctes admodum parum præ nimis doloribus quieverat : pulsum tamen habebat sat naturalem.

Mamma statim incoëpit decocto cicutæ foveri, & curam internam cum rhei. elect. dr. j. unde aliquoties purgata est cum appetitus emendatione, inchoavi. Vespere sumpsit fyrupi diacod. unc. j. cum laudan. liquid. sydenh. gtt. v. & noctu sat bene dormivit.

6. Martii bis de die extract. cicut. scr. j. sumpsit, dato semper vespere pargorico.

Per sex primas dies, quibus hoc modo tractata fuit, parum mutationis animadvertimus, nisi quod dolores paulo leniores facti sint, & noctes habuerit tranquilliores.

Septimo die, quo cicuta utebatur, five 12. Martii incoëpit ulcus majus fieri, & copiosiorem faniem fundere; dolores quoque intensiores evaserunt; cæterum pulsus vix mutatus erat: emulsum cum diacodio prioribus additum est.

13. 14. 15. Fere eodem modo habuit,

& ulcus perrexit in toto ambitu gangrænescere, & mammam exedere.

17. Ait ægra dolores remisisse, & se noctu per plures horas dormivisse: eadem tamen erat febris, & gangræna integram massam scirrhopam, quæ hinc inde a sanis separari videbatur, occupabat.

Abstinent tunc a cicuta, cujus loco mixtura sequenti usa est:

℞. Extract. cortic. peruv. unc. β.

Vin. bon. austriac. unc. j.

Aq. flor. rhæad. unc. vj.

Syr. diacod. unc. j. β.

M.

S. omni bihorio duo cochlearia sumat.

Externe fomentum ex decocto cicutæ & corticis peruviani cum addito paucō spiritu falis acido applicabatur, unde diem noctemque sat tranquilla transiegit.

18. Mane dum Chirurgus emplastrum, quo ulcus noctu tectum fuerat, abstulit, simul cum linteis carptis tota massa scirrhopa gangræna tabefacta excidit, magno foramine in mamma relicto usque ad costas penetrante, parietes ulceris bono pure tectæ erant, & ægra vix febricitabat: sic totus separatus est scirrhus a partibus sanis; reman-

fit tamen alter nucis juglandis mediocris magnitudine pollicem circiter supra papillam situs, quem antea non perceperamus.

Hac die adhuc cum priori fomento ulcus deligatum est, & perrexit eadem medicamenta assumere.

19. Decocto cicutæ imprægnatis linteis carptis cavitas ulceris implebatur: fomentumque ejusdem plantæ desuper applicabatur.

Abstinit ægra omni medicamento interno, & cibis aptis vires a febre & doloribus debilitatæ brevi refectæ sunt.

27. Extra lectum per plures horas esse potuit. Toto hoc tempore perrexit ulcus moderata quantitate pus bonum dare.

28. Denuo incœpit bis de die extracti cicutæ gr. xvj. fumere, ea spe freta, fore, ut a parvo illo scirrho relicto etiam curaretur, sub cujus usu continuavit optime habere.

4. Aprilis ægram vidit illustrissimus Præses; mammam examinavit, & cavitatem a scirrho relictam cum parietibus optimum pus fundentibus, magnumque gaudium testatus est vir humanissimus de felici adeo, non minus quam celeri cicutæ in hac ægra effectu: suasitque,

ut illo medicamento propter parvum scirrhum relictum continuaret uti.

Ab hoc tempore cavitas ulceris sensim minor facta est, & continuavit bonum pus ex illa prodire minori quantitate : puella quoad reliqua optimè habens, maximam partem diei extra lectum transegit, & appetitus ita auctus est, ut 14. Aprilis debuerint ipsi carnes concedi : bubula tamen, & aliis durioribus cibis ipsi non licuit vesci.

Corpus torositatem præteritam sensim recuperavit, color cachecticus disparuit, & 23. Aprilis proruperunt menstrua, quæ per quinque dies debite fluxerunt, & quorum tempore perrexit dictam cicutæ dosin sumere.

Initio Martii cum cavitas ulceris ita impleta esset, ut medium illius fere æquale esset marginibus, solo emplastro cicutæ tegebatur. Durities in superiori mammæ parte relictæ nucem tunc avellanam magnitudine non superabat ; perrexit tamen adhuc cicutam sumere usque ad 16. Maii, qua illa abstinuit : nullam enim amplius duritiem in mamma percipiebamus, & in ulceris superficie adhuc dum aliquid puris dante cicatricis rudimenta conspiciebantur.

21. Denuo menses debita copia fluxe-

runt. Initio Junii vidit denuo illustrissimus Præses puellam hanc : erat tunc ulcus cicatrice obductum, mamma tota mollis, optima sanitate fruebatur, ac paucis post diebus ex nosocomio discessit. Illam ab eo tempore sæpius vidi optime valentem.

CASUS XXXI.

FEMINA 29. annos nata 18. Maii ad nos delata 1. Martii infantem feliciter pepererat, quem lactaverat sine incommodo ad 16. ejusdem mensis, qua die post frigidæ haustum ambæ mammæ cum dolore valde intumuerunt : sinistram potuit suggerere infans, quæ post aliquot dies detumuit, dextra autem licet brevi indolens fuerit, mansit tumida, & sensim magis magisque indurata est.

Cum primo illam vidimus, ait, dum ante 15. dies sarcinas elevabat, mammam ad thoraculum valde attritam fuisse, unde statim incoeperat dolere : dolor urens, subindeque lancinans erat, & sensim ita auctus, ut ancillaribus laboribus penitus inepta opem apud nos quæreretur.

Externe fomentum de cicuta diurno tempore diligenter applicatum est, noctu tota mamma emplastro ejusdem nominis tegebatur.

Cum ægra quoad reliqua sana esset & boni appetitus; stricta diæta non præscripta fuit: licuit ipsi carnes comedere, & statim incoepit bis de die extracti cicutæ scr. j. sumere, & 28. Maii cum nulla sensibilis mutatio adverteretur, aucta est dosis, & ter de die extracti scr. j. sumpsit.

30. Maii mamma magis dolebat, & videbatur illius renitentia minui: præcribebatur idcirco haustus purgans, quem sequenti die sumpsit optimo cum effectu; dolor remisit, & 1. Junii videbatur moles mammæ paulisper minuta.

Incoepit denuo per diem extracti dr. j. absumere: & 4. Mensis dum vidit hanc feminam in nosocomio illustrissimus L. A. *van Swieten*, observavit tumorem in parte superiori in plures partes diffilire: dolores sat facile ferebat, & quoad reliqua sana erat.

9. Datum est ipsi denuo purgans, quod postea omni octavo die sumpsit, diebus intercalaribus cicuta utens. Hac methodo mammæ moles ad minimum una tertia parte sub finem Junii minuta

erat, & residuum tumoris duri in plures partes variæ magnitudinis divisum; dolores erant mediocres & vires optimæ.

Ex his spem aliquam concipiebamus futuræ per resolutionem curationis: verum 6. Julii incoëpit mamma denuo magis tumere, dolere: ægra sæpius horrores & noctu magnam febrim habuit.

Dum sequenti die illam vidi, in media mamma fluctuatio obscura percipiebatur, & dolores, febrisque erant sat valida.

Eadem ac in initio externe applicata sunt. Interne autem loco cicutæ emulso diacodiato usa est, & copioso hordei decocto.

Alimenta fuere juscula carnium cum hordeo & farinaceis levioribus, panatellæ &c.

Sub horum usu febris & dolor sat moderata fuerunt, suppuratio optime processit, & 11. Julii febris erat pauca, dolores minores: & magna fluctuatio in mamma percipiebatur: supererant tamen tria tubercula dura in parte superiori sat magna, ac ideo aperturam roganti ægræ recusavimus, ut facilius in suppurationem deduci possent; verum 16. in parte inferiori mammæ apertura

sponte facta est, ex qua copiosum pus effluxit cum magno mammæ collapsu, & præter illa tubercula, de quibus jam dictum est, nulla durities in mamma supererat.

Ulcus decocto cicutæ deligabatur, & omni die magna quantitas puris effluxit, quod in initio tenue, sensim optimum evasit.

22. Magna abdominis tormina passa est, & sæpius alvum habuit, aiebatque se jam ab aliquibus diebus acidum eructare, quod sequens mixtura brevi immutavit.

℞. Aq. flor. rhæad. unc. vij.

Lapid. cancr. dr. j. β.

Laud. liq. syd. gtt. xv.

Syr. diacod. unc. β.

S. omni bihorio duo cochlearia sumat.

24. Julii rhei. elect. dr. j. sumpsit, unde aliquoties purgata est, cum appetitus antea fere deleti restitutione.

Abstinent dein omni medicamento interno usque ad 2. Augusti, qua denuo extracti cicutæ gr. xvj. sumpsit: puris omni die ex mamma effluentis copia sensim minuta est, & ægra continuavit optime habere: moleculæ duræ superstites manifesto minutæ sunt, & appe-

titus ita auctus est, ut prima Augusti carnes debuerint ipsi concedi.

10. Ulcus mammæ multum minutum solummodo parum puris dabat & videbatur brevi cicatrice obducendum; duæ e moleculis duris post mammæ suppurationem superstitibus disparuerunt, tertia autem adhuc mediam prioris voluminis partem servabat. Solo tunc cicutæ emplastro mamma tegebatur, & cum alvus, quæ toto fere curæ tempore sponte cessarat, jam per triduum emanisset, haustum purgantem sumpsit, & sequenti die denuo incoepit cicutam fumere.

Bene habuit toto mense Augusto, sub cujus finem ulcus penitus bona cicatrice obductum erat, & molis duræ in superiori parte mammæ pauculum tantum supererat.

Voluisssem feminam adhuc per aliquod tempus in nosocomio retinere: verum diutius manere recusavit, & illam, data tamen ipsi bona pilularum cicutæ dosi, ut continuaret adhuc illis omni die uti, dimittere debui.

Prima Januarii 1763. illam vidi optima sanitate gaudentem, & mamma ejus ubique mollitiem naturalem habebat.

CASUS XXXII.

VIR circiter 40. annos natus, anno 1762. initio Octobris ad nostrum nosocomium venit. Hic jam per sex annos scrotum valde tumidum & durum habebat, & jam a quatuor annis & ultra ex binis aperturis fistulosis pars major lotii, dum urinam mittere volebat, elabebatur, & sæpe dolores magnos patiebatur. Cæterum sanus erat.

Variis medicamentis tum interne tum externe sine effectu usus fuerat.

Apud nos sumpsit primo purgans, dein 5 Octobris incoepit de die extracti cicutæ scr. j. assumere, & externe pars decocto cicutæ diligenter fota est.

Toto mense Octobris cicuta usus est sine sensibili tumoris mutatione: cæterum bene habuit.

Initio Novembris sumpsit haustum N. 9. unde alvus decies mota est: dein ter de die incoepit extracti cicutæ scr. j. sumere, & omni octavo die ipsi purgans datum est.

Hac methodo sensim durities & tumor scroti ita minuta sunt, & sub finem Januarii nihil omnino superesse viderint
magnificus

magnificus *Storck* & plures medici, qui ægrum antea sæpius inviserant.

Urina ex aperturis fistulosis raro & admodum pauca effluebat, hinc cum dolores quoque valde rari & lenes essent, ex nosocomio discessit.

CASUS XXXIII.

PUELLA 23. annorum, 17 Decembris anni 1762. ad nos delata est. Hæc ante tres menses post cerevisiæ frigidæ haustum matutino tempore antequam jentaculum sumpsisset, incœperat ventriculo dolere & ab assumptis cibis angî.

Dolor & anxietas in initio tolerabiles erant, verum intra sex hebdomadas ita increverant, ut ægra præ metu doloris & anxietatis sæpius alimentis abstineret.

Mense Octobris accessit vomitus, sæpius post cibos assumptos repetens: leviora tamen alimenta parva copia sumpta frequentius servabat ventriculus, donec mense Decembris incœperit etiam levissima vomitu rejicere.

Sic habuerat ad 13. qua medicus varia ipsi sumenda dedit, & externe appli-

cari iussit : quibus non obstantibus pluries per diem vomere perrexit.

Dum puellam vidimus , aspectu sat sana erat , respiratio parum impedita ; pulsus nihil mali indicans : verum in regione epigastrica infra scrobiculum cordis corpus durum tactu obscure percipiebatur.

Tentavi malum demulcentibus , pargoricis , applicato externe scuto stomachico opiato , & omni die injectis enematibus per sex dies superare , sed incassum omnia adhibita fuerunt.

23 Decembris dedi ipsi sequens :

R. Aq. florum rhæad. unc. vj.

Extract. cicut. dr. j.

Laudan. liq. Syd. gutt. xx.

Syr. diacod. dr. vj.

M.

S. intra biduum cochlearium assumat.

Primo die mane bis vomuit & semel post meridiem : bis vero postea assumptum jusculum retinuit , & noctem pacate transegit.

24 & 25. Idem contigit : verum aiebat vomitum esse minus dolorificum.

26. Tantum semel binis horis post prandium partem assumptorum rejecit : ad alvum per biduum emanentem cendam enema ipsi datum est.

De Cicutæ Efficacia. 219

Illi potus erat ex anaticis lactis, & decocti hordei partibus compositus, de quo sæpius parva quantitate hauriebat: juscula quoque & tenues panatellæ ipsi pluries per diem porrigebantur: scutum stomachicum ipsi molestum sponte abstulit, nec aliud dein habuit.

27 & 28. Non vomuit, & 29. sumpsit decoctum N. 20. a quo octies intra biduum alvus mota est cum aliquo anxietatis levamine; eadem tamen fere mansit infra scrobiculum cordis durities.

31 Decembris incoepit mixtura sequenti uti.

Rx. Aq. flor. rhæad. unc. vj.

Extracti cicutæ dr. j. β.

Syr. papav. alb. dr. vj.

M.

S. sumat ut priorem.

Sub usu hujus mixturæ ægra omni die alvum habuit, & 9 Januarii 1763. tantus erat appetitus, ut cibis liquidis minime contenta foret: quare cum jam per tot dies vomitu cessasset, parvam carnis vitulinæ portionem cum frustulo panis triticei concessimus, quæ avide manducavit: verum hora post pastum omnia vomitu rejecit, & vespere adhuc semel vomuit.

Perrexit ægra cicuta uti , carnibus denuo abstinuit : & vomitus iterum emanfit.

14. Januarii invenimus epigastrium mollitiei naturalis : verum dolorem leniter urentem & majorem ad tactum ventriculi sensibilitatem conquerebatur.

Sumpsit denuo intra biduum decoctum N. 20. unde circiter decies purgata omnis dolor sublatus est , & ægra usque ad 20 Januarii omni medicamento abstinuit.

21. Data est ipsi rhei dr. j. quæ aliquoties alvum movit , & 23. vitulina & aliis tenerioribus carnibus cum bono appetitu & sine incommodo potuit vesci.

24. Dedi ipsi denuo extracti cicutæ in pilulas redacti gr. xvj. bis de die sumenda.

Ægra tunc multo melius colorata erat , & sensim carnes ita renatæ sunt , ut medio Februarii corpus naturalem rorositatem haberet , ventriculo quoque tam bene habebat , ut bubulam & alia duriora alimenta sine incommodo comederet : cumque nihil amplius præternaturale in epigastrio quocunque modo premeretur , deprehendi posset , cicuta abstinuit.

6 Aprilis menstruorum fluxum habuit, quo caruerat toto tempore, quo apud nos fuerat, & 12. ad suos rediit sana.

CASUS XXXIV.

FEMINA 35. annorum 20 Decembris anni 1762. ad nos venit. Aiebat infantem sex annorum, qui apud illam in lecto jacere solebat, ante sex menses calcitrando pedem in mammam dextram valde impegisse: unde magnum dolorem perceperat, qui tamen applicato emplastro, quod ab obstetrice acceperat, sensim lenitus fuerat: mamma autem mole increvit quotidie & indurata est.

Dum ad nosocomium accessit, in mamma pars dura vere scirrhusa pugni mediocris virilis magnitudinis erat, fere immobilis, admodum dolorifica, & cutis illam tegens livescebat: cæterum femina sana erat.

Statim primo die incoëpit cicuta uti: cujus extracti scr. j. bis de die pilularum forma sumpsit: externe fomentum & emplastrum cicutæ more nobis in his casibus solito applicata sunt: licuit ipsi

vitulina & aliis teneris carnibus vesci.

Per 13. dies in mamma nulla mutatio facta est, verum 14. die, qua cicuta utebatur, five 2 Januarii anni 1763. dolores frequentiores & majores facti sunt, cum pulsu leniter febrili, quapropter præter cicutam emulsum paregoricum ipsi datum est.

7 Januarii mamma multum intumuerat, & ad latus externum papillæ locus erat magis elevatus, reliquo tumore mollior, in quo obscura fluctuatio percipiebatur : febris erat sat magna.

Abstinit tunc ægra cicuta, & solis emulsis paregoricis usa est, & diæta omissis carnibus tantum ex cibis lenissimis, demulcentibus præscripta fuit : externe vero nihil mutatum est.

Suppuratio celeris fuit : decima enim Januarii jam maxima pars mammæ mollis erat materia fluctuante plena ; dolores erant minores, & febris multum minuta : nihil tamen in methodo mendi mutatum est.

13. Mamma sponte ad latus externum papillæ aperta est, & magnam copiam puris tenuis, flavescentis, multis frustulis nigris fudit intermixti : remansit tamen ad latus internum papillæ pars dura ovi gallinacei magnitudine,

& parietes ulceris gangræna nigrescebant; in reliqua plaga suppurabat. Expertissimus Chirurgus. fomento ex cortice peruviano & herba cicutæ parato ulcus tunc deligavit.

Febris cessaverat, & dolores erant leves, ægra tamen a febre debilitata erat.

Præter emulsum datum est ipsi sequens:

℞. Aq. flor. rhæad. unc. vj.

Extract. cort. peruv. unc. β.

Syr. diacod. unc. j. β.

Liquor. anod. mineral. scr. j.

S. omni trihorio duo cochlearia sumat.

Hac methodo ulcus sensim mundatum est, & 15. ejusdem Januarii in omni ambitu optimum pus conspiciebatur, usa est tamen dicta mixtura ad 18. quacum omnia boni coloris essent, & pars dura post reliquæ molis suppurationem relicta immutata maneret, denuo incœpit bis de die extracti cicutæ scr. j. fumere, & solo cicutæ infuso & emplastro deligari: diæta mansit eadem ut ante.

Perrexit ægra bene habere, & durities relicta suppuratione sensim ita consumpta est, ut 2 Februarii tota mam-

ma mollis esset, & ulceris labia jam ad se invicem inciperent accedere.

Omni medicamento abstinuit, & tantum bis de die linteis carptis decocto cicutæ imprægnatis desuper emplastro cicutæ appposito ulcus deligabatur.

12. Cavitas ulceris omnino impleta erat, & in tota superficie rudimenta cicatricis conspiciebantur, unde solo tegebatur emplastro diapalmæ, quod servavit, quandiu in nosocomio mansit, licet intra paucos dies cicatrix formata fuerit.

13. Sumpsit rhei elect. dr. j. & 14. licuit ipsi carnibus facilioris digestionis vesci, vires sensim increverunt, & torositas tempore curæ amissa corpori restituta est.

24. Bubulam & alia difficilioris digestionis alimenta, cum alia appetitui fatiando non sufficerent, incoëpit comedere.

Initio Martii fluxerunt menstrua, quibus caruerat toto curæ tempore, & brevi post nosocomio discessit: illam mensibus Aprilis & Maii vidi optima fanitate gaudentem. Hanc vidit illustrissimus Præses in initio curæ eam quoque ad illum adduxi, dum nosocomio egressa est.

CASUS XXXV.

PUERUM undecim annorum curandum accepi sexto mense a quo tinea foedissima laborare incœperat.

Per sex hebdomadas varia efficacissima medicamenta ipsi sine effectu sumenda dedi, externe applicari jussi.

Ad cicutæ extractum demum deveni, cujus gr. xvj. mane & totidem vesperti quotidie sumpsit : dum simul bis de die decocto cicutæ caput lavaretur.

Hac methodo intra bimestre spatium tinea integre disparuit.

Puer toto curæ tempore omnes functiones optimas habuit ; & , si quater datum lene purgans excipias , nullum aliud medicamentum ipsi administratum fuit.

CASUS XXXVI.

PUERUM novem circiter annorum mihi adduxit mater die sabbati ante Pascha anni 1762. habebat ille duodecim glandulas tumidas , duras partim sub parte dextra & sinistra maxillæ inferioris

ris & sub mento partim etiam circum collum. Omnes, aiebat mater, jam ortas esse, dum puer quartum ageret ætatis annum: occupabant præterea jam a femi-anno brachium finistrum duo tumores duri, lividi, ovi gallinacei magnitudine. Abdomen tumidum, durum erat: puer emaciatus & coloris ex pallido flavescentis.

Prius sumpto leni purgante incoepit bis de die extracti cicutæ gr. iv. sumere, & tumores diu noctuque emplastro cicutæ tecti sunt.

Primo mense, quo cicuta usus est, tumores brachii sinistri suppurati sunt, & pus dilutum dederunt: abdomen paulisper collapsum est, multo mollius evasit, & æger alacrior fuit.

Initio Junii clausa erant ulcera per suppurationem tumorum brachii producta: bini alii tumores, unus nempe sub parte sinistra maxillæ inferioris & alter sub mento aperti, pus dederunt: reliqui vero immutati permanebant. Habebat tunc puer abdomen gracile, molle; colorem corporis naturalem; appetitum magnum; vires optimas & animum admodum hilarem.

Sic fuit per integros quatuor menses absque ulla tumorum colli mutatione,

illis duobus folis exceptis, qui initio Julii aperti sunt: hos enim suppuratione consumptos optima cicatrix obduxit.

Circa medium Octobris incoepit bis de die extracti cicutæ gr. vj. fumere.

Perrexit æger optime quoad omnes functiones habere; initio Novembris advertimus tumores minus duros fieri, & molem illorum paulisper minui.

Datum est posthac omni 14. die lene purgans & diebus intermediis usus est dicta cicutæ dosi.

Duo ex residuis tumoribus sensim ita minuti sunt, ut initio Januarii anni 1763. resolutione penitus curati essent; in reliquis autem res admodum lente procedebat.

Dedi tunc puero extracti cicutæ gr. viij. bis de die fumenda: verum ab hac dosi angebatur, & ventriculo dolebat: unde ad priorem dosin redivimus, quam sine incommodo continuavit fumere.

Sensim ita minuti sunt omnes tumores, ut sub finem Martii vix tertiam prioris molis partem haberent: æger vero fastidiebat medicamenta, & illa coacti fuimus per aliquod tempus suspendere.

Initio Maii denuo incoepit eandem

medicamenti dosim sumere, sensimque ita collapsa est tumorum moles, ut in plerisque sub finem Julii tantum superesset pars dura fabæ magnitudine, in aliis paulo major.

Comedit vero puer fructus horæos immaturos magna copia, unde valida diarrhæa laboravit, quæ omiſſa cicuta aptis medicamentis intra octo dies penitus curata fuit.

Sub finem Augusti prior cicutæ dosis denuo ipsi data fuit, qua usus est usque ad initium hujus quem vivimus anni, semper optime habens: verum ulterior mutatio in tumoribus nulla facta est, cæterum puer sanissimus est, & pro ratione ætatis torosus.

CASUS XXXVII.

FEMINA 43. annorum 1. Octobris ad nos venit cum foedissimo cancro, mammam dextram occupante, quam aiebat a multis annis induratum, ante biennium incoepisse dolere & circiter ab anno apertam in cancrum evasisse.

Fundebat paucam faniem, & ægra enormes dolores patiebatur; admodum emaciata erat & viribus exhausta: sæpe

tussitabat, & subinde sputa flava eiciebat; respiratio erat brevis, & ægra continuo supina in dorsum decumbere cogebatur.

In hoc desperatissimo casu ægræ ter de die extracti cicutæ gr. xvj. sumenda dedi, mollem diætam præscripsi & quotidie lactis mensuram semis cum decocto hordei hauriendam exhibui.

3. Octobris jam totus cancer pure optimo tectus erat, dolores multum leniti, respiratio major, & ægra copiosiora sputa expectorabat.

Binorum mensium spatio suppuratione ita consumptus est cancer, ut initio Decembris quintam prioris molis partem non superaret, dolores toto tempore tolerabiles fuerunt, & ægra, quæ ad nos venerat admodum tristis, & melancholica, spe futuræ sanitatis erecta, animi sat hilaris erat.

Pergebat tamen copiosa sputa ejicere, & vires non incresebant.

Extracto cicutæ usa est ad finem usque Decembris, quo tempore cum præteriti canceri vix vestigium conspiceretur, a cicuta abstinuimus, & omni arte conati fuimus vires sustinere & erigere; verum omnia incassum adhibita fuerunt

& ægra 28. Januarii anni 1764. mortua est.

Aperto cadavere inventus est pulmo sinister maxima parte durus & ulceribus plenus, dexter vero erat integre consumptus, & eam pectoris cavitatem aqua fusca replebat.

CASUS XXXVIII.

JUVENIS 25. annorum sub finem Martii anni 1763 ad nos venit. Hic jam a pluribus mensibus artuum dolore noctu crescente laborabat, & fauces circumcirca a lue venerea exulceratas habebat.

Dedi ipsi lene purgans, dein decoct. N. 26. exhibui intra biduum absumendum, & injectionibus ejusdem plantæ decocti bis terve per diem fauces elutæ sunt.

Post octiduum dolores multum remiserant & ulcera erant pura.

Sumpsit tunc æger. decoct. N. 27. eo cum effectū, ut 8. Aprilis doloris expers, & ab exulceratione faucium penitus curatus ex nosocomio discesserit.

Primis 15. diebus, quibus in noso-

comio fuit, diæta molli usus est; postea autem cibis etiam durioribus ipsi licuit vesci, toto curæ tempore functiones omnes bonæ fuerunt, licet præter cicutæ decoctum administratum ipsi fuerit nihil, nisi lene purgans, quod tertia vice repetitum fuit.

C A S U S X X X I X.

FEMINA 28. annorum gonorrhæa tam acri jam per quatuor menses laboraverat, ut pudenda inde admodum erosa essent.

3. Aprilis nos accessit, & sumpto prius leni purgante usa est decocto N. 26.

9. Urinam multo minori cum dolore mittebat, & ulcera erant minus dolentia.

Sensim omnia ita in melius mutata sunt ut 28. ulcera cicatrice obducta essent, ægra nullos amplius dolores perciperet, & materies mucosa minime acris tantum pauca quantitate ex pudendis efflueret.

Perrexit tamen decocto cicutæ uti ad 8. Maii, qua vix de fluore albo quid supererat, & sumptis adhuc per octi-

dum lenioribus roborantibus perfectæ sanitati restituta ad labores rediit.

Quinquies hæc sub usu cicutæ purgans sumpsit, & optimum, quo antea carebat, appetitum recuperavit.

His duobus casibus similes multos habui, in quibus cicutæ extractum idem effecit, ac in his decoctum, quod ultimum tribus aliis feminis eodem fere modo affectis æquali cum effectu exhibui.

C A S U S X X X X.

FEMINA 40. annorum scorbutica jam ab anno ulcus in crure dextro habebat, multam saniem fundens, quod ita prospererat, ut, dum ad nos

11. Junii venit, a malleolo pedis externo ad mediam suræ partem crus occuparet, margines profunde exesos habebat: & valde sordidum erat, ægra in artubus superioribus dolores conquebatur, & gingivæ facile sanguinem fundebant.

Decocto N. 26. statim incoepit interne uti & ulcus simili fere ejusdem plantæ decocto deligatum est.

14. Jam ulcus mundum erat, & cò-

loris subrubelli, verbo intra quinque hebdomadas ulcus optima cicatrice obductum est.

Disparuerunt artuum dolores; gingivæ colorem naturalem adeptæ sunt, nec ullum amplius sanguinem fuderunt, continuavit tamen cicutæ decocto uti ad finem Julii usque, & initio Augusti sana ad suos rediit.

C A S U S X X X X I.

FEMINA 23. annorum jam a vigesimo ætatis suæ anno inferiorem cruris finistri partem tumidam, duram habuerat; mense Martii tempore puerperii tumor exulceratus est, crurisque mole admodum increvit, & dum ad nos 22. Junii delata est, aiebat se jam per tres menses ob magnos dolores & nimiam cruris, quod admodum durum & tumidum invenimus, molem lecto affixam fuisse, ulcus valde magnum foetebat & sordidissimum erat.

Sumptis per quatrimum omni die folior. cicutæ dr. ʒ. ii. in decocto & fomento cicutæ quotidie bis terve deligato crure ulcus mundatum est, nec ullam amplius foetorem sparfit.

Dedi tunc ægræ folior. cicutæ dr. iiii. in decocto quotidie absumendas, & perrexit expertissimus Chirurgus fomento cicutæ ulcus deligare.

Hac methodo quinque hebdomadarum spatio continuata, crus mollitiem naturalem acquisivit; disparuit tumor, ulcus coaluit, & ægra libero cruris usu gaudens, non multo post sanissima ex nosocomio discessit.

Plures similes ægros partim extracto cicutæ, partim ejusdem plantæ decocto felicissime curavi, omnium autem historias referre lectori tædiosum foret, sufficiat mihi dixisse quod non meminerim me in talibus casibus cicutam adhibendo ni ossa corrupta fuerint, scopum non attigisse.

COROLLARIUM Primum.

CICUTA in tumoribus internis ab obstructione ortis & viscerum indurationibus secure & egregio cum effectu datur, modo attentus sit Medicus ad mutationes illius usum subsequentes, in externis enim tumoribus a suppuratione nihil metuimus, quæ, si interna sit, ni in tali loco fiat, ex quo per aliquod emunc-

torium pus excerni queat ; ægrum perfundare potest, ergo ubi signa metum suppurationis internæ incutiunt, illam impedire debet medicus, sopita, si adsit, feбри, interrupto per unum vel plures dies cicutæ usu &c.

Qui hoc modo cicutam in dictis casibus exhibebit ægris, proderit semper, nocebit nunquam, & sæpe casus omni alteri pharmaco indomabiles radicitus curabit.

COROLLARIUM Secundum.

FORMICATIO & levis dolor in tumore duro antea indolente notat medicamento ingressum & actionem in illum, si dolor intendatur, futuram suppurationem, subinde etiam scirrhusæ massæ secuturam, a sanis per gangrænam separationem indicat.

Quid, dum interni sunt illi tumores, in hoc casu agendum sit medico, dictum est corollario primo, in partibus vero externis vix præcaveri debet suppuratio, multi enim tumores nequeunt resolutione curari, qui suppuratione sat cito consumuntur, & nullo modo cancer &

durissimi scirrhi tam celeriter a fanis separantur , quam per gangrænam.

COROLLARIUM Tertium.

SÆPE tamen scirrhi non admodum antiqui , & alii tumores duri , resolutione curantur.

In hoc casu , ubi cicuta tenax vascula infarciens attenuavit , & totum vel pro parte per vasa meabile reddidit , subinde datum purgans prodest , ni ipsa cicuta , ut quandoque fit , alvum leniter subducat.

COROLLARIUM Quartum.

UBI antivenereorum princeps mercurius sublimatus corrosivus , in spiritu frumenti solutus ob nimiam jam a lue venerea labefacta viscera exhiberi nequit , vel quando ægri illum non ferunt , cicuta efficax præbet medicamentum , dolores leniens , sopiensque , & ulcera fanans , & corpus teterrimo malo feliciter liberans.

COROLLARIUM Quintum.

CICUTA in primo, secundo & tertio scorbuti gradu egregiam opem fert; dum tenax serum solvit, acre a compedibus liberat, ac e corpore eliminat, vel illud aptum reddit, ut per diluentia aut alia evacuantia e corpore possit eliminari, hinc ulcera sanat & omnia scorbuti symptomata lenit, ac simul cum morbo extirpat.

COROLLARIUM Sextum.

CICUTA circulationem liberiores & æqualiores reddit; glutinosa enim & lenta a quibus obstructions in minimis vasculis oriuntur, attenuat, solvit & vascula aperit; nec tamen sanguinem aggreditur, qui sub usu cicutæ, etiam diu continuato, pristinas suas qualitates integre servat.



COROLLARIUM Septimum.

IN omni cancro salubris est cicutæ usus, si enim ob viscerum labem vel a nimia morbi diuturnitate viribus exhaustum corpus, salutem perfectam adferre nequeat, dolores lenit, faniem rodentem in pus sæpe admodum blandum convertendo & sic morbum tolerabiliorem reddit, reliquosque vitæ dies magis tranquillos.

COROLLARIUM Octavum.

GANGRÆNA, quantum huc usque observare potui, scirrhum & cancrum fere solum in juvenibus, vel saltem subiectis adhuc robustis, a sanis partibus separat.

COROLLARIUM Nonum.

CICUTA nullum respuit alimentum, valde acres tamen vel tenaces sibi copiose sumpti nocent.

COROLLARIUM Decimum.

VINUM bonum moderate sumptum prodest, nimia autem copia haustum omnia perturbat, dolores auget; supurationem a cicuta productam supprimit, & ulcus exsiccat.

COROLLARIUM Undecimum.

IN lue venerea, scorbuto & ulceribus venereis & scorbuticis &c. folia cicutæ vase clauso per semi-horam decocta optimo cum effectu, & æque secure ac extractum ejusdem plantæ, exhiberi possunt, imo videntur etiam in scirrho & cancro æque efficacia ac ipsum extractum, ansam hoc credendi præbet mihi femina, quam cum pessimo cancro nasum occupante ad nostrum nosocomium misit magnificus *Storck* & cui præter decoctum cicutæ nihil exhibui, in initio tantum omni die habuit folior. dr. 11. in colatura lib. β. assumendas & 5. die jam pus in omni superficie canceri conspiebatur. Nunc vero folior. unc. β. ad co;

laturæ unc. ix. jam per octiduum sumpfit
absque minima in corpore excitata tūr-
ba, & tanto cum effectu, ut tertia
cancris pars jam suppuratione consumpta
sit.



FORMULÆ:

FORMULÆ.

1) ℞. Rad. althææ. unc. j.
 folior. althææ. m. j. β.
 consciss. coq. c. f. q. aq. p. $\frac{1}{2}$ horam
 dein adde
 folior. veron. m. j.
 rad. fenicul. unc. j.
 relinq. in fervida digestionem per $\frac{1}{2}$
 horæ vase clauso
 calat. lib. ij. adde
 oxymell. simpl. unc. ij.
 — squill. unc. j.
 stib. diaphor. o. abl. dr. j. β.

M. S. *Omni bihorio unc. ij. sumantur.*

2) ℞. Semin. melon. unc. iij.
 f. cum aq. hord. emuls.
 colat. lib. j. β. adde
 sal. polychr. dr. j.
 fyr. althææ. unc. j. β.

M. S. *Omni bihorio unc. ij. sumat.*

3) ℞. Semin. melon. unc. ij.
 f. cum aq. hord. emulsio.
 colat lib. j. adde
 fyr. diacod. unc. j.

M. S. *Omni bihorio unc. j. vel unc. ij.
 sumantur.*

Collin Pars I. Tom. II.

L

- 4) R. Rob. sambuc. unc. iv.
 sal. polychr. dr. j.
 nitr. pur. dr. β.

M. S. *Omni trihorio unc. β.*

- 5) R. Semin. melon. unc. iij.
 f. cum aq. hord. emulsio.
 colat. lib. j. β. adde
 bol. armen. dr. vj.
 fyr. diacod. unc. ij.

M. S. *Omni bihorio unc. ij. sumat.*

- 6) R. Rad. sal. dr. ij.
 confciff. coq. per $\frac{1}{2}$ horam
 colat. lib. j. adde
 fyr. althææ. unc. j.

M. S. *Omni trihorio unc. iij. sumat.*

- 7) R. Rad. sal. unc. β.
 coq. cum aq. q. f. p. $\frac{1}{2}$ horam.
 colat. lib. j. adde
 laud. liq. fyd. gtt. xx.
 fyr. diacod. unc. j.

M. S. *Omni trihorio unc. ij.*

- 8) R. Claret. fact. ex conserv.
 flor. cordial. lib. j.
 fyr. diacod. unc. j. β.
 spir. sulph. p. camp. q. f.
 ad gratiam.

M. S. *Sumat æger omni bihorio vel trihorio duo cochlearia.*

- 9) R. Folior. alexandr. dr. iv.
 flavæ. cortic. critic. dr. β.

sal. polychr. dr. j. β .
mann. calabr. unc. j.
m. infunde cum aq. fervid.
q. f. p. $\frac{1}{2}$ horam vase clauso.
colat. unc. iv. d: u.

10) \mathcal{R} . Nitri puri dr. j.
fyr. moror. unc. j.
aq. flor. rhæad. unc. viij.

M. S. Omni bihorio vel trihorio unc. j. detur.

11) \mathcal{R} . Stib. diaphor. o. abl. dr. j. β .
oxymell. squill. unc. j. β .
aq. hyssop. unc. viij.

M. S. Omni trihorio unc. j.

12) \mathcal{R} . Sal. polychr. dr. β .
fyr. rub. ideam unc. ij.
rob. ribesior. unc. j. β .
vin. bon. austriac. unc. ij.
decoct. hord. lib. ij.

M. S. Omni bihorio unc. j. β . vel unc. ij. sumantur.

13) \mathcal{R} . Camphor. gr. xx.
mucilag. gumm. trag. dr. j.
in mortario vitreo terendo subactis
admisce.

aq. flor. sambuc. lib. j.
fyr. diacod. unc. j.
nitr. stib. dr. β .

M. S. Omni bihorio unum vel duo cochlearia.

14. R. Cortic. peruv. unc. j.
 fyr. flor. chamom. unc. ij.
 aq. flor. samb. unc. xv.
 vin. bon. austriac. unc. j. β.

M. S. *Omni bihorio unc. j. β. vel unc. ij. sumantur.*

15) R. Stib. diaph. o. alb. dr. j.

kerm. mineral. gr. xv.

facchar. candi. alb. unc. j.

m. f. pulv. tenuissimus.

S. *Omni trihorio vel quarthorio parvum cochleare.*

16) R. Stib. diaph. o. abl. dr. j. β.

kerm. mineral. gr. x.

m. f. pulv. tenuissimus, cui exacte miscendo adde

conserv. fumar.

— nasturt. aq.

— becabung. aa. unc. ij.

M. S. *Sumat omni bihorio duo parva cochlearia.*

17) R. Camphor. gr. xv.

femin. melon. unc. iij.

f. cum aq. hord. l. a. emulsio

colat. lib. j. β. adde

fyr. papav. alb. unc. j.

M. S. *Omni trihorio unc. ij. dentur.*

18) R. Spir. sulph. p. camp. dr. j.

aq. flor. rhæad. lib. j.

fyr. papav. alb. unc. j. β.

M. S. *Omni trihorio unum vel duo cochl.*

19) R. Rad. gramin.

— taraxaci aa. unc. vij.

consciss. coq. cum. aq. q. f. per
horam colat fortiter express. unc. xx.

adde

fyr. fumar. unc. ij.

sal. polychr. unc. β.

spir. nitr. dulc. dr. j.

M. S. *Omni trihorio unc. ij. sumantur.*

20) R. Herb. mercurial. m. j. β.

folior. alexandr. dr. iiij.

coq. cum aq. q. f. p. $\frac{1}{2}$ horam

vase clauso.

colat. lib. j. β. adde

sal. polychr. dr. ij.

fyr. rosar. solut. unc. j. β.

spir. nitr. dulc. gtt. xx.

M. S. *Omni trihorio unc. ij. sumantur.*

21) R. Stipit dulcamar. unc. ij.

leviter contusos infunde cum aq.

fervid. p. $\frac{1}{2}$ horam, sub finem

momento ebulliant.

colat. lib. j. β. adde

oxymell. simpl.

mell. pector. aa. unc. j.

M. S. *Omni bihorio unc. j. vel unc. j. β.*

sumatur.

22) R. Scammon.

resin. jalap. aa. gr. v.

mass. pilul. extract. cathol. gr. x.

spir. vin. q. f.

m. f. pilul. n. vj.

S. Mane omnes sumat.

23) ℞. Rhei elect. dr. β.

scammon. gr. viij.

sal. polychr. gr. x.

ol. stillat. foenicul. gtt. j.

M. F. Pulv. mane sumendus.

24) ℞. Rad. jalap. scr. j.

resin. jalap. gr. ij.

sal polychr.

sacchar. alb. aa. gr. x.

M. F. Pulv. mane sumendus.

25) ℞. Sal. polychr. dr. j.

conserv. nast. aq. unc. v.

*M. S. Quater vel quinquies per diem
sumat unc. β.*

26) ℞. Folior. cicut. unc. β.

coq. p. $\frac{1}{2}$ horam cum aq. q. f. vase
clauso.

colat. lib. j. adde

fyr. althææ. unc. j.

M. S. Quater de die sumat unc. j. β.

27) ℞. Folior. cicut. dr. vj.

coq. cum aq. q. f. p. $\frac{1}{2}$ horam vase
clauso.

colat. lib. j. adde

fyr. althææ vel diacod. unc. j.

M. S. Usus ut prioris.



HENR. JOSEPH. COLLIN,

Nosocomii Pazmanniani Physici Ordini-
narii, & Sacrae Cæsareo-Reg. Apost.
Majest. regim. infer. Austr. Confiliarii

OBSERVATIONUM

CIRCA


MORBOS ACUTOS

ET

CHRONICOS FACTARUM.

PARS SECUNDA.





PRÆFATIO.

EN, amice Lector, secundam Observationum mearum partem, in qua quidem de acutis Morbis nihil continetur: morbus enim notabilis ab anno 1760 usque ad annum 1770, nullus Epidemicus fuit: quæ tamen minus communia occurrerunt, notavi, & data occasione publici juris fient.


Varia de chronicis & medicamentorum quorundam viribus maturius typis mandassem; ni desiderium illa magis magisque confirmata videndi remoram posuisset. Gravis dein morbus epi-

demicus Regna vicina & demum
Austriam anno 1770 invadens,
tanta negotia facessivit, ut typis
aliquid mandandi non vacaverit
tempus. Cum autem, favente
Deo, nunc remittat hæc epidemia,
unam observationum partem post
alteram interposito brevi intervallo
Typographiæ tradam: observa-
tionesque fideli calamo scribere
pergam, persuasus hanc principem
esse viam, qua Ars Medica pro-
gressus facere possit.

Cautus ero semper, ne aliorum
famæ noceam, & si in morborum
anamnesi aliquid occurrat, quibus-
dam minus favens, illorum nomina
reticebo.

Objectiones contra me factas,
si solida experientia & exacte

factis observationibus destitutæ
sunt, floccifaciam; si me meliora
docuerint, lubens admittam, &
mutabo sententiam.





ELENCHUS CAPITUM.

CAPUT I.

De Colchico in Hydrope.

CAPUT II.

De Aconito & Hyoscyamo.

CAPUT III.

De Polygalæ amaræ radicis contra
suppurationem pulmonum &
Phtysin pulmonalem usu.






CAPUT PRIMUM

D E

COLCHICO IN HYDROPE.



CASUS PRIMUS.

IGINTI trium annorum puella
jam a pluribus mensibus as-
cite anasarca & tussi inani
laborans, multisque medica-
mentis sine effectu usa, undecima Sep-
tembris anni 1764 ad nostrum nosoco-
mium delata quindecim dierum spatio
oxymellis colchici unc. xxx, sine leva-
mine, absumpsit. De hujus medicamenti
in hac ægra efficacia desperantes, om-
nia alia in arte nota medicamenta anti-
hydropica per quatuor menses incassum
adhibuimus; imo sub finem quarti
mensis uterque hydrops ita increvit, ut
ægra brevi suffocanda videretur. In his

angustiis ad oxymel colchicum denuo confugimus , dedimusque hujus unc. iv. omni die absumendas.

Sequenti die ægram invisentes copiam urinæ ab ipsa redditam sedecim libras medicas excedentem invenimus.

Perrexit ægra eadem medicamento dosi uti , & urinis magna copia constanter missis , intra tres hebdomadas ab omni tumore hydropico perfecte liberata fuit ; tussis autem mansit , qua sub finem Aprilis anni 1765. sputa purulenta striis nigris mixta incœperunt ejici , quæ licet continuarint usque ad finem anni modo majori , modo minori copia excerni , ægræ vires bonis alimentis & aptis medicamentis ita reparatæ , & conservatæ sunt , ut post mensem Maium raro interdum debuerit decumbere.

Ineunte anno 1766. in vehementissimam febrim inflammatoriam cum doloribus punctoriis hypochondriorum , epigastrii & variarum pectoris partium , tussi frequenti sicca , pulsu durissimo , lingua & toto corpore siccissimis incidit , quæ ter instituta binis primis diebus larga venæ sectione & medicamentis emollientibus antiphlogisticis sensim minus vehemens reddita , erumpente septimo die sudore copioso per totum

corpus æquali, sputis coctis subpuru-
lentis sat facile excretis, doloribus pec-
toris & hypochondrii dextri silentibus
ita mitigata est, ut brevi integram ju-
dicationem sperassemus, nisi obtusus
dolor sub ultimis costis spuris lateris
sinistri & epigastrii suspensos tenuisset
animos.

Usque ad decimum quartum morbi
diem mansit fere in eodem statu: postea
autem evaserunt sputa sincere puru-
lenta, copiosa: febris per diem lenta
incoepit omni vespere exasperari, do-
lore hypochondrii sinistri cum febris
increfcente.

Diæta lactea & medicamentis in tali
casu indicatis usa est ægra usque ad fi-
nem Januarii sine levamine: auctus est
lateris dolor & tensio, & initio Fe-
bruarii trium dierum spatio pus pluries
magna copia vomuit, sputis reddidit,
& per alvum excrevit cum magna do-
loris & tensionis remissione.

Continuato medicamentorum emol-
lientium, mellitorum expectorantium
& diætæ lacteæ usu febris hectica sensim
multum imminuta fuerat, & lateris
dolor & tensio evanuerant, continuante
sputorum purulentorum copiosa excre-
tione.

Decima octava Februarii totus corporis habitus incœpit intumescere, ac sequenti die ægram invifens inveni illam anasarca occupatam.

Præter medicamenta pectoralia oxymell. colchic. unc. ii. per diem sumpsit, sicque effectum est, ut intra decem dies anasarca disparuerit; tussis multo rarior & expectoratio paucior evaserit, respiratione pleniori & liberiori reddita; continuavit tamen adhuc per octiduum oxymell. colchici unc. j. quotidie sumere, ac postea aliis aptis medicamentis & congrua diæta utens carnes & vires ita recuperavit, ut mense Junii potuerit servitium ingredi, in quo officio coquæ adhucdum fungitur, optime valens.

CASUS SECUNDUS.

FEMINAM 20. annos natam vigesima Aprilis anni 1765. magno ascite & ingenti anasarca laborantem magnosque dolores in toto abdomine conquerentem curandam suscepi: novem elapsæ erant hebdomadæ a puerperio, quo feliciter defuncta fuerat, & ab eo tempore dolores lancinantes sæpius repetentes, quæ

a regione epigastrica per totum abdomen propagabantur, illam afficiebant. In cruribus dolor urens, decimo quarto a partu die ortus, continuavit donec decima tertia Aprilis subito cruribus, dein toto corpore intumuerit. Hoc in statu malo consilio bis vena secta fuerat, ac tertio venæ sectio tentata: verum tunc nullus amplius sanguis ex vena effluxit.

His venæ sectionibus ad maximam debilitatem redacta fuerat ægra & hydrops uterque ita auctus fuerat, ut suffocationem continuo minaretur. Alvus non nisi enemate sollicitata jam per plures dies exonerabatur, & urina quam paucissima prodibat: appetitus erat paucus, sitis autem nulla, & pulsus præ tumore nullus inveniri potuit.

Acrium & corpus turbantium medicamentorum usum prohibebat nimia corporis debilitas: hinc solo oxymelle colchico curam aggressus, illius unc. j. ℞. omni die absumendam ægræ, cibis vescenti eupetis, dedi.

Statim prima die magnam urinæ copiam misit, & diuresis tam felici cum successu continuavit, ut ab omni hydrope intra quinque hebdomadarum spatium integre liberata fuerit, func-

tionibus in integrum restitutis: ægram tamen in nosocomio, donec & carnes & vires corpori emaciato sufficientes renatæ essent, retinui, & 19. Julii sanam, viribus valentem ad suos remisi.

CASUS TERTIUS.

UNDECIM annorum puella tertia Octobris ad nos delata est: tussi valida admodum, qua nihil præter spumam & serosum quid ejiciebat, jam a quatuor annis vexabatur, & octo dies elapsi erant, ex quo tumere incoeperat.

Totum corpus ingens anasarca occupabat; abdominis cavitas aqua impleta erat, & decubitus ob respirationis difficultatem raro possibilis: diarrhæa quoque frequens, cum siti & abdominis torminibus jam per sex dies durans ægram multum debilitabat.

Partim ad tussim leniendam, partim ad sedandam diarrhæam decoctum demulcens, & paregoricum per quatuor dies sumpsit, quo quidem diarrhæa sopita & alvus in naturalem mutata: tussis vero & anxietas eadem vehementia ac ante perrexerunt, & sæpius recurrebant magna abdominis tormina.

De Colchico in Hydropse. 259

Septima Octobris præter decoctum memoratum quod N. 1. videri potest. oxymell. colchici unc. j. per diem absumere incœpit. Sequenti die facilior tussis erat; sputa glutinosa magna quantitate ejiciebat, & ægra intra quatuor dies magnam in respirando facilitatem adepta est, atque tumoris hydropici incipiens collapsus manifeste conspiciatur. Urinæ tamen copia, nyctemeri spatio missa, vix tres libras medicas æquabat: dejectio alvina omni nota naturalis erat, nec de abdominis doloribus amplius conquerebatur.

Undecima Octobris data est ipsi oxymellis colchici unc. j. β. omni die absumenda, qua perrexit uti ad vigesimam quartam ejusdem mensis diem, pergente ut prius diuresi, & omnibus ita sensim in melius mutatis, ut oxymellis colchici usui supersedere potuerimus; etenim respiratio liberrima erat; tussis cum sputis evanuerat, nec ullum de ascite & anasarca supererat vestigium.

Per octiduum usa est sequenti medicamento.

℞. Conserv. cochleariæ.

Becabung. aa. unc. j.

Limat. mart. subtil. scr. ℞.

M.

S. intra biduum absumat.

Sub hujus medicamenti usu vescebatur ægra cibis reconvalescentibus dari solitis, per cubiculum toto die deambulans, ac cum ultimis diebus sanarum diæta uteretur; parentes illam quinta Decembris domum receperunt, optima sanitate & viribus gaudentem.

CASUS QUARTUS.

QUADRAGINTA duorum annorum femina ante sex menses menstruorum fluxu carere incœperat: quibus cessantibus tussis inanis validissima illam corripuit, accedente simul tanta respirationis difficultate, ut in lecto infomnis & erecto corporis trunco in magnis anxietatibus fere omnes dies noctesque transegerit.

Faucis ab initio ferinæ illius tussis elapsis diebus abdomen mole majus solito fieri, & facies, manus, pedesque tumere incœperunt, tumorque brevi totum corpus occupans in valde magnam molem increverat.

Ægram hanc primo sexta Julii anni 1765. vidimus: tuncque omnibus præ-

dictis symptomatibus laborabat, & præ ascitis magnitudine ingentique anasarca corpus nullo modo movere poterat: admotis pulvinaribus situs erectus corpori conciliabatur, ut suffocationem diutius effugeret. Urina jam a multis hebdomadibus guttatim paucissima quantitate effluebat, & alvus erat admodum tarda; appetitus erat nullus, sitis quoque nulla.

Variis medicamentis incidentibus hydragogis & diureticis per plures dies adhibitis, ægra nullum sensibile levamen percepit, donec oxymellis colchici unc. j. β. omni die absumendam dederim, a quo, jam secundo, quo illo utebatur, die, ad lib. ij. & ultra excreta est urina, & tussi multo minus violenta, quam ante, magna sputorum glutinosorum copia reddebatur.


Hac medicamenti dosi uti perrexit usque ad vigesimam secundam Julii, urinæ & sputorum evacuatione bene procedente, succedente quotidie semel, quandoque bis dejectione alvina molli sic corporis habitus mollis evasit, minus tumidus & abdominis moles manifeste minuta est, liberius respirabat ægra, & seipsam erigere solaque comedere

poterat : naturalis autem decubitus vix adhucdum ipsi possibilis erat.

Ut cura acceleraretur dedi ipsi oxy-mellis colchici unc. ij. per diem fumendas , qua dosi usque ad secundam Augusti usa est cum diureseos augmento, collapsu majori tumoris , tussisque & sputorum magna imminutione , & sensim facilius redditus est decubitus.

Aucta est medicamenti dosi ad unc. iij. per diem , qua dosi ad vigesimam quartam Augusti usa ab omni hydrope & tussi & reliquis omnibus hydropis symptomatibus liberata fuit. Maximam diei partem extra lectum & per cubiculum deambulans transigebat , noctu somno pacato reficiebatur & omnes corporis functiones bonæ erant.

Usa est tunc ægra conserv. antisc. , cui addita erat limat. mart. scr. β. ad decimam usque Septembris , qua die cum alvus non debite procederet pulv. hydragog. sumpsit , ac postea omni medicamento abstinuit & vigesima quarta Septembris sanissima discessit.



CASUS QUINTUS.

VIR 55. Annorum 29. Octobris anni elapsi ad nostrum nosocomium delatus est: corripuerat illum tussis frequens, sicca, jam ante tres menses, quæ sensim valde increverat: jam a tribus hebdomadis admodum anxie spirabat, & nonnisi per brevia intervalla decumbere poterat; accesserat quoque crurum femorumque tumor, & facies artusque superiores ac abdomen mole augeri incoeperant, & brevi ad maximas angustias redactus fuerat æger.

Dum primo illum vidi, præsentē doctissimo *Mathæo Storck*, magni *Hetruriæ Ducis Medico*, qui maximæ horum casuum partis testis diligens fuit; ascites magnus & admodum tumidus; anasarca ægrum occupabant; aderat summa anxietas; decubitus impossibilis; inanis ad tussim conatus; livescebat facies, manus & crura; livida erant labia, aures, palpebræ & cadaveroso frigore, sicut artuum extremitates, occupabantur; alvus erat tardissima; urina non nisi guttatim jam in tertiam

hebdomadem & paucissima quantitate reddebatur.

Visis omnibus his pessimis symptomatibus de ægri curatione desperabamus, suo fato tamen ægrum relinquere nolimus, & dedimus illi oxymellis colchici unc. ij. ut per diem absumeret, & statim primo die urina sat magna quantitate pluries missa fuit.

Per quatuor dies eadem dosi medicamenti usus sat magnam aquarum copiam diuresi reddidit, verum vix inde levamen adverti poterat, & alvus per plures dies clausa manebat.

Tertia Novembris decoctum N. 3. bono cum effectū sumpsit, dein priori colchici dosi perrexit, uti, qua tanta urinæ evacuatio facta est, ut intra decem dierum spatium omnis hydrops disparuerit, reddita respiratione liberima, absente tussi, ægro facillime decumbente & pacatum somnum appetitumque bonum habente, alvique exoneratione naturaliter procedente.

Ne tamen in cavitatibus aqua adhuc latitaret, eadem medicamenti dosi usus est usque ad decimam-nonam Novembris, qua incoepit unicam unciam per diem sumere; & hoc modo continuavit

usque

De Colchico in Hydropse. 265
usque ad vigesimam sextam cibis eupetis vescens.

Demum sequentem conservam ipsi præscripsi intra triduum absumendam.

℞. Conservæ cochleariæ.

oxymell. colchici aa. unc. ij.

limat. mart. o. rubigin. scr. j.

M.

Hoc medicamento usus est usque ad sextam Decembris diem, qua cum solidioribus cibis sine incommodo jam per plures dies vesceretur & ad solitos labores obeundos se robustum satis crederet, diutius in nosocomio manere recusavit.

CASUS SEXTUS.

OPERARIUS 45. annorum, antea militiæ ferviens, ante sex annos in castris militaribus degens diu, modo supra glaciem, modo in aqua frigida stare debuit, & tussim inde validam, inanem contraxit, ob quam diu in nosocomiis militaribus detentus a medicis præscripta varia medicamenta sollicite sumpsit: verum ab his nullum levamen secutum est. Multis postea continuo usus est medicamenti contra tussim, sed sine effectu, ante

Collin Pars II, Tom. II. M

annum tussi accessit ascites, cui, brevi post, se adjunxit anasarca.

Acceptis ex nosocomio hispanico medicamentis ab hoc tempore usus est, quibus aliquoties hydropicus tumor paulisper minutus, nunquam autem ex integro dispulsus, brevi denuo prius volumen acquisivit, tussis autem immutata permansit, & ab eo tempore, quo incoepit tumere corpus, decubitus illi in sinistrum latus impossibilis fuit.

Octava Octobris illum primo vidi, & totum corpus tunc anasarca occupabat; ascites admodum magnus erat: tussis vehementissima, sicca; facies livescens; & æger, sive jacens, sive sedens admodum inquietus continuo situm præ anxietate mutabat; urinam paucam dimittebat, dejectio autem alvina tenuis, pluries sponte per diem aderat.

Data est ipsi dupla dosis decocti radicis salab, & omni die oxymell. colchici unc. ij. assumpsit.

Statim æger levamen habuit, & sæpe decies octies, imo vigesies nyctemeri spatio urinam quaque vice ad plures uncias octo primis diebus mittere debuit, donec anasarca integre disparuerit, postea vero minus frequens fuit diuresis, & alvus antea tenuis naturalis evasit.

Perrexit tamen urinæ evacuatio egregie procedere, tussis sensim lenita & ascites de die in diem sensim ita minutus est, ut sub finem Novembris nullum sui indicium amplius præberet, tussis penitus cessaverat & æger in utrumque latus facile decumbebat; appetitus erat optimus, somnus bonus; vires tam bonæ, ut per cubiculum deambulans magnam diei partem consumeret; paucis, omnium functionum debito exercitio gauderet.

Vigesima sexta Novembris incoepit conserva N. 3. uti, continuavit ad septimam Decembris usque, & sanus robustusque decima Decembris ad suos labores rediit.

CASUS SEPTIMUS.

OPERARIUS 51. annos natus, duodecima Novembris ad nos delatus est. Hunc hominem post multum panem prunaque comesta, potamque desuper cerevisiam, octo jam antea, quam ad nos deferretur, hebdomadis febris quotidiana prehenderat, qua adhucdum afficiebatur, dum illum curandum suscepimus.

Tempore paroxysmi febrilis frequenter inani tussi vexabatur, & jam a quatuor hebdomadibus abdomine tumere incœperat, ac decubitus in dorsum ipsi erat impossibilis.

Dum illum primo examinavi, levi anasarca laborabat, & magno ascite, febris per paucas tantum horas intermittens illum multum debilitaverat; tussis erat frequens, vehemens, qua quandoque aliquid mucosi ejiciebatur.

Datum est illi sequens:

℞. Oxymell. colchici unc. iv.

sal. polychr. dr. iij.

M.

℞. Intra biduum totum sumat.

Ufus est hoc medicamento usque ad 24. Novembris, tumore vel nihil vel admodum parum collabente, licet sat copiosa urina excerneretur, & alvus liquida quotidie bis quandoque ter exoneraretur: febris paulo leniore evaserat, & tussis raro ægrum invadebat.

Vires autem magis magisque deperdebantur, hinc præter prius medicamentum data est illi mixt. N. 4. qua febris penitus fugata est.

Solo postea oxymelle colchico ad unc. ij. per diem usus est. Aquarum evacuatio optime processit, alvus liquida in

naturalem mutata est, & decima Decembris anasarca penitus disparuerat & ascites vix amplius sensibilis erat, tussis rarissima, vigente appetitu: viribus insurgentibus, decubituque in dorsum diuturniori, faciliiori, & accedente somno sæpius sat longo, reficiente.

Perrexit eadem medicamenti dosi uti ad vigesimam Decembris usque, qua die cum nullum amplius hydropis indicium superesset, data est illi conserv. N. 3. sub cuius usu vires magis magisque auctæ sunt, & initio Januarii anni 1766. sanus & robustus ad suos rediit.

CASUS OCTAVUS.

MULIER 29. annorum, plurium prolium mater, ante biennium ultimo partu defuncta, & ab eo tempore catameniiis carens, cæterum toto hoc temporis intervallo sana & solitis laboribus exercitata, declinante Octobri proxime elapso in febrim quartanam incidit, cuius paroxysmos novem perpeffa est.

Paroxysmorum tempore introtractione hypochondriorum dolorifica & abdominis torminibus multum vexaba-

tur, totoque, quo febris duravit, tempore, diarrhæa frequenti laboravit & magna siti.

Ter intercalaribus diebus assumptis cujusdam tincturæ a mercatrice acceptæ guttis v. febris fugata est, cujus ultimo tempore totus corporis habitus intumuerat.

Sublata autem febre intumuit quoque abdomen, & incassum medicamenta varia aquarum evacuationi promovendæ apta adhibuit.

Omnia enim in pejus cito ruerunt, & dum septima Decembris illam vidi, abdomen erat ingentis mollis, tensum, pressioni manus difficile cedens & præ hydropis intercutis magnitudine vix fluctuationis indicium percipi poterat; ultimis octo diebus quibus domi degerat, per plura minuta magnam vim adhibere debuerat, ut aliquot urinæ guttulas exprimeret, huncque laborem frequenter repetere cogebatur, diarrhæa usque ad suum in nosocomium ingressum continuavit, ibi brevi sedata.

Tumidissimis pudendis fomentum ex herbis resolventibus & discutientibus diligenter applicatum est, & statim ægra incœpit oxymell. colchici unc. ij. per diem sumere.

Tanta, intra biduum, urina facile & magna copia prodeunte, sudoribusque toto corpore sæpius æqualiter erumpentibus, facta est aquarum evacuatio, ut nona Decembris ad minimum una tertia prioris molis parte ascites & anasarca minores fuerint.

Cum urina tunc facile mitteretur, fomentum ablatum est, & continuavit ægra eadem oxymellis dosi uti.

Duodecima Decembris omnes artus & facies fere detumuerant; ascites pergebat insigniter minui, siti, qui antea aderat, omnino absente, ingens erat appetitus, sponte omni die alvus naturalis exonerabatur; & sæpius somno pacato reficiebatur.

Perrexit ægra usque ad vigesimam Decembris eadem medicamenti dosi uti, iisdem & eodem modo ac antea evacuationibus pergentibus; cumque tunc omnis hydrops disparuisset, ab omni medicamento abstinuit, & cibis eupetis solummodo usa est. Alacris erat ægra, & sæpius ex lecto surgens per cubiculum deambulabat; cumque medicamenta roborantia ipsi propinare vellemus floccifactis nostris monitis, post festa natalitia ad suas proles rediit, promisit tamen se.

redituram, si aliquid mali ipsi accideret; ast huc usque non rediit.

CASUS NONUS.

PUELLA 25. annos nata, torosi semper corporis habitus, rusticis laboribus assueta, menstruis debito modo semper gavisa, cibis ut plurimum frigidis & crudis vesci solita, ac a juventute vomitis pulmonum quater quinquiesve per annum ruptis & cum foetore per sputa evacuatis obnoxia, tussique valida vix integris annorum decursibus unquam intermittente vexata, sub finem Septembris anni 1765. emanentibus catameniis in validam febrem quartanam incidit, cujus tempore tussis multum intensa est.

Jacuerat in aliquo hujus civitatis nosocomio, in quo a febre curata fuerat, manserat autem tussis, & antequam febris fugaretur, pedes ædematosi evaserant.

Pedum tumores floccifaciens, & non sperans se a tussi liberari posse, ex nosocomio illo duodecima Octobris exivit paucis diebus a sublata febre elapsis.

Per paucas dies cum difficultate so-

litos labores peregit, & brevi totus corporis habitus aqua intercute intumuit, ac abdomen magnam in molem increvit.

Dum nona Decembris illam primo vidimus, abdomen aqua plenissimum ingentem in modum protuberabat, & totum corpus anasarca valde tumebat: stertor magnus & continuus ingratissime antequam cubiculum intraremus aures feriebat, & vix verbum proferre poterat; facies & artuum extremitates valde livescebant, & urinæ ac alvi excretio jam a tribus diebus erat intercepta; situque semi erecto supine decumbens, nec federe valens, brevi videbatur suffocanda.

Præsentibus tamen his mortis teteris insigniis, licet admodum exigua spe ducti ad oxymell. colchicum confugimus, intra aliquot horas circiter unciam unam, circa vesperras, cum post meridiem ad nos delata fuisset, ægræ ingessimus, quæ noctu fere libram urinæ misit.

Sequenti die respiratio aliquantisper minus difficilis videbatur, & ægra incipiebat sputa mucosa tussi laboriosa reddere.

Datae sunt binæ oxymellis unciae, ut

per diem absumeret, & præter hoc ad tussim leniendam usa est decocto N. 1.

Urinæ excretio copiosior fuit, quam noctu fuerat, ægra leni sudore per totum corpus usque ad artuum extremitates æquali tota die nocteque sequenti maduit, & naturalis alvi dejectio sponte successit.

Undecima Octobris omnia eodem modo perrexerunt; livescens faciei & extremitatum artuum color fere integre disparuerat, magnamque sputorum glutinosorum copiam ejecerat.

Duodecima Decembris ægra non amplius semi-erecto, sed situ naturali & facillime decumbere poterat; somno protracto, quo per multas dies caruerat, noctu refecta: sputa multa glutinosa ejecerat, & adhucdum ejiciebat; tussis erat facilior, minus frequens; stertor aberat & respiratio erat facilis, continuabat ægra per vices æquabili sudore perfundi, urina laudabili quantitate excernebatur & tumor incipiebat col-
labi.

Incoepit ægra oxymellis colchici unc. iij. per diem absumere, tota nocte dormivit, nec tussi excitata fuit, quapropter admodum gaudebat ægra & tam paca-

tam noctem aiebat se non transegisse a multis annis, ultra decem libras urinæ 24. horarum spatio cum magno abdominis & totius corporis collapsu excreverat.

Perrexit ægra eadem oxymellis dosi uti, diuresis abundantissima constanter se sustinuit; ægra nihilominus sæpius diu noctuque sudore perfusa est, naturali alvi dejectione quotidie sponte succedente, tussis faciliior & rariior sensim facta, sputorumque copia de die in diem minuta est; & omni nocte pacatissimus somnus adfuit.

Vigesima Decembris totus corporis habitus integre ab aquis liberatus erat, exceptis pedibus & inferiori crurum parte, quæ adhuc molli tumore affecta erant; abdomen erat penitus collapsum, molle, nec minimum resistentis in illo aquæ indicium supererat, tussis erat rarissima, appetitus magnus, sitis nulla, & reliquæ functiones bonæ erant.

Ne nimia diuresis ægræ multum emaciata noceret, unicam tantum oxymellis colchici unciam per diem ipsi dedimus, & intra paucas dies pedes & crura integre detumuerunt.

Vigesima quarta Decembris præter leviores facile digerendos cibos quibus

eo usque usa fuerat, quotidie portionem carnis vitulinæ, quam valde appetebat, concessimus.

Hac diæta binis diebus usa incoepit nauseare, & incidit in febrim tertianam, quo tempore præmisso leni purgante, quod nauseam sopivit, omni die oxymell. colchici unc. j. cum sal. polychr. dr. j. absumpsit.

Tertio paroxysmo incoepit denuo hydropica fieri, & quarto tumor magis auctus est; hinc secunda Januarii mixtura. Cum cortice peruviano simul cum priori colchici dosi illi dedi, qua bis repetita febris penitus emanfit.

Fugata feбри per quinque dies quotidie oxymell. colchici unc. ij. sumpsit, & sic, qui incoeperat renasci hydrops anasarca denuo integre dispulsus est, ægra autem multum debilitata erat.

Undecima Januarii incoepit uti conserv. N. 3.

Hoc medicamento semel repetito & cibis eupetis ægræ vires ita erectæ sunt, ut in lecto dilutius manere noluerit. Continuavit hoc medicamento uti ad 18. Januarii & vigesima quarta cum sanarum cibos jam per aliquot dies sine incommodo comedisset, & viribus valeret,

De Colchico in Hydrope. 277
ab hydrope , feбри & tuſſi perfecte cu-
ratam ex noſocomio dimiſimus.

CASUS DECIMUS.

SUTOR trigefimum ætatis annum
agens , aliquot ab hinc milliaribus de-
gens , die vigefima prima Septembris
anni 1765. comeſta multa carne fuilla
& deſuper vini media menſura pota in
validam febrim tertianam inciderat ,
cujus aliquot paroxyſmos perpeſſus bal-
neatorem ultima Septembris acceſſit qui
pro medicamento ipſi venam ſecuit.

Post venæ ſectionem incoeperunt
pedes per diem œdematoſi fieri , noctu
primis diebus denuo collabentes : pro-
cedente vero tempore tumidi manſe-
runt , & tumor brevi femora occupavit.
Circa medium Octobris incoepit abdo-
men mole augeri , & ſub finem ejus-
dem menſis abdomen jam valde pro-
minebat : ac febris tertiana ſuum typum
ſervabat : tempore paroxyſmi æger
anxius erat , & validos capitis dolores
patiebatur.

Dedit illi tunc balneator rob. junci-
peri aliis medicamentis acuatam & varia
alia , quibus ultra menſem cum aliquo

tumoris artuum inferiorum collapsus
usus est : immota autem manente febre
& abdominis mole sensim assurgente.

Postea nullis amplius ibi medica-
mentis uti voluit, se Viennam rustici
curru vehendum decima quinta Decem-
bris curavit, ut hic curaretur : & deci-
ma nona Decembris ad nostrum noso-
mium delatus est, ascite admodum tu-
mido laborans; & artubus inferioribus
aqua intercute valde distensis, feбри ter-
tiana vehementi adhucdum suum ty-
pum fervante; jam a pluribus diebus
exigua erat urinæ excretio : alvus tarda
tantum omni tertio vel quarto die exo-
nerari solebat; appetitus erat bonus &
nullam sitim extra febrilem paroxys-
mum conquerebatur.

Dedi illi per diem oxymellis colchici
unc. ij. absumendas, & statim tanta
urinæ copia diu noctuque excreta est,
ut ascites binis tertiis intra quatuor dies
prioris suæ mollis partibus minutus &
artuum inferiorum tumor multum col-
lapsus sit, feбри multo mitiori reddita,
& sublata, quæ aderat antea tempore
paroxysmi anxietate : alvus autem im-
morigera suppositoio sollicitari debe-
bat.

Vigesima sexta Decembris ab ascite

penitus liberatus erat, & nihil amplius advertebatur de crurum tumore. Cum autem febris ægrum jam debilem continuaret invadere, præter solitam colchici dosin mixtur. N. 4. incoepit sumere, qua ter repetita a febre liberatus est.

Ufus est postea ad sextam Januarii usque solita dosi oxymellis colchici: deinde data est ipsi conserv. N. 3. qua per duodecim dies usus est, bonis alimentis nutritus. Vires denuo renatæ sunt, & sub finem Januarii sanus robustusque dimissus est.

CASUS UNDECIMUS.

VIR 44. annorum artem sartoriam a juventute exercens, anno 1763. adulto jam vere, difficili respiratione, sensim valde anxia reddita, laborare incoepit.

Ineunte autumnno anxiati supervenit tussis valida, primis diebus sicca, valde dolens. Brevi postea incoepit, præcipue matutino tempore, carbonibus contritis humectatis similia expectorare, eademque toto autumnno & hyeme continuavit ejicere: sequenti vere tussis mitior & rarior evasit: omni tamen

mane exacerbata mucosum, quid expellens.

Manfit autem anxietas, & ab eo tempore neque in dorsum, neque in latus sinistrum decumbere quievit, atque quoties in dorsum decumbere tentabat, & præ anxietate subito se in latus sinistrum vertebat, pondus ex latere dextro in sinistrum subito labebatur, strepitum aquæ fluctuantis edens, & ob imminentem suffocationem statim corpus erigere cogebatur æger.

Durantibus his angustiis solitos labores obivit, functionibus naturalibus sat bene procedentibus: redeunte autem autumnno, tussis denuo valde aucta est, & sputa nigra iterum fuerunt, pauciora tamen, quam anno præcedente, continuantia usque ad tempus vernum, quo tussis manente anxietate & iisdem decubitus impedimentis denuo mitigata est: & æger vere & æstate eodem modo se habuit ac anno elapso.

Ineunte autem autumnno anni 1765. tussis denuo frequentior & validior fuit, & sub finem Octobris vehementissima & sicca erat, anxietate ita aucta, ut ob metum suffocationis vena ipsi secta fuerit.

Manfit post venæ sectionem æque

anxius; decubitus in latus dextrum eo usque sat liber, difficilior factus est, ut pluries tentare deberet, antequam manere posset jacens.

Vigesima tertia Novembris ad nos delatus est, cum jam per tres dies noctesque continuo sedens, antrorsum incurvatus, difficile admodum spiritum trahens manere debuisset; tussis præ anxietate & debilitate fere suppressa erat; appetitum nullum habebat; alvus erat laxa; pulsus debilis, sæpius intermittens; habitus corporis adhucdum sat torosus; sub utraque axilla glandulas multas tumidas, duras & dolentes per modum rosarii sibi connexas gerebat, quas tantum ante octiduum animadverterat æger.

Primis diebus quibus apud nos fuit, medicamenta pectoralia sumpsit oxymelle squillitico acuata, eo effectu ut noctu ultra tres horas jacere & dormire potuerit: tertia autem nocte pessime habuit, & summe anxius continuo sedere coactus est.

Hydropem pectoris ex anamnesi & præsentibus signis adesse concludentes oxymell. colchici unc. ij. per diem sumendas illi dedimus, qua dosi jam prima die copiam urinæ circiter tres men-

furas æquantem, sitis expertus, & præter juscula nihil liquidi sumens, cum magno levamine, misit.

Constans mansit magna illa urinæ evacuatio, omniaque de die in diem ita in melius mutata sunt, ut quindecim dierum spatio facillima fuerit respiratio, liberrimusque in dorsum & utrumque latus decubitus; pulsus fortior, æqualis ægro noctu bene dormiente, per diem plures horas extra lectum transigente: vigeat appetitus: tumores glandularum subaxillarium penitus resoluti erant.

Licet æger vires sat bonas haberet, & toroso satis corporis habitu gauderet; ne forte aliquid residui in pectoris cavitate fieret, continuavit usque ad finem Decembris eadem oxymellis colchici dosi uti, quo tempore ab omni medicamento abstinuit, & incoepit sanorum cibis magno cum appetitu vesci.

Initio Januarii in diarrhæam sat frequentem incidit, quæ tamen sponte intra quatuor dies sedata est, homine quo ad omnes functiones bene habente. Accedebat tamen omni mane tussis lenis medium horæ quadrantem durans, & paucis sputis spumosis rejectis perfecte cessans.

Ufus est dein per 18. dies conserv.
N. 3. & sub finem Januarii 1766. sanus
& robustus dimissus est.

CASUS DUODECIMUS.

VIR 38. annorum, qui jam per quinque hebdomadas feбри tertiana laboraverat, & in tertiam septimanam aqua intercute valde tumentem totum corporis habitum habebat, decima septima Novembris anni 1765. in nostrum nosocomium susceptus est.

Non minus extra paroxysmum, quam tempore paroxysmi, siti valida afficiebatur: alvus cocta quotidie vel saltem omni altero die sponte ab initio morbi secedebat: urinæ excretio parca erat: febrilis paroxysmus cum paucissimo sudore terminabatur.

Datis rob. sambuc. ebuli cum oxymelle squillitico & sale polychresto & feбри & hydropi prospicere conati fuimus, post binos autem febris paroxysmos in nosocomio perpeffos æger multum debilitatus est, & anasarca in majorem molem increvit, nec auctæ sunt excretiones.

Dedimus illi mixtur. N. 4. qua bis

absumpta paroxysmus febrilis penitus emanfit, manente hydrope & siti frequenti.

Vigesima quinta Novembris incoepit uti vino diuretico, perrexitque in illius usu usque ad initium Decembris: cum vero tumor idem permaneret, & sitis mitigata esset, dedimus illi vinum N. 5. quo Magnificus Archiater *Antonius Storck*, & ego post illum sæpius pulchras curas fecimus: inde autem in hoc ægro aucta est sitis, nec minutus est hydrops.

Duodecima Decembris omnibus aliis sepositis medicamentis oxymell. colchici unc. ij. omni die absumendæ ipsi præscriptæ sunt: ab hoc medicamento statim prima die major urinæ copia excreta est, & sequenti die præter urinarum evacuationem copiosam variis vicibus toto corpore magno cum levamine leniter sudavit; alacrior factus est: cibos suos, qui antea insipidi ipsi videbantur, bono cum appetitu comedit.

Aquarum evacuatio, tam diaphoresi, quam diuresi, ita feliciter continuavit, ut intra quatuordecim dies ab anasarca perfecte liberatus fuerit. Usus est dein conserv. N. 3. qua pluries repetita, cum omnes functiones corporis liberæ essent, & vires bonæ, sanorumque diæta

De Colchico in Hydrope. 285
sine incommodo uteretur, quarta Januarii ex nosocomio exivit.

CASUS DECIMUS TERTIUS.

VIR sexagesimum quintum ætatis annum agens, a pluribus annis victum mendicando quæritans, per septem hebdomadas feбри quartana, quam neglexerat, vexatus, sub qua hydropicus evaserat; duodecima Decembris anni 1765. ad nos delatus est quartana adhuc laborans, cum abdomine aquis turgentissimo, toto corpore aqua intercute distento, ac ita debilis, ut brevi animam efflaturus videretur.

Bonis alimentis & medicamento cardiaco, quantum fieri potuit, ægrum refecimus, & dedimus illi oxymellis colchici unc. ij. ut diei spatio absumeret: perrexitque omni die eandem dosin sumere.

Urinæ excretio statim valde aucta est, & imperturbata mansit, alvo, antea admodum tarda, omni die exonerata.

Decima octava Decembris nulla amplius fluctuatio in abdomine percipi poterat; videbatur ascites disparuisse,

corporisque habitus ubique mollis, minus tumens; paroxysmus febrilis erat mitis: eadem medicamenti dosi perrexit uti.

Vigesima quarta Decembris ob febrim adhucdum continuantem debilem ægrum invadere, data est illi, præter solitam oxymellis dosin, mixtur. N. 4. qua bis repetita omnis paroxysmus febrilis disparuit.

Sublata feбри incoepit æger appetere: præter congruos cibos, data est illi omni die semi-libra vini austriaci albi & continuavit oxymell. fumere.

Initio Januarii cum totum corpus, exceptis pedibus & inferiori crurum parte adhucdum levi œdemate elatis, collapsum esset, & ab aquis liberatum, incoepit conserv. N. 3. uti: aucta est ciborum copia & carnes teneriores ipsi concessæ sunt. Sub finem Januarii sanus ex nosocomio dimissus est.

CASUS DECIMUS QUARTUS.

HOMO triginta quinque annos natus, per sex septimanas in Hungaria degens feбри tertiana laboraverat, sub qua magna in hypochondrio sinistro indu-

ratio orta fuërat : quinta febris hebdomada abdomen in magnam molem increvit, & æger sanitatis recuperandæ desiderio impulsus, iter Viennam suscepit : quò magno cum labore 14 Octobris appulsus, bis febrilis paroxysmus emanfit.

Successit dein tertianæ feбри quotidiana vehemens, & in quoddam hujus civitatis nosocomium susceptus, absumptis variis medicamentis a feбри liberatus est, manente abdominis mole & totius corporis tumore.

Sublata feбри data sunt illi varia medicamenta aquarum evacuationi dicata : his usus est ultra tres hebdomadas nullo alio effectu secuto, nisi quod corporis habitus paulisper detumuerit, abdomine manente admodum tumido. In hoc statu medicus illum ex suo nosocomio 24 Novembris dimisit & 26. ejusdem mensis ad nos delatus est.

Abdomen aquis admodum distensum erat : hypochondrium sinistrum dolens & pressioni minime cedens : artus inferiores tumidissimi erant, & reliquum corpus levis anasarca occupabat ; valde debilis erat ; tussi inani vexabatur ; sitis erat pauca ; appetitus nullus ; alvus laxa : & urinæ excretio paucissima.

Statim incoepit oxymell. colchic. ij. quotidie sumere : prima die copiosas urinas, modo fuscas, cum enæoremate crasso, nigrescente, modo flavas, modo aquosas misit : sequentibus autem diebus copiosior adhuc fuit excretio & coloris magis naturalis.

Trigesima Novembris totus corporis habitus, exceptis artubus inferioribus adhuc parum tumidis, integre collapsus erat ; ascites multum minutus ; & hypochondrii sinistri dolor & tensio minor ; manifesteque tangendo, corpus durum, pugni virilis crassitie percipiebatur.

Cum alvus jam a quatuor diebus clausa esset, haust. N. 6. purgatus est ; dein continuavit priori oxymell. colchici dosi uti.

Undecima Decembris ascites disparuerat ; artus inferiores penitus detumuerant ; jam ab aliquot diebus aberat tussis ; omnes functiones bonæ erant ; nec ulla amplius durities in hypochondrio sinistro percipi poterat.

Loco oxymell. colchici usus est conserv. N. 3. & carnes quibus huc usque caruerat, ipsi concessæ sunt, cito vires recuperavit, & dicta conserva quater absumpta, optime valens ex nosocomio discessit.

CASUS

CASUS DECIMUS QUINTUS.

VIRGO 55. annos nata, ante 13. annos respiratione difficili, anhelosa laborare incoeperat, & eodem adhuc anno febris tertiana correpta fuerat, cujus multos paroxysmos perpeffa est.

Assumptis variis medicamentis a febre fuit liberata. Remansit autem in epigastrio dolor continuus ab ingestis auctus, a quo postea nunquam immunis fuit ægra, ab illo tempore sæpius assumptos cibos prægressa magna anxietate vomitu reddere coacta est; respiratio mansit læsa, & accessit tussicula, matutino præcipue tempore invadens, ut plurimum sicca.

Anxietas tempore febris minime minuta, successu temporis, ita increvit, ut ante septennium famulatum desere coacta fuerit.

Anxietati & dolori epigastrium occupanti juncta est molesta hypochondrii sinistri tensio ad attactum paulo rudiorrem dolentis, & per intervalla cordis palpitatio.

Sumpsit varia medicamenta, a quibus nullum levamen habuit, & ante

Collin Pars II. Tom. II. N

quatuor annos, partim ob nimiam anxietatem, partim ob auctum lateris sinistri dolorem, decubitus in latus sinistrum non amplius ferre potuit.

Cum his malis miseram vitam ultra tres annos duxit, donec adulto anno 1765. omnia incœperint in deterius verti, vigesima secunda Decembris ejusdem anni, cum jam per plures hebdomadas jacere debuisset, tantum leves & paucos cibos assumere potens, ad nos delata est.

Respiratio admodum brevis, celeris & anxiosa erat; subinde inani tussicula vexabatur; crura femoraque aquis valde distenta erant, facies œdematosa, livescens, magno ascite abdomen occupabatur; appetitus erat parvus, sitis non magna; alvus, ut aiebat, more solito omni biduo vel triduo exonerabatur, & non nisi laborioso conatu paucissima subinde urina excernebatur. Debilissima ægra somnis brevibus per intervalla accedentibus minime resecta, evigilans videbatur suffocanda; epigastrium, hypochondrium sinistrum tensa ab actu valde dolebant.

Incœpit oxymell. colchici unc. ij. per diem sumere, quo effectum est, ut primis duobus diebus magnam sputo-

rum glutinosorum copiam ejecerit, & urina copiosa multo facilius solito magno cum respirationis levamine excreta fuerit.

Tussis dein penitus cessavit; & tam magna perrexit esse diuresis, ut jam initio Januarii ab omni hydrope libera fuerit, & continuato usque ad medium Januarium oxymellis colchici usu, omnis tensio disparuerit: cessavit anxietas, & decubitus in utrumque latus facillimus redditus est.

Toto mense Januario colchico usa est, & absumpta dein aliquoties conserva N. 3. sub finem Februarii sana dimissa est.

CASUS DECIMUS SEXTUS.

VIR 44. annos natus, decima quarta Decembris anni 1765. ad nos delatus est. Mense Februario & Martio febre intermittente laboraverat, sub paroxysmis magnas anxietates patiens: fugata febre remansit aliqualis anxietas, quæ brevi ita aucta est, ut ad lenem etiam motum fere suffocaretur, somnos admodum breves capere poterat, & dum decumbens per mediam horam dormiverat,

evigilabat summe anxius, & continuo situm mutare cogeatur.

Dum illum prima vice vidi, præter memorata symptomata, abdomen admodum tumidum aquis impletum erat; urina a multis hebdomadis paucissima excernebatur, & alvus erat tarda; appetitus sat bonus; sitis nulla; pulsus inæqualis, subinde intermittens.

Præmissis purgante dedimus illi oxymell. colchici unc. ij. quotidie absumendas, copiosissima statim prima die incoëpit urinæ excretio fieri, quæ constans permanfit, alvo saltem omni alterno die cocta, molli, exonerata.

Pectus sensim levatum est & abdominis moles minuta, evanuitque pulsus inæqualitas & intermissio.

Octava Januarii cum abdomen fere integre ab aquis liberum, subinde aere distenderetur, & tympanitidem præferret, mixturam ipsi dedimus ex aqua rorismarini, liquore anodino minerali & solita oxymell. colchici dosi.

Hac mixtura usus est æger cum euphoria. Disparuit abdominis distensio flatulenta, & excretiones eodem modo perrexerunt ac ante.

Decima septima Januarii ægrum examinantes abdomen invenimus integre

collapsum, molle, nec ullum amplius inhærentis aquæ indicium supererat; somnus, qui etiam tempore curæ paucus & turbulentus fuerat, jam a binis diebus pacatissimus & reficiens erat; optimo appetitu fruebatur, & excepta diuresi, quæ pergebat valde copiosa esse, omnes functiones naturales erant & vires bonæ.

Continuavit tamen adhuc per octiduum eadem mixtura uti, & paucis post diebus cum jam solidioribus cibis sine incommodo vesceretur, sanus & robustus dimissus est.

CASUS DECIMUS SEPTIMUS.

PUELLA 23. annorum Augusto mense anni 1765. feбри correpta est, quæ per aliquot paroxysmos quartanæ typum servavit, mutata dein in tertianam. A mense Aprili catamenia non prodierant, licet varia emmenagoga a medico præscripta sumpserit, febris quoque nullis medicamentis fugari potuit; & initio Octobris toto corpore tumere incœpit.

Post hæc frequenter rheo purgata fuit, & mutata febris tertiam in quotidianam, corporis tumore non colla-

bente, & simul sicca validaque tussi correpta est.

Variis usa est medicamentis, tum pectoralibus, tum antifebrilibus diu absque effectu, donec tandem declinante Decembri febris emanferit, manente tussi, corpore admodum tumente & respiratione valde anxia.

Vigesima octava Januarii ad nostrum nosocomium delata est, totum corpus hydrope anasarca ingentem in modum distensum erat, & abdomen ascites magnus occupabat; vehementissima, per vices accedente, inani tussi afficiebatur, valde anxia erat & pulsus præ tumoris mole non percipiebatur; alvus tarda erat, urina jam a multis diebus, guttatim tantum, & paucissima excernebatur, appetitus erat nullus, sitis quoque pauca, decubitus admodum difficilis, & somnus vix ullus.

Præmisso purgante hydragogo datae sunt illi omni die oxymell. colchici unc. ij. quæ binis primis diebus parum effecerunt; tertio autem die urinæ fuscae cum copiosissimo enæoremate crasso, nigrescente, copia fere mensuram æquans, magno cum ægræ levamine excreta est.

Usa est eadem medicamenti dosi per

duodecim dies , quo tempore urinæ , modo fuscescentes , modo aquosæ , modo etiam coloris naturalis , copiosæ excretæ sunt , & corporis habitus , exceptis cruribus , totus detumuit ; appetitus rediit ; respiratio liberior reddita est , pulsus autem erat inæqualis , debilis & ascites non videbatur minui , manebatque tussis ; ægra tamen melius dormiente & alacrius corpus movente.

Licet priori oxymell. colchisi dosi bene procederet , diuresis , ut copiosior fieret aquarum evacuatio , ejusdem. unc. iij. omni die ipsi dedimus.

Copiosior secuta est urinæ excretio , circiter mensuras tres nyctemeri spatio æquans ; sæpius sudore leni , æquabili perfusa est , & tussi , quæ semper sicca fuerat , multa sputa perquam glutinosa ejicere incoepit.

Tussis sensim minuta est & sputorum copia , & tam felix perrexit aquarum evacuatio , ut 24. Februarii de ascite & anasarca nihil superfuerit ; absente tussi , pulsu bono , æquali reddito ; anxietate penitus sublata & reliquis functionibus optime procedentibus.

Continuavit tamen oxymelle colchico uti usque ad quartam Martii carne vitulina & aliis eupetis cibis vescens , dein

usa est conserv. N. 3. qua ter repetita ; cum optime valeret , & corpus bene coloratum sat robustum esset , ad suos rediit.

CASUS DECIMUS OCTAVUS.

FEMINA 46. annos nata , initio Martii in diarrhæam incidit , quæ per 14. dies duravit , hac cessante statim totus corporis habitus intumuit. Variis incassum tentatis quatuor septimanarum spatio , ad nos 19. Aprilis delata est.

Ægra non modo anasarca , sed & ascite admodum magno laborabat ; urinam a pluribus diebus tantum guttatim mittebat ; alvus erat tarda ; appetitus nullus ; vires multum collapsæ. Oxy-mellis colchici unc. ij. per diem ipsi dedimus.

Prima die vespere urinam sine labore ad plures uncias misit , fuscentem , floccis magnis nigrescentibus refertam , similemque noctu pluries excrevit.

Postea aquarum evacuationes copiosissimæ fuerunt , intra decem dierum spatium anasarca & ascites penitus disparuerunt ; actionibus naturalibus optime

constitutis ; languidis vero vitalibus & animalibus.

Ægra deinde incoepit uti conserv. N. 3. & debita ciborum facilis digestionis copia ipsi concessa est.

Sub hujus medicamenti usu corporis color cachecticus brevi in sanum mutatus est : vires increverunt , & carnes corpori sensim renatæ sunt.

Decima quinta Maii ægra optime valens , & custodes in laboribus egregie sublevans a medicamentis abstinuit , ac octiduo post sana robustaque ex nosocomio discessit.

CASUS DECIMUS NONUS.

STATUARIUS 29. annos natus, 19. Aprilis anni 1766. ad nos delatus est.

Ante biennium artem suam in Hungaria exercens , in febrim quartanam inciderat , qua per annum neglecta ortum est corpus durum , mobile ex hypochondrio sinistro emergens , & mediam abdominis partem occupans, continuante febre.

Febris demum pertæsus æger , & tumore territus auxilium cujusdam viri imploravit , a quo essentiam rubram ac-

cepit, cujus effectus debebat esse purgare & ciere vomitum.

Hujus essentiae pluries gutt. vj. sumpsit sine effectu; imo febris validior evasit, æger anxius factus est, & abdomine cruribusque admodum intumuit, ac denuo per undecim hebdomadas nihil tentavit.

Postea vero vinum generosum magna copia hausit, & saltu corpus valde exercuit, sperans febrim sic excussam iri; verum mansit febris, & sic increvit anxietas, ut non nisi per intervalla corpus movere potuerit.

Duodecima Novembris anni 1765, Viennam curru advectus & medicamenta horrens cum febre luctatus est usque ad initium Aprilis 1766, quo tempore demum consilium petiit a doctissimo medico *Kohlman*, tunc temporis nosocomii Hispanici Physico & nunc Cæsareo reg. Archiatro, qui, perpenſa maxima virium ægri prostratione, metuens ne sub paroxylmo febrili brevi occumberet, aptis medicamentis febrim fugavit, & dein inopem hominem, ob defectum bonæ dietæ, non potentem a gravibus suis malis liberari, ad nostrum nosocomium direxit.

Erat valde debilis, anxius, tussi fre-

quenti, & sicca dolores secundum ultimas costas veras in utroque latere & dorso validi excitabantur. Abdomen magnæ molis erat aquis plenum, & supra memoratum corpus durum pressionis manus difficile cedens facile distinguebatur; artus inferiores valde tumebant, urinæ excretio erat pauca, alvus tarda; appetitus vix ullus; somnari, turbulenti; pulsus parvus, subinde intermittens.

Data illi omni die oxymell. colchici unc. ij. jam sequenti die diuresis multum aucta est, post quinque dies ab usu medicamenti omnia notabiliter in melius mutata erant, anxietas fere disparuerat; tussis erat rara, somnus tranquillus, artus inferiores fere integre collapsi & abdominis moles minuta; alvus mollis, sponte secedens, corpus autem ante descriptum mole videbatur idem.

Perrexit æger eadem medicamenti dosi uti usque ad duodecimam Maii, intra quod tempus ascites penitus disparuit, & durus lateris sinistri tumor ita minutus est, ut tangendo tantum obscure sub costis spuris aliquid perciperetur; omnibus functionibus in melius mutatis.

Æger postea usus est oxymell. col-

chici uncia unica usque ad vigesimam Maii, qua, cum omnia mollia essent, illius loco conserv. N. 3. incoepit uti.

Hoc medicamento & cibis aptis sensim vires recuperavit; carnes corpori incoeperunt renasci, & sub finem Junii omni medicamento abstinuit.

Mansit tamen in nosocomio æger usque ad finem Julii, cibis solidioribus vescens, & ex nosocomio sanus & torosus discessit.

CASUS VIGESIMUS.

VIR 37. annorum, declinante Julio parca & mala diæta per plures menses usus, in febrim tertianam incidit, cujus aliquot paroxysmos perpeffus quotidiana correptus est, accedente hypochondriorum tensione, intumescencia & respiratione difficili.

Domi jacuit neglectus usque ad quartam Augusti, qua ad nos delatus est valde anxius, debilis; totus corporis habitus aqua intercute admodum distentus & abdomen tensissimum aquis plenum erat; incoeperat hydropicus fieri statim post primos febris quotidianæ

paroxyfmos ; alvus erat tarda & rara ; parcaque urina excernebatur.

Primis quatuor diebus quibus apud nos fuit , remediis solventibus falinis ufus est.

Corporis tumore de die in diem magis increfcente , ac viribus admodum collabentibus , ne sub febrili paroxyfmo periret æger , præter oxymell. colchici unc. ij. per diem abfumendas , mixtur. N. 4. dedimus , qua bis repetita febris fugata eft , diurefi fimul multum aucta.

Sublata feбри & continuata eadem oxymellis colchici dofi , tam abundans fuit urinæ excretio , ut intra decem dierum fpatium ab omni hydrope liber fuerit æger.

Ne tamen aliquid de morbo remaneret , unc. j. oxymell. colchici perrexit uti ufque ad 24. Augufti & dein folummodo unc. β. ejufdem medicamenti fumpfit ufque ad 29. præfati menfis.

Æger tunc variis etiam folidioribus cibis fine incommodo vefcebatur ; alacris erat & viribus tam bonis pollebat , ut recufaverit diutius in nofocomio commorari : quare data ipfi conferv. N. 3. illum brevi poft dimifimus.

CASUS VIGESIMUS PRIMUS.

FEMINA 20. & aliquot annorum, vigesima tertia Augusti anno 1766. ascite & anasarca laborans ac valde anxiosa debilisque ad nos delata est.

Ante binos & medium annos in febrem quotidianam inciderat, quæ neglecta & per sesqui annum protracta demum sponte desierat; post se relictis artuum inferiorum tumore, respiratione difficili, abdomine tenso, duro; appetitu præcipue carniū penitus deletō; artuum superiorum & dorsi recurrentibus sæpius doloribus cum alvo subinde segni, sæpius nimis frequenti: & magna corporis debilitate.

Postea totum corporis habitum hydrops intercus sensim occupavit, abdomen in magnam molem increvit, & ultimis hebdomadis antequam ad nos deferretur, urinæ excretio ita imminuta est, ut demum tantum subinde guttulas aliquot vi exprimeret.

Missis aliis medicamentis solum oxymell. colchicum ipsi præscripsi, cujus unc. ij. omni die absumpsit.

Primis tribus diebus urina quidem

liberius fluxit : verum copia vix libras duas æquavit, & erat fusca, floccis magnis nigrescentibus plena : postea autem tam copiosa facta est diuresis, ut plures noctes præ nimis frequenti urinæ excretionem infomnis transegerit.

Octava Septembris anasarca disparuerat, & ascites vix amplius sensibilis erat : abdomen autem examinantes invenimus tumorem oblongum, latum, totum hypochondrium sinistrum occupantem : ægra cæteroquin, quæ jam a fœsqui anno carnes nauseabat, & nihil appetebat, famem conquerebatur, & teneriores carnes optimo cum appetitu comedit, pergens eadem colchici dosi uti.

Sensim tumor mole ita minutus est, ut decima quinta Septembris tantum lienis mediocris figuram & magnitudinem referret, nullo tunc superstite hydropis indicio.

Vigesima Septembris avunculus illius eam invisens, & illam ab hydrope curatam, bene comedentem & alacrem videns, illam domum suam suscepit, promittens se illi adhuc ad confirmationem curæ necessaria medicamenta & reliqua subministraturum.

CASUS VIGESIMUS SECUNDUS.

FEMINA 53. annorum , initio Junii anni 1766. incoepit artubus inferioribus & abdomine tumere , ac quarta Julii ad nos delata est , valde ascitica , artubus inferioribus tumidissimis , superiori corporis trunco , facie & artubus superioribus siccissimis. Anxietas , tussicula , sitis ægram valde inquietam reddebant : urinæ excretio vix ulla aderat , & alvus pauca raro excernebatur.

Ipsi oxymell. colchici unc. ij. quotidie absumendas , per quatrimum sine ullo effectu dedi ; quare varia alia antihydrica usque ad finem Julii ipsi exhibui : verum neque ab his ægra levamen habuit , imo omnia continuo in pejus ruerunt , & videbatur brevi moritura.

Dedi illi oxymell. colchici unc. iij. per diem absumendas : primo die alvum bis deposuit , & urinam pluries ad uncias plures misit , ac sequenti die res eodem modo successit.

Tertia ab usu hujus dosis die , alvus frequens copiosa evasit , & valde pro-

mota est urinæ excretio : ascite multum collabente.

Nihil mutavi per triduum , postea autem ne nimius alvi fluxus debilem ægram pessumdaret, & ut mitigaretur tussis sicca , qua admodum molestabatur , simul cum dicta oxymellis dosi decoctum N. 1. ipsi exhibui , quod votis optime respondit , moderato alvi fluxu , tussi multum mitigata , & nullo modo minuta urinæ excretionem.

Hac methodo medio Augusti ab hydrope penitus libera fuit , & tantum unc. β. oxymellis adhuc per aliquot dies absumere perrexit. Erat tunc alacris , non tussiens , libere spirans , cibos appetens , a quibus tamen paulo majori copia assumptis , licet tenerioribus , gravabatur ventriculus. Tentavimus leniter roborantibus medicamentis vires ventriculo reddere ; verum ab his male habebat , anxietate & præcordiorum dolore post quamlibet dosin accedente : quare ab his abstinuimus & conati fuimus cibis congruis ægram reficere.

Initio Septembris incoepit denuo aquarum in abdomine collectio manifestari , quæ dato oxymelle colchico intra paucos dies disparuit , ægra sat

alacri, appetente & diem ambulando per cubiculum transigente.

Tentata denuo medicamenta roborantia idem fatum experta sunt ac prima vice: hinc illis penitus supersedere debuiamus.

Prima Octobris ægra subito incoepit anxari, tussire, intumescere artus inferiores & abdomen: accessit urinæ suppressio & appetitus deletus est.

Datis oxymell. colchici unc. ij. quotidie absumendis, urinæ excretio restituta est, & abdomen artusque ab aquis liberata sunt: verum increvit anxietas, pulsus omnino malus evasit & octava Octobris ægra mortua est.

Aperto cadavere inventum est hepar parvum scyrrhosum, vesicula fellea alba, bile vacua, calculus continebat ovum columbinum magnitudine æquans, qui casu in terram prolapsus, distractus est instar vitri, & pulcherrimam variegatam crystallisationem oculis obtulit. Utrumque pectoris cavum & pericardium aqua plena erant.

Licet systema biliosum in hac ægrâ tam male affectum fuerit, vix ullum icteri signum adfuit: tantum levissima oculorum flavedo primis diebus, quibus

De Colchico in Hydropse. 307
apud nos fuit, conspecta est: in urina
autem & alvo nihil icterici conspeximus.

CASUS VIGESIMUS TERTIUS.

FEMINA 56. annorum, octodecim
prolium mater, sexta Septembris 1766.
ad nos delata, initio Junii inciderat in
febrim quotidianam, quæ per tres heb-
domadas protracta in tertianam mutata
est, & initio Augusti sponte desit, qua
cessante artus inferiores & abdomen in-
coeperunt tumere. Dum illam primo vi-
dimus abdomen erat admodum tensum,
aqua plenissimum & tumidissima crura
vix movere valebat.

Dedimus illi statim oxymell. colchici
unc. ij. quotidie sumendas, nulla autem
evacuatio sensibilis observata est.

Tertio tamen ab usu colchici die
ægram examinantes invenimus omnia
molliora, multum collapsa, tumorem-
que quem jam ultra viginti annos in
latere sinistro gesserat, nec antea po-
tueramus percipere, latum, oblongum
facile deteximus; hinc continuavimus
in usu colchici.

Hydrops sensim magis magisque eva-
nuit, & 16. Septembris abdomen fere

penitus detumuerat, & artus inferiores, excepto crure dextro, adhuc parumper circa malleolos tumente. Aiebat tunc ægra urinæ excretionem paulo copiosorem fieri, quam ante; reliquæ autem functiones naturales erant, & appetitus antea deletus, nunc optimus.

Vigesima Septembris nullum amplius hydropis indicium supererat, & tumor durus in latere sinistro abdominis situs, mole multum minutus erat, omnes functiones bonæ erant.

Ægra carnibus incoepit vesci, & continuavit colchico uti, ut duri tumoris moles quantum fieri posset, minueretur; nulla autem ulterior mutatio in illo, licet ad medium Octobris dicto medicamento usa fuerit, facta est, quare ægra robusta & optime valens 28. Octobris ex nosocomio discessit.

CASUS VIGESIMUS QUARTUS.

FEMINA 55. annorum, mortuo sub finem anni 1765. marito, in magnum mœrorem incidit, cui initio anni 1766. juncta est pessima febris quotidiana; cujus frigidus insultus per horam durans, validis totius corporis convulsio-

nibus semper stipatus erat, permanentibus, donec accederet calor, post paucas horas sudore copioso finitus: relicta ægra debili, anxia, sæpius inani tussi vexata.

Cessaverunt febris & convulsiones circa pascha: mansit autem tussis sicca, frequens, anxietas, impossibilis sæpe decubitus, hypocondriorum, maxime dextri dolores, epigastrii inflatio, dolor post paucos cibos assumptos. Sic miseram duxit vitam ægra usque ad 14. Julii, qua illam curandam suscepi.

Per quinque hebdomadas variis medicamentis solventibus usa est, sine ullo levamine, & declinante Augusto intumuerunt artus inferiores, & abdomen, ac intra paucas dies, non obstante copioso sudore, sæpius diu noctuque a multis diebus erumpente, facta est valde ascitica: artus inferiores vultusque admodum tumidi evaserunt: superior abdominis pars valde distenta sonum tympaniticum edebat.

Medicamentâ solventia, diuretica, leniter carminativa interpolatis purgantibus incassum assumpsit ægra usque ad nonam Septembris: imo sub horum usu in hypocondrio dextro ortus est dolor acutus fere intolerabilis, raro

remittens ; & tussis anxietasque multum increverunt.

His visis ægræ oxymell. colchici unc. ij. per diem exhibui.

Tussis antea valida , inanis , mitigata est & sputa utcumque cocta ejecit ; hypochondrii dolor remisit ; urinæ excretionem sat copiosa , nyctemeri spatio decies duodeciesque repetita , & alvo naturali quotidie semel bisve desposita , sæpiusque accedente sudore per totum corpus æquali.

Sic sensim aquæ evacuatae sunt , ut 15. Septembris facies & artus superiores penitus detumuerint ; maximæ antea molis artubus inferioribus pariter fere integre collapsis ; abdomine multo minus tenso ; appetitu restituto & anxietate multum minuta.

Ægra pergens eadem oxymell. colchici dosi uti , eundem continuo effectum experta est , & initio Octobris simul cum hydrope omnia symptomata disparuerant.

Usa est dein conserv. N. 3. usque ad 23. Octobris , qua cum bene valeret ab illa abstinuit : ob sudores tamen copiosos noctu adhuc erumpentes per aliquot dies usa est infuso N. 7. sudoribus mitigatis , omni medicamento abstinuit ,

De Colchico in Hydrope. 311
fana enim & robusta erat, & omnigenos cibos sine incommodo digerebat.

CASUS VIGESIMUS QUINTUS.

VIR 53. annorum, 25. Julii febris quotidiana prehensus, illam quotidie etiam tempore paroxysmi validis in libero aere laboribus incumbendo, domare conatus est: ac statim post binos primos paroxysmos toto corpore tumere coepit: non tamen a suo proposito destitit: laboravit donec monstrosam corporis molem non amplius movere potuerit: & biduo post, quinta nempe Augusti ad nos delatus est.

Inter omnes, quos vidi, aqua intercute laborantes, hic longe tumidissimus erat: ingens abdominis ab aquis contentis distenti moles valde protuberabat, & scrotum in faccum magnum lucentem aquis fluctuantibus plenum, valde tensum intumuerat: æger immobilis jacebat, paucissimam urinam mittens; alvus jam a biduo clausa erat, & febrilis paroxysmus continuabat quotidie post prandium invadere, sine sudore sequenti mane desinens.

Per undecim dies dedimus ei medica-

menta ad obstructions solvendas, diuresim & diaphoresim movendam, febrimque eliminandam apta, quibus quidem febris fugata est, alvusque omni die bis terve liquida mota: verum in aliis excretionibus nullam mutationem observavimus, nec tumidi corporis moles ullo modo minuta est.

Licet post optima medicamenta incassum adhibita levem curationis spem foveremus, ipsi oxymell. colchici unc. ij. quotidie absumentas dedimus, quibus urinæ variæ, pallidæ, flavescentes sine enæoremate, subinde fuscescentes cum enæoremate copioso, flocculento, fusco quotidie ad quatuor libras & ultra motæ sunt, succedente simul pluries alvo pauca, liquida; unde usu medicamenti per octo dies continuato, corporis habitus paulisper mollitus est, manente eadem mole.

Absumpsit dein omni die oxymell. unc. iij. sequente majori urinæ excretionem & alvina fluidorum exoneratione copiosa; verum inde non detumescebat æger, & vires valde collabebantur.

Quarta Septembris continuata eadem oxymell. colchici dosi decoctum N. r. ipsi exhibuimus, ac fomentum discutiens simul scroto applicuimus.

Hac

Hac methodo alvus naturalis fere evasit, ac tantum bis, raro ter nyctemeri spatium secessit, urina septies octiesve ad libram & ultra excreta est; omni nocte copiosissime sudavit.

Sic sensim collapsus est corporis habitus: ascites minutus est, & decima Septembris hydrops scroti disparuerat renascente appetitu, unde abjectus ægri animus multum erigebatur.

Decima quinta Septembris superior corporis truncus & artus superiores caputque omnino detumuerant; artuum inferiorum tumor admodum mollis, pastaceus erat, & ascites fere integre disparuerat; pergebat fieri magna urinæ excretio, & sudores minus copiosi evadabant.

Continuavit æger eadem priorum medicamentorum dosi uti, & admodum appetenti carnes vitulinas aliaque facilis digestionis alimenta majori copia cum aliquot vini austriaci unciis ipsi quotidie concessimus.

Vigesima Septembris omissum est decoctum N. 1. & eadem oxymell. colchidosi tinct. mart. pomar. gtt. l. admixtæ sunt; totum corpus tunc detumuerat, exceptis cruribus, quæ licet mollissima, adhuc multum tumebant.

Finito Septembri conserv. N. 3. incoepit uti, & in illius usu continuavit usque ad 28. Octobris, qua demum ab omni medicamento abstinuit, optime valens, robustus, ac omnibus corporis functionibus naturaliter procedentibus, octava Novembris ex nosocomio dimissus est.

CASUS VIGESIMUS SEXTUS.

FEMINĀ 64. annorum, per binos menses febrim tertianam perpeffa ab illa per quindecim dies libera fuit, & recidivam denuo passa jam primis paroxysmis incoepit toto corpore intumescere ac brevi ingens evasit corporis moles, feбри post quinque vel sex paroxysmos sponte denuo desiniente: vigesima die post recidivam ad nostrum nosocomium delata est.

Totum corporis habitum aqua intercus multum distendebat, & in abdominis aquis plenissimi sinistra parte corpus durum, oblongum percipiebatur; ægra valde anxia diu noctuque in lecto erecta federe coge batur; alvus tarda erat, & magno cum labore subinde paucas urinæ guttulas exprimebat.

De Colchico in Hydropse. 315

Dedimus illi oxymell. colchici unc. ij. quotidie per triduum sine levamine, quare datæ sunt illi unc. iij. pro diurna dosi : inde urina magna quantitate incoepit excerni, corporis habitus sensim mollitus & collapsus est, & abdominis moles minuta.

Decima quarta Augusti, five undecima a suo in nosocomium ingressu die, facile decumbebat, licet adhuc subinde a somno subito excitaretur.

Continuavit adhuc per 18. dies eadem medicamenti dosi uti, dein cum omnis hydrops & reliqua symptomata disparuissent, illius loco usa est, conserv. N. 3. per duodecim dies, aptis postea alimentis vescens, carnes & vires recuperavit, & prima Octobris ex nosocomio sana dimissa est.

CASUS VIGESIMUS SEPTIMUS.

FEMINA 40. annorum, feбри tertiana per tres hebdomadas & ultra laboraverat, qua sponte cessante & emanentibus menstruis, alias debite semper fluentibus, prima Augusti totus corporis habitus subito intumuit, & abdominis cavum incoepit aquis impleri.

accessit magnus oris amator, nausea
anxietas & ingens membrorum lassitudo.

Uta est per quindecim dies variis medicamentis solventibus, stomachicis, urinæ alvoque movendæ aptis, sub horum autem usu omnia in pejus ruerunt, multum auctis ascite & anasarca.

Dedi illi decima quinta Augusti oxymell. colchici unc. ij. per diem: secuta est statim magna urinæ excretio, & dejectiones liquidæ per alvum pluries per diem accesserunt, uterque hydrops sensim minutus est; brevi disparuit anasarca & ultima Augusti nulla amplius fluctuatio in abdomine percipiebatur.

Octava Septembris ab omni medicamento abstinuit, ac decima tertia Septembris ad suos rediit, promittens se iis, quæ ad confirmationem curæ requiruntur domi usuram.

CASUS VIGESIMUS OCTAVUS.

PUELLA 12. annorum, sub finem Augusti in febrim quotidianam post potum aquæ stagnantis, impuræ, inciderat, qua adhuc laborans sexta Septembris ad nos delata est.

Valde ascitica erat, & simul anasarca jam postprimum febris paroxysmum incœpto totus corporis habitus occupabatur; anxie spirabat; tussi frequenti, sicca, vexabatur, neque appetens cibos neque multum sitiens; urinæ excretio pauca erat, & alvus raro exonerabatur.

Dedimus illi oxymell. colchici unc. j. per diem assumendam, quam dosi per octo dies continuata cessavit febris; anasarca disparuit, & minutus est ascites, urinæ excretionem copiosa, motaque sæpius alvo: immutata autem manebat tussis & anxietas.

Ut curam acceleraremus, dedimus ipsi oxymell. colchici unc. j. β . per diem qua dosi per quatuor dies urina solito majori copia excreta est, verum decima octava Septembris subito minuta est urinæ excretio: in pectoris latere sinistro dolorem & ardorem conquerebatur: lenis febris aderat, & excretio alvina antea liquida, sæpe frequens, jam ab hesterno die emanabat.

Cataplasmatibus loco dolenti applicatis, enematis emollientibus & dato decocto N. 1. cum nitro, continuataque solita oxymell. dosi intra biduum omnia ad pristinum statum reducta sunt: con-

tinuavit ægra usque ad finem Septembris oxymelle colchico uti ; postea autem cum omnis hydrops disparuisset , datum est illi ℞. conserv. cochlear unc. β. oxymell. colchici unc. j. limat. mart. o. rubigin. gr. v.

M. intra biduum absumat ; hæc quater repetita sunt , ac demum omni medicamento abstinuit. Initio Novembris sana robustaque dimissa est.

CASUS VIGESIMUS NONUS.

FEMINA 73. annorum , initio Augusti anni 1767. a multis annis anxietate , difficili respiratione , tussicula & impossibili in latera decubitu affecta , frequenter noctu ab imminente suffocatione subito expergefacta , ad nos delata est valde exsucca.

Jam per tres hebdomadas antequam ad nos deferretur , diu noctuque erecta sedere coacta fuerat ; urinæ excretio paucissima erat , anxietas summa ; facies tumida , livida , hypochondria elata , tensa ; artus inferiores aqua intercute tumidissimi , alvus tarda.

Datæ sunt illi oxymellis colchici unc.

ij. quotidie quatuor dosibus absumendæ superpoto vasculo infusi pectoralis.

Primo die nullam mutationem observavimus, secunda die autem ter urinam sat copiosam misit, obscuri coloris cum enæoremate flocculis densis, fuscis constante, fundum petente; & alvus sponte secessit.

Postea diuresis valde copiosa fuit, alvus quotidie semel bisve secessit; sensim levatum est pectus; respiratio facta est liberior & cessavit tussis.

Vigesima Augusti incidit in diarrhæam, dejectiones erant frequentes, aquosæ, multo glutine tenaci, varie colorato mixtæ.

Vigesima quarta Augusti continuabat diarrhæa valde frequens, & accedebant tormina, conciderant ambo hypochondria & mollia erant; artus inferiores & facies penitus detumuerant; respiratio erat libera, & sat diu in omnem partem decumbere poterat; tussis autem denuo ægram incipiebat invadere.

Omissum est oxymell. colchicum & datum decoctum N. i. quo solo usque ad vigesimam octavam Augusti usa est ægra.

Sic sedata tussi & alvi dejectionibus sufficienter minutis, diuresi continuant-

te, appetitus renatus est, & sensim res ægræ ad optimum statum vergebant: continuavit tamen præfato decocto uti & oxymell. colchici unc. j. iterum quotidie sumpsit.

Quarta Septembris vetulam examinantes nullum amplius præteritorum malorum vestigium invenimus; nulla amplius anxietas; tussis nulla, respiratio liberissima, decubitus in omnem partem facilis; somnus bonus, appetitus bonus; hypochondria libera, alvus naturalis; urinæ excretio minor quam ante; ut vires augerentur, cibi eupeti & paucum vinum ipsi data sunt.

Continuavit usque ad decimam tertiam Septembris oxymell. colchici unc. j. fumere, postea medicamento abstinuit, & optime valens sub finem mensis hujus ex nosocomio discessit.

CASUS TRIGESIMUS.

PUELLA 43. annos nata, 18. ætatis anno menstruare cœpit; famulatu vitam a teneris sustentavit, & vix unquam ægrotavit, donec absque nota causa ante quinque vel sex annos menstrua emanferint, neque primis hujus muta-

tionis temporibus male habuit ; ideo suppressionem mensium floccifaciens ad illos revocandos nihil adhibuit.

Ante tres annos incoepit torpida fieri ; membra lassa , pigriora & ad labores minus apta experiri , per intervalla valde anxiosa esse , minus appetere & excretiones urinæ alvique tam copia , quam tempore valde irregulares incoeperunt fieri.

Variis adhibitis medicamentis conata est sibi levamen adferre ; verum omnia incassum adhibuit ; initio anni 1768. incoepit intumescere , tussi inani vexari , alvi excretio rara & diuresis valde parca fieri.

Decima sexta Julii anni 1768. ad nos delata , ascite magno & totius corporis ingenti anasarca laborabat. Jam a quinque septimanis decubitus erat impossibilis ; sessio difficilis , somnus nullus ; frequens tussendi conatus a doloribus hypochondriorum inanis redditus ; color tumidæ faciei & manuum lividus , extremitates frigidæ , urina tantum guttatim jam ab octiduo excernebatur : alvus atriduo nulla , anxietas tanta , ut mors instare videretur.

Data sunt illi salis polychresti dr. ij. & desuper haust. N. 6. cochleatim

trihorii spatium absumpsit ; unde decies purgata est. Diuresis tamen inde nullo modo fuit promota , neque quoad reliqua pessima symptomata levare visa est ægra , quam gratis cardiacis recurrevimus.

Decima septima incepit oxymellis colchici unc. ij. per diem sumere.

Decima octava sputa foetida , coenosa , fat copiosa expectoravit , & tussis fuit minus dolorifica , urinæ excretio vix ulla , & reliqua symptomata , ut ante.

Decima nona oxymell. colchici unc. iij. ipsi per diem absumendæ datæ sunt.

Vespere sputa copiosa , glutinosa , fusca , cœrulea , viridia , magna copia eiecerat ; alvum copiosam , mollem multo muco mixtam deposuerat ; quinque libras urinæ fuscescentis cum multo enæo remate ejusdem coloris miserat ; respiratio facilius erat , anxietas minor , mens spe futuræ curationis erecta , alacris ; cibos cum appetitu sumit.

Continuato ejusdem dosi oxymellis colchici usu quotidiano per 24. dies , nullo alio adhibito medicamento , sputis glutinosis , & urina sæpe ad 14. libras nyctemeri spatium excreta , integre curata fuit ægra , ita ut ascites & anasarca perfecte disparuerint ; tussis emanavit ,

respiratio & decubitus liberrimus fuerit, hypochondria mollia, minime dolentia, & omnes functiones naturales evaserint.

Ad corpus roborandum & curæ confirmationem datæ sunt illi conserv. nasturt. aquat. & oxymell. colchici aa. unc. j. per diem cum limat. mart. gr. viij. quibus per 20. dies usa sanissima ex nosocomio dimissa est.

CASUS TRIGESIMUS PRIMUS.

VIR 68. annos natus, vino a juventute valde deditus, cæterum fere semper sanus decima quinta Maii ad nostrum nosocomium delatus est anno 1768.

Declinante anno 1767. tensionibus hypochondriorum, epigastrii, tarditate alvi, accedente subinde anxietate & difficili respirio, somno perturbato, lassitudine spontanea, inappetentia, magna siti laboravit. Mense Decembris urinæ solito paucior excerni, & æger toto corpore intumescere cœpit.

Multa & varia tentavit medicamenta; donec rebus suis fere exhaustis se ad nostrum nosocomium deferri curaverit.

Ascite in magnam molem distende-

batur abdomen : hypochondrium dextrum sinistro multo altius , magis tensum ; totus corporis habitus aqua intercute valde tumidus , coloris viridis ; alvus fere quotidie sponte secedebat ; urina tantum guttatim excernebatur ; appetitus nullus , sitis multa , somnus paucus , debilitas magna.

Per 10. dies quibus oxymell. colchici unc. ij. quotidie sumpsit , uterque hydrops immutatus permanfit , licet alvi & urinæ excretiones aliquantulum auctæ fuerint.

Vigesima quinta Maii incoepit oxymell. colchici unc. iij. per diem absumere , unde urina jam primo die maxima quantitate incoepit excerni , & quatuor septimanarum spatio omni hydrops disparuit , sitis cessavit , appetitus sat bonus evasit , excretio alvi naturalis mansit , & somno pacato omni nocte refectus est æger.

Evacuatis aquis hepatis lobi sinistri tumor & durities manifesta supererat : ægrum tamen rogantem , ut liceret ipsi parum a medicamentis quiescere , per aliquot dies absque medicamento reliquimus , cibos eupetos & paucum vinum ipsi concedentes.

Vix per septimanam a medicamentis

quievit : & factus est tympaniticus, & paucis diebus postea aquæ denuo in abdomine incoeperunt colligi.

Præter priorem colchici dosin scopo sol ventre & diuretico ipsi iterum exhibitam dedimus mixtur. N. 8.

Medicamenta optimum effectum statim fecerunt, statuum & urinæ excretionem egregie promoverunt, ut 14. dierum spatio abdominis moles collapsa & mollis fuerit, minutaque hypochondrii dextri durities.

Ut adhucdum manifestus lobi sinistri hepatis infarctus, & latentes forte adhuc aliorum viscerum profundiores obstructions radicitus tollerentur, continuavit quotidie oxymell. colchici uncias ij. absumere, & præterea decoct. gramin. taraxac. ipsi datum est.

Hisce usus est de die in diem melius habens usque ad medium Augusti, quo tempore hypochondrium dextrum penitus liberum & nullum alius visceris affecti signum inveniri poterat.

Postea usus est conserv. N. 3. usque ad ultimam Augusti, qua sanus & robustus ex nosocomio dimissus est.



CASUS TRIGES. SECUNDUS.

FEMINA 56. annos nata, cui catamenia ante octo vel novem annos emanferant, absque nota causa initio Maii anni 1768. pustulæ subrubræ valde dolentes per totum corpus eruperunt, quibus medelam facturis advocatus Balneator venam secuerat, & magnam sanguinis copiam eduxerat: disparuere pustulæ eodem die, & femina pedibus intumescere cœpit.

Usa est variis medicamentis, sed omnia absque effectu fuerunt: sensim cavitas abdominis aquis impleta est, & ita intumuit totus corporis habitus, ut se loco movere non amplius potuerit ægra.

21. Junii ad nostrum nosocomium delata est valde debilis; alvus more illi solito secedebat; urina ab initio morbi pauca & cum difficultate & dolore urente excernebatur; noctes inquietæ erant; appetitus paucus.

Datum est illi decoct. N. 1. & oxymell. colchici unc. ij. quotidie absu-
mendæ.

Jam prima die multum aucta est

urinæ excretio, cessavit dolor urens, & postea aquæ tanta copia per diuresin evacuatae sunt, ut septima Julii ab omni hydropse libera esset: appetitus autem adhuc languebat: ægra manebat debilis: somnus erat bonus.

Dedi ægræ quotidie conserv. cochlear. & oxymell. colchici aa. unc. j. cum rad. helen. dr. j. & sic usque ad decimam quintam Julii continuavit, donec appetitus optimus fuerit, & vires ita increverint, ut potuerit sola deambulare per cubiculum. Post hæc sumpsit ægra quotidie oxymell. colchici, conserv. cochlear. aa. dr. vj. limat. mart. o. rubig. gr. x. usque ad vigesimam quartam Julii, qua sana ex nosocomio exivit.

CASUS TRIGES. TERTIUS.

PUELLA 23. annorum, vigesimo ætatis anno menstruare cœperat: evacuatio autem menstrua semper fuit pauca, pallida, irregularis, & ab eo tempore ægra vitam languidam duxit. Sub finem Junii anni 1768. subito abdomine intumescere cœpit; tumor brevi in magnam molem increvit, & decima Julii ad nos ascitica delata est.

Dedimus illi statim oxymell. colchici unc. ij. per diem, & jam prima curæ die urina, antea paucissima, tanta copia incoepit excerni, ut quinque dierum spatio penitus ab hydrope libera fuerit.

Abdomen panno fumo aromatico imprægnato tectum, fasciis circumductis firmatum est. Sumpsit adhuc per quatuor dies oxymell. colchici unc. j. dein quotidie oxymell. colchici, conserv. cochlear. aa. unc. j. cum limatur. mart. o. rubigin. gr. x. ipsi dedimus usque ad vigesimam sextam Julii, qua optime valens voluit ad labores redire, nec potuit diutius in nosocomio retineri.

CASUS TRIGES. QUARTUS.

OPERARIUS 34. annos natus, jam a semi-anno corporis gravitate, lassitudine, inappetentia, in somnum proclivitate magna affectus, initio Julii anno 1768. decumbere debuit, & incoepit intumescere, auctis continuo prioribus symptomatibus.

Dum 24. Julii ad nos delatus est, totum corpus valde tumidum anasarca occupabat; abdomen ascites valde distendebat; magna debilitas, summa.

anxietas omnium functionum, ingens læsio metum instantis mortis incutiebant.

Ilico datæ sunt illi oxymell. colchici unc. ij. per diem, quæ jam prima die diuresin ita promoverunt, ut ultra tres mensuras urinæ varii coloris miserit, cum magno symptomatum levamine.

Sequentibus diebus tanta fuit urinæ excretio, ut intra sex dies & anasarca & ascites integre cum omnibus symptomatibus disparuerit; debilitas minuta erat, & æger cibos appetebat.

Trigesima Julii incoepit oxymellis colchici tantum unc. j. per diem sumere: abdomen fasciis firmatum est, & cibis aptis majori copia vesci incoepit.

Sexta Augusti dedimus illi quotidie oxymell. colchici. unc. β. conserv. cochlear, unc. j. limat. mart. o. rubigin. gr. x. quibus usque ad vigesimam Augusti continuavit uti. Vires brevi recuperavit; omnes functiones in integrum restitutæ fuerunt, & sub finem Augusti sanissimus discessit.

Decem primis curæ diebus alvus valde tarda fuit, & nonnisi emate sollicitata exonerabatur.

CASUS TRIGES. QUINTUS.

FEMINA 59. annos nata & multis annis valetudinaria, ineunte anno 1769. incoepit tussitare, appetitus fere deletus, & respiratio admodum difficilis, anxiosa facta est.

Variis medicamentis absque levamine usa est, & demum provecto jam Aprili venam sibi secari curavit. Verum inde valde debilitata est, & increvit anxietas.

26. Aprilis ad nos delata est, toto corpore valde emaciata: sex notabiles in abdomine manu observavimus indurationes variae magnitudinis, pugni binæ, ovi anserini una, tres aliæ minores, omnes fere functiones læsæ erant.

Dedi ipsi pilularum ex sapone veneto & gummi aromaticis dr. j. per diem & superpotandum decoct. gramin. & taraxac.

Sub usu horum medicamentorum res ægræ nullo modo emendatæ fuerunt: indurationes eædem mansere; respiratio difficilis, valde anxiosa & decubitus suppositis pulvinaribus semi-erectus tantum in dorsum possibilis factus est: somnus paucus, sæpe subitis anxietatibus inter-

De Colchico in Hydrope. 331

ruptus; appetitus nullus; alvus tarda; urina pauca, plerumque fusca; pulsus inæqualis, irregularis, sat solidus tamen & vires adhuc præseferens.

Declinante Maio, toto corpore intumuit, & simul incoeperunt aquæ in abdomine colligi, febris sat magna cum tensione & inæqualitate pulsus insurrexit: sitis magna; lingua sicca; respiratio crebra, celeris, brevis, evaserunt, ut jam de ægra conclamatum esse crederetur.

Dedi ipsi medicamentum sequens:

℞. Rob. sambuci.

57. Ebuli aa. unc. j.

Oxymell. squillit. unc. β.

Pulv. squill. gr. xx.

Nitri puri

Sal polychr. aa. dr. j.

Liquor anod. mineral.

gtt. xxx.

M. ut nyctemerii spatio partitis dosibus absumat & emulsum ex seminibus frigidis.

Sub usu horum medicamentorum per 12. dies continuato, febris, sitis, linguæ ficcitas disparuere, & respirationis crebritas & celeritas multum remisit; reliqua autem symptomata permanserunt, aquarum in cavitate abdominis aucta

collectio illud in magnam molem distendit, multumque increvit anasarca.

Nona Junii ægræ quater de die oxymellis colchici unc. β. dedimus absque ulla futuri felicitis effectus spe; etenim præter reliqua mala signa, diu noctuque a quinque diebus in lecto erecta sedebat, continuo sopore detenta.

Prima die urinam, quæ antea paucissima erat, ad tres libras & ultra misit fuscam, saturatam, cum enæoremate denso, copioso, fundum petente, & alvum solidam pallide flavam multa pituita involutam deposuit.

10. Junii urinam minus fuscam misit ad lib. viij. Sequenti die ad mens. iij. & ultra: sopor disparuit; ægra minuta jam multum anxietate utcunque decumbere potuit, & sat tranquille per horam, & subin diutius dormire: mollito totius corporis habitu & abdomine minus tenso.

Continuavit diuresis valde copiosa esse, & 18. Junii anasarca disparuerat: ascites media ad minimum parte minutus erat: ægra in omnem partem facile decumbebat; bene dormiebat; appetitus erat bonus; alvus autem non nisi supposito vel enemate sollicitata evacuabatur.

Perrexit ægra dictam oxymellis colchici dosin eodem cum effectu sumere usque ad finem Junii, quo tempore omnis hydrops evanuerat: indurationes omnes excepta unica adhuc manifesta in inferiore & media epigastrii parte, quæ tamen multum minuta & minus solida erat, disparuerant: ægra jam ex lecto surgebat; per intervalla per cubiculum ambulabat.

Ne continuans magna diuresis ægram jam ab omni hydrope liberam nimis debilitaret, illi tantum unc. j. oxymell. colchici per diem dedimus, ut obstructions penitus resolverentur, ac aptis alimentis corpus exhaustum conati fuimus reficere.

Circa medium Julii abdomen liberum erat; omnes functiones bonæ; vires increscebant, & carnes corpori incipiebant renasci: quare medicamento valedixit.

Tertia Augusti nosocomio exivit optime valens.

CASUS TRIGES. SEXTUS.

FEMINA 77. annos nata, tota sua vita vix unquam ægrota, ante tres menses sensim incœperat debilitari, appetitu

languere, somnolenta fieri; transactis in hoc statu binis mensibus subito toto corpore intumuit; lecto affixa manere debuit; & 13. Augusti quinta nempe hydropis septimana ad nos delata est.

Habitus corporis externus aqua intercute multum tumebat, & ascite magno abdomen distendebatur; epigastrium supra reliquam abdominis molem assurgebat tensissimum, tympaniticum.

Valde debilis erat, anxia; appetitus nullus; urina jam a 15. diebus tantum subinde guttatim mittebatur; alvus tardissima, jam a quatrduo nulla.

Datus est illi pulvis purgans, quo quater alvus movebatur: dein quotidie oxymellis colchici unc. ij. absumpsit, & quotidie aliquot unciae vini austriaci concessæ sunt.

Prima die vix ullum effectum fecit medicamentum: secunda sex urinae varii coloris librarum excretionem promovit.

Postea diu noctuque tam copiosam urinam misit, ut 26. Augusti ab utroque hydrope integre liberata esset: epigastrium quoque penitus collapsum erat, & nihil præternaturale in abdomine detegebatur; appetitus erat bonus; sitis nulla; alvus naturalis, omni

De Colchico in Hydropse. 335

alterno die sponte secedens ; somnus bonus : ægra tamen continuavit oxymellis colchici unc. j. per diem sumere usque ad octavam Septembris. Appetitus erat valde magnus, & plures horas diei extra lectum subin sedendo, modo ambulando transigebat. Data est ipsi sequens conserva :

℞. Conserv. cochlear.

Oxymell. colchici aa. unc. j.

Limat. mart. o. rubig. gr. xv.

M. ut divisis dosibus biduis spatio absumat.

Hac conserv. per 10. dies usa est, mansit adhuc in nosocomio usque ad 28. Decembris, qua optime valens sola ad suos rediit.

CASUS TRIGES. SEPTIMUS.

FEMINA 25. annos nata, 17. Julii prima vice puerpera facta, lochiis quinta puerperii die suppressis, incoepit toto corpore intumescere : varia ipsi adhibita medicamenta nihil juverunt ; ægra 13. Augusti ad nostrum nosocomium delata est.

Totum corpus anasarca occupabat ; abdomen in ingentem molem distendebant aquæ ; tormina frequentia, magna

abdominis patiebatur ; erat valde debilis & anxia , urinæ excretio etiam sub alvi dejectionibus vix ulla ; sitis magna ; lingua pura , pallida.

Dedi ipsi decoct. rad. falab. cum laudano & unc. ij. oxymellis colchici per diem.

Jam prima die diarrhæa , abdominis tormina & sitis minuta sunt , & urina incoëpit fluere.

23. Augusti diarrhæa & sitis cessaverunt ; disparuere tormina , & uterque hydrops multum minuebatur.

25. Missum factum est decoctum , & solo oxymelle colchico usa est ægra.

Diuresis tam copiosa fuit , ut 30. Augusti nihil de hydrope superesset. Appetitus erat bonus , somnus tranquillus , & reliquæ functiones bonæ erant.

Ægra dein tantum oxymellis unc. j. per diem sumpsit , & maximam diei partem in cubiculo deambulans extra lectum transegit.

Octava Septembris quotidie oxymell. colchici & conserv. cochlear. aa unc. j. cum limatur. Mart. non rubigin. gr. vij. per diem sumpsit , atque sic continuavit usque ad 17 Septembris , qua optime valens ex nosocomio discessit.

C A S U S

CASUS TRIGES. OCTAVUS.

ANCILLA 28. annorum, sub eruptione menstruorum febris quotidiana corripitur 16 Augusti anni 1769.

Tertia die incoepit toto corpore valde intumescere, & octava Febris die, 23. nempe Augusti, febris sponte cessavit.

26. Augusti ad nostrum nosocomium delata est: totus corporis habitus aqua intercute valde tumidus erat: abdomen ab ascite in valde magnam molem elatum: alvus tarda; urinæ excretio paucissima, appetitus nullus; respiratio difficilis & ægra valde debilis erat.

Sumpsit ægra oxymellis colchici unc. ij. quotidie: urinæ statim magna copia excreta est, alvus quotidie bis, ter secessit: orta est tussis, quæ multis sputis glutinosis excretis post quatuor dies sponte cessavit; sæpius sudavit ægra.

Quarta Septembris omnis hydrops disparuerat, vires meliores erant, & omnes functiones bonæ.

Data est ipsi postea oxymellis colchici tantum unc. j. per diem, & 9 Septembris cum jam facile extra lectum

esset, & per cubiculum deambulare; optime appeteret cum colchico & conserva cochleariæ Mars ipsi datus est.

His continuavit uti usque 19 Septembris, qua optime valens ad heram suam rediit.

Quas hucusque retuli observationes de oxymelle colchico, videntur sufficere ad probandam confirmandamque ipsius in variis hydropis speciebus efficaciam neque omnes casus felices referam; valde magno volumine opus esset, ut omnes felices hoc medicamento peractas curas scriberem; solo hoc anno 1772. ultra centum tam hydropicos quam hydro-picas illo curavi, quorum historias neglexi: cum nihil diversi ab iis, quæ jam retuli observaverim: hinc tantum duos alios casus mixtos addam.

CASUS TRIGES. NONUS.

PUELLA 28. annorum, a 12. ætatis anno menses regulares omni mense per tres quatuorve dies habens, semper sana, vigesimo ætatis anno in quadam domo hic Viennæ famulatum inivit, cumque habitatio angustior esset, de-

buit etiam hyemali tempore in culina frigidissima noctu jacere.

Frigus hyemale sic sustinuit fere per novem annos absque incommodo : anno autem 1768. circa mediam quadragesimam artus inferiores intumuerunt œdematosi , & prima Aprilis corporis truncus, artus superiores & totum caput pariter tumidissima evaserunt , ut vix amplius oculos aperire posset.

Tertia Aprilis ad religiosas sanctæ Elisabethæ missa , ibi per septem hebdomadas jacuit : varia sumpsit medicamenta absque levamine , imo hydropi intercuti incoepit se adungere ascites.

Inde Badam petiit , ubi per quindecim dies balneis usa , multum increvit anasarca , & abdomen aquis distentum in valde magnam molem elatum est : menstrua , quæ huc usque regularia fuerant , emanferunt ; periit appetitus : & ægra valde debilitata est.

Domum curru revecta variis adhuc usa est remediis , quæ omnia irrita fuere , mansit tamen domi usque ad trigessimam Augusti qua ad nostrum nosocomium delata est.

Abdomen erat aquis plenum , tensum , in valde magnam molem ela-

tum, & totus corporis habitus tumidissimus; respiratio brevis, laboriosa, anxiosa, decubitus impossibilis, alvus tarda, urina paucissima, tantum guttatim missa, biliosa; appetitus nullus; sitis multa.

Sumpsit per triduum oxymell. colchici unc. ij. quotidie absque effectu: data sunt dein unc. iij. ejusdem medicamento per diem: verum præter imminutionem sitis nullam mutationem attulerunt, & metu suffocationis crescente paracenthesis instituta est octava Septembris, qua ad minimum 40. libræ aquæ sat puræeductæ sunt cum magno respirationis levamine.

Perrexit ægra eadem oxymellis colchici dosi uti: alvus liberior fuit, appetitus utcumque incoepit vigere, & decubitus fuit multo facilior: urina tamen valde pauca excreta est, & 23 Septembris debuit iterum paracenthesis institui, qua copia aquæ fere æque magna ac prima viceeducta est.

Colchicum missum fecimus & squillam varia forma ægræ dedimus, inde autem nausæ, vomitus, anxietates ortæ sunt, neque inde urinæ excretio aucta est; ita ut post paucos dies ad alia devenire debuerimus. Dedimus ipsi

etiam vinum. N. 5. Verum & hoc nihil immutavit, & brevi iterum ita increvit ascites, ut elapsis a secunda paracenthesi sedecim diebus denuo institui debuerit. Post hanc alia, quæ & viribus solventibus, aperitivis & diureticis multum commendantur, adhibui medicamenta: verum post viginti dies ascites æque magnus erat, ac dum ad nos venit; anasarca idem, & reliqua symptomata increverant ita ut denuo canula aquæ educi debuerint.

Sic ante finem Novembris anni 1768. non obstante usu optimorum medicamentorum ab authoribus contra hydrophem commendatorum sexies paracenthesis institui debuit, aquis sat claris manentibus.

Ægræ tunc dedi oxymell. colchici unc. ij. extract. cicutæ dr. ij. M. ut quotidie absumat: diuresis paulo copiosior facta est: artus superiores, caput, & superior trunci corporis pars sensim parum detumuerunt: elapsis tamen quatuor septimanis ascites denuo ita increverat ut respiratio valde anxiosa esset, & valde difficilis decubitus, quare paracenthesis de novo instituta est.

Idem medicamentum continuavit sumere ægra: appetitus utcumque bonus

evasisit ; & 27. dies præterierunt antequam cogèremur paracenthesin octava vice instituere.

Continuato ejusdem medicamenti usu urinæ excretio ad tres quatuorve libras nyctemeri spatio facta est. Truncus superior, artus superiores, & facies penitus detumuerunt, sicque mansere ultra quinque hebdomadas & ascites lente renatus est. Sub finem tamen Februarii toto corpore denuo incœpit intumescere, & abdomen in tantam molem increvit, ut ægra denuo in periculum suffocationis devenerit, unde septima Martii nona vice aquæ cannula ex abdomine evacuatæ fuerunt æque copiosæ & minus puræ quam ante.

Octo post hanc paracenthesin diebus elapsis abdomen denuo aquis incœpit distendi : sed 18. Martii diuresis incœpit fieri valde copiosa, & intra quinque dies totus corporis habitus integre detumuit, & ascites penitus disparuit.

Continuavit tamen ægra usque ad medium Maii eandem prædictorum medicamentorum dosin sumere : dein quotidie limat. mart. non rubigin. gr. x. cum conserv. nast. aquat. & oxymell. colchici aa. unc. j. absumpsit usque ad finem Maii, qua cum optime haberet,

& omnes functiones naturales essent, facies coloris sanissimi ab omni medicamento abstinuit.

Septima Junii anni 1769. sana & robusta servitium inivit, in quo per triennium sana vixit: hoc anno autem post febrim putridam exantlatam denuo hydropica facta est, & nunc in nostro nosocomio curatur.

CASUS QUADRAGESIMUS.

PUELLA 26. annorum, initio Augusti anni 1769. incidit in febrim acutam, putridam, quæ per tres septimanas duravit, & prout retulit, absque evacuationibus criticis, circa 21. morbi diem cessavit; ægra statim incoepit artubus inferioribus tumere, & brevi totum corporis habitum anasarca occupavit, & abdomen incoepit protuberare.

Variis incassum adhibitis medicamentis undecima Octobris ejusdem anni ad nostrum nosocomium delata est.

Valde tumebat totum corpus, abdomen aquis in ingentem molem distentum: ægra erat valde debilis, anxiosa, coloris viridis, cæruleo præcipue in facie & artuum extremita-

tibus mixti ; alvus erat tarda , dura , variegata ; urina paucissima saturate biliosa.

Dedi illi oxymell. colchici unc. ij. per diem , & congruis cibis ac paucō vino conatus sum vires sustinere , erigere.

Octo primis diebus urina ad binas , tresve libras excernebatur. Minus saturata , & multa sputa glutinosa variæ coloris expectoravit : tumor intercus & abdominis videbatur molliri , respiratio facilior fieri.

Verum hæc non continuaverunt : uterque hydrops sensim magis increvit , & sub finem Octobris imminente suffocationis periculo , paracenthesis debuit institui , qua magna copia aquæ sat claræeducta est ,eductis aquis epigastrium & hypochondrium dextrum mansere tumida , dura.

Sumpsit tunc ægra extracti cicutæ dr. j. & oxymell. colchici unc. ij. per diem : urinæ autem æque paucae ac ante fluxere , & ita cito aquæ renatae sunt , ut elapsis 15. diebus cannula denuo debuerint educi. Epigastrium & hypochondrium dextrum erant minus tumida , minus dura.

Eadem medicamenta perrexit sume-

re; alvus libera, mollis, coloris boni, quotidie bis, ter secessit: sed mansit parca urinæ excretio & ascites brevi in priorem molem denuo increvit, quare initio Decembris tertia vice paracenthesis institui debuit: aquæ erant limpidæ, epigastrium & hypochondrium erant mollia, collapsa & anasarca minutus: color faciei & artuum melior.

Continuato dictorum medicamentorum-usu, ascites primis ab operatione diebus videbatur quidem renasci, sed brevi viæ urinariæ reſeratae sunt; facta est magna urinæ excretio, & intra paucos dies omnis hydrops disparuit: somnus & appetitus evasere optimi, respiratio libera, & ægra bonam partem diei incoepit extra lectum transigere.

Uſa est eadem cicuta & colchici doſi uſque ad finem Januarii 1770. dein per 16. dies martem ſumpſit, & declinante Februario ſana & robuſta dimiſſa eſt. Sub finem anni inviſit noſocomium gratiarum actiones repetitura, optime valens.



COROLLARIA.

COLCHICUM tutum & lene medicamentum est quod dosi morbo adaptata exhibitum nemini nocet, plurimis prodest.

In asciticis temperamento strictiori præditis citius & minori dosi operatur, quam in aliis, quibus laxior corporis compages.

Vis solvens colchici virtuti diureticæ fere æquiparanda est: abdominalium enim viscerum obstructions potenter referat; tumores solvit; pulmones a glutine tenaci aliis medicamentis non obediens sæpius promota expectoratione, quandoque modo vix sensibili cito liberat.

Boni ominis sunt hydropicis incipientibus colchico uti, urinæ fuscescentes vel fuscæ cum enæoremate fusco vel etiam nigro, crasso, copioso breviter in colorem dilutiorem mutatæ & præcipue observantur, in iis qui hydrope jam profecto & aliis medicamentis rebelliter laborant. Bonæ etiam primis curæ diebus, quæ sedimentum deponunt mucosum, leve, mixtum, granulis varie

coloratis, fundum vasis petentibus. An denotant tales urinæ vasa uropœtica referari, soluta materia crassa, tenaci qua infarcta erant, & quæ quandoque hydropis causa primaria est?

In hydropē alvum habere liberam salutare: frequens & copiosa alvus quandoque prodest anasarca laborantibus, si sint robusti: asciticis vero vires ad curationem necessarias adimit, & raro quemdam vidi hac via curatum: hinc si data majori oxymellis colchici dosi, corpore jam per medicamenta antea assumpta vel intestinorum nimiam irritabilitatem ad alvi dejectiones propendente, alvi fluxus nimius oriat̃ur, intra debitos limites coercendus est: in quo casu opium demulcentibus mixtum apprime votis satisfacit: tollit tormina, si adsunt; moderatur alvum & sæpe dein sequuntur copiosæ urinæ excretiones, quas non raro comitatur salubris sudor.

Subinde sudore per totum corpus erumpente æquali copioso sæpius repente, cura hydropis etiam ascitis maxima parte perficitur: quandoque etiam sub usu colchici nulla facta notabili evacuatione, tumor hydropicus collabitur.

Dosis oxymellis colchici non potest , nec quantum credo poterit unquam determinari : pendet enim a variis temperamentis , a varia causarum hydropis magnitudine & pertinacia , imo videtur varia aëris temperies multum contribuere ad maiorem vel minorem diureticorum actionem. Atque non improbabile videtur varium solum in quo crescit colchicum multum contribuere posse ad ipsius maiorem vel minorem efficaciam.

Bulbus colchici , ut efficax sit medicamentum , recens esse debet & succulentus ; qui enim effoetus est & subfarinosus , nullam habet virtutem , nec ullam acrimoniam , & potest impune comedi magna dosi ; ubi e contrario parva succulenti & recentis bulbi portio & hominum & brutorum sanitatem turbat , lædit , & sæpe mortem adferre potest.


Prudens Medicus circa dosin hujus medicamenti peccare non potest : licet enim efficacissimum sit , est admodum lene , præterea semper a minori dosi incipiendum est , quæ si non sufficiat , sensim augenda est , nisi peculiaris ægri idiosyncrasia , quam hæc usque non vidi , medicamentum respuat. Dedi desperata-

te hydropicæ unc. iv. per diem & illam curavi.

Colchicum est ex omnibus, quæ nota sunt, anti-hydropicis efficacissimum, corpus minime turbans, secure etiam exhibendum præsentē febrī, cui medetur, dantur tamen aliquando hydropes colchico non curandi, aliis medicamentis cedentes. Sic vidi perillustrem ac magnificum Archiatrum *Storck* mixtura ex vino austriaco & lapidibus cancrorum in nostro nosocomio curasse hydropicum, cui nulla alia medicamenta profuerant, & ego anno elapso eadem mixtura virum ex organi faucibus eripui, quem salibus, millepedibus, squilla, colchico & aliis medicamentis frustra tentaveram curare.

Quandoque præter colchicum alia medicamenta v. g. leviter stimulantia, roborantia &c. nimis languidæ corporis actiones &c. exigunt, plerumque tamen solo colchico curationes ad finem perducuntur, & talia tantum ad curæ confirmationem adhibentur.





CAPUT SECUNDUM.

DE

ACONITO ET HYOSCYAMO.



CASUS PRIMUS.

TRIGINTA quinque annorum femina, cui menstrua irregularia jam a pluribus annis fluebant, a tribus annis vagis artuum doloribus sine febre laborans, & jam a quatuor mensibus vehementissima arthritidis symptomata patiens, artibus præ dolore vix mobilibus 26 Augusti 1764. ad nostrum nosocomium delata est.

Valde emaciata erat, tussi frequenti inani vexabatur; epigastrium & hypochondria tensa erant, ab attractu dolentia, ingentem in humero sinistro patiebatur dolorem, lancinantem, urentem, totum brachium in consensum trahentem, brachium dextrum eodem modo, sed lenius afficiebatur; similes dolores lumborum vertebrae & os sacrum ado-

rientes, per medium diem subinde remittebant; malleolus externus pedis dextri valde tumidus, lividus, durissimus, genu ejusdem lateris interna sui parte magno tali tumore affectum, immobile; media cruris sinistri tibia in duram exostosin cute livida tectam duos pollices longam, ultra pollicem latam multum elevatam excreverat, hi tumores ægræ magnos dolores causabant. Appetitus nullus, sitis pauca, alvus tarda, cutis sicca, somnus præ doloribus paucus, pulsus mollis, debilis, apyretos.

Solventia, leniter purgantia per 14. dies ipsi dedimus, inde tensio & dolor hypochondriorum & epigastrii disparuerunt.

Post hac dedimus illi extracti aconiti gr. j. per diem cum saccharo & decoctum emolliens.

Diebus ab usu horum medicamento-
rum decem elapsis, dolores valde remi-
ferant, tussis cessaverat, & omnia in
melius mutabantur, in tumoribus au-
tem nulla adhuc alia mutatio sensibilis
fiebat.

12. Septembris malleolus & genu mul-
tum mollita, collapsa, crus movere,
imo illi insistere, & cum dolore ince-

dere poterat, tumor quoque tibiæ cruris sinistri minor, minus lividus videbatur.

Iisdem medicamentis ad septimam Octobris continuavit uti, & nona ejusdem resolutis omnibus tumoribus, sana discessit.

CASUS SECUNDUS.

FEMINA triginta aliquot annorum, sanguinei temperamenti, mensstruis sat regularibus semper gavisæ, vix unquam ægrota sub finem Aprilis, anni 1764. arthritide valida corripitur; adhibentur per totum mensem Maium varia medicamenta, non omiſſa initio venæ sectione, nihil inde levaminis habet: imo omnia in pejus ruunt. Prima Junii ad nostrum nosocomium defertur.

Omnes articuli valde dolebant, utriusque cruris tibia tumore sat magno ossæ duriæ, versus inferiorem sui partem occupabatur; omnes malleoli durissimi, valde tumidi erant, hi tumores ægræ tantos dolores lancinantes dilacerantesque causabant, ut dies noctesque inquietissima transigeret, & artus inferiores nullo modo movere posset.

Præmisso purgante datum est ægræ extracti aconiti gr. j. per diem cum saccharo & emulsa paregorica.

Hac dosi per decem dies continuata, dolorum aliquod levamen percepit ægra, reliqua autem immutata permanebant, quare medicamenti gr. j. β. per diem ipsi datum est.

17. Julii sensus fornicationis in omnibus artubus ac præcipue in cruribus aderat, dolores erant minuti, tumorum moles paulo minor, & ægra pacate incoepit dormire.

Initio Augusti tumoribus multum collapsis, residuo licet duro manente, & doloribus fere integre ablatis, sola ex lecto incoepit surgere & sustentata baculo incedere.

Hac methodo continuata, duodecima Septembris femina sanissima ad suos rediit.

CASUS TERTIUS.

FEMINA 50. annorum, jam ultra annum menstrua evacuatione privata, robusta, sanguinei temperamenti declinante Februario anni 1765. arthritide valida corripitur, domi lecto affixa

venæ sectionem & alia medicamenta sine effectū adhibet ad decimam Martii usque, qua ad nostrum nosocomium delata est.

Pulsus erat plenus, durus, febrilis, ingentes patiebatur articulorum dolores, sitis erat multa, urina valde rubra cum enæoremate copioso innatante, reliquæ functiones sat bonæ.

Venæ sectione, medicamentis emollientibus, aperientibus, nitrosis, fero lactis usque ad decimam Aprilis adhibitis febris fugata est, dolores autem aucti sunt, articulos omnes duri, rubentes, valde dolorifici tumores occuparunt, & ægra neque artus, neque artuum digitos ullo modo præ doloribus movere poterat.

Datum est illi extracti aconiti gr. j. per diem tripartita dosi, & pro potu ordinario, decocto hordei, pradic. bardanæ, acetosæ cum oxymelle simplici continuavit uti.

Elapsis quinque diebus, mirum quantum levamen habuerit, articulorum dolores & tumores ita minuti erant, ut ægra noctu optime dormire, ex lecto interdiu surgere & per cubiculum lente incedere posset.

Ufa est aconito ad tertiam Maii usque, & septima ejusdem sanissima discessit.

CASUS QUARTUS.

PUELLA 25. annorum, 9. Decembris 1765. meæ curæ se commisit.

Ante duos annos cephalalgia laborans emplastro quodam capiti applicato validis convulsionibus correpta est, quæ per quatuor dies vix intermiserunt, ægra fui omnino nescia, loquela & motu brachii ac cruris dextri privata.

Ab eo tempore lecto affixa mansit hemiplectica, loquela fere orba, convulsionibus modo per plures dies illam invadebant quotidie; modo uno, binis, raro tribus diebus intermittebant, illam acerbius invasuræ, menstrua, quæ regulariter semper habuerat, emansere.

Per biennium successive quinque Medici sunt accersiti, quorum tres ipsi medicinam sine ullo effectu fecerunt, alii commiserantes ægram suo fato reliquerunt. Advocati dein sunt Chirurgi, Balneatores, aniculæ, qui omnes illam curando æthyopem lavarunt.

Initio Septembris 1765. ter quaterve

in die incoepit valide convelli, & ab illo tempore nullus dies a convulsionibus pluries repetitis liber fuit.

Uno vel duobus minutis primis antè paroxysmum præcedebant interna quædam abdominis agitatio, concussus; succedebat statim pectoris ficcitas, concussus, qui brevi collum occupabat, & tunc ægra sui nescia convellebatur.

Dum prima indicia paroxysmi advertebat, adstantibus manu sinistra signum dabat, ut cochleare in os intruderent, ne lingua, quam sæpe acriter momorderat, læderetur, strictissime enim dentes adinvicem allidebantur, & sic jam tres molares dentes & sex alios diffregerat.

Tempore paroxysmi brachium paralyticum curvabatur & manu pectus valde percutiebat; pes ejusdem lateris retrorsum ad nates ducebatur & hinc inde valde agitabatur.

Ingruente primo paroxysmi signo aphona fiebat, & extra paroxysmum difficillime intelligenda balbutiebat; oculus dexter lumen ferre non poterat, totum dextrum capitis hemisphærium doloribus lancinantibus, pungentibus extra paroxysmum afficiebatur; appe-

titus extra paroxysmum utcumque bonus, alvi & urinæ excretio debite procedebat, cutis ut plurimum sicca, sitis pauca, respiratio bona; pulsus mollis, mire inæqualis, apyretos; somnus paucus, corpus tamen non emaciatum, colore sano præditum.

Per decem septimanas in & externe omnia applicui quæ profutura credebam, vesicantia, fomenta, cataplasmata, medicamenta solventia, evacuantia, emmenagoga, castoreum, moschum, paregorica, folia aurantiorum; verum nihil effeci, a cortice peruviano & aliis roborantibus omnia exacerbabantur.

Circa medium Februarii de cura desperans extracti aconiti gr. j. cum saccharo tripartita dosi per diem dedi, cui decoct. rad. salab. vel emuls. adjungebatur.

Paucis diebus elapsis paroxysmi breviores, minus vehementes fuere, sicque sensim ita remiserunt, ut 12. Martii penitus emanferint, & ab eo tempore nullum eorum signum amplius adfuerit. Potuit ægra e lecto surgere, crure & brachio uti, multo liberius & intelligentius loqui.

Decima sexta Martii prodire mens-

trua, quæ per quatuor, quinque dies copiosa fluxerunt, ægræ rebus continuo in melius mutatis.

Perrexit eadem extracti aconiti dosi uti, quotidie plures horas extra lectum transigens, per cubiculum deambulans, oculo dextro jam lucem facile ferente.

Duodecima Aprilis cum sana esset, medicinæ valedixit, & debito tempore denuo menstrua erupere.

Sic exigua extracti aconiti dosi dirissimus morbus, cujus cura a pluribus peritis Medicis frustra fuerat tentata, demum perfecte sublatus est.

CASUS QUINTUS.

VIR 60. annorum, sub finem Martii 1766. vehementi ira excandescit; invadunt illum subito validissimi dolores a scapula sinistra secundum spinam dorsi ad os sacrum descendentes, quibus eadem adhuc die totum brachium & crus sinistrum ita affecta sunt, ut omnis motus in illis perierit.

18. Aprilis multis incassum adhibitis remediis ad nos defertur.

Præter jam descripta mala, tussi va-

lida, qua ejiciebatur gluten valde tenax, afficiebatur, respiratio erat laboriosa, anxia.

Indicatis in tali casu medicamentis ad 26. Aprilis usus est, quibus & tussis lenita & respiratio liberior reddita, manente eadem dolorum intensitate & artuum immobilitate, ut neque se erigere, neque solus comedere posset.

Dedi illi extracti aconiti gr. j. per diem cum saccharo, inde citum levamen habuit, & prima Maii brachium, licet cum dolore, jam aliquantulum movere poterat.

Sexta Maii aliquis motus quoque in crus rediverat, & dolores ubique sensim leniores fiebant, æger sat diu in lecto sedens manere poterat. Somnus antea valde inquietus, nunc pacatus ad 4. 5. horas noctu protrahebatur, & interdum etiam subinde dormiebat, appetitus erat bonus, sitis nulla, & naturales excretiones bene procedebant.

Omnia posthac sensim in melius mutata sunt. Initio Junii omnes dolores evanuerant, senex fere integrum diem extra lectum transigebat, libero omnium artuum usu gaudens.

Continuavit eandem extracti aconiti

dosin sumere usque ad 14 Junii & 17. ejusdem sanus & robustus ex nosocomio discessit.

CASUS SEXTUS.

OPERARIUS 65. annos natus, 4 Junii 1767. ad nos delatus est.

Elapsus erat annus, ex quo grave quod gestabat, onus, dum illud deponere vellet, in pedem ipsius sinistrum ceciderat, & tres pedis digitos vulneraverat.

Hæc vulnera emplastro quodam applicato brevi coaluerunt, revertentibus frequenter acutissimis doloribus, a digitis pedis secundum externam cruris & femoris partem ad os sacrum usque protractis, hujus artus usum valde difficilem reddentibus, quare pauperculus senex necessaria sibi laborando suppeditare impotens, mendicare coactus est.

Initio Junii a custodiis captus est, in locum ubi asservantur pauperes deducendus; inde valde terrefactus omnium artuum motu privatus est, antiquis doloribus illum diu noctuque cruciare continuantibus. Tussis frequens inanis erat,
pulsus

De Aconito & Hyoscyamo. 361
pulsus autem, respiratio & functiones
naturales sat bonæ.

Extracti aconiti gr. j. per diem statim
incoepit sumere & simul decocto emol-
lienti usus est.

Duodecima Junii jam solus ex lecto
surrexit, & baculo adjutus utcumque
incedere potuit.

Perrexit iisdem uti usque ad initium
Julii, & septima ejusdem perfecte sanus
dimissus est.

CASUS SEPTIMUS.

SUTOR 21. annorum, circa festa nata-
litia anni 1766. subito validis lumborum
doloribus correptus est, nec potuit am-
plius laborare; dolores subinde in ver-
tebris lumborum orti & in os sacrum
propagati ita itendebantur, ut per plura
minuta antrorsum incurvatus nullo modo
se movere posset.

Delatus est ad nostrum nosocomium
28. Maii 1767. postquam jam multa
ipsi applicata fuerant remedia.

Inveni epigastrium & hypochondrium
sinistrum valde elata, dolentia: alvus
jam a longo tempore valde tarda; dolo-
res ab osse sacro ad vertebrae dorsales

Collin Pars II. Tom. II. Q

usque tanti erant, ut æger se movere non posset.

Medicamentis leniter purgantibus ad septimam Junii usque absque levamine usus est : dein taraxaci, graminis radicum saturatissimi decocti, cui dr. ij. salis polychr. &c. additæ erant, quotidie lib. j. sumpsit.

Sub hujus usu hypochondrium & epigastrium collapsa, mollita sunt, & in his dolores cessaverunt : furentes autem evaserunt in vertebriis lumborum & osse sacro.

Decima quinta Junii extracti aconiti gr. j. ipsi per diem dedi & decoctum radicis salab.

Sensim ita remisere dolores, ut 12 jam solus se erigere & in lecto sedere potuerit.

25. E lecto surrexit, & sat facile incedere potuit : appetitus in initio deletus nunc magnus erat : reliquæ functiones bonæ.

Extracto Aconiti usus est ad tertiam Julii, & septima ejusdem exivit perfecte sanus.

Plura de hoc medicamento scribere supervacuum duco : cum propria experientia me docuerit, omnes, qui illo utuntur, in morbis, in quibus illud

De Aconito & Hyoscyamo. 363
commendavit magnificus *Storck*, summam in his morbis curandis felicitatem experiri debere.

Licet in nunc relatis casibus tantum ad granum unum exhibuerim, in magis rebellibus morbis ad gr. ij. iij. iv. exhiberi potest.

Prodest in omnibus morbis, ubi viscida lymphæ obstructions causat: sic frater meus in hac celeberrima universitate anatomiae professor pertinacissimas febres quartanas, omnibus medicamentis & ipsi cortici rebelles hoc medicamento ruri curavit.

Hyoscyami virtutes a magnifico archiattrorum comite Antonio *Storck* in nervorum affectibus laudatas frequenter in ægris confirmatas vidi.

Ut tamen brevius sim, tantum unum casum notatu dignissimum referam.

Femina 52. annos nata, prima Junii anni 1770. ad nostrum nosocomium ex domo castigatoria defertur.

Illuc ob debita ab aliquo tempore deducta in magnum mœrorem lapsa, semel, bis, quandoque ter per diem valde convellebatur; noctu ex lecto surgebat somnambula per mediam horam & ultra, dein in lectum sola se iterum componebat, hocque in una

nocte sæpius : sat plenus, fortis, apyretos pulsus erat ; respiratio naturalis, appetitus multus ; sitis frequens ; alvus tarda ; urina sana ; habitus corporis sat torosus, coloris naturalis ; quædam in epigastrio & hypochondrio dextro observabatur tensio ; vires sat magnæ.

Statim vena ipsi secta fuit, unde sanguis sat bonus eductus : dein variis solventibus, purgantibus, nervinis, anti-hysteriis &c. incassum tentavimus usque ad initium Februarii anni 1771. ægræ levamen adferre : omnia symptomata immutata permanferunt : imo epigastrium & hypochondrium dextrum multo tumidiora, dura, ab attactu dolentia evaserunt : ægra multum emaciata & debilitata fuit.

Post optima diu secundum indicationem absque bono effectu diligenter adhibita medicamenta, vix spes curationis superesse videbatur : nihilominus tamen extracti hyoscyami gr. xij. per diem ægræ 9. Februarii 1771. dare incoepi.

Hæc dos usque ad 14. continuata nullam mutationem adferebat : quare ejusdem medicamenti scr. j. per diem dabatur.

20. Februarii convulsiones de vehe-

mentia & duratione sua multum amiserant; jam binas noctes tranquille dormiverat; epigastrium & hypochondrium molliora; alvus solito liberior, & reliquæ functiones sat bonæ.

Data sunt ipsi medicamenti gr xxiv. per diem & 26. dr. ℞.

Convulsiones sensim rariores factæ sunt, & circa finem Martii tantum omni secundo, tertiove die illam invadebant; lenes erant, & vix per tres quadrantes horæ durabant, quibus finitis ægra sibi præsens erat, cum antea post paroxysmum ultra horam quasi maniaca esset: raro amplius noctambulam agebat; epigastrium & hypochondrium fere naturalia; bis, ter, subinde quater in die alvum pultaceam, mollem, varii coloris toto mense Martio deposuit, & reliquæ functiones naturaliter peractæ: vires augentur; carnes corpori sensim renascuntur: continuat eadem medicamenti dosi uti.


Usque ad medium Aprilem aliquoties adhuc adfuit paroxysmus convulsivus & noctu inscia deambulavit; postea autem nihil amplius de priori morbo apparuit.

Initio Maii cum epigastrium & hypochondrium nihil amplius morborum præ se ferrent, & alvus liberalior esse conti-

nuaret, tantum dedi ægræ ejusdem
medicamenti gr. xij. per diem: ut si quæ
adhuc laterent viscerum obstructions,
sensim integre tollerentur.

Ægram in nosocomio servavi usque
ad 20. Junii: partim ut effluxu hujus
temporis spatii securus fierem de per-
fecta curatione; partim etiam ut vires
& carnes decursu longi morbi perditas
magis recuperaret.

Missum tamen fecimus sub finem
Maii medicamenti usum, & 20. Junii
sanam, robustam & torosam feminam
ex nosocomio dimisimus; pulcherrimum
testimonium magnarum extracti hyos-
cyami virtutum nobis relinquentem.



CAPUT TERTIUM.

D E

POLYGALÆ AMAR. RADICIS

Contra suppurationem Pulmonum, & Phthysin pulmonalem usu.

CASUS PRIMUS.

DELATA fuit ad nostrum nosocomium 12. Augusti anni 1760. femina 60. annos nata, a sesqui-anno sputa purulenta habens, quæ, dum ad nostrum nosocomium deferebatur, frequenti tussi ejiciebantur copiosa, flavescentia, tenuia, & jam a tribus mensibus ascite laborabat. Per totum mensem Augusti lenia medicamenta expectorantia simul & diuretica cum aliqua ascitis imminutione sumpsit; continuabant autem sputa ejusdem notæ copiosissima prodire, & pulsus omni vespere febrilis fiebat, & noctes inquietæ erant.

Prævidebam, etiamsi bona fortuna

ab hydrope curaretur ægra, illam tamen cum tanta pulmonum suppuratione non diu supervicturam: hinc statui polygalam in illa experiri, præcipue cum inde apud plures urinam majori copia excerni vidissem.

Prima ergo Septembris incoëpit decocto N. 9. uti, & vespere ad somnum conciliandum syr. diacod. unc. j. sumpsit: appetitus erat tunc paucus, & ægra adeo debilis: ut nec extra lectum sedere posset.

Quarta Septembris sputa ejusdem quidem coloris erant: verum multo minus tenuia: tussis facilior: noctes magis tranquillæ: urinæ rubellæ cum nubecula innatante, sat copiosæ excernebantur: alvus naturalis & appetitus melior.

Undecima Septembris sputa, minori copia reddita, fere alba erant, optimæ consistentiæ: tussis erat facilis & minus frequens: respiratio multo liberior: insurgabant vires, & moles abdominis non augebatur.

Decima sexta Septembris appetitus sensim sub usu polygalæ renatus, ita auctus erat, ut de fame conquereretur: quare majorem ipsi ciborum eupetorum copiam concessimus.

Continuavit eandem medicamentido-
sin sumere usque ad vigesimam Septem-
bris, qua sputa sensim minuta fere integre
emanferant ; tussis autem erat validior ,
frequentior , ægram fatigans.

Missum fecimus polygalæ decoctum ,
& illius loco dupla dosi decocti radicis
salab. usa est : quod exhibito simul ves-
pere leniparegorico tussim brevi lenivit ,
expectorationem facilem reddidit ; sputis
tamen vix quartam partem eorum , quæ
expectorabantur dum ad nos venit ,
æquantibus.

Vigesima sexta Septembris denuo in-
cœpit decocto polygalæ uti , & syrupo
althææ pro linctu.

Rara post hæc fuit tussis & facilis ,
sputa pauca facile prodierunt , & omnia
ita sensim in melius mutata sunt , ut
duodecima Octobris & sputa & tussis
omnino disparuissent , relicta respira-
tione libera.

Moles abdominis sub usu polygalæ
non fuit aucta : verum quia inde integra
aquarum evacuatio sperari posse non
videbatur , aliis lenibus diureticis hydro-
pem aggressus sum , quæ sub finem
Octobris disparuerat.

Sumpsit dein femina per aliquod

tempus medicamenta leniter roborantia,
& sub finem Octobris perfecte sana &
robusta ex nosocomio dimissa est.

CASUS SECUNDUS.

JUVENIS 24 annorum, initio Octobris
1760. ad nos deferebatur: ante sex
septimanas dolore acuto, punctorio la-
teris dextri & tussi frequenti, qua sputa
glutinosa, difficilia educebat, correptus
fuerat; a quindecim diebus vespere &
noctu valde calebat; tussis frequentior,
vehementior erat, unde lateris dolor
multum exacerbabatur; urina ruffa;
alvus tarda; sudores omni nocte copiosi.

Vidit illum mecum, primo die quo
in nosocomio decubuit, magnificus do-
minus *Storck*, cui felicem prioris ægræ
cûram polygala peractam retuli, &
intentionem meam de eadem huic ægro
danda communicavi.

Erat æger valde emaciatus, sputa
purulenta, alba, copiosa reddebat, &
magnus in pectore stertor continuus au-
diebatur; pulsus erat febrilis; sitis ta-
men non magna, & levia alimenta li-
benter assumebat.

Tertia Octobris incœpit decoct. N. 9.

De Polygalæ amaræ Rad. &c. 371
uti, ac simul dabatur ipsi syr. diacod.
oxymell. squill. aa. unc. j. β. ut su-
binde parvum cochleare fumeret.

Urina solito copiosior prodiit, sputa
copiosiora reddidit, noctesque fuisse
tranquilliores.

Octava Octobris narrabat nobis gau-
dens, dum illum mane invisebamus, se
noctem sine sudoribus transegisse, ac
quater noctu urinam sat copiosam misisse;
respiratio multo liberior erat, & stertor
minutus; alvum habebat coctam, na-
turalem.

Binas sequentes noctes pariter sine
sudore transegit, & febricula vespertina
lenior erat: nocte tamen decimæ diei
Octobris ad undecimam iterum copiose
sudavit: postea autem sudor rarus fuit,
isque non copiosus.

Continuavit æger sputa minus copiosa
vario diei tempore facile ejicere usque
ad vigesimam primam Octobris, qua
die tantum matutino tempore moderata
quantitate sputa reddidit; reliquo vero
diei tempore fere integre a tussi liber
fuit; febricula vespertina caruit; noctu
optime dormivit, ac mane denuo sputa
optime cocta per binas circiter horas
tussi facili minime dolente rejecit.

Continuavit æger eadem medica-

menti dosi uti; tussis sensim & sputorum excretio ita minuta sunt, ut initio Novembris vix de illis signum superesset.

Gaudebat magnificus *Storck* mecum de felici non minus quam celeri hujus ægri cura.

Polygala tamen usus est usque ad medium Novembris; deinde omni medicamento abstinuit & tantum cibis aptis ægrum aluimus, quibus intra quindecim dies aliqua corpori torositas restituta est, & vires ita increverunt, ut potuerit ex nosocomio discedere.

CASUS TERTIUS.

DELATUS fuerat ad nostrum nosocomium vir 30. & aliquot annorum initio Octobris anni 1760. cum gravissima peripneumonia neglecta, quæ non obstantibus omnibus artis auxiliis in suppurationem magnam abivit: omnia usitata in his casibus medicamenta adhibui usque ad vigesimam Octobris, quæ cum materies purulenta æque copiosa in pulmonibus generaretur, sudoribus æger sæpius difflueret, & febricula fere continua cum horripilationibus vespere exacerbata continuaret affici, consilio

De Polygalæ amaræ Rad. &c. 373

habito cum perillustri ac magnifico *Storck*, polygalam illi exhibui, & lac cum hordei decocto: erat enim valde debilitatus & emaciatus.

Primo & secundo die quibus hoc medicamento usus est, nullam mutationem advertimus; tertio vero die minor fuit sputorum copia, & respiratio facta est laboriosior & noctem habuit inquietam, unde cum vigesima quarta Octobris permanerent hæc symptomata, præter polygalam & lac quater de die sumpsit pulv. expector. dr. j. Hic pulvis constabat sacchari candi albi unc. kerm. mineral. gr. xv. stib. diaph. o. abl. dr. j.

Hoc modo expectoratio æque copiosa intra 24 horas adfuit ac antea & respiratio faciliior facta est.

Vigesima septima Octobris cum sputa admodum copiosa & tenuia ejicerentur subflavescentia, abstinuit a kermes mineralis usu & decocto. N. 9. laudan. liq. syd. dr. β. addita est: toto die in eodem fere statu permansit, & noctem sat pacatam habuit.

Vigesima octava mane sputa eadem erant & æque copiosa ac die præcedenti; tussis tamen ægrum minus defatigabat: nulla hucusque in sudoribus

mutatio observabatur, nocturni enim erant æque copiosi, & subinde quoque per diem erumpebant; permanebant horripilationes & febricula.

Prima Novembris sputa mane ejecta magis alba, spissiora & minus copiosa erant; æger noctu bis purgatus fuerat, & minus sudaverat: diem sine horripilationibus transegit, & febricula vespertina lenis fuit.

Ab hoc tempore omnia sensim magis magisque in melius mutata sunt: perrexerit lacte uti & decocto. N. 9. omissa tamen, quæ antea addita fuerat laud. liq. Syd. dosi: tussis enim erat lenis & sputa facile prodibant, ac æger somno pacato per plures horas noctu, subinde quoque etiam diurno tempore reficiebatur.

Nona Novembris sudores tam nocturni quam diurni fere integrè evanuerant; sputa erant pauca, bona: & respiratio libera; tussis rara; appetitus autem admodum erat paucus, & de debilitate ventriculi conquerebatur.

Licet omni die alvum coctam, mollem haberet, sumpsit rhei elect. dr. j. ut collecta forte in ventriculo materia eliminaretur: pluries inde purgatus est,

De Polygalæ amaræ Rad. &c. 375
& dato vespere paregorico noctem
tranquillam habuit.

Sequenti die denuo incœpit polygalæ
uti, minorem autem lactis & decocti
hordei copiam hauriendam accepit.

Sensim rediit appetitus; sudores &
febris emanerunt, & sputa tussisque
ita omni die minuta sunt, ut decima
octava Novembris omnino disparuissent,
& respiratio liberrima: perrexit tamen
adhuc polygalæ uti: verum sub conti-
nuato illius usu vigesima quinta No-
vembris de magna siccitate & pectoris
constrictione conquestus est, quæ per
aliquot dies sumpto decoct. rad. salab.
evanuerunt.

Mansit æger in nosocomio usque ad
medium Decembris & discessit sanus.

CASUS QUARTUS.

FEMINA 47. annorum, vigesima sexta
Octobris ad nos venit, narravitque se
ante sex menses magna febre cum siti,
tussi & pectoris anxietate laborasse, a quo
tempore tussi molesta semper affecta
erat, sputa purulenta sæpe admodum
difficilia reddebat, & sæpe ob nimiam
tussis vehementiam ad vomitum coge-

batur : aiebatque se a novem mensibus sudoribus nocturnis copiosis diffluere : valde emaciata erat ; sputa erant tenuia, & febre continua febricula afficiebatur.

Medicamentis demulcentibus, paregoricis leniter expectorantibus & lacte cum decocto hordei usa est usque ad decimam Novembris, a quibus tussis facilior reddita est : febricula per diem minus sensibilis fuit, vespertino tempore sat magna, manebant noctes inquietæ, sudores nocturni, macies : & vires sensim magis collabebantur : unde decima septima Novembris ad decoct. N. 9. deveni : ægra lacte cum decocto hordei continuavit uti ; vespere ad somnum faciliorem conciliandum massæ pilul. de cygnocloss. gr. vj. quotidie ipsi exhibita fuerunt : diæta fuit ex hordeo, oriza, levibus farinaceis & oleraceis jusculo incoctis.

Hac methodo sensim ita mutata est, ut initio Decembris appetitus, antea admodum paucus, optimus foret ; tussis rara ; sputum bonum, paucum, facile prodeuns ; noctes sine paregorico tranquillæ ; sudores nocturni nulli, & vires multo meliores.

Polygala in hac femina in initio curæ

De Polygalæ amaræ Rad. &c. 377

urinæ sat magnam copiam pepulit, non tamen omni die æqualem, & alvus vix non omni die sat bona secessit.

Circa medium Decembris ægra iisdem continuans uti, sputa admodum pauca habebat: de pectoris siccitate & constrictione conquerebatur, & tussis erat frequentior, dolorifica.

Abstinuit tunc decocto polygalæ, & usa est decocto rad. salab. cum laudano: continuavit lac cum decocto hordei mixtum potare.

Hac methodo omni modo brevi levatum est pectus: siccitas enim & constrictionis vigesima secunda Decembris evanuerant: minus frequenter & sine dolore tussiebat, & sputa paulo copiosiora, quam ante hujus decocti usum, facile prodibant.

Dedi ipsi tunc linctum emollientem, & denuo sumpsit solitam decocti polygalæ dosin: sic continuavit usque ad decimam tertiam Januarii anno 1761. de die in diem in melius mutabatur, ita ut decima Januarii cum jam per plures dies & sputa & tussis emanassent, polygalæ usui supersederimus. Nec ægra alio medicamento indiguit, cum vix in ulla functionum aliquid deesse videretur: supererat tamen macies & corpo-

ris debilitas, licet multo minor quam antea : poterat enim sat diu per cubiculum ambulare.

Appetitu optimo gaudebat : hinc data ipsi decima octava Januarii rhei electi dr. j. decima nona ejusdem mensis incoepit carnibus tenerioribus vesci.

Hac die adfuit in nostro nosocomio doctissimus Dominus *Hasenohrl*, nosocomii Hispanici Physicus, cui hanc ægram ostendi, modumque, quo hanc feminam & alios ægros curaveram, enarravi : miratus est bonum polygalæ effectum, & brevi post illam scripto laudavit.

Ægram in nosocomio retinui usque ad vigesimam Februarii, cujus temporis spatium bona diæta ita resecta est, ut robusta, torosa & sanissima ad suos redierit, illam ab hoc tempore sæpius vidi optime valentem.

Hujus curæ testis fuit magnificus *Storck*, qui ægram vidit, dum polygala incoepit uti, & examinavit antequam ex nosocomio discederet.



CASUS QUINTUS.

PUELLA 14. annorum, vigesima quinta Januarii anni 1761. ad nos venit. Hæc ante 13. menses peripneumonia laboraverat, a quo tempore tussis residua semper increverat, qua sputum purulentum difficile ejiciebatur: sputis autem ingens puris copia jam a tribus mensibus reddebatur & a tribus septimanis copiosis sudoribus nocturnis diffluebat ac valde emaciabatur: febricula fere continua aderat, vespere exacerbata, & tussis frequens, fere inanis, noctes admodum turbulentas reddebat.

Usa est decocto N. j. usque ad sextam Februarii; lac quoque cum decocto hordei ipsi datum est pro potu, & omni vespere unc. j. syrup. diacodii: verum inde non multum levata est.

Sexta Februarii incoepit quinquies per diem decoct. N. 9. unc. j. sumere. Dicta diacodii dosis omnis vespere ipsi dabatur: & continuavit lac cum decocto hordei potare.

Sensim respiratio liberior facta est: tussis rarior & lenior evasit, & sputorum copia ita minuta est, ut vix sextam par-

tem eorum, quæ antea ejiciebat, adæquarent; noctes pacatiores erant, & fomno reficiebatur; bonum incipiebat habere appetitum; manebant tamen sudores nocturni & febricula vespertina.

In methodo medendi nihil mutavimus, & perrexerunt phthyseos symptomata sensim magis magisque minui, ac vigesima sexta Februarii incoepit ægra urinam copiosiore mittere & alvum frequentiore habere, eo cum levamine, ut sequenti nocte sudores multo pauciores fuerint, qui nocte quartæ diei Martii ad quintam ejusdem mensis diem penitus emanferunt & raro postea noctu sudavit; urina vero omni die sat copiosa prodiit.

Emanente sudore nocturno, sputa adhuc pauca, præcipue matutino tempore facile ejiciebantur: febricula vespertina sensim disparuit & decima Martii nulla amplius observabatur; vires ægræ increscebant; pectus liberum erat, & tussis tam matutino quam reliquo diei tempore fere integre fiebat.

Decima quarta Martii polygala abstinuit, cesserant enim sputa & tussis, & tantum studuimus bona diæta vires reficere & corpus emaciatum nutrire.

De Polygalæ amaræ Rad. &c. 381

Manſit apud nos uſque ad initium Aprilis, quo tempore corpori carnes renaſcebantur; & vires ita auctæ erant, ut potuerit ad parentes redire, apud illos bonis alimentis carnes corporis deperditas ſperans ſe citius refarcituram.

CASUS SEXTUS.

FEMINA 40. annorum, ante quatuor annos gravi peripneumonia laboraverat, a qua utcumque curata ſolitos labores denuo perficere potuerat: ab eo autem tempore ſæpius pus modo majori, ſubinde minori quantitate ſputis reddidit, & ab anno ſudores nocturnos ſæpius paſſa eſt, qui jam a ſex hebdomadis, dum noſocomium ſecunda Februarii anni 1761. intravit, omni nocte illam valde debilitabant.

Dum illam curandam ſuſcepi, colorem habebat cachecticum: corpus tamen adhuc aliquam torofitatem ſervabat; frequenti tuſſi ſputa copioſa ejiciebat tenuia, maxima parte ſubflava; febricula laborabat, quæ omni vespere exacerbabatur.

Statim primo diei incoepit decoct.

N. 9. uti, & vespere syr. diacod. unc. j. sumpsit : diæta similibus ægris conveniente usa est.

Per quatuor primos dies quibus hoc medicamentum assumpsit, continuavit copiosissimis sudoribus omni nocte diffluere : urinam tamen, ut aiebat, majori copia mittere debebat quam antea : cæterum in reliquis nulla mutatio observabatur.

Noctæ vero noni diei Februarii ad decimum, & decimi ad undecimum sudores penitus emanferunt ; sputorum copia minuta est ; tussis minus frequens fuit ; respiratio liberior : urina tamen hisce diebus minus copiosa prodiit : verum alvus copiosa bis nyctemeri spatio deposita fuit : 14. 15. 16 & 17. hujus mensis die solito majorem urinæ copiam misit, & sudores continuarunt emanere : tussis & reliqua in eodem statu permansere.

In eadem medendi methodo continuavimus toto mense Februario ad septimam Martii usque, quo toto tempore tantum binis noctibus sudavit, & febricula vespertina lenis fuit ac fere integre disparuit.

Septima Martii sputa admodum pauca prodierunt ; tussis quidem non erat fre-

De Polygalæ amaræ Rad. &c. 383
quens; sed magis anxia erat ægra, &
tussiendo in variis pectoris partibus do-
lores conquerebatur: unde polygala
abstinuit & decocto N. 1. usa est.

Usum hujus decocti continuare de-
buimus usque ad decimam octavam
Martii, antequam pectus & respiratio
libera essent, & a doloribus sub tussi
excitatis penitus immunis foret.

Sub hujus decocti usu sudores noc-
turnos aliquoties habuit, & sputa paulo
copiosiora prodierunt, ac vesperi dari
debebat paregoricum, hoc enim neglec-
to nox inquieta, insomnis sequebatur.

Decima octava Martii denuo incoepit
polygalæ decocto uti, quod sine in-
commodo tulit: toto mense Martio
excreta fuere naturalia, appetitus, qui
sub usu decocti N. 1. valde minutus
fuerat, brevi optimus evasit, & liben-
tissime cibos ipsi oblatos assumpsit.

Initio Aprilis cum sputa tantum
pauca matutino tempore ejiceret, me-
diam solummodo dosin decocti poly-
galæ sumpsit, & cum aliquam in pec-
tore constrictionem conquereretur, simul
usa est decocto radicis salab. Sic conti-
nuavit per quindecim dies: quo tem-
pore sputa, tussis & constrictionis in pec-
tore sensus sensim integre disparuerunt:

ægra jam initio hujus mensis incoeperat præter alia levia alimenta quibus ab initio curæ vescebatur, teneriores carnes comedere.

Color cachecticus disparuit, & brevi vires tantas recuperavit, ut sub finem Aprilis nosocomio potuerit sana egredi.

CASUS SEPTIMUS.

DUODECIMA Januarii 1762. ad nostrum nosocomium delata est vetula 63. annorum a pluribus mensibus valde difficili & anxia respiratione & tussicula inani affecta. Declinante Decembri anni 1761. arthritide corrupta fuerat quæ initio Februarii subito intumescente crure dextro disparuit, manente respiratione æque læsa ac ante: erat enim, dum ad nos delata est, difficilis, anxia, frequens; tussis subinde sat valida; inanis; febricula continua, vespere aucta; decubitus in latera impossibilis; appetitus nullus; sitis pauca; alvus & urina naturales.

Medicamentis emollientibus, aperientibus, pectoralibus, leniter diaphoreticis & paregoricis statim incoepit uti.

Tumor

De Polygalæ amaræ Rad. &c. 385

Tumor cruris brevi disparuit & vigesima Januarii mane prægressa valida tussi magnam puris tenuis, flavi copiam incoepit ejicere, cujus quantitas vespere lib. β. superabat: perrexit noctu multum tussire & similia sputa reddere.

Eadem medendi methodus usque ad octavam Februarii continuata est. Lac cum appeteret, & reliqua alimenta nausearet, dedimus ipsi quotidie lactis mensur. β. cum anatica decocti hordei & rad. bardanæ, &c. parte.

Octava Februarii cum sputa æque malæ notæ ac primis diebus & valde copiosa continuarent esse, incoepit decocto N. 9. uti, & perrexit lac cum hordei decocto haurire & vespere paregoricum assumere.

Tertia die, qua hoc medicamento usa est, incoeperunt sputa spissiora fieri, minus flava, facilia; tussis lenior; alimenta libentius assumpsit: somno tranquillo & protracto noctu incoepit refici; alvus & urina naturales erant.

Continuarunt omnia sensim in melius verti, & decima septima Februarii tussi & sputorum copia valde minutis paregorico non amplius indiguit, respiratio & pulsus erant naturales, decubitus in omnem partem liber.

Post vigesimam sextam Februarii vix amplius adfuit tussis, & tantum matutino tempore sputa aliqua optime notæ rejiciebantur, ægra incœpit subinde ex lecto surgere.

Quarta Martii & sputa tussis penitus cessarunt & maximam diei partem extra lectum transegit.

Postea sola diæta feminæ vires ita restauravit, ut initio Aprilis sana ad suos rediverit.

CASUS OCTAVUS.

JUVENIS 19 annorum, quarta Maii anni 1763. ad nos venit. Jam a novem mensibus tussi afficiebatur frequenti, qua in initio pauca sputa valde difficile ejiciebat, aiebat autem a decem diebus sputa copiosa sat facile, excerni, quæ examinata vere purulenta deprehendebantur; a tribus hebdomadis sudores nocturnos habebat; omni vespere febricitabat & multum emaciebatur.

Data sunt ipsi medicamenta pectoralia & expectorantia, ac simul lac cum potu ordinario hauriendum; inde sputa facilia reddebantur.

Sputis autem & sudoribus copiosis val-

De Polygalæ amaræ Rad. &c. 387
de debilitabatur, nec febricula hectica
inde minuebatur; unde decima quinta
Maii datum est ipsi decoct. N. 9. &
continuavit lacte uti.

Hoc modo effectum est, ut intra sex
dies respiratio facilior fuerit, sputa pau-
ciora, tussis minus frequens, & sudores
omnino emanferint, febricula quoque
hectica minuebatur; in hoc tamen ægro
diuresin a polygala moveri non obser-
vavi, & alvus mansit naturalis.

Sensim omnia in melius mutata sunt,
& initio Junii tantum pauca sputa ma-
tutino tempore optimæ notæ facili tussi
reddidit.

Sumpsit tunc tantum mediam decocti
polygalæ dosin & aptis alimentis nutri-
tus est.

Hac methodo brevi cessaverunt sputa
& tussis, & vires bonas tam cito acqui-
sivit, ut initio Julii potuerit dimitti sa-
nus.

CASUS NONUS.

FEMINA 40. annos nata, vigesima Maii
anni 1763. ad nostrum nosocomium de-
lata est, trigesima quinta die postquam
pleuropneumonia correpta fuisset, quæ

in suppurationem post undecimum morbi diem, abiit, 15. morbi die incoepit sputa purulenta tussi ejicere, & paucis diebus elapsis incoepit sudoribus nocturnis diffluere, qui adhucdum continuant.

Pus album bonum sputis reddit copiosum, respiratio est brevis, celeris, frequens, febris multa, vespere exacerbata; appetitus nullus, sitis sat magna, tussis frequens, urina rubra, alvus laxa, semel bis de die secedens; habitus corporis emaciati & multum debilitati pallidus, decubitus semi-erectus.

Per quinque dies emollientia expectorantia sumpsit, & inde respiratio utcumque levata est, verum copiosis sudoribus nocturnis difflebat ægra, & incoeperunt sputa, quæ copiosissima prodibant, tenuiora fieri, quare ad polygalam confugi.

Vigesima quinta Maii incoepit decocto N. 9. uti, ac simul mensuram mediam lactis cum anatica decocti hordei radic. bardanæ &c. parte quotidie hauriendam habuit, & ubi tussis nimis defatigans erat, syrupo diacodii leniebatur.

Per octo dies hoc medicamento usa est sine sensibili in melius mutatione,

De Polygalæ amaræ Rad. &c. 389

licet urinam solito copiosiore mitteret: tussis enim, sputa, sudores, febris eadem erant, subinde tamen somno tranquilliori reficiebatur.

Nocte vero primæ Junii ad secundam ejusdem mensis diem multo minus sudavit, & copiosiore urinam misit.

Sudores cito minuti sunt, minuta est febricula vespertina: sexta Junii penitus emanferunt sudores, & febris admodum lenis evasit.

Tussis erat tunc minus frequens, facilis & sputa bonæ consistentiæ multo pauciori quantitate reddebantur, appetitus quoque melior erat, & alvus ligata, urina naturalis.

Decima quarta Junii vix tussivit, pulsus tota die naturalis permansit.

Decima quinta tantum pauca sputa mane ejecit.

Solam tunc mediam dosin decocti N. 9. sumpsit, & vigesima quinta Junii penitus ab illo abstinuit.

Hæc femina brevi vires recuperavit, & circa finem Julii ex nosocomio exivit.



CASUS DECIMUS.

PUELLA 23. annos nata, laxi temperamenti, cui menstrua & tempore & copia semper fuere irregularia, toto mense Februario anni 1764. anxia fuit, dolores pectoris urentes fere continuos patiens, frequenti affecta est tussi, in initio sicca, dein sub finem Februarii humida, qua glutinosa pure mixta cum magna difficultate incœperunt excerni, appetitus toto hoc tempore languidus, sitis multa, & circa vesperras & de nocte multum calebat, post mediam noctem modo plus, modo minus sudans.

Decima Martii ad nos delata est.

Medicamentis aperitivis, emollientibus, paregoricis usque ad septimam Aprilis usa est, inde respiratio vix emendata est; sputa valde copiosa, tenuia, purulenta, flavescentia tussi valida & frequenti ejiciebat, febris hectica corpus continuabat depasci, & omni nocte sudoribus diffuebat, unde valde debilitabatur, & macies de die in diem magnos progressus faciebat.

Septima Aprilis decoctum polygalæ ipsi præscripsi, & lacte cum decocto

De Polygalæ amaræ Rad. &c. 391
hordei, quod jam a 15. diebus sumebat, continuavit uti, vespere pargorico.

Decima septima Aprilis noctem absque sudore transegit, sputa erant alba, spissiora æque tamen copiosa ac ante, & tussis frequens, sæpe valde vehemens interdium ægram valde defatigabat, sitis tamen erat minor, & febris notabiliter remiserat, urinæ excretio ab incœpto polygalæ usu copiosior, quam ante.

Præter decoctum polygalæ ægræ decoctum salab. cum laudano præscripsi, ut ter de die vasculum sumeret.

Inde tussis statim prima die mitior, minus frequens facta est, & sputa bonæ notæ facile excreta sunt.

Posthac sputa sensim minuta sunt; tussis sensim rarior evasit, & 25. Aprilis omnis febris etiam vespertinæ expertem ægram inveni.

Præfatis medicamentis usa est usque ad decimam Maii, qua missa illa fecimus, sputis cessantibus, tussicula valde rara, respiratione liberrima & omnibus functionibus sat bonis, lactis tamen usus continuatus est.

Decima nona Maii tussis videbatur recrudesce velle, licet quoad reliqua optime haberet ægra, quare datum est

illi decoctum emolliens & syrupus diacodii pro linctu.

Hæc continuata sunt usque ad 24. Maii, qua tussis integre cessaverat, postea omni medicamento abstinuit, & quinta Junii perfecte curata ex nosocomio exivit.

CASUS UNDECIMUS.

PUELLA viginti trium annorum, cui menstrua nunquam debite fluxerant, & initio anni 1763. penitus emanferant, 24. Februarii anni 1764. ad nos delata est.

Ab anno tussi frequenti, subinde sat valida, ut plurimum sicca, pectoris dolorifica constrictione sub tussi aucta vexabatur, sanguinei temperamenti puella valde emaciata erat, debilis, respiratio accelerata, anxia, pulsus omni vespere febrilis, & sæpe noctu sudavit; somnus erat sat protractus, debilitans, appetitus nullus; urina pauca, rubra, sedimen lateritium deponens; sputa, quæ laboriosa tussi ejiciebantur, purulenta erant, paucò glutine tenaci mixta.

Pro medicamento datum est illi decoctum rad. salab. cujus quater de die

De Polygalæ amaræ Rad. &c. 393
unc. iij. sumpsit, & infusum ex herbis
pectoralibus aliquoties in die tepide po-
tandum.

His per decem dies continuatis, tussis
mitior, facilior facta est, & sputa puru-
lenta, copiosa incoeperunt excerni :
urina naturalis evasit.

Decima septima Martii cum & pec-
toris dolorifica constrictio cessasset, res-
piratio sat bona, facilis esset, & sputa
copiosa, purulenta, subflava sat facile
excernerentur, sudores autem nocturni
valde copiosi essent, & febricula ves-
pertina ægram continuaret, ut ante,
invadere, decoctum polygalæ ipsi dedi,
& pro linctu syrupum diacodii.

Omnia ita sensim in melius mutata
sunt, ut trigesima prima Martii tussi
multo rariori & faciliori quam ante,
vix mediam priorum sputorum partem
ejiceret; hæc quæ optimæ notæ erant,
respiratio libera, febris vespertina so-
lito minor, nocturni sudores multo pau-
ciores, urinæ tamen copia non videba-
tur major, quam ante, animus ægræ
erectus, alacris erat, & appetitus re-
nascebatur.

Sic continuantes ad tertiam Maii us-
que omnibus functionibus sensim in me-
lius mutatis, sputa integre cessarunt.

superstite modica tussi, quare usui polygalæ supersedimus, & illius loco ægra rad. salab. decocto usa est, & cum lac non amaret, aliis aptis alimentis ægram debite nutrire conati fuimus.

Vigesima nona Maii ab omni medicamento abstinuit ægra, & 12. Junii sana ad suos rediit.

CASUS DUODECIMUS.

PUELLAM 32. annos natam, prima Octobris anni 1764. in nosocomium suscepimus.

Hæc alias semper satis sana mense Julio post validos labores valde calefacto corpori frigidam multam ingesserat, ut ingentem, quam patiebatur sitim sedaret, eadem die adhuc catharro, ut aiebat, valido correpta est, & licet ipsi venæ sectio suaderetur, illam neglexit, solo infuso quodam utens.

Tussis sicca, frequenti, valida per tres septimanas laboravit, dein incoepit copiosum pus, sincerum, ut ex relatione ipsius colligere potui, sat facile expectorare; tussis tunc facta est faciliior, & pectoris dolores ac anxietas,

De Polygalæ amaræ Rad. &c. 395
quæ antea aderant, cessarunt; quare
ægra se jam in vado esse credens nihil
amplius adhibuit.

Continuante copiosa sputorum eva-
cuatione sensim valde debilitata est;
munere suo fungi non amplius potuit &
demum ad nos delata fuit.

Robustæ antea puellæ carnes erant
flaccidæ: color cachecticus, flavo vi-
ridis, puris subflavi sat bonæ consisten-
tiæ. Nichtemeri spatium unc. iv. v. tussim
sat facili expectorabat; pulsus interdum
mollis ad flaccidum accedens, apyretos,
vespere febrilis; respiratio sat libera,
tantum circa matutinum tempus sterto-
rosa fiebat, menstrua regularia & reli-
quæ functiones sat bonæ.

Statim incœpit decocto polygalæ uti,
urina solito copiosior excreta est, & sex-
ta Octobris color & consistentia sputo-
rum optima erant, videbanturque co-
pia minui.

Decima quinta Octobris febris ves-
pertina sensim antea minuta penitus
emanfit, color cachecticus in lætiores
mutabatur, carnes erant minus flaccidæ
& sputa duabus tertiis partibus minuta
erant.

Octava Novembris nihil de præterito
morbo supererat, optime valebat, hinc

a medicamento abstinuit & 13. ad sua munia rediit.

CASUS DECIMUS TERTIUS.

SUTOR 20. annorum, tussi sicca & sæpe recurrentibus pectoris urentibus doloribus a pluribus mensibus affectus, initio Julii anni 1765. incoepit sæpius per diem horripilari, copiose expectorare, noctu multum sudare.

His non obstantibus opificio suo incubuit ad finem Augusti, tunc vero præ debilitate laborare amplius non potuit, & sexta Septembris ad nos delatus est.

Valde emaciatus erat, febricula aderat continua, vespere exacerbata, respiratio anxiosa, noctu sudoribus disfluebat, tussi frequenti pus copiosum flavum tenue ejiciebat, reliquæ functiones utcumque bonæ.

Datum est illi decoct. polygalæ; urina jam prima die copia solito majori excreta est, & quarta ab usu medicamenti die sputa jam minus copiosa, minus flava & magis spissa erant, ac respiratio multo liberior.

Tam celeris fuit in hoc medicamentum

De Polygalæ amaræ Rad. &c. 397
effectus, ut quatuordecim dierum spatio
fugata fuerint omnia phthysæos sympto-
mata.

Sub usu medicamenti vires redierunt,
& initio Octobris sanus dimissus est.

CASUS DECIMUS QUARTUS.

VIR 65. annorum, a multis annis tussi
vexatus, qua subinde pauca sputa glu-
tinosa excernebat, mense Martii anni
1765. incoepit tussi vehementi & fere
continua dolorifica vexari, & paulo post
multum expectorare.

Ad nos delatus est decima Julii.

Vehementissima tussi sputorum puru-
lentorum, flavorum, tenuium ultra lib.
ß. quotidie excernebat; respiratio erat
anxia, dolens: reliquæ functiones non
multum labefactatæ.

Medicamentis pectoralibus paregoricis
usque ad 25. Julii usus est: nulla autem
in melius mutatio facta est, imo incoe-
pit vespere febricitare & noctu sudare.

Missis reliquis decoctum polygalæ
ipsi dedimus, & subinde haustum pa-
regoricum.

Sic tussis brevi lenior evasit, & sputa

alba, spissa, sensimque parciora cum facilitate excreta sunt; emanferunt febris & sudores nocturni.

Polygala perrexit uti usque ad 16. Septembris, qua cum morbus penitus sublatus esset, ab omni medicamento abstinuit, & 12. Octobris sanus & robustus ex nosocomio dimissus est.

CASUS DECIMUS QUINTUS.

FEMINA 40. annos nata, temperamenti laxi, sanguinei, cui jam a biennio menstrua irregularia erant, mense Augusti anni 1765. postquam per plures septimanas difficili respirio & tussicula sicca laboraverat, incoepit omni nocte copiosissime sudare; sputa purulenta, tenuia, variegata valida tussi ejicere, & respiratio ita anxiosa facta est ut ob metum suffocationis diu noctuque in lecto sedere cogeretur: demum expensis, quibus morbus illam exposuerat, ulterius sustinendis impar facta, 14. Martii 1766. ad nos fere moribunda delata est.

Præter prius enarrata symptomata, febris sat magna, continua, vespere aucta afficiebatur: jam a pluribus septimanis paucam urinam valde saturatam,

De Polygalæ amaræ Rad. &c. 399
biliosam , urentem mittebat ; valde
emaciata erat ; sitis multa ; appetitus
nullus ; alvus tamen naturalis ; somnus
vix nullus.

Decima quinta Martii incoepit decocto rad. poligalæ uti, & decima octava urina coloris fere naturalis absque ardore sat copiosa incoepit excerni; sputa erant facilia , copiosiora , minus tenuia ; respiratio multo facilior ; febris minor.

Vigesima secunda Martii magna sudoris nocturni imminutio ; sputorum sat bonæ notæ magna & facilis excretio ; ægra jam in dorsum & in latus sinistrum decumbere potest.

Vigesima nona Martii decubitus in omnem partem liberrimus ; respiratio naturalis ; febris omnis disparuit ; cessarunt sudores nocturni ; sputa omni notæ bona facili tussi , sensim minori copia educuntur.

Perrexit medicamento uti ad 21. Aprilis , qua cum ægra perfecte curata esset, ab illo abstinuimus, & femina initio Maii sanissima discessit.

POTUISSEM de polygala multo plures felices casus referre; sed cum omnes jam relatis analogi fuerint, & nihil novum exhibuerint, nolui repetitionibus volumen augere.

Patet ex observationibus his radicem polygalæ amaræ medicamentum esse balsamicum detergens, consolidans, roborans & simul demulcens, inter illa, quæ contra phthysin pulmonalem laudantur, facile princeps.

Equidem multum abest, ut curet omnes, curat tamen multos & etiam multis incurabilibus prodest: inveni in cadaveribus illorum qui illam ferre non potuerant, pulmonum indurationes, scyrrhositates, vel pulmones valde consumptos, circumquaque fortiter accretos: hepar, pancreas, subinde mesenterii glandulas obstructa, indurata.

In his casibus vidi cicutam cum emollientibus & minori polygalæ dosi exhibitam bonos effectus præstitisse.

Subinde dum solida nimis tensa, irritata sunt, emollientia, pægorica præmittenda, ut polygalam ferre possint ægri: subinde etiam, dum sub usu polygalæ pulmonum ulcera pro parte,

De Polygalæ amaræ Rad. &c. 401
vel integre cicatrifata sunt, tussis antea sopita recrudesceat: oritur constrictionis in pectore sensus; tunc pariter paregorica, emollientia necessaria sunt, quæ tensa relaxant; acrimoniam forte irritantem demulcent & simul bonum phthysicis valde necessarium suppeditant nutrimentum. Pacatis hoc modo turbis si sputa purulenta continuent, vel quasi suppressa redeant, polygala iterum secure adhibetur.

Absque his cautelis vel nihil efficitur, vel ægris fere æque nocetur, ac dum cortice peruviano obruuntur, quando viscera nimis tensa, irritata & obstructa sunt.

Licet in notatis modo ægrorum historiis polygalam in decocto ad unc. ij. per diem exhibuerim, sæpe, præcipue in praxi urbana, minori dosi cum effectu exhibui.

Quamvis tamen primo aspectu magna videatur dosis, attentius examinanti patebit non esse tantam; radix enim quasi lignea est, & vix aliquid medicamentosi continet: cortex vero virtute dives ab aliquot radicis unciiis detractus & exsiccatus non adeo magnum pondus æquat.

Dum cura feliciter procedit, immi-

nutionem sudorum plerumque comitatur major diuresis. An id effectus est virium medicamenti roborantium & leniter diureticarum, quo poris relaxatis debitum robur restituitur, & liquida percutim evacuari solita ad vias urinarias simul determinantur?

Certe sudores sæpe minuuntur, dum sputa eadem copia ac ante excernuntur, & antequam de incoëpta ulceris pulmonum cicatrificatione cogitari possit.

Neque ego observationem celeberrimorum virorum, qui hydropem polygala curatum viderunt, minime in dubium revoco, licet mihi in hoc morbo eundem effectum non præstiterit.

Morbi enim hujus natura valde implicata est: neque uno eodemque medicamento etiam optimo in omnibus subjectis curari potest.

Pleuritide inflammatoria affectis exhibita polygala augendo symptomata nocet: prodest autem dum in suppurationem abivit pleuritis, adhibitis cautelis prius memoratis.

Hæc planta veteribus jam nota, descripta & adumbrata fuit: cujus vulgaris sat bonam iconem depictam habet Hieronymus *Tragus*, T. I. pag. 455. *Lobelius*, ic. pag. 416. & 417. *Dodon.* Flos

De Polygalæ amaræ Rad. &c. 403
ambarualis. Pempt. 2. pag. 253. Inter
recentiores vero & vulgaris & amaræ
polygalæ nitidiorem habet iconem
Vaillant, bot. par. t. 32. f. j. 2. Verum
illorum vix non omnium definitiones
inancæ & minus sinceræ deprehendun-
tur : quare opere pretium esse duxi cu-
ratiorem fusioemque ejus exhibere des-
criptionem, ne inter collectores, ut
fieri solet, lites moveantur.

Ad hoc rite præstandum celebris Ja-
cobi *Well*, diligentissimi ad ursum
nigrum Pharmacopæi, doctissimi certe
Chimici & expertissimi Botanici opera
usus sum.

Antequam autem hæc planta definia-
tur, adnotare oportet quod celeberrimus
Linnæus in systematis naturæ, editione
duodecima reformata, viginti quatuor
species polygalæ recenseat, quas in
quatuor sectiones digessit. Nostra in
prima sectione aut fasciculo cristatarum
flore appendice penicilliformi deprehen-
ditur, & est *Polygala amara* floribus
cristatis racemosis, caulibus erectiuscu-
lis, foliis radicalibus obovatis majoribus.
Linn. & *Jacquin.* polygala procum-
bens; foliis imis subrotundis, superio-
ribus linearibus. *Hall.* hist. n. 343.

Polygala alia foliolis circa radicem

rotundioribus , flore cæruleo , sapore admodum amaro. *Bauh. pin.* 215.

Polygalæ amaræ habitus vix non idem est ac *Polygalæ vulgaris* : folia tamen radicalia illius sunt ampliora ; magis crassa , obovata ac obtusa : caules numerosissimi ad 30. & plures interdum , magisque declinati aut procumbentes , & solus sapor polygalæ nostræ amaræ magnam esse differentiam inter hanc & vulgarem convincere quemlibet potest , & impedire ne promiscue adhibeatur : vulgaris enim polygala , excepta radice vix sapida est ; prioris vero & caulis & folia adeo amara sunt , ut unicum leviter masticatum foliolum totam linguam summo amarore afficiat , qui non nisi sensim & post longam moram evanescit , ex qua ratione forte cum polygala americana , *Senega* dicta , virtute convenire potest.

Sequitur fusior polygalæ amaræ

Descriptio secundum omnes suas partes.

Radix ejus est perennis , fibroso-ramosa , lignescens , ad caulium eruptionem crassiuscula , cæterum gracilis , extus coloris ex gilvo cinerascens , intus albidi ; saporis balsamici ex amariusculo subdulcis & grati.

De Polygalæ amaræ Rad. &c. 405

Hæc caules promit plures, simplices, graciles, plus minus dodrantes, procumbentes partimque surrectos.

Folia circum caules alternatim aut sine ordine posita sunt linearia, sessilia: radicalia vero rotundata, numerosa, & in cespitem quasi collecta, quæ ob saporem simul intense amarum hanc speciem a vulgari facile distinguunt.

Flores cærulei, aut purpurascens, etiam albicantes interdum, brevibus pedunculis inhærentes, inque racemum simplicem dispositi caulium cacumina ornant; quorum

Calix pentaphyllus tria gerit foliola, unicum inferne ac duo superne posita parvula, ex cæruleo virentia: alia duo lateribus adstant ovata, prioribus longe majora, patula, petalorum colore donata, qui tamen color post deflorescentiam in pallide virentem abit.

Corolla monopetala, subtubulosa, superius ad basin usque fissa, fissuræ latere altero alteri incumbente, duo fauce mentitur labia: labio superiore bipartito, inferiore fimbriato.

Stamina communiter octo, connexa antheras gerentes liberas intra corollæ tubum latitant.

Stylus staminibus cinctus adest unicus apice bifidus.

Hunc sequitur capsula subcordiformis, compressa, margine membranacea, pendula foliolis calycis majoribus lateralibus tecta.

Semina quælibet capsula recondit communiter bina, solitaria, subovata, parva.

Hujus plantæ nomen derivatur a græco πολυ multum & γαλα lac, quasi lac augens.

Crescit passim in subalpinis & montosis, floret æstate. Vulgaris vero ubique in pratis, nemoribus & sylvis viget.

Præter polygalam ante aliquot annos aliud hic contra phthysin innotuit medicamentum lichen nempe Islandicus.

Vidi pluribus prodesse hujus infusum, & optime subinde polygalæ sociatur.



FORMULÆ.

N. j. ℞. Rad. saleb. dr. j. β.

Caq. c. aq. pur. q. s. p. $\frac{1}{2}$ hor.

Colat. lib. j. adde

Syr. diacod. unc. j. β.

M.

S. omni trihorio unc. ij. vel. unc. iij.

fumat, pro ratione gravitatis symptomatum leniendorum.

N. 2. ℞. Folior. fenn. dr. vj.

Herb. mercurial. m. j. ℞.

Coq. c. aq. q. f. p. $\frac{1}{4}$ hor. vase

Clauso colat. lib. j. ℞. adde

Mell. pur. unc. ij.

M.

S. omni trihorio unc. iij.

N. 3. ℞. Conserv. cochlear.

Oxymell. colchic.

aa. unc. j.

Limat mart. o. rubigin.

scr. ℞.

M.

S. intra biduum absumat.

N. 4. ℞. Cort. peruv. unc. j.

Syr. flor. chamom. unc. ij.

Vin. bon. austriac. unc. j.

Aq. flor. sambuc. unc. xv.

M.

S. intra biduum absumat.

N. 5. ℞. Herb. absynth.

Eupator cannabin.

aa. unc. j.

Consciss. inf. vin. bon. austriac. lib. iij.

per bihorium colatura detur usui

intra biduum absumenda.

N. 6. Folior. alexandr. dr. v.

Cortic. citri dr. ℞.

Sal. polychr. dr. j. β .

Mann. unc. j. β .

Inf. c. aq. fervid. q. s. p. $\frac{1}{2}$ hor. vase
clauso. colat. unc. iv. d. pro dosi.

N. 7. \mathcal{R} . Folior. saliv. m. ij.

Inf. c. aq. fervid. q. s. p. $\frac{1}{2}$ hor.

Vase clauso colat. lib. j. β . adde

Syr. salviae. unc. ij.

M.

S. intra biduum mane & vespere ab-
sumat.

N. 8. \mathcal{R} . Aq. foenicul.

— Petroselin.

— Juniper. aa. unc. iv.

Syr. baccar. Juniper.

— Foenicul. aa. unc. j.

Spir. cochlear.

— Nitri dulc. aa. dr. j. β .

Rob. Juniper. unc. j.

M.

S. intra biduum absumatur.

N. 9. \mathcal{R} . Rad. polygal. unc. iij.

Consciss. coq. c. aq. lib. iij.

Ad remanent. lib. j. β .

Cui adde

Syr. hyssop.

— Diacod. aa. unc. j.

M.

S. intra biduum partitis dosibus absumat.

HENRICI



HENR. JOSEPH. COLLIN,

Nosocomii Pazmanniani Physici Ordinarium, & Sacrae Cæsareo-Reg. Apost. Majest. Regim. infer. Austr. Consiliarii

CAMPHORÆ

VIRES,

SIVE

OBSERVATIONUM

CIRCA

MORBOS ACUTOS

ET


CHRONICOS FACTARUM.

PARS TERTIA.



Collin Pars III. Tom. II.

S



V X R O

PERILLUSTRI, MAGNIFICO

A G

CLARISSIMO


ANTONIO STORCK,

AUGUSTISS. IMPERATORIS
& IMPERATRICIS, a Consiliis,
Archiatrorum Comiti, Studii
Medici Cæsareo-Reg. Præfidi &
Directori, Nosocomii Pazman-
niani Physico, plurium Acade-
miarum Membro, &c. &c.

*Has suas observationes, seque totum
dicat.*

H. J. COLLIN.

S 2



PRÆFATIO.



HUIC OPUSCULO occasionem dedit effectuum medicamentorum in variis morbis exhibitionem sequentium diligens & a præjudiciis libera observatio, cujus eximia exempla in pie defuncto illustrissimo L. B. Gerardo van SWIETEN, & Perillustri ac Magnifico STORCK, semper ob oculos habui: hunc enim non modo Ægris Nosocomii medicinam facientem secutus sum, sed & ad suos in Civitate Ægros eum

P R Æ F A T I O.

comitari mihi licuit : Illustrissimus autem pie defunctus Præses ad mortem usque severum & indefessum observatorem egit ; me ad observandum stimulavit , gratiamque mihi fecit meos Ægros , vel difficillimis vel incurabilibus habitis morbis laborantes saltem omni mense , subinde etiam sæpius , per undecim annos invisendi meque in gravibus casibus titubantem sapientibus consiliis erigendi firmandique. Ubi meam ex observatione fluentem de Camphora sententiam illi aperui Ægrosque quos illa curabam ostendi : norunt multi Medici , qui Nosocomium frequentarunt , quanta cum bonitate omnibus prius magna cum patientia examinatis , suam mihi sententiam dixerit ! & quantum me sæpe , de felici curarum successu gaudens

P R Æ F A T I O.

& humanissime gratulans, reverenti pudore suffuderit!

Multa ab anno 1762. cum practicis de Camphora Ægris exhibenda regulis & relatis ipsius effectibus minime convenientia in meos usus notaveram. Verno autem tempore anni 1770, dum incipiens febris putrida petechialis adhuc sporadica erat, & plerosque libithina ad se rapiebat: aliquot hominibus morti jam traditis meæ de Camphora sæpe repetitæ observationi innixus, illam larga manu exhibui, eosque miraculi instar ex orci faucibus eripui; statui tunc de Camphora observationes majori cum exactitudine, non obstante magno Ægrorum, quo incipiebam obrui, numero, scribere; selegique, ut plurimum, casus, in quibus illius effectus

PRÆFATIO.

magis oculis paterent, ut in obscurioribus de illius viribus & securo usu melius posset ferri iudicium. Hunc laborem boni consule, benevole Lector, & vale.






CAMPHORÆ VIRES.



CASUS PRIMUS.

 URARIUS 35. circiter annos natus, 9 Junii 1770. ad nos defertur, a semi-anno opisthotono affectus, & toto hoc tempore lecto affixus, immobilis, sat libero functionum naturalium usque gaudens.

Ante tres annos eodem morbo per plures menses occupatus balneis Baden-sibus, quæ hoc anno ipsi nullum levamen attulerunt, curatus fuerat.

Tota vita sua ante hunc morbum, vix unquam æger, sæpe tempore pluvioso & frigido calci parandæ & aliis in libero aere perficiendis incubuit.

Pulsus erat tremulus, formicans, & 82. pulsationes intra horæ minutum cum modica arteriæ tensione absolvit; respi-

ratio ob retrotractum caput, collum &c. & incurvatam dorsi spinam, per intervalla laboriosa, naturali tamen vix frequentior aut celerior, fitis multa datur ipsi medicam N. 1. id est dr. β . camphor. per diem.

Hoc medicamentum optime fert, & 12. Junii arteria intra minutum tantum 72. vel 73. pulsatur; mollis est pulsus, liber collapsus, neque tremulus, neque formicans amplius. Calor ad sensum valde minutus, fitis disparuit, subinde per horam unam, duasve præcipue noctu æqualiter sudat, & colli spinæque dorsi dolores inde minui ipsi videntur, somnus hac nocte optimus, quo gavissus fuerit a semi-anno.

Camphoræ dr. j. quotidie absumit usque ad 22. Junii, calor fuit toto hoc tempore minor; cutis mollis, perspirans, sudor nullus & pulsus 8. 10. 12. pulsationibus minus creber, liberior, magis dilatatus fuit, quam ante camphoræ usum; cum autem licet spinæ dorsi dolores remisissent, opisthonus maneret immutatus, aliam curandi viam inivi, & æger sub finem Julii sanus ad labores rediit.

CASUS SECUNDUS.

RHEDARIUS quadraginta aliquot annos natus, robustus, proceræ staturæ vir, sub finem Decembris anno 1769. coxa sinistra incœpit valde dolere; ut nonnisi bachulo adjutus postea potuerit incedere. Varia in & externe incassum adhibita fuere remedia; ultimo autem circa initium Maii anni 1770. unguento carminativo locum dolentum incœpit inungere: 15. ejusdem mensis dolor coxam reliquit, vertebrae lumborum & os sacrum tanta cum vehementia occupavit, ut in artubus inferioribus omnis sensus & motus perierit; 18. ejusdem mensis ad nos delatus est.

Functiones naturales sat integræ; respiratio libera; pulsus vix febrilis, sat plenus, valde mollis, debilis.

Varia secundum indicationem in & externe applicuimus medicamenta absque effectu.

9. Junii continuant dolor & reliqua mala ægrum cruciare, magnam debilitatem, nauseam, capitis gravitatem doloremque & sitim conqueritur, respiratio est anxiosa, pulsus febrilis, sed de-

bilis, mollis, oculi tristes; facies for-
dida, lurida. Præscribitur ipecacuanh.
dr. β. cum tartari emetici gr. j. vomitu
sexies repetito cibos indigestos, & mul-
tum glutinis varie colorati reddidit.
Aliquoties purgatus est, unde anxietas
visa est minor. Posthac mixtura vinosa
utitur; post emeticum leniter fere con-
tinuo sudat.

10. 11. Nihil novi accidit.

12. Hinc inde macula petechialis ru-
bra apparet; arteria tensa, dilatata vix
aliquid præter aerem continere vide-
tur, & circiter 78. intra minutum cum
debilitatē digitum ferit, alvus & urina
naturalis, cutis continuo leniter madet,
lingua sicca, fuscescens, reliqua ut
ante.

Datur ægro camphoræ dr. j. per diem,
juscula tenuia, & potus theiformis te-
pidus.

13. Camphoram optime fert, coete-
rum nihil novi.

14. Arteria libera; pulsus solidescit;
& tantum 75. pulsationes intra horæ mi-
nutum habet; anxietas multum minuta,
capitis dolor multum remisit; oculi &
faciei cutis nitidiores; lingua ut ante,
fudor lenis continuat, petechiis variæ
figuræ & magnitudinis rubris, fusces-

centibus totum corpus , excepta facie , oblitum est , sitis nulla , alvus a biduo clausa ; urina saturata , obscuri valde coloris , cum enæoremate multo suspeso , reliqua ut ante.

Nihil in methodo medendi mutatur , alvus 15. sponte secedit cocta , mollis , subfusca.

Res ægri continuant sensim in melius vergere. Lingua depuratur , omnes functiones sensim ad statum naturalem appropinquant , & 22. Junii petechiis fere omnibus flaventibus dolor in lumborum vertebriis & osse sacro multum remisit , in artus inferiores rediit sensus , & utrumque in lecto parum movere potest.

Continuat magna cum euphoria suam camphoræ dragmam quotidie absumere , raro amplius sudat.

7. Julii vix de doloribus aliquid superest , libere solus absque baculo incedit , omnes functiones bonæ , & pulsus tantum 74. pulsationes intra horæ minutum habet. Continuat eandem medicamenti dosin sumere.

12. Julii missus sit camphoræ usus & 14. ejusdem sanus discedit.

CASUS TERTIUS.

FEMINA 48. annorum , per 20. annos maritata sterilis mansit ; catamenia semper pauca & irregularia habuit , quæ jam a tribus annis penitus emanfere , febribus intermittentibus & erysipelati crura præcipue invadenti doloribusque articulorum , pedum , & genuum per crura propagatis valde obnoxia , sub finem anni 1769. doloribus vehementibus in osse sacro & ultimis lumborum vertebreis corripitur , qui ad coxam sinistram , inde vero exterius per femur ad apices usque digitorum pedis valde urentes & lancinantes extendebantur , ægramque maxima temporis parte lecto affixam tenebant. Crus & femur quasi glacie involuta frigore , stupore affecta erant , & videbatur ipsi fura sæpius dilacerari.

Circa medium Maium anni 1770. e lecto nullo modo amplius surgere potuit , imo nonnisi cum summa dolorum exacerbatione corpus in lecto parum movere poterat , sic continuavit affici usque ad 18. Junii , qua ad nos deferrebatur.

Ægram examinans inveni illam if-

chiade nervosa , tam docte & perite a celeb. Cotunno descripta & elucidata affectam ; alvus erat tarda , præ doloribus sæpius sudabat ; sitis nulla , lingua humida , alba ; appetitus bonus , toto capite frequenter dolet , somnus paucus , noctu ab auctis doloribus impeditus , respiratio naturali paulo crebrior , celerior ; pulsus mollis , parvus , debilis , flaccescens , tantum 50. pulsationes intra minutum habet.

19. Junii lene purgans sumit , unde quinquies purgatur 20. datur ipsi camphoræ dr. β. in mucilaginé gummi arabici syr. edulcorata , quotidie absumentenda.

Hanc dosin per sex dies absque notabili mutatione sumit , & optime fert.

25. Camphoræ dr. j. incoëpit sumere vide formul. N. 2.

26. Gratissimum post sumptum medicamentum , quod quadripartita dosi ipsi porrigitur , laudat refrigerium , quod sequitur lenis sudor per totum corpus , per mediam horam , subin diutius , durans ; pulsus magis dilatatus , liberior , 58. pulsationes intra minutum primum habet.

27. Datur ipsi quadripartita dosi camphoræ dr. j. β. vide N. 3. pulsus habet

61. pulsationes intra minutum reliqua
ut ante.

28. Fere tota nocte leniter sudavit,
& adhuc continuat; dolores multum
remifere, per intervalla dormivit, res-
piratio naturalis, pulsus liber, mollis
solidescit, & tantum 50. pulsationes
intra horæ minutum habet.

30. Junii dolores valde minuuntur,
& jam aliquoties hodie se sola in latus
sinistrum vertit, & in illud per aliquot
tempus decubuit.

3. Julii sola e lecto surrexit, & ali-
quoties per cubiculum deambulavit, in
lecto se erigit & facile sedet, in latus
affectum fere æque facile ac in aliud
decumbit; loco dolorum sensum decur-
rentium formicarum ab osse sacro ad
digitos pedis usque percipit: continuat
sæpius leniter sudare, arteria mollis,
libera, dilatata, 54. vicibus intra horæ
minutum pulsat.

Datur ipsi quater de die dr. β . cam-
phoræ, quam optime fert, vide N. 4.

5. Julii pulsus ut nudius tertius, cir-
citer vigesies ab una parte cubiculi ad
aliam libere incessit, somnus optimus,
alvus, enemate sollicitata, colore & con-
sistentia bona, urina straminea, tenuis,
cum nubecula fundum petente, vix

amplius sudat, sitis nulla, calor ad tactum & sensum ægræ temperatissimus.

7. Julii pulsus intra minutum 62. pulsationes habet. Nocte elapsa punctorius dolor mammam sinistram per medium quadrantem horæ occupavit, ibi cessans ad lumbos delatus est, qui ibi per duo triave minuta moratus sinistram capitis partem cum leni auris tinnitu subito occupavit: os sacrum, vertebræ lumborum, coxa, femur & totum crus omnino naturaliter habent. Alvo a nudius tertius mane caret, non sudat.

Missa fit camphora, datur ægræ emulum & enema, sequenti die disparuit capitis dolor & auris tinnitus & ægra continuat bene habere.

14. Julii pulsus mollis, liber, dilatatus, æqualis, 60. pulsationes intra horæ minutum habet, tensionem in pectore percipit, omni anno mense Maio venæ sectionem celebrare consuevit, quam hoc anno ob nimiam debilitatem omisit.

Sanguis educitur ex brachio ad unc. x. qui refrigeratus infulam bonæ consistentiæ & coloris, tenui crusta inflammatoria tectam debitæ feri quantitati innatantem præbuit, & ægra post v. f.

optime habens magnam partem diei per agrum & pratum nosocomii deambulat.

28. Julii sana & robusta ex nosocomio exit.

CASUS QUARTUS.

VIR 43. annos natus, 1. Junii anni 1770. ad nos delatus est.

A 24. ætatis anno febribus acutis, pleuritide, arthritide diuturna frequenter vexatus fuit.

15. Mensis Maii hujus anni cum jam per aliquot septimanas minus bene habuisset, prægressa lassitudine spontanea, magna debilitate, anxietate doloribus lancinantibus, dilacerantibus in utriusque pedis dorso incipientibus & ad coxam usque propagatis affectus est, incipientibus doloribus utriusque pedis dorsum intumescebat: hic tumor sensim cum dolore auctus demum disparebat, dum ad summam intensitatem pervenerat dolor, ægrum fere in convulsiones agens; sic per mediam horam & ultra durabat, postea remittens absque intermissione, frequenter irregularibus intervallis exacerbandus, noctu intensior

quam de die. Similis dolor & tumor eodem modo procedens, digitos & dorsum utriusque manus occupans ad articulationem brachii inferioris cum ossibus carpi protendebatur, ingentes dolores vertebrae lumborum & os sacrum occupabant: lecto affixus, immobilis variis usus est absque levamine, donec 1. Junii ad nos deferretur.

Vir torosus, robustus ita macer est, ut consumptis carnibus cutis tantum ossibus hæere videatur; unguibus incurvis, oculis in orbitarum cavis profunde hærentibus; cuti colore obscure flavo tincta.

Gingivæ cœruleæ, dentes fordidi, denudati, vacillantes.

Caput grave, obtuse præcipue circa frontem dolens.

Somnus paucus, appetitus nullus, sitis nulla, lingua humida, alvus naturalis, omni alterno die secedere solita; urina straminea cum enæoremate fundum petente, subinde aquosa, tenuis; respiratio facilis, naturali paulo frequentior, pulsus inæqualis, valde mollis, parvus; arteria subinde tensa, plerumque intra minutum 90. digitum ferit.

Curam hujus ægri usque ad vigesim

mam Junii variis medicamentis , decoc-
tis depurantibus , diaphoreticis , pur-
gantibus , fero lactis &c. levamine sub-
inde apparente ac brevi iterum dispa-
rente , tentavimus.

21. Camphoræ scr. j. per diem in
emulso datur , quam libenter sumit. 23.
datur dr. β. 25. dr. j. per diem qua-
tuor dosibus in mucilagine incipit ab-
sumere.

26. Junii nocte elapsa melius dor-
mivit , continuo sudore leni per totum
corpus æquali madens , qui circa matu-
tinum tempus remisit , & circa septi-
mam per horam factus est copiosus ;
gratissimum per totum corpus refrige-
rium laudat , tactui etiam manifestum ;
caput levius habet : dolores omnes multo
minores sunt , se solus erigit , & qui vix
pedem in lecto movere poterat , solus
ex lecto surrexit. Pulsus ut ante , su-
binde adhuc parum tensus , 88. pulsa-
tionibus intra minutum absolvitur. Qua-
dripartita dosi camph. dr. j. β. per diem
absumat.

28. Junii continuat per intervalla
leniter sudare , functiones reliquæ natu-
rales bonæ. Dolores ita minuti sunt ,
ut heri bis absque fulcro ab una parte
cubiculi ad aliam incesse-rit ; manibus

quæcunque prehendit, sat fortiter tenet; circa mediam noctem aure dextra per semi-horam doluit, hic dolor oborto secundum spinam dorsi copioso sudore cessavit, & æger sat bene postea dormivit. Pulsus liber, dilatatus, mollis, arteria 74. intra minutum digitum ferit.

29 & 30 Junii vix amplius sudat: caput adhuc grave est: arteria libera, 70 pulsat intra minutum. Sumat quater de die camphor dr. β.

Hanc dosin bene fert: 3 Julii artus inferiores, os sacrum & lumbares vertebrae ab omni dolore libera sunt: artus superiores quoque liberi, exceptis humeris, in quibus obtusum dolorem conqueritur: noctu optime dormit, subin leni aurium tinnitu affectus: gressus facilis, liber est: pulsus liber, mollis 78. pulsationes intra minutum habet, pergit eandem medicamenti dosin quotidie absumere.

Nocte tertiæ ad quartam Julii cum debilitate & pandiculatione plus solito incaluit: accessere abdominis tormina: post quadrantem horæ erupit sudor per totum corpus æqualis, circiter bihorio durans: quo finito incoeperunt carnes surarum & femorum tremere, sicque con-

tinuaverunt per 20. horæ minuta mansit post hæc æger vigilans optime habens per quadrantem horæ; dein in placidum somnum lapsus est.

4 Julii pulsus 70. pulsationibus intra minutum absolvitur, est plenus, solidus, dilatatus, liber, quoad omnia benet habet: camphoram valde nauseat, & post illam assumptam calorem ad caput ascendentem, & frontis tensionem leniter dolorificam conqueritur. Missus fit camphoræ usus.

5. 6. 7. Julii sæpe leniter sudat. 8. nihil morboſi ſupereſſe videtur: ipſæ gingivæ firmæ, coloris boni ſunt: dentes nitidifirmi: carnes ſenſim corpori emaciato renaſcuntur: omnes functiones bonæ. Conceditur ipſi carniū eſus.

20 Julii optime valens & fortis dimiſſus eſt.

CASUS QUINTUS.

SEPTUAGENARIUS Muſicus ſemper utcumque ſanus vixit: ſpaſmodicis tamen & flatulentis hypochondriorum & abdominis affectibus ac torminibus præcipue poſt olerum & leguminum coctionem frequenter obnoxius.

Tota fere æstate elapſa valida laboravit tuſſi, qua vix aliquid excernebatur, & quæ variis adhibitis adpropinquante autumnno demum ceſſavit.

Ante ſeptem ſeptimanas medium femur ſiniſtrum invaſit dolor urens, lancinans, diurno tempore major, quam de nocte, ad ſuram, malleolōs & dorſum pedis protractus, greſſum difficilem reddens.

Decoctis ſic dictis, ſanguinem depurantibus per quatuor ſeptimanas uſus nullo modo levatus eſt; imo e lecto ſurgere amplius non potuit. Domi modo hoc, modo illud adhibens remedium, permanſit donec 30 Junii anni 1770. ſe ad noſtrum noſocomium curavit deferri.

Habitus corporis eſt valde macilentus, cachecticus: tuſſitat ſubinde: appetitus bonus, ſitis nulla; dorſum pedis ſiniſtri uterque malleolus tument, dura ſunt, dolent, planta pedis ita ſenſibilis, ut illi præ dolore inſiſtere nequeat; genu mole auctum, non dolens, dum ſolito magis incaleſcit ægro ſenſum fornicationis cauſat, ſub poplite omnia rigida ſunt; ſura tenſa eſt, dolens: quibus extenſio cruris impeditur.

Reſpiratio libera: pulſus ſunt ſpatio

432 *Camphoræ Vires:*

minuti 100. vel plures, molles, parvi, debiles, subinde tensi: Mercurius in thermometro Fahrenheitiano per quadrantem horæ ante 10. matutinam sub axilla applicato exacte ad gradum 98. ascendit.

Datur per diem camphoræ dr. β. quam optime absque mutatione fert.

3 Julii quater de die camphoræ gr. xv. sumit.

5 Julii pulsus fere ut ante, paulo magis dilatatus: applicatum ut ante thermometrum, grad. caloris $96\frac{1}{2}$. notat; cutis mollis, perspirans.

7 Julii somnus melior, protractior solito: dolores ubique multum minuti: fura minus tensa: tendines subpoplitei minus rigidi: urina rubra, alvus naturalis; sudor nullus; sitis nulla; pulsus dilatatus, mollis, liber 83. pulsationes intra minutum primum habet. Thermometrum applicatum caloris gradus 97. exhibet. Datur quater in die camphoræ dr. β.

8 & 9 Julii mane thermometrum eundem caloris gradum notat ac præcedentibus diebus: aitque æger se post assumptum medicamentum nullum incommodum pati; lingua naturalis; sitis nulla; sudor nullus.

Post

Post meridiem per mediam horam doloribus punctoriis hypochondrii dextri & tunc distenti abdominis borborymis affectus est: alvum a nudio tertio non deposuit: pulsus est tensus, resiliens, inæqualis, irregularis, intra minutum 86. pulsationes complens: datum enema has turbas statim abstulit: somnus est bonus & omnia continuant in melius mutari, pergit quotidie dr. ij. camphoræ absumere.

17 Julii pulsus 80. intra horæ minutum molles, liberi, dilatati: grad. caloris 96. notat thermometrum more solito applicatum.

20. Crus libere extendit: disparuere tensiones, tumores, dolores: pedi insistere potest: somnus bonus, protractus, in quo nunc leniter sudat: pulsus plenus, solidus, mollis, dilatatus 78. pulsationes intra minutum primum præbet: gradus caloris thermometro per quadrantem horæ applicato est, ut 17.

Abstinet æger a medicamento: cibis congruis utitur, & circa medium Augusti sanus dimittitur.



CASUS SEXTUS.

PUELLA 27. annos nata 26 Julii anni 1770. ad nos delata est.

A pueritia febribus intermittentibus sponte semper cessantibus frequenter affecta, ante sex annos in profundum lapsa præcipitium multum sanguinis per triduum ore reddidit : convaluit nullis adhibitis remediis.

A verno tempore anni 1769. frequenter nullo alio prægresso symptomate convellitur cum integra mentis alienatione : menstruis caruit ad ultimam Maii anni 1770. quæ, completo iam 24. ætatis anno, post validum convulsionis paroxysmum, prima vice eruperunt, & copiosa per triduum fluxerunt : quibus non obstantibus ante finem Junii adhuc bis convulsa fuit.

Circa medium Aprilem ejusdem anni, ex curru, quo vehebatur, lapsæ crus dextrum, prope malleolum internum, valde contusum, excoriatum est, & in ulcus abivit : quod variis applicatis videbatur brevi cicatrice obducendum. Cecidit autem iterum 17 Junii ex alta, quam conscenderat, scala & idem crus

denuo multum læsit : unde ulcus denuo latius evasit , & incoepit hypochondrio sinistro multum dolere. Hoc modo adhuc affecta post institutam V. S. & sumptum purgans ad nos defertur.

Pulsus , est mollis , parvus , & tantum 66. pulsationes intra minutum primum præbet. Respiratio , ob hypochondrii dolorem parum læsa : dantur medicamenta leniter solventia , paregorica & talia externe applicantur : ulcus saniem dans antisepticiis deligatur.

Prima Julii crus totum tumet ; profunde rubet , tensum est , & ulcus fuscum , siccum est : pulsus frequentia irregularis uno minuto septuaginta altero 80. pulsationes exhibens , valde mollis , flaccescens : thermometer per quadrantem horæ applicatum 98. grad. caloris notat. Datur camphoræ dr. β. per diem absumenda.

2 Julii omnia in eodem statu permanent : malum non est auctum : dantur quater de die camphoræ gr. xv.

Ulceri gangræ noso præter emplastrum diapalm. nihil applicatur : frequenter invisitur ægra , ne forte ingravescente malo hac methodo aliquid negligatur , & si opus sit , alia medica-

menta illi porrigantur : verum visa est potius in melius parum mutari.

Tertia Julii crus minus rubrum, minus tumidum, minus dolens : ulcus humefcit, & in circumferentia videtur crusta elevari Thermometrum per 20. & ultra horæ minuta in cavo subaxillari applicatum caloris gradum 97. exhibet : pulsus adhuc irregularis, modo 54. modo 60. mox etiam 72. pulsationes intra minutum præbens : sed solidescit, fortior est : respiratio minus frequens, fere naturalis : licet adhuc doleat hypochondrium.

Continuat eadem medicamenti dosi uti, rebus sensim in melius vergentibus.

Quinta Julii, idem caloris gradus : pulsus magis regularis, dilatatus, liber 63. pulsationes intra minutum habet : dolor partem anteriorem hypochondrii occupans retrorsum prope dorsi spinam translatus est, & subinde intermittit : crus multum collabitur, & fere ubique suppurat ulcus : urina & alvus naturales sponte excernuntur : cutis mollis, perspirans : fudor nullus : fitis nulla : lingua pura : appetitus bonus : somnus vero paucus. Continuetur eadem camphoræ dosi.

Septima Julii crus penitus detumuit, colore naturali præditum: ulcus cavum, purum, ubique copiosum, optimum pus dat: heri tamen convulsa fuit. Pulsus sunt 55. intra minutum primum: in thermometro Fahrenheitiano more solito applicato mercurius ad gradum 96. ascendit, sic etiam octava: nona ad 95. sic usque ad 16 Julii, qua tantum 94. caloris gradus notat. Pulsus liber, dilatatus, solidus, fere semper 60. 62. pullationes intra minutum primum exhibet: disparuit omnis dolor: cavitas ulceris tota impleta est, & media superficies cicatrice obducta.

Continuatur camphoræ usus, ea spe, fore ut forte convulsionibus medeatur & menstrua ab ultima Maii emanentia promoveantur; verum 27 Julii medicamentum nauseat: dantur ipsi scr. ij. per diem cum succo liquiritiæ in pilulas redacti: verum nec sic potest sumere, & si se cogat, vertiginosa fit: hinc illi superseditur. Pulsus est plenus, liber, omni nota sanus.

Tertia Augusti cum jam per sex dies a camphora abstinuisset, more solito convulsa est: ulcus perfecte cicatrice obductum, & totum corpus sanitatem præ se fert.

Utitur antispasmodicis, nervinis, &c. ad finem usque Augusti, sub quorum usu adhuc semel convulsa est.

6 Septembris licet menstrua evacuatio nulla promoveri potuerit, robusta, optimo colore prædita ex nosocomio exit.

Quinta Julii incoëpit ulceri gangrenoso applicari mucilago N. 5. & continuata est donec ulcus fuerit cicatrice obductum.

CASUS SEPTIMUS.

PUELLA 28. annos nata, decimo ætatis anno variolavit, ingenti pustularum agmine tecta, quarum conferta vestigia in facie prostant.

Annos nata 17. prima menstrua acquisivit, quæ, ut ait, debite fluxere ad ætatis suæ annum 27.

24. annos nata vehementissimo dolore finistram capitis partem occupante per aliquot dies affecta est. Sub quo in osse temporali tumor medii ovi galinacei longitudinaliter divisi figura & magnitudine, brevi duritie ossea tactui resistens, ortus hemicraniam multum lenivit.

Tumor ille neglectus post medium annum sponte disparuit, & ægra atrocissima cephalalgia, qua, per vices præcipue nocturno tempore, fere in furorem agebatur, correpta est: quæ variis medicamentis & maxime bis repetita cum scarificatione cucurbitularum septem retro aures & ad nucham applicatione disparuit.

Initio anni 1769. scabie humida totum corpus occupatum est, quam, præmisso purgante, in unctione quadam circa artuum articulos quotidie per sex septimanas continuata retropulit.

Mense Martio sequente pleuritide correpta est, quæ V. S. curata mense Aprili illam denuo invasit, venæ sectione iterum sublata.

Ab illo tempore menstrua quoad quantitatem, qualitatem & tempus fuere irregularia. Fluore albo frequenter affecta fuit, ut aiebat, numquam urente.

Circa medium Octobris ejusdem anni os sacrum & coxam dextram vehemens, lancinans, dilacerans dolor invasit, & inde per femur & exteriorem cruris partem ad digitos usque pedis æque acerbis propagatus est: genu intumuit ita, ut nonnisi cum magnis doloribus crus vel flectere vel extendere posset.

Variis & externe adhibitis aliquod levamen naſta eſt , & ſua utcumque peragere potuit ; donec circa finem Januarii anni 1770. ex ſede , cui infidebat, ſurgere volens ceciderit : tunc enim omnia exacerbata fuere : genu maxima parte collapſum , iterum intumuit , & iſchiadii nervoſæ adjuncta eſt pleuritis , quæ methodo antiplogiſticæ ceſſit , manentibus diriffimis iſchiadis ſymptomatibus , quibuſcum 12 Martii anni 1770. ad nos delata eſt.

Uſque ad tertiam Julii varia & optima adhibita medicamenta , veſicantia , aliquoties repetita , ſubinde aliquod levamen attulerunt , morbum vicerunt nunquam. Caput ſæpe dolet ; menſtrua manent irregularia , aquoſa , & illa per plures dies præcedit & ſequitur fluor albus. Pallidus , & gracilis eſt corporis habitus ; appetitus bonus , alvus & urina naturales.

Tertia Julii camphoræ dr. ſ. quotidie abſumenda præſcribitur : antequam primam adſumat medicamenti doſin thermometer per 20. horæ minuta applicatum notat gradum 97 ; pulſus parvus cum aliqua tenſione , mollis , variis vicibus examinatus 84. 85. 88. pulſationes intra horæ minutum exhibet.

Quinta Julii, pulsus plerumque 70. tantum pulsationes intra minutum habet. Thermometrum eundem caloris gradum notat ac nudius tertius. Datur ipsi medicam. N. 2.

6. 7. 8. idem caloris gradus: pulsus idem.

10. Pulsus variis vicibus examinatus 60. 64. 66. pulsationes intra horæ minutum præbet. Gradus mercurii in thermometro est 96.

Sequentibus diebus continuata eadem camphoræ dosi, caloris gradus sunt 97, pulsus ut ante usque ad 16. Julii, quæ thermometrum caloris grad. 100. notat, more solito applicatum: pulsationes arteriæ tempore consueto sunt 80. 86. Ægra à camphora nullum omnino levamen habet.

17. Julii dantur ægræ mercurii dulcis grana v. quadripartita dosi quotidie absumenda.

Absumpta hujus dr. β. incoëpit salivare, & per sex septimanas continuata salivatione perfecte curata est.

Initio Septembris menstrua debita quantitate & qualitate per sex dies fluxerunt, & 13. ejusdem sana dimissa est.

CASUS OCTAVUS.

QUINDECIM annorum futoris tyro ab aliquot annis frequentibus narium hæmorrhagiis, quas cephalalgia modo brevioris, modo diuturnioris durationis semper subsequitur, obnoxius, quater arthritide, qua omnes artus articuli tumentes, immobiles fiebant, spatio duorum annorum correptus, suffumigiis & paucis interne adhibitis medicamentis semper sat cito curatus est.

Ab aliquot annis (annum enim determinare nequit) speciei cuidam convulsionis, qua uterque oculus mire rotatur cum faciei rubore obnoxius est: hoc per aliquot horæ minuta durat: dein caput antè collabitur oculis clausis: totus paroxysmus circiter intra quadrantem horæ absolvitur, & quandoque sæpius de die redit. Causam tribuit terrori magno, quo non diu ante primum paroxysmum perculsus fuit.

Hoc anno 1770. tempore Bacchanalium apud nos decubuit, & curatus dimissus est, emanfitque paroxysmus ultra tres menses, donec 20. Junii elapsi ligna empturus tempestate valde plu-

viosa sommo mane in tenebris exeuns in obstaculum ligneum impegerit, unde multum territus fuit & sequenti die paroxysmus illum denuo invasit, quo ab eo tempore quotidie semel, quandoque bis impetitur.

3. Julii ad nos delatus est, bis in itinere ad nosocomium paroxysmum passus.

Circa sinus frontales dolorem magnum conqueritur, & magnam in sudores, propensionem.

Thermometrum Fahrenheitianum bi-horio post suum in nosocomium ingressum in cavo subaxillari per 20. horæ minuta retentum ægro adhuc jejuno, 99. caloris gradum notat. Pulsus rithmo & tempore inæqualis, irregularis omni fere minuto pulsationum numero varians, ut modo 70. modo 70. aliquot numerentur: maximus tamen numerus est 80. valde mollis & sat dilatata arteria; reliquæ functiones sat bonæ: in hypochondrii dextri media parte, minime tensa, ab attactu dolet: datur ipsi purgans & 4. Julii incipit camphoræ dr. β. per diem absumere quam optime fert: quare 6. ejusdem dantur gr. xv. quater diei tempore.

7. Julii pulsus liber, mollis, subundulans, minus inæqualis 77. pulsatio-

nibus horæ minutum explet; frontis & hypochondrii dolor ut ante: latus pectoris sinistrum, subinde dolor præhendit ad sternum extensus, fugax, cito evanidus. Leniter, sed fere continuo sudat. Stat mercurius in thermometro applicato ad gradum 97: omnes functiones bonæ: paroxysmus more solito redit. Detur ter de die camphoræ dr. β. sive medicam. N. 3.

8. 9. Julii idem pulsus: caloris grad. paulo infra 97.

10. Julii thermometrum mane & vespere applicatum notat semper grad. 98. Pulsus characteres ut ante, cujus pulsationes intra minutum numero 64. comprehenduntur. Post assumptam quamque medicamenti dosin, ait quasi ebrium se fieri, manereque sic per mediam horam: dolor circa sinus frontales & hypochondrium idem: bene dormit: leniter sudat: quoad reliqua pergit bene habere: continuat quotidie camphoræ dr. j. β. absumere, sed sexpartita dosi; sic nulla amplius ebrietas ipsius assumptionem sequitur.

12. Julii oculorum convulsio, quæ a 7. ejusdem abfuerat, denuo apparuit, sed tantum per duo horæ minuta duravit, omnia ut ante.

14. Julii brevis convulsio oculorum iterum adfuit. Pulsus valde inæqualis post tres quatuorve pulsationes valde præcipites, plures alias habet valde raras, inter quas una intercurrit valde tarda, quasi pars arteriæ tangenti digito respondens tenaci quadam materia internæ arteriæ parti fere agglutinata vix amplius dilatari posset: hæcque inæqualitates non semel sed decies examinatus pulsus semper exhibet: utrumque hypochondrium leniter tensum, dolorificum est, frons ut ante dolet. Detur haustus purgans: mercurius in thermometro non exacte ad 98. gradum ascendit.

15. levata sunt hypochondria: pulsus liberior, minus inæqualis; minime febrilis: calor thermometro mensuratus idem, ac ante.

Omnia bene pergunt ad 18. Julii, qua iterum convelluntur oculi, paroxysmo æque diu durante ac dum ad nos venerat: calor idem; pulsationes intra minutum circa 70.

Perrexit eadem camphoræ dosi uti usque ad 28. Julii, pulsus circiter 56. intra minutum digitum feriens eosdem characteres servat, ac 14. Julii: continuat redire paroxysmus convulsivus: dolor circa sinus frontales idem perma-

net. cœterum quoad reliqua æger bene habere videtur.

A camphora abſtineat & ſumat quater de die extracti hyoſcyami gr. vj.

10. Auguſti magnum lumbricum vivum ano excrevit ; pergit eandem extracti hyoſcyami doſin ſumere.

6. Septembris, cum poſt excretum vermem nulli amplius frontis dolores adfuerint, paroxyſmus convulſivus integre emanſerit, & functiones omnes naturaliter proceſſerint, ſanus, viribus pollens dimittitur.

C A S U S . N O N U S .

TEXTOR 20. annorum menſe Septembris anni 1769. ſcabiem, qua a tribus hebdomadis occupabatur, inuncto aliquoties manibus & brachiis anterioribus unguento quodam retropulit : ſtatim intumuerunt crura, quæ ab eo tempore ſemper doluere, & menſe Octobris ulcerata ſunt.

Variis incaſſum uſque ad primam Julii anni 1770. qua balneis Badenſibus inſidere inchoavit, uſus eſt remediis.

Sub uſu balnei per 16. dies continuato, crurum tumor, tenſio, dolor

valde increverunt, & ulcera in gangrænam abierunt, cum qua 17. Julii ad nos curru vectus est.

Ulcus magnum sinistrum crus occupans a malleolo externo recta sursum ad 15. pollicum Parisinorum longitudinem extensum, cujus latitudo superior 3. inferior vero 5. pollicum erat, supra caput fibulæ aliud ulcus imperialis magnitudine, & tertium floreni magnitudinem æquans metatarso insidebat: dextri cruris partem externam occupans ulcus a medio malleolo versus superiora ad sex pollicum Parisinorum longitudinem decurrebat cum latitudine 3. pollicum & 9. linearum: superiorem externam cruris partem ulcus pariter imperialis magnitudinis occupabat, vix cum inferiore non coeuns. Hæc omnia ulcera gangræna nigra affecta erant, hinc inde saniem fuscā stillantia: crura tumidissima, purpureo, plumbeoque colore deturbata, frigida, inferius insensilia, superius doloribus plena.

Respiratio creberrima, celeris, valde laboriosa, sæpe sublimis: arteriæ membranæ tenues, flaccidæ, videntur tantummodo aerem vehere; & pulsus summe irregularis, sat dilatatus, ita

præcipitatus est, ut impossibile sit pulsationes numerare.

Caput totum, quasi a putredine inflatum valde dolet: urens, ficcus per totum corpus, exceptis cruribus calor: supinus diductis cruribus decubitus: lingua nigra siccissima: sitis nulla: oculi cœrulei, prominentes, tumidi: tota cutis sordidissima, quasi pulvere fusco conspersa.

Sera vespera ad nosocomium advecto datur camphoræ dr. β. totum crus omni octava hora medicament. N. 5. deligatur.

18. Julii sumit quater de die camphoræ dr. β. deligatio pergit fieri ut heri.

Vespere omnia sensibilibiter in melius mutantur: gangræna ubique separatur: respiratio naturalis: pulsus collapsus, solidus, vix febrilis: leniter sudat: de grato totius corporis refrigerio lætatur: minus tensa sunt crura: collapsa est facies: oculi vividiores: dolores capitis disparuere: nox sequitur fere tota somno pacato transacta: crura ubique calent.

19. Mane, fere integra gangrænosi in omnibus ulceribus facta est separatio. In fundo magni ulceris cruris sinistri tendo peronæi ad longitudinem duorum

pollicum nudus : in superiori dextri cruris ulceris tendo bicipitis etiam semipollicem pariter denudatus conspicitur : facies & oculi naturales, lingua tota humida, marginibus pura ; sitis nulla : crura mollescent : color illorum sensim ad naturalem accedit. Pulsus liber, dilatatus, cum soliditate mollis, 80. pulsationes intra horæ minutum habet ; sudat multum : cutis tactui refrigerata videtur.

Vespere omnia ulcera suppurant : pus inodorum, optimæ consistentiæ, leniter flavescens dant : muscoli subjacentes pulchre rubelli : valde detumescunt crura ; & æger de magna fame conqueritur.

20. Julii crurum colore naturali præditorum tumor fere integre disparuit, optima est suppuratio : æger nocte elapsa optime dormivit.

21. Julii omnia continuant optime procedere : pulsus liber, dilatatus, mollis, 80. pulsationes intra minutum tactui exhibet : tendinum nuditas sensim minor fit, nihil in methodo mendendi mutatur.

27. Julii tendines carne tecti sunt : cavitates ulcerum repletæ : optima sed multum minuta suppuratio : rudimenta

cicatricum in quovis ulcere conspiciuntur. Verum æger, post solitam camphoræ dosin assumptam speciem levis & cito disparentis ebrietatis jam a biduo conquerens, hodie vertigine vexatus est. Pulsus est fortis, plenus, dilatatus, non frequentior solito. Jubetur ut tantum camphoræ dr. j. β. per diem hancque sexpartita dosi absumat. Nox sequitur bona.

28. Julii custos vel moniti oblitus, vel bono, quem videbat in ægro medicamenti effectū seductus, & non credens nocere posse, illi mane adhuc jejuno solitam dosin porrexit, unde statim valde vertiginosus evasit, & circiter per duo horæ minuta tendinum subsultus in omnibus artubus passus est: datum vero quotidie præfatum camphoræ pondus, sed sexpartita dosi, postea tales turbas non amplius excitavit, licet æger magis nauseabundus medicamentum sumpserit.

29. Æger optime noctu dormivit: pulsus bonus, parum collapsus: cicatrices cito augentur: valde magnus est appetitus: conceditur ipsi carniū esus.

6. Augusti ulcera superiorum crurum & illud quod metatarsum pedis dextrī

occupabat, pulcherrima cicatrice obducta sunt, & duas tertias majorum ulcerum partes cicatrix obduxit: æger continuat camphor. dr. j. β. per diem modo ante dicto sumere, illam bene fert: omnes functiones optimæ.

14. Augusti ulcus cruris dextri fere integrè cicatrifatum: in sinistro tantum superest pars floreno paulo major cicatrice orba. Missum facimus camphoræ internum usum: externa illius applicatio continuatur.

Sub finem Septembris robustus & optime valens, ulcere nondum perfectè cicatrifato nobis invitis ad suum opificium rediit.

Mense Octobris declinante sub continuatis laboribus & diæta dyspeptica crura pergebant bene habere: quidam tamen ipsi suavit, ut gramen butyro incoctum utrique cruri applicaret: qua methodo per octo dies continuata, dextrum parva, sinistrum majori plaga ulcerari incoëpit.

Variis postea aliis absque magno ulcerum augmento usus est: donec 16. Januarii anni 1771. febris petechiali epidemica correptus fuerit: decurrente enim morbo sensim gangrænosa facta ulcera superficie aucta sunt: datis autem

illi, ut pote iterum ad nostrum nosocomium delato, 10. morbi die camphor. dr. ij. per diem sexpartita dosi, & applicata externe camphora, gangræna intra quatuor dies separata bonæ suppurationi locum fecit. Æger 14. morbi die incoëpit sudare & per sex dies multum sudavit, sicque a morbo penitus judicatus est.

Post hac de camphora nihil amplius sumpsit, & solo illius externo usu per 10. vel. 12. septimanas continuato, interposito subinde purgante perfecte curatus est: custodis postea officium apud ægros inivit, mansitque usque ad mensem Juliü anni 1772.

CASUS DECIMUS.

VIGINTI novem annorum, operarius a 9. mensibus ingentes ossis sacri & vertebrarum lumbarium dolores noctu semper intensiores & sensim ita auctos, ut artus inferiores non amplius movere potuerit, patiens 23. Juliü ad nostrum nosocomium delatus est.

Nullam præfati doloris causam ab ipso eruere potuimus; hinc materiam rheumaticam has partes forte obsidere

suspicati, cum pulsus liber, mollis, non plenus, 62. pulsationibus intra minutum absolveretur, & thermometrum per mediam horam applicatum 97. caloris gradum notaret: camphoræ dr. j. per diem quadripartita dosi ipsi exhibuimus.

Sic continuavit usque ad 15. Augusti, modo parum melius habere, modo plus pati visus; vix toto hoc tempore sudavit: omnes reliquæ functiones mansere bonæ.

16. Augusti, dolores noctu acerbissimi fuere: thermometrum notat caloris gradum 98. pulsus sunt circiter 70. intra minutum, magis irritati, molles tamen. Missa fit camphora: dantur ipsi quotidie mercurii dulcis gr. v. Continuat decoctum chinæ, sassaparillæ radic. &c. quo jam antea utebatur: interpolatur subinde purgans & hac methodo per 22. dies continuata, æger perfecte absque salivatione curatus est, & 13. Septembris nosocomio valedicit.

CASUS UNDECIMUS.

FEMINÆ circiter 30. annos natæ, 16. ætatis anno menstrua prima vice erupere:

ab eo tempore regularia. Circiter 23. annos nata matrimonium inivit : tres proles debito tempore felici partu in lucem edidit anno autem 1769. in octavum mensem iterum gravida mense Augusto febris acuta continua per 14. dies decubuit : visa postea sana.

Sub finem Augusti diarrhæa correpta est, quæ 20. & ultra dejectionibus alvinis per plures dies continuatis ægram valde debilitavit : unde præmaturo partu, continuante adhuc diarrhæa, quartam prolem peperit.

Adhibita medela diarrhæa fere subito sublata est, & vix fluxere lochia; pedes ante partum tumidi, sub diarrhæa collapsi, denuo valde intumuerunt, & facta est ascitica.

Ex Hungaria ubi tunc degebat, tempore frigido, pluviis nivibusque copiose alternatim cadentibus, iter pedes Viennam suscepit, ut curaretur, quo appulsa remediis sumptis ab ascite & magna crurum œdematis parte liberata fuit.

Mense Decembris crus dextrum magis intumuit, doluit, tensum & inflammatum est: pustulæ rubræ illud occuparunt, quas omnes illito unguento quodam retropulit, una magna excepta,

quæ inferiorem internam cruris partem obsidebat, & escharam formavit, qua ablata subjecta profunde erosa in conspectum venerunt.

Hoc ulcus sensim omni dimensione auctum est, crure manente tumido, duro, dolente.

Mense Februario 1770. prima vice ab ultimo partu menstrua erupere, quæ circa medium Junii iterum pauca fluxerunt, & ab eo tempore non amplius apparuere.

Optimis medicamentis adhibitis, crus mollitum est; dolores remiserunt: quare ægra mense Maio lotricem agere coepit, non obstante ulceris valde dolentis extensione & renatis tumore & tensione dolorifica cruris: hoc munere usque ad trigesimam Julii, qua ad nos delata est, continuavit fungi.

Crus duplo majus altero, durum, rubrum, multis locis cœrulescens, valde dolens: ulcus profundum palmæ magnitudine marginibus callosis, fuscum, saniem paucam, fuscescentem fundens, valde dolorificum: color faciei fusco-viridis: pulsus febrilis, parvus, flaccescens: appetitus nullus: lingua fordida, sitis mediocris.

Post assumptam ipecacuanh. dr. ℞.

qua aliquoties vomuit ægra, data est illi 1. Augusti camphor dr. j. per diem absumenda, & ulceri medicament. N. 5. applicatum est.

Secunda Augusti incoepit quotidie camphoræ dr. j. β. absumere: pulsus adhuc febrilis, minus flaccidus. Ulcus pus tenue, flavum, dat.

3. Veipere ulcus pus album, spissum, blandum dat: margines multum molliuntur.

4. Augusti crus totum mollescit, collabitur: ulcus optime suppurat: appetitus magnus: sitis nulla: alvus & urina naturales.

Cavitas ulceris renatis carnibus cito impletur: undecima Augusti crure penitus collapsio, colore naturali prædito ab ulceris marginibus naturalem molliem adeptis, & ulceris superficiei æqualibus cicatrix circumquaque nascens conspicitur: pulsus plenus, dilatatus, solidus, minime febrilis.

14. Augusti res cum ulcere optime pergit. Pulsus autem est valde plenus, parvus, subdurus: vena in brachio dextro secta est, & eductus est sanguis, qui refrigeratus insulam compactam, crusta phlogistica tectam, multo fero innatantem exhibuit.

Posthac

Posthac ægra solum dr. j. camphoræ cum nitri scr. ij. quotidie absumpsit. Deligata est ut ante : penultima Augusti, ulcere perfecte cicatrizzato, ab omni medicamento abstinuit, & 15 Septembris, sana, bene colorata, robusta, octiduo ante menstruis gavisa ex nosocomio dimissa est.

CASUS DUODECIMUS.

PUELLA 18. annos nata, nunquam menstruata, robusta, torosa, jam a septem mensibus male habens prima Augusti anni. 1770. ad nos delata est.

Habebat pulsum valde irritatum, resilientem, tensum, absque duritie, imo videbatur sæpe arteria vacua: respiratio sæpe anxiosa: conquerebatur magnum circa præcordia pondus, & vagos punctorios ventriculi, hypochondriorum & pectoris, subindeque capitis & colli dolores: abdomen tensum erat: appetitus nullus: alvus tarda: urina varia: calores vagi sæpe repetentes, quos sequebatur copiosus mox brevioris, mox longioris durationis sudor.

Considerantes juvenem robustam nondum menstruata, dedimus illi cam-

phor. gr. xv. quater de die, visuri an sic non erumperent menstrua, quæ morbum tollerent: vel an alio modo camphora illam a suis ærumnis liberaret.

2 Augusti omnia paulo mitiora esse ait: pulsus est minus irritatus, ritmo & tempore sæpe varians. Camphoram optime fert & libenter sumit.

3 Augusti omnia ut heri. Dantur sexies in die gr. xv. camphoræ.

4 Augusti ait se noctu bene dormivisse: respiratio est liberior: pulsus dilatatus, mollis, minus creber: dolores sunt minores; abdomen minus tensum: accessus caloris & sudoris rariores, & ægra se per totum corpus gratissime refrigeratam gaudet. Continuat eadem camphoræ dosi uti.

7 Augusti, pulsus pacatissimus: omnia naturaliter habent: erupit in manibus & brachiis anterioribus denso agmine scabies: missa fit camphora, & puella aliis medicamentis a scabie liberata ex nosocomio absque evacuatione menstrua exivit.



CASUS DECIMUS TERTIUS.

VIR 30. annos natus, dum puer esset variolas, morbillos & febrem intermittentem feliciter exantlavit, & postea sanus vixit.

Annos 18. natus militiæ nomen dedit: munere suo sanus, alacris per annum functus est: dein totum corpus scabies purulenta invasit, quam unguento ex pulvere pyrio & axungia parato sæpe applicato intra 14. dies percuravit.

Elapsis a retropulsa scabie aliquot diebus, concidit quasi apoplecticus, & post binas venæ sectiones sibi redditus acute per longum tempus decubuit: donec magnus tumor a summa posterioreque parte ossis ilii usque supra mediam natem dextram ortus est, qui apertus circiter mensuram puris dedit: ulcere cicatrifato alius sub poplite dextro ortus est abscessus, qui quoque multum puris dedit, & 14. dierum spatio curatus est. Æger postea quot annis venam bis sibi secari curavit.

In ultimo bello Borussico ense vulneratum ipsi fuit os perietale dextrum, glande plumbea poples sinister: & post

in pugna Torgaviensi tormentorum, quibus inserviebat assiduo fragore factum jam surdastrum globus ab hoste missus proxime aurem dextram prætervolans. ad terram prostravit : finita pugna sanguis primo, & dein serosum, quid ex aure effluxit : subinde pure mixtus hic fluxus, non obstante variorum applicatione, per quatuor annos duravit, quo cessante per biennium sibi sanus vilus est æger.

Mense Novembris anni 1768. gingivas lavando officulum tenue, oblongum absque dolore ex anteriore parte maxillæ superioris separavit : aitque æger se nunquam ibi doluisse antea : posthac autem statim intumuit, & tumens est labium superius, cui æger nihil admovit, solitos labores continuo peragens.

Mense Maii anni 1770. cum diu pluviae expositus fuisset, binis locis ulceratum est labium superius : a Medicis, Chirurgis, aniculis varia applicata sunt, sub quorum usu malum cito perpsit : accessit demum pie defunctum illustrissimum L. B. Gerardum van Svvieten, qui illum 10 Octobris 1770. ad nostrum nosocomium misit, & expensas solvit.

Totum labium superius oris, angulus sinister oris & inde labii inferioris media pars sinistra exesa, penitus consumpta erant. Ab angulo oris sinistro & labiis ulcus profundum late descendebat, usque infra marginem inferiorem partis lateralis sinistrae maxillae inferioris : dexter oris angulus pariter exesus, sed non integre consumptus : gena utraque & malarum contigua media pars ad nasum usque consumptis cute & panniculo adiposo turpi spectaculo ulcerata ; labia ulcerum multis locis dentatis excrescentiis, involutis, aperturas finium tegentibus, duris, ad faciendas in sinus, quorum quatuor in sinistra, tres in dextra gena erant, injectiones, præ rigiditate difficulter revolvendis munita sunt. Jam initio hujus anni duo ossa propria nasi sponte exciderant, foramenque reliquerant per quod exterius applicata in fauces cadunt : media pinnarum nasi pars exesa ; a symphyse maxillae superioris margo alveolaris sinister usque ad tertium molarem cariosus est : vix maxillae amplius cohaerentes primus & secundus molaris digitis facile educti, cariosi : anterioris hujus lateris dentes jam ante exciderant. Omnia hæc ulcera sive potius ex

his invicem communicantibus conflatum ulcus totum sordidum, fuscum, foetidissimum, sanie fusca diffluit. Pulsus est flaccidus, debilis, parvus, febrilis: respiratio bona: masticatio ciborum impossibilis: hinc tenuia alimenta cochleatim ipsi ingeri debent: sitis mediocris: alvus naturalis.

Deligantur ter de die omnia mucilag.

N. 5.

Datur ipsi omni tertia hora camphor. dr. β. ut 24. horarum spatio illius dr. iij. absumat.

11 Octobris omnia depurantur; foetor minuitur, dictam camphoræ dosin libenter sumit, & absque minimo incommodo fert.

12. Ubique pus tenue flavescens adest: foetor disparuit.

13. Bonum pus dant omnia ulcera, rigidi molliuntur margines & suppurant.

20 Octobris ulcus, quod ab angulo oris sinistro deorsum versus mentum & lateralem sinistram maxillæ inferioris partem omnia exederat, carnibus impletum fere integre cicatrifatum: cava ubique implentur, in facie & in multis locis cicatricum rudimenta conspiciuntur. Sinus hinc inde sub integumentis

latentes vix amplius sensibiles, & dentatæ labiorum ulceris excrescentiæ fere integre bona suppuratione consumptæ. Præfatam medicamenti dosin optime fert, & pergit libenter sumere: bene dormit, facilius deglutit, & magnum appetitum habet: omnes reliquæ functiones etiam bonæ.

25 Octobris dextrum os spongiosum nasi frustillatim emunxit: omnia cito in melius pergunt.

I Novembris cicatrifatis oris angulis & illorum vicinia, ulcereque anteriorem maxillæ superioris partem occupante firma cicatrice obducto, separataque insensibiliter carie partis sinistrae maxillæ superioris, quæ nunc hoc loco specie membranæ vestita est, panem cito & facile masticat: de ingenti appetitu conqueritur; hinc præter alia alimenta conceditur ipsi carniū esus. Pulsus manet pacatissimus, mollis, liberrimus: inferior nasi pars etiam cicatrifata est: foramen nasi superioris partem occupans clausum est: & hoc ulcus incipit cicatrifari.

Licet æger de camphora nihil conqueratur, & optime illam ferat, cum videatur sufficere nunc dosis minor;

præscribitur illi formula N. 4. & deligatio tantum bis in die instituitur.

Sic continuavimus usque ad 23. mensis Decembris, qua die ego & plures Medici mecum nosocomium frequentates omnia cicatrifata invenimus; superior autem malæ sinistræ pars est oedematosa, coloris coerulei, minime tamen etiam ab attactu rudiori dolens.

Pulsus est pacatus, sed valde plenus, solidus: capitis gravitatem præcipue vespere conqueritur: coeterum optime habet; robustus est: solitus est autumnali tempore venæ sectionem instituere, quæ hoc anno neglecta fuit: quare vena secta est, & eductus est sanguis omni nota bonus.

24 Decembris ab omni medicamento quiescit, & 25. sumit purgans.

Post hæc alacriter continuavit habere, & quotidie camphoræ dr. j. absumpsit.

18 Januarii 1771. color lividus malæ disparuit: oedema dissipatum est. Missa fit camphora: datur ipsi decoctum lignorum cum antimonio crudo; ut eo magis depuretur humorum massa, statui-musque in horum usu per sex septimanas continuandum: verum insalutato hospite initio Februarii discessit.

1 Septembris 1771. denuo ad nos rediit superiore nasi parte late ita exesa, ut ipse canthus internus oculi sinistri penitus consumptus esset, oculo toto & utraque palpebra valde inflammatis.

Ab angulo oris dextro ulcus ad labium anterius ossis maxillæ inferioris descendens, sinistrorsum supra mentum usque ad partem lateralem sinistram maxillæ extensum ita profunde omnia exederat, ut residua labii inferioris pars continuo videretur excisura: genæ hinc inde levioribus ulceribus occupatæ erant. Pulsus ut prima vice erat mollis, flaccidus, parvus, debilis: reliquæ functiones utcumque bonæ.

Eodem medicamento ac ante deligata sunt omnia, & jussi ut de camphora ipsi daret assistens meus, quantum absque incommodo ferre posset: metuebam enim jacturam oculi & labii inferioris ac alia teterrima mala, si serpentibus ulceribus non statim ponerentur limites.

Data est ipsi omni bihorio camphor. dr. β. donec ea die unc. β. absumpserit: noctu bene dormivit.

2 Septembris inflammatio oculi & palpebrarum minor: non serpunt ul-

cera : datur eadem medicamenti dosi ac heri, quam avide sumit.

3. Septembris ulcera multo pure bono tecta sunt ; hodie iterum camphoræ unc. β . absomit, pulsus est minus flaccidus, pacatissimus, minime irritatus, qualem 4. Septembris cum pie defuncto Illustrissimo L. B. Gerardo *van Swieten* plures doctissimi Medici & Chirurgi invenerunt ; erat ubique magna & optima suppuratio ; labium inferius, carnibus in cavitate ulceris menti jam incipientibus recrefcere, minus vacillabat, quare camphoræ tantum dr. iij. impofterum ægro quotidie datæ sunt, qui ultra unc. β . per diem sumpfisset, si ipsi porrecta fuisset major dosi.

Quatuor primis diebus quater quinquies in die alvum copiosam deiecit ; quæ dein facta est naturalis, 8. Septembris inflammatio oculi & palpebrarum disparuerat.

Elapsis a suo in nosocomium reditu, binis mensibus ulcera carne impleta denovo cicatrice, exceptis tribus parvis plagis, lentis magnitudine genam sinistram occupantibus, obducta erant.

Æger dr. iij. camphoræ quotidie usque ad 16. Novembris absumpsit, quademum ab illa iterum abstinuit. Pulsus

erat tunc plenus, solidus, dilatatus, naturales omnes functiones; ob consuetudinem vena secta sanguis optimus eductus est, & ab omni medicamento usque ad initium Decembris abstinuit; dein sanguinem depurantibus medicamentis denuo incoepimus uti, continuaturi diu.

Sub finem Decembris fit morosus homo, quod tam diu in nosocomio detineatur, & initio Januarii 1772. me inscio discessit, egregie quidem valens, sed binis parvis lenticularibus plagis genam sinistram occupantibus nondum integre cicatrifatis.

CASUS DECIMUS QUARTUS.

FEMINA 60. annorum, valde torosa menstruis, quæ prima vice illi 13. annos natæ eruperant, & quamdiu durarunt sat regularia semper fluxere, jam a 20. annis orba, post exantlatam circa vigesimum ætatis annum febrim putridam exanthematicam crure dextro incoepit per intervalla dolere, quod brevi mole parum auctum est, & varicibus,

vesiculisque aqua plenis, sæpe renascentibus affectum.

Emanentibus menstruis, demum in parte interna paulo supra malleolum exulceratum est crus, cum quo per 20. annos vitam doloribus & incommodis plenam duxit.

Anno 1769. crus incoepit mole valde augeri, & ulcus in omnem dimensionem extendi, quibus sensim incrementum capientibus, femina præ doloribus & pondere cruris ad omnem motum inepta, reddita ad nostrum nosocomium circa medium Octobrem anni 1770. delata est.

Crus erat durissimum, lividum, monstrose molle: femur minus durum, coloris naturalis multum quoque tumebat. Ulcus inferiorem internam cruris partem occupans, cavo suo magnum pugnum virilem capere facile potuisset, totum fuscum, saniem foetidam fundens, valde dolorificum, marginibus callosis, crenatis. Cæterum sat bene habebat femina.

Ægræ levamen adferendi, & quid in tam antiquo & difficili morbo possit camphora, experiendi cupidus, ejusdem dr. j. per diem absumendam, exhibito prius purgante, feminae pulsum

mollem , parvum , debilem habenti præscripsi , jussique ut ulcus saturata mucilagine camphorata deligetur; tribus diebus elapsis , totum ulcus optime suppurabat , sublati integre doloribus præscribitur illi formula N. 3. id est camphoræ dr. j. β. per diem.

Hac methodo ad 13. Decembris continuata , crus multum mollitum est ; cavitas ulceris ultra mediam partem renatis carnibus impleta , marginibus mollitis æqualibus.

Ob tarditatem alvi & abdominis tensionem datur purgans quod vix operatur.

14. Decembris abstinet a camphoræ & datur ipsi sequens enema :

℞. Gum. arab. unc. j.
solv. in aq. pur. lib. j.
dein terendo admisce.
camph. unc. β.

Tepide quotidie injiciatur.

Prima die semel, ij. ter, iiij. quinquies post enema , quod plerumque ultra bihorium absque minimo incommodo retinet , valde copiosas fæces excrevit ; ut tamen adhuc diutius retineatur , postea laudani puri gr. j. semper additur.

Hoc modo enemata adhuc per 9. dies

continuata sunt , quo tempore ægra absque virium jactura , quater , quin- quies , subinde etiam septies alvum co- piofam magno cum abdominis & cruris fere nunc ad volumen naturale redacti , collapsu exoneravit , appetitu valde aucto , pulsu solido , molli , minus de- bili , magis dilatato & reliquis functio- nibus bonis.

Sub horum enæmatum usu , nec mi- nimum incommodum passa est ægra.

26. Decembris denuo incipit cam- phoræ dr. j. β. sumere , & ulcus solito modo continuat deligari.

28. Januarii , anni 1771. superficies ulceris marginibus æqualis est ; hinc inde cicatricis rudimenta conspiciuntur , nullus amplius in carnibus & integu- mentis tumor ; ossa vero sunt paulo crassiora , quam in sinistro crure.

Continuatur camphoræ usus ; inter- polato subinde purgante.

Initio Martii totum latum ulcus ex- cepta parte centrali floreni magnitudine cicatrice obductum est. Hucusque sump- ta camphor dr. j. β. ægræ nec minimum incommodum causavit ; illam autem nunc nauseat ; illius usui interno super- sedetur , & superiori cruri incisione fac- ta , forficulus paratur.

Adhuc parum minuta est ulceris superficies, quod licet eodem modo ac ante deligatum, integre cicatrice non fuit abductum. Ex nosocomio sub finem Maii anni 1771. hæc femina sanissima dimissa est.

CASUS DECIMUS QUINTUS:

VINITOR 27. annos, natus, torosus, robustus 29. Novembris asserens navis fractæ ex loco aquis inundato exportaturus in aquam descendit, in clavum pede sinistro impingit, qui inter ossa metatarsi digiti minimi & vicini pedem perforat, alte in dorso pedis extans domum pedes absque dolore redit; nihil applicat; sequenti demum die pes incipit intumescere, dolere. Auctus sensim tumor & dolor totum crus occupat.

4. Decembris omnia sunt livida, frigida, sensu privata; Advocatus Balneator credit omnia perditâ, nihil applicat.

5. Decembris ad nostrum nosocomium curru vectus advenit.

Crus totum & pes, ut prius jam dic-

tum , valde tumida , plumbea , frigida , insensilia , excepta parte popliti vicina sensu adhuc prædita ; valde debilis est æger , respiratio lenta , tarda , laboriosa , pulsus debilis , parvus , flaccidus , creberrimus , inæqualis , irregularis ; oculi luridi : cutis faciei collapsæ , tristis , ut & reliqui corporis , fordida , quasi pulvere fusco conspersa.

Digitus minimus jam totus putrefactus cultro a pede separatur ; pes scarificatur & mucilag. N. 5. sicut totum crus omni trihorio tepide deligatur , datur ipsi omni 4. hora camphor. scr. j. sumendus.

6. Decembris respiratio paulo minus laboriosa videtur , & pulsus minus flaccidus ; cæterum nulla mutatio.

7. Crus multum detumuit ; livor illius minutus est , tepescit ; sensus adhuc abest.

Pes multum collapsus , lividus adhuc est , caloris & sensus expers ; partes scarificatæ humectantur ; faniem fundunt , respiratio adhuc melior quam heri , pulsus solidescit , minus debilis est. Dantur omni 4. hora camphoræ gr. xxv.

8. Nulla mutatio ; ob alvum a triduo

stipatam datur enema oleosum quod multas fœces solidas educit.

9. Decembris aliquis sensus in crus & pedem redit; sensim magis collabuntur; omnia calent; livor disparuit; loca scarificata magis humida; cutis sordities disparet; vires eriguntur; nullum a camphora incommodum; hinc illius dr. β. omni 4. hora sumat.

10. Crus coloris fere naturalis, fere integre collapsum est; calet, valde dolet, pes quoque calidus, valde dolorificus est, saniem mucilaginosam fundit; pulsus est solidus, sat fortis, plenus, minus frequens; respiratio libera.

11. Decembris loca pedis scarificata parum puris diluti dant; reliqua, ut heri; æger tamen melius dormit, & alvum sponte quotidie deponit.

12. Suppuratio major fit in pede, dolores in crure cessarunt.

13. Pes valde suppurat, adhuc multum dolet, pus est dilutum, cinereum, deligetur postea eodem medicamento tantum bis de die, & cruri optime habenti nihil amplius applicetur.

14. Magna est suppuratio, pus paulo melius.

15. Pus copiosum, album, spissum

in locis scarificatis adest, vix amplius dolet pes, camphoræ magnam hanc dosin optime fert.

16. Decembris noctu optime dormivit, suppuratio ut heri, dolor vix ullus, appetitus magnus, pulsus omni nota bonus, reliquæ functiones omnes optime procedentes, media ossis metatarsi digito minimo respondentis pars cariota est.

20. Decembris omnia optime procedunt, famem conqueritur æger, conceditur ipsi carniū facilis digestionis esus, & continuat camphor. dr. iij. quotidie absumere.

29. Decembris, quæ cariota erat ossis metatarsi pars, hodie sponte separata est, ulcus dorsi pedis, separatis vel consumptis omnibus heterogeneis, purum est, & circumquaque incipit cicatrifari, omnes functiones bonæ sunt, vires crescunt, æger pergit nyctemerū spatio camphoræ dr. iij. absumere.

18. Januarii anni 1771. hucusque continuavit æger camphoræ dr. iij. sumere, illam nunc nauseat, duæ tertiæ ulceris partes cicatrifatæ sunt, usui interno camphoræ supersedetur, & continuatur externa illius applicatio.

14. Februarii febris petechiali epide-

mica tunc temporis valde grassante corripitur, tertia morbi die jam eruperant petechiæ rubræ fuscis intermixtis: 6. morbi die suppuratio in ulcere minus bona, ulcus dilatatur; loco aliorum medicamentorum, quibus in hoc morbo hucusque usus est, datur ipsi quotidie camphoræ dr. j. & ulcus pulvere camphoræ superpositis desuper plumaceolis siccis totum dense tegitur, sicque jam sequenti die suppuratio melior erat, nec amplius postea aucta est ulceris superficies.

10. Morbi die vix non omnes disparuerant petechiæ, & æger inde valde anxius & debilis factus est.

11. Morbi die subito omnia symptomata disparuere, æger videtur curatus, verum ecce apparet macula in externo inferiori labii inferioris parte ad radices dentium incisiorum faba majori amplior, livida, in os usque penetrans, quæ cito aucta mariani magnitudinem eadem adhuc die æquavit, & pars marginis alveolaris cum dentibus mento respondens ad 9. circiter linearum longitudinem nigra est, dum interea æger bene habens de exantlato morbo valde gaudet.

Deligantur omnia mucilag. N. 5. &

dantur ægro camphor. dr. ij. per diem sexpartita dosi sumendæ.

Sic tridui spatium illa gangræna penitus separata est, carnes deperditæ sensim reparatæ fuerunt; 8. Martii ulcus cicatrice jam incipiebat obduci, & ante finem Martii penitus cicatrifatum est, pes quoque perfecta cicatrice obductus est, æger a medicamentis abstinere.

Circa medium Aprilis nobis invitis, vacillante jam ossis parte corrupta, ex nosocomio discessit, laboribus suis rusticis operam daturus.

CASUS DECIMUS SEXTUS.

FEMINA 40. annos nata, menstrua semper pauca & irregularia habuit, a juventute colore cachectico deturpata, scorbutica, frequentibus artuum doloribus obnoxia, crus dextrum a duodecim annis ulceratum habens, laboribus domesticis utcumque semper suffecit: donec 3. Decembris per plateas incedens currus raptim prætervecti rota in crus ulceratum impingente in terram violenter præcipitata fuerit, unde statim ingentes dolores urentes, lancinantes totum crus & femur occuparunt.

Accesserunt frequentes horripilationes, calores, sitis; & deletus est appetitus. Crus cito intumuit, rubuit: 6. Decembris lividum factum est, & ulcus incoepit siccescere, nigrum fieri.

10. Decembris anni 1770. illam curandam suscepi. Ulcus quatuor digitos transversos latum, totum crus paulo superius malleolis cingebat, gangræna nigra circumquaque occupatum hinc inde paucam saniem fuscam fundens. Crus valde tumidum, lividum, frigidum, paulo fortius pressum multum dolebat, faciei fordida cutis, oculi luridi, humidi: respiratio crebra, frequenter inæqualis, pulsus creberrimus, flaccidus, lingua humida, livescens, sitis multa, sudor frequens, copiosus. Totum crus & ulcus mucilagine N. 5. deligatur, & ægra quadripartita dosi camphor. dr. j. quotidie incipit absumere.

11. Decembris crus valde dolet, collabatur, minus lividum est, calet: gangræna separatur, functiones vitales videntur in melius mutari.

12. Decembris gangræna integre separata ulcus purum est, dolores cruris valde leniti, sitis vix ulla; facies & oculi meliores, respiratio optima, pul-

sus solidus, dilatatus, sat fortis, apyretos, noctu fere per tres horas sat pacate dormivit, alvus cocta mane sponte secessit, sudor multum minutus.

13. Decembris totum ulcus optimum pus dat, crus coloris naturalis fere integre collapsum, reliqua ut heri.

16. Decembris, omnia optime pergunt, appetitui renato major ciborum copia conceditur.

20. Decembris, ulceris optime suppurantis superficies marginibus æqualis est, jam adsunt cicatricis rudimenta. Continuat camphor. dr. j. quotidie sumere, & jam a quatuor diebus tantum bis de die, eodem ac ante, medicamento deligatur, sudor nullus: omnes functiones bonæ.

18. Januarii, tota posterior & lateralis ulceris pars bona cicatrice obducta est: & antea magnos progressus facit cicatrificatio: ægra optime habens a camphoræ, quam optime tulit, usu interno abstinet: deligatio continuatur, ut ante.

10. Martii omnia cicatrificata, excepta plaga medii floreni magnitudine, cicatrix jam ab initio hujus mensis non pergit ulterius: quare hoc parvum ulcus

remaneat , mundetur diligenter , & ægra diæta vegetabili , quantum fieri potest , utatur.

CASUS DECIMUS SEPTIMUS.

PUELLA rustica 26. annos nata , sanguinei temperamenti , torosa , robusta , post exantlatum in infantia morbum variolosum & morbillosum semper sana , menstruis debite semper gavisa , ante quatuor annos feбри putrida , qua multi in suo & vicinis pagis mortui sunt , correpta est.

Finito morbo intumuit pes dexter circa malleolos usque ad suram absque dolore. Hic tumor permanfit : menstrua denuo debitam periodum servarunt , & ægra sana vixit , laboribus egregie exercitata.

Mense Augusti anni elapsi in paludosum locum , aqua stagnante plenum , descendit gramen procerum ibi crescens collectura : in palude stanti visus est sibi momorsus fuisse circa malleolum internum pes dexter , qui ab eo tempore incoepit dolere & sensim cum parte inferiore cruris mole magis auctus brevi infra malleolum exulceratus est.

Malum ad omnia applicata semper fuit exacerbatum, quare sub finem Septembris anni 1770. egregium Chirurgum in ipsius vicinia degentem advocavit puellæ herus, qui per tres menses optima medicamenta solventia, antiseptica & ipsum corticem peruvianum in & externe applicuit: sub quorum usu ulcus foetidissimum evasit, & omnia continuarent in pejus ruere: quare de cura puellæ desperans, illam curru ad nostrum nosocomium 17. Decembris anni 1770. advexit, & totam morbi historiam nobis enarravit.

A media fura usque ad plantam pedis omnia tumore fuscescente, magno, dolente, elastico, circumquaque distenta sunt: internam cruris partem ulcus, cujus centrum supra malleolum est, occupat cancrosum, in fungum solidum, nigrescentem, alte elevatum: margines callosi, retorridi sunt, & totum ulceris ambitum phlyctenæ magnæ, nigæ, sanie atra plenæ occupant.

Respiratio valde inæqualis, irregularis, celeris, crebra, sublimis, modo etiam profundior, anxia semper: dextra carpi arteria tenuissima, quasi membrana constans, flaccidissima videtur aerem tantum vehere. Pulsus subinde tensus, creberrimus,

creberrimus, celerrimus: ut intra horæ minutum 130. pulsationes numeraverim, nec omnes numerando assequi potuerim: in sinistro brachio arteria plenior aliquam soliditatem absque tensione servat: sitis multa: lingua fordibus cinereis obsita: facies fuligine conspersa: oculi luridi, tristes: decubitus supinus: sudores copiosi, tenues, fere continui.

Quinta vespertina incipit omni quadrihorio camphoræ scr. j. sumere: & omnia mucilag. N. 5. deligantur: apparatu omni tertia quartave hora renovando, nox sequitur inquieta.

18. Decembris, ulcus minus foetet: respiratio videtur paulo melior: camphoram bene fert. Circa meridiem incipit illius dr. β. omni quarta hora sumere.

19. Respiratio tantum majori frequentia peccat. Pulsus solidescit, minus præcipitatus est: ulcus multum saniei fundit: nigredo nulla: dolor in ulcere & crure magnus.

20. Decembris ulcus totum, excepta media parte fungi, pus dilutum, flavum dat: foetor omnis disparuit: in parte posteriori ulceris prope marginem separatis gangrænosus subjacentibus profundum cavum, ovum calumbinum facile capere potens, in quo tendo de-

nudatus oculis patet, factum est: prope marginem inferiorem versus tibiam fungus speciem cartilaginis mobilis duarum fabarum basibus suis connexarum magnitudine includere videtur: labia ulceris molliuntur: minus retorrida fiunt. Nox fuit pacatior; facies & oculi naturales; lingua pura; sitis nulla; vires eriguntur; respiratio est fere naturalis; pulsus est solidus, mollis, plenus, liber, & 94. pulsationibus horæ minutum absolvit; urina bona; alvus naturalis & appetitus redit; cutis mollis, perspirans; sudor rarus & paucus.

21. Decembris omnia bene pergunt, pulsus 83. pulsationes intra horæ minutum habet.

22. Decembris posterior labii ulceris huc usque retorridi, exterius fungosi, intus durissimi pars suppuratione multa incipit consumi, suppurat quoque tota fungosa ulceris excrecentia. Pulsus dilatatus, regularis, solidus, 80. pulsationes intra horæ minutum habet: respiratio optima: cutis mollis: sudor nullus: vespere post assumptum medicamentum capitis gravitatem & vertiginem conqueritur: hinc tantum camphoræ scr. j. omni quarta hora datur.

25. Decembris, omni nocte sat bene

per plures horas dormit : crus & pes detumuerunt , colore naturali prædita sunt : labium posterius ulceris suppuratione penitus consumptum est : circumcirca suppuratio bona est , quæ supra fungosam excrescentiam disparuit : sub illa autem serpens suppuratio partem unam fungositatis post alteram formam membranularum flaccidarum separat : cartilago antedicta in fragmentula cylindrica tangentem digitum pungentia , flexilia , acicularum figura , N. 12. vel 13. diffiliit.

Ægra pergit quoad omnia semper melius habere.

28. Decembris, foramen antea dictum prope labium posterius ulceris superficiem renatis carnibus æquale est : sed separato fungoso aliud hodie in parte anteriori inferiori ulceris , quod nucem juglandem capere posset , adest , ubique suppurans : huic foramini superius adjacent duo tubera mediam nucem juglandem æquantia , unum album , molle : aliud carneæ soliditatis rubellum , fungositas ulceris superficiem tegens. continuat suppuratione , subtus serpente lamellatim separari : labia antea retractorida fere in toto ulceris ambitu consumpta.

2. Januarii labiis ulceris penitus consumptis cicatrix nascens circumquaque conspicitur: fungositas ulceris integre separata est: tota ulceris superficies pus fat spissum, sed flavescens dat. Ægra post assumptam camphoram angitur: vertiginosa fit. Pulsus habet hominis plethorici, bene habentis: omnes functiones sunt sanæ: abstinet a camphoræ interno usu, quæ externe ut ante continuat applicari.

10. Januarii, cicatrix circum ulcus nata jam ad tres lineas versus ulceris centrum se extendit: media ulceris pars excrescit; omnes functiones bonæ, datur quotidie enema N. 6.

Continuat enemate uti usque ad 19. Januarii: alvus deponitur quotidie ter, quater, non obstante addito laudani puri. gr. j. ulcus in medio continuat parum excrescere, & cicatrix non augetur; quoad reliqua sanissima est ægra; missum fit enema.

Applicatur vespere ulceri pulveris camphoræ densum stratum & plumaceolis ficcis tegitur: jubetque Dominus Wallner ut aliquis ex suis ægræ adstet, qui illum moneat, si ægra vel nimio dolore vel aliquo alio malo symptomate corripiatur, ut statim omnia auferantur;

verum ægra, nunquam doloris a multo tempore expers, per mediam horam grati caloris sensum passa, placide obdormivit: somnusque ultra novem horas protractus est sequenti die optima in ulcere, & multo copiosior solito aderat suppuratio sic quotidie semel deligatur ægra. Cavitas antedicta sensim impletur: tubercula consumuntur: cicatrix, pergente magna suppuratione, cito augetur, & 15. Februarii ulcus perfecte cicatrifatum est. Initio Martii menstrua debita quantitate denuo fluxere & puella sanissima paulo post discessit.

CASUS DECIMUS OCTAVUS.

PUELLÆ 22. annorum 15. ætatis anno prima vice menstrua erupere, quæ semper irregularia fluxerunt.

19. Ætatis annum agens, acuta febris correpta diu decubuit: ac anno 1769. circa medium Maii febris intermittente irregulari, modo quotidiana, modo tertiana, incoepit laborare, quæ sub finem Julii sponte cessavit, & ab eo tempore puella minus bene habuit.

Mense Maii hujus anni febris tertiana regularis illam invasit: cujus per-

tæsa post tertium paroxysmum piper pulverisatum vino dilutum hausit : ab hoc pulvere violenter & sæpe vomuit , & emanfit febris : sed ab eo tempore omni septimana bis , terve parvas narium hæmorrhogias passa est.

13. Decembris in tumore ovum galinaceum æquante , cujus originis tempus ignorat ægra ; & circa arcum 4. & 5. Costæ veræ postrosum situs est , incoëpit tensionem & dolorem leniter pungentem pati ; dolor hic cito valde augetur. 15. Decembris post meridiem accessit magnum frigus cum valido tremore , quæ per quatuor horas durarunt , & locum fecerunt calori urenti , qui circa matutinum tempus lenior evasit.

16. Decembris ad nos defertur : febris est sat magna , respiratio frequens , celeris : totum pectoris latus sinistrum tensum , rubrum , dolens : tumor arcum costarum occupans in apicem elevatur , mollitur. Dantur decocta demulcentia & toto sinistro lateri applicatur cataplasma emolliens : sic 17. & 18. continuatur.

19. Manifesta in tumore toto molli adest fluctuatio : tensio & rubor circumjacentium integumentorum disparuit : respiratio melior : febris ut ante :

aperitur tumor : effluit ingens copia puris viridis , tenuis , foetidi , quod a sterno ad cavum subaxillare & circa mammam fere usque ad claviculam sub integumentis ingentem - sinum fecit.

Datur cortex peruvianus : fiunt injectiones ex decocto corticis peruviani , aliis antisepticis & depurantibus usque ad 27. Decembris : inde nihil in melius mutatur : materies effluens æque mala ac ante : febris eadem : pulsus est mollis cum aliqua tensione , videturque subinde fere vacuus.

27. Decembris missa fiunt priora medicamenta : dantur ægræ quater in die camphor. gr. xv. in sinum injicitur mucilago N. 5. & integumenta linteis eadem mucilagine imprægnatis teguntur : id bis in die repetitur.

Ab usu camphoræ jam prima die dolores valde leniti , & 29. Decembris ex ulcere & sinibus pus spissum , album , inodorum exit.

5. Januarii 1771. appetitus viget : sitis nulla : pulsus & respiratio sat naturales : dolor nullus , nisi sub deligatione : somnus melior , quam ante ; reliquæ functiones bonæ.

7. Januarii circumquaque minuitur sinus , & pergit optimum pus dare.

488. *Camphoræ Vires.*

18. Januarii de sinu nihil superest :
ulcus coalescit : color cutis melior ,
vividior : continuat eandem , ac ante ,
camphoræ dosin sumere.

28. Januarii ulcus coaluit : puella
quoad omnia sana est , & paulo post
ad solitos labores redit.

CASUS DECIMUS NONUS.

ILLUSTRIS & antiquissimæ Profagiæ vir
quadraginta aliquot annos natus , a 21.
annis militiæ operam dans , morbis ve-
nereis sæpe affectus , mercurio varie
applicato semper , saltem apparenter
curatus , sub finem Januarii anni 1771.
curat me vocari.

Refert sibi ante sesqui-annum in
superiori dextra nasi parte sponte eru-
pisse pustulam , quæ scalpendo irritata
statim incoepit in fungum excrecere.

Advocatus Chirurgus excitata per
frictiones mercuriales salivatione & la-
pidis infernalis applicatione malum au-
ferre conatus est : verum inde irritatum
citius excrevit , nulli medicamento ce-
dens : quare 14. Julii anni 1770. a
doctissimo & expertissimo Chirurgo
amputatus est tumor : ulcus autem nullis

medicamentis potuit ad cicatricem duci, & incoepit denuo excrescere, incassumque fuere omnia, quæ postea applicuit.

Dum illum in curam suscepi, pedunculo brevi, cujus circumferentia duodecim lineas æquabat, massa cancrofa, fusca, undequaque ulcerata saniem acrem fundens nucis juglandis magnitudine infidebat: integumenta adjacentia ad trium quatuorve linearum latitudinem erosa erant. Cœterum æger, torosus, viribus optimis gaudebat, pulsus sat plenus, fortis, liber, minime febrilis.

Camphoram quacumque forma datam dosi etiam valde remissa non tulit: aiebat sibi post quamlibet dosin caput tendi, rigidum & vertiginosum fieri: hinc sola externa mucilag. N. 5. applicatione curam tentare coacti fuimus.

Tertia die ab applicatione medicamenti, optima ubique suppuratio aderat, quæ absque interruptione continuavit.

26. Februarii, ulcus integumentorum circum excrescentiam cancrofam coaluerat: hæc autem licet continuo suppurans lente minuebatur: quare vocatus expertissimus Wallner, nosocomii nostri Chirurgus ordinarius, cum

domino Liegle ordinario ægri Chirurgo, ægrum invisit. Crassis linteis carptis convolutis speciem chordæ laxæ fecit, quam mucilagine camphorata imprægnata latum pedunculum ligavit: chorda hæc quotidie mucilagine camphorata humectata sensim quotidie magis constricta est: pedunculus & inferior fungi pars multum copiosa suppuratione consumpta sunt, & 16. Martii tota massa excidit superius gangrænosa facta, & ulcus reliquit mariano majus, cui quotidie semel densus inspergitur camphoræ pulvis, superposito desuper plumaceolo sicco.

Hac methodo ante finem Aprilis perfecta & firma cicatrice obductum est ulcus, & hucusque manet curatum.

CASUS VIGESIMUS.

VIGES. TERT. Annorum juvenis 24. Februarii anni 1771. ad nos delatus est.

Quantum ex ipsius narratione colligere potui, 12. erat febris petechialis epidemicæ dies, quam in itinere ex Austria superiori Viennam versus contraxerat: totum pedem dextrum circum nonum morbi diem livor, insensibilitas

subito occupaverant : omnes pedis digiti gangræna nigra , sicca affecti erant & tantum supra malleolos calor & sensus aderant. Totum corpus petechiis nigris oblitum erat : arteria flaccida , fere vacua , lente & cum debilitate digitum ferebat : respiratio videbatur naturalis.

Datur ipsi omni bihorio diei camphor. scr. j. ut quotidie dr. ij. absumat , & totus pes mucilag. N. 5. diligenter fovetur.

25. Februarii color pedis minus lividus , pulsus minus flaccidus.

26. Dolores in dorso pedis conquiritur , digiti hinc inde saniem fundunt , pulsus sensim melioratur , multæ petechiæ colorem rubrum induunt , faciei & oculorum color nitidior , alvus & urinæ naturales.

27. Omnes digiti multa sanie hinc inde pure mixta diffuunt , ultimæ phalanges digiti minimi , vicini & pollicis nigrae . totus pes dolet , calet , coloris naturalis est , pulsus solidescit , vires acquirit , fere omnes petechiæ flavent.

28. In omnibus digitis nigredo disparuit , adest magna suppuratio , omnia sensim continuant in melius verti.

2. Martii multæ petechiæ disparuere , reliquæ omnes pallefcunt ; pulsus est sat

plenus & fortis, solidus, pacatissimus, reliquæ functiones bonæ.

14. Martii, ultima phalanx digiti minimi & vicini sponte exciderunt, & levi adhibita vi remedia pars phalangis ultimæ pollicis separata est, æger optime habet, nauseat camphoram, atque ab illa sibi caput grave fieri, hinc dentur tantum quater in die illius gr. xv. quæ iterum libenter sumit, valde appetit, quare præter alia alimenta carnes ipsi conceduntur.

29. Martii, secundus & tertius digitus cicatrice obducti sunt, reliqui optime continuantes suppurare, incipiunt cicatrifari. Missus fit internus camphoræ usus, & datur omni octiduo lene purgans; deligatio fit ut ante.

20. Aprilis omnes digii, except pollice, cicatrice obducti.

10. Maii omnia cicatrifata sunt, & æger optime habens brevi post dimissus est.

CASUS VIGESIMUS PRIMUS.

PISTOR torosus, robustus, 28. circiter annos natus, circa medium Januarii anni 1771. in superiori externa dextri

cruris parte phlegmone correptus est, quæ in suppurationem abiit, diu malum flocci fecit robustus homo, donec incedere non amplius potens ad aliquod hujus civitatis nosocomium sub finem Februarii curavit se deferri, ubi 2. Martii, facta superius prope genu incisione, apertus abscessus multum puris tenuis, flavi dedit, apertura post 10. vel 12. dies coaluit, & inde exivit, crure adhuc tumido, tenso, debili.

Solitos labores denuo aggressus est, & utcumque peregit usque ad 26. Martii ejusdem anni, qua faccum magnum farina plenum humeris portans subito circa articulationem ossium cruris dextri cum ossibus tarfi omnia integumenta disrupta sunt, unde in terram cum onere suo cecidit.

Varia curavit applicari herus illius per 4. dies absque effectu, & rebus ad pessimum statum reductis illum trigesima Martii ad nostrum nosocomium transferri curavit.

Circum totam cruris cum tarso articulationem omnes tendines, & etiam ipse tendo achillis ad trium digitorum transversorum latitudinem nudi, laxi, elevato crure pes in omnem partem collabebatur, quasi tantum filis laxis elon-

gatis cruri adhuc hærens, crus & pes valde tumida, livida, pes insensibilis, frigidus; crus adhuc parum calet, & attactum percipit: ulcus circumquaque nigram faniem fundens supra malleolum externum apertura erat communicans cum sinu per totum crus, excepta parte posteriore interna pollicem lata, sub integumentis fere usque ad genu decurrente & ichorem foetidum fundente.

Respiratio est lenta, tarda, inæqualis, arteria tenuis, quasi aerem rarefactum continere videtur, pulsus est lentus, tardus, debilis, inæqualis: color faciei & reliquæ cutis sordidus, fuliginosus: oculi languidi, luridi.

De ægro actum esse credimus omnes, datur tamen omni trihorio camphoræ dr. β. ut dr. ij. in die absumat, totus sinus cruris, quod exterius fomento antiseptico diligenter foveri jubetur, mucilagine N. 5. impletur: ulcus & pes eadem mucilagine sæpius renovanda teguntur.

31. Martii nil in deterius vertitur, imo respiratio melior videtur.

1. Aprilis livor cruris & pedis disparuit, nigra ab ulcere separantur, ex sinu cruris pus effluit, vix amplius foetens, tenue tamen adhuc & flavum.

Respiratio æqualis, pulsus paulo melior est.

2. Aprilis, ulcus purum est, hinc inde suppurat, sinus cruris sensim pus melius dat, tumor cruris & pedis minuitur, calor & sensus in pedem redeunt, facies & oculi vividiores, nitidiores. Alvum coctam sponte deposuit, pulsus solidescit, vires acquirit, magis æqualis est, minime febrilis. Fomenta continentur, injectio & deligatio cum mucilagine camphorata tantum bis in die fiant, & pergat æger quotidie camphor. dr. ij. absumere.

3. Aprilis pus copiosum, optimum ex cavo cruris effluit, ulcus optime suppurat, multæ fibræ tendinæ abscedunt, separantur, & omnia continentur in melius mutari.

6. Aprilis, sub continua optima supuratione corruptæ tendinum partes continentur febrillatim separari, carnes recrescunt, minuitur ulceris superficies, sinus cruris minus injectionis capit, pulsus impletur, solidus, æqualis est, appetitus redit, reliquæ functiones sunt naturales.

2. Aprilis, crus & pes colore & lumine omnino naturalia sunt; ulcus carnibus renatis impletum, nullus am-

plius tendo jam ab aliquot diebus oculo patet, circumcirca cicatricis rudimenta adfunt, cavum cruris vix tertiam prioris injectionis partem recipit. Omittitur fomentum, hujus loco linteis ficcis involvitur crus; ulcus more solito deligatur, pergit æger eandem camphoræ dosin sumere; ac ante.

4. Maii ulcus totum cicatrice obductum est, excepta parte illa, quæ aperturæ sinus cruris, jam fere evanidi & tantum parum puris optimi nunc dantis subjacet. A medicamento abstineat, cibi copiosiores & solidiores ipsi porrigantur.

12. Maii, omnia consolidata sunt, incipit cruri insistere.

Initio Junii sanus, optimo cruris & pedis usu gaudens dimittitur.

CASUS VIGES. SECUNDUS.

PUELLA 12. annorum, 5. Decembris 28. variolarum confluentium die ad nostrum nosocomium vespere defertur.

Frigus cadaverosum in toto corpore erat, totam faciem crusta nigra, densa, quæ jam ter exciderat, & semper renata fuerat, occupabat; totum corpus con-

fertis variolarum vestigiis profunde excavatis, sicco quasi muco obductis deturpatum, cadaveris jam putrescentis saturatissimum, foetorem spargebat, respiratio erat rara, tarda, inæqualis, stertorosa; pulsus flaccidissimus, sæpe vix perceptibilis, brevi animam efflatura creditur, quare præter gratum cardiacum & juscula nihil præscribitur.

6 Decembris, cum illam adhuc viventem & utcumque liquida deglutientem mane invenerim, jussi ut omni bihorio camphor. gr. xv. ut per diem dr. ij. absumat, porrigantur; faciei, manibus valde exesis & omnibus corporis ulceribus omni trihorio linthea mucilagine camphorata dilutiori imprægnata applicantur, interposito subinde carniuum jusculo, spiritu vitrioli acidulato.

7. Decembris videtur reviviscere; dictam camphoræ dosin facile sumit, & bene fert.

8. Decembris totum corpus naturalis calor pervasit, nec minimus foetor amplius observatur: omnia ulcera optimo pure scatent, stertor disparuit: pulsus & respiratio sensim meliores fiunt, crustæ omnes deciderunt.

11. Decembris, ulcera manuum cicatrifata sunt, magna pars faciei jam

cicatrice obducitur, reliqua optime suppurant, pulsus est sat plenus, solidus, liber, æqualis, respiratio optima, sola se in lecto erigit, iuscula acidula nauseat: hinc acidum omittatur & sumat tantum sexies in die camphor. gr. x.

18. Omnia continuo in melius vergunt, abstineat a medicamento.

25. Decembris omnia ubique ulcera cicatrice obducta sunt, optime valet; per cubiculum deambulat, functiones omnes optimæ, conceduntur ipsi carnes.

Cum utroque parente orbata esset, servata est in nosocomio per binos menses, ubi semper bene habuit, & postea sanam aliqua civis misericordia mota suscepit.

CASUS VIGES. TERTIUS.

LOTHARINGA femina, 2. Decembris anni 1771, ad nostrum nosocomium cum puella ægrotante, nondum quartum ætatis annum emensa, venit.

15. Dies erat ex quo cum frigore anxietate & subsequente calore, postea continuo, incoeperat ægrotare.

Quarta morbi die variolæ discretæ

confertim per totum corpus eruperunt.

Navi Viennam septima morbi die advecta ægra diu noctuque subdio aeri frigido & humido absque ullo auxilio exposita fuit, & 8. morbi die, omnes variolæ exceptis 14. quæ in trunco remanserunt, fere subito disparuere, parvula statim delira facta est, & quoad omnia miserrime habuit, mansit tamen absque auxilio, donec ad nos delata fuerit.

Continuabat delirium, pulsus erat mollis, valde febrilis, respiratio laboriosa, anxia, stertens, debilitas magna, totus corporis habitus tam dolens, ut ad levem attactum ejularet parvula: lingua glabra, siccissima, residuæ variolæ suppuratæ latas & profundas foveas fecerant.

Applicantur furis bina vesicantia, enemata emollientia injiciuntur, præscribuntur medicamenta demulcentia, diaphoretica, expectorantia, leniter antiseptica, quibus absque levamine per tres dies adhibitis, 5. Decembris sequens præscribitur medicamentum.

℞. Aq. flor. tiliæ unc. iv.

spirit. vitriol. gtt. xv.

cort. peruv. selectissimi.

subtilissime pulverisati dr. ij.

syrup. althææ unc. ij.

M.

S. nyctemeri spatium absumat & decocto pectorali simul utatur, sic ad 8. Decembris absque minima in melius mutatione continuavimus, imo reliquis malis symptomatibus accessit pulsus flaccescencia, magna irregularitas, & vires ita collapsæ sunt, ut morti proxima videretur, quare missis aliis medicamentis sequentem præscripsimus mixturam.

℞. Gumm. arabic. dr. ij.

solv. in aq. flor. tilia unc. iv.

dein terendo diligenter admisce

camphor. scr. iv.

fyr. capill. vener. unc. ij. β.

d. u.

Ut divisis dosibus quotidie absumat.

9. Decembris, pulsus jam minus malus est: stertor tantum per intervalla auditur, delirium minus: alvus, quæ toto tempore quo apud nos jacet, quotidie quinquies, sexies secessit, liquida, valde foetens, minus foetet, minus frequens est.

10. Decembris, pulsus solidescit, plenior fit, sat regularis est, modice tantum febrilis, disparuit stertor, respiratio faciliior, liberior est: delirium nullum, alvus naturalis est, lingua humescit;

cutis, ut ante, absque sudore mollis : sæpe bene dormit : ulcera a. variolis relicta humescunt, suppurant, teguntur parvis emplastris.

13. Omnia continuant optime procedere : vires ita crescunt, ut hodie sola se in lecto erigat, & sat diu sedens maneat : optinus est appetitus dolor totum corporis habitum antea occupans, fere integre disparuit, lingua est pura, sudor nullus, alvus naturalis. Continuat eandem medicamenti dosin sumere.

17. Decembris, omnes functiones sunt naturales, excepta excretionem alvi, quæ denuo incipit hodie frequentior fieri, missa fit camphora & alvus sibi relinquitur.

21. Decembris, alvus aquosa quotidie quinquies, sexies continuat secedere, abdomen fit dolorificum : subinde tussit ægra. Datur decoctum salab. cum bolo armena & syr. diacod. quod per 5. dies continuatum omnia ad statum pacatum naturalem reducit.

Parvula ob excedentem paupertatem & defectum azyli ultra duos menses in nosocomio servata, brevi vires recuperavit & sana mansit.

CASUS VIGESIMUS QUARTUS.

PUELLA 13. annorum, 19. Decembris mane alternantibus frigore & calore cum frequenti vomitu, capitis dolore & magna totius corporis lassitudine corripitur, circa vespervas cessante frigore & vomitu reliqua continuant symptomata, sumit emeticum, 23. ad nos defertur.

Valde debilis est: de ventriculi & capitis doloribus conqueritur, alvus est laxa, urina naturalis: lingua humida, lurida, facies & oculi tristitiam expriment. Sitis mediocris: appetitus nullus, cutis mollis, flaccida, maculis latis figuræ irregularis, fuscis obsita: inter quas multæ aliæ maculæ minores rubræ interspersæ sunt, respiratio naturalis: pulsus debilis, flaccidus, vix febrilis.

Datur infuso decoctum ex emollient. & leniter aromaticis cum spiritu vitrioli. Nox sequitur insomnis.

24. Decembris mane loco macularum rubrarum inter fuscas petechias papulæ minimæ assurgere videntur, quas variolas futuras suspicamur: pulsus est valde febrilis, debilis, fere vacuus, subinde tensus, tussicula frequens,

lingua fordida, alba, reliqua ut heri. Loco prioris medicamenti dantur illi omni bihorio camphor. gr. x. ut per diem dr. j.umat.

25. Papulæ non crescunt: petechiæ immutatae permanent: urina fusca post aliquot horas sedimen copiosum fursuraceum, flavum, flocculis lanuginosis mixtum deponit: reliqua ut heri. Dantur per diem camphor. dr. ij.

26. Variolæ discretæ milii parvi habent magnitudinem: petechiæ multæ rubent: alvus bis, ter in die laxa secedit: urina bona: lingua pura: cutis mollis, perspirans: tussis nulla: pulsus minus debilis, vix amplius febrilis, soliditatem acquisivit: facies incipit parum tumere.

27. Variolæ elewantur sphaericæ, rubentes: omnium circumferentia rubra: in facie, jam valde tumida, ut vix oculos amplius aperire possit, incipiunt suppurare: pulsus bonus, tantum 78. pulsationes intra minutum horæ habet. Petechiæ omnes rubent. Paucis, morbus variolosus stadia suppurationis & exsiccationis absque febre secundaria benignissime percurrit: & 31. Decembris de petechiis nihil amplius superfuit.

6. Januarii, ex facie, trunco & artubus superioribus crustæ omnes exci-

derunt : in artubus inferioribus pustulæ omnes exsiccantur. Missam facimus camphoram : ægra sumit lene purgans, quod 12. & 15. Januarii repetitur : omnes crustæ nullis relictis excidere foveis : puella optime habens ad suos remittitur.

CASUS VIGESIMUS QUINTUS.

PUELLA 24. annos nata, sexta Octobris 1772. ad nostrum nosocomium venit.

Prima ipsi 14. ætatis anno erupere menstrua, copiosa & regularia, donec 15. fere annos nata absque nota causa emanferint. Non diu post menstruorum cessantium periodum feбри acuta correpta est, ex qua multis ut ait venæ sectionibus & paucis assumptis medicamentis post tres circiter septimanas evasit.

Mense circiter ab exantlato morbo elapso denuo rediere menstrua copiosiora & minus regularia quam ante, utpote sæpe bis quatuor septimanarum spatio, modo per tres quatuorve, sæpius per octo dies copiose fluentia : donec viginti annos nata denuo acuto morbo affecta fuerit, à quo iterum aliquot

venæ

venæ sectionibus adhibitis & quibusdam medicamentis assumptis post tres quatuorve septimanas perfectè fuit restituta.

Post hunc ultimum morbum menstrua evacuatio irregulari tempore semper accessit, fuitque multo paucior solito: puella pinguescere coëpit, & cito valde obesa facta est.

22. Ætatis annum agenti tumor mobilis nucem juglandem æquans ipsi supra superiorem externam brachii superioris dextri partem ortus est, qui sensim mole absque dolore increvit, & quem frustra multis remediis in & externe applicatis conata est auferre.

28. Annos nata incœpit emaciari, & dum ad nos venit, valde emaciata erat, cuti residuisque carnibus per totum corpus laxissimis, pendulis: coloris cachectici flavo-viridis. Tumor magnus, mollis superiori brachio latà basi insidebat mobilis.

6. Octobris datum purgans: 7. quievit; 8. tumorem atheromatofum peritissime & cito coram celeberr. Chirurgiæ professore Leber, multis aliis Chirurgis & Medicis enucleavit expertissimus nosocomii Chirurgus Wallner. More in talibus casibus solito deligatum est vulnus: bona diæta, medicamenta de-

mulcentia , paregorica præscripta sunt.

11. Octobris nulla adhuc suppuratio : præter reliqua dantur ægræ quater de die decocti lignorum unc. iv. unguento digestivo admiscetur unguentum de styrace , & ulcus fomento corticis peruviani & aliorum antisepticorum diligenter fovetur.

15. His non obstantibus tantum serosum quid loco puris ex ulcere effluit. Datur quater de die cort. peruv. dr. j. quam difficile sumit.

20. Octobris totum ulcus gangrænescit : corticem cum nausea sumit , & subinde vomit : pulsus est valde febrilis , irregularis : respiratio crebra , celeris , anxia , &c. saturatissimo corticis peruviani decocto , cui aliæ herbæ antisepticiæ infusæ erant , deligatur ulcus , & eodem diligenter fovetur.

21. Omnia continuo in deterius vergunt ; vix amplius potest persuaderi , ut corticemumat.

22. Octobris quomodocumque datum corticem evomit : delirat : facies collapsa , sordida , fuliginosa : oculi in orbitis profunde hærent luridi , tristes : lingua nigra , aridissima : sitis nulla : decubitus supinus : respiratio valde laboriosa , crebra , irregularis , sæpe sublimis :

pulsus creberrimus, celerrimus, ut impossibile sit pulsationes numerare, summe inæqualis, irregularis, vacuus: arteria modo flaccidissima, modo leviter tensa: calor urens: summus virium collapsus: ulcus duas tertias brachii partes ambiens, cujus mensura perpendicularis ab humero versus cubitum fere quinque pollices parisinos æquat, gangræna nigra sicca totum occupatum est: totum brachium & manus valde tument.

Dantur omni trihorio camphoræ gr. xv. ut per diem dr. j. β. sumat. Ulcus linteis carptis mucilag. N. 5. fortiori imprægnatis ter de die renovandis, admoto sæpius fomento calido ter de die deligatur.

23. Respiratio videtur paulo melior.

24. Ulcus humescit: superius parum puris diluti dat: pulsationes arteriæ sunt magis distinctæ, minus præcipites: respiratio magis regularis, minus difficilis: calor blandus, non urens. Pulvere camphoræ totum ulcus tegitur applicata desuper mucilagine, apparatu bis in die renovando: & totum brachium fomento calido involvitur sæpe applicando.

25. Vespere, in superiori ulceris parte

sesqui-pollicis magnitudine magna suppuratio adest : in reliquo ulcere omnia nigra , sed humida , saniem multam fundentia : in toto ambitu ulceris rima adest , quasi cultro profunde incisa gangrænosum a sanis separans , respiratio est libera , crebrior tamen adhuc & celerior naturali : pulsus sat solidus est , liber , regularis , dilatatus , sat fortis , multo minus febrilis. Facies & oculi reviviscunt : cessavit delirium : alvus sponte deponitur cocta : cutis mollis , perspirans est.

26. Omnia separata , excepta parva plaga in parte ulceris inferiori.

27. Omnia pura optimum & copiosum pus dant : sed residua posterior integumentorum pars , ulceri respondens , consumpto panniculo adiposo a subiectis musculis tota abscedit , excepta parte media pollicem medium lata cum subjacentibus adhuc cohærente. Tendo bicipitis nudus est , & magna deltoïdis pars consumpta.

28. Pulsus solidus , mollis , liber , apyretos : respiratio naturalis : omnia in melius mutata ; pergит eandem camphoræ dosin quotidie sumere.

30. Tendinis bicipitis filamenta multa abscedunt , separantur ; omnia bene

procedunt. Cum valde magna substantiæ deperditio facta sit, denuo sola mucilag. N. 5. deligatur, ut citius renatis cãrni- bus cavum impleatur: cavitati ab abscedentibus integumentis factæ & multum suppuranti idem medicamentum immittitur.

12. Novembris, totum brachium detumuit: ulceris superficies integumentis parallela est; sed in illo tres excrescentiæ septenarii magnitudine, cinerei coloris sunt: quare plumaceolis mucilagine camphorata imbutis camphoræ stratum inspergitur, ulceri applicandum, ut bona suppuratione eo securius consumantur. Cavum inter musculos & integumenta abscedentia minuitur, purum est: nulla amplius plumaceola interponuntur, sed tantum instillatur mucilago & leni pressione sibi vicina retinentur: in superiori ulceris parte cicatrix jam incoëpta est: ægra quoad omnia in melius pergit mutari: perfecte apyretos est, & quotidie camphor. dr. j. β. absunit.

16. Novembris pes & crus sinistrum prægressa aliquot horarum febricula erysipelate cum tumore sat magno occupatur: erysipelate formato pulsus est

bonus, apyretos, nihil in methodo medendi mutatur.

23. Novembris, erysipelas & pedis ac cruris tumor fere integre disparuerunt: integumenta posteriora a carnibus separata illis iterum perfecte agglutinata sunt, & inde antrorsum cicatrix incoepit extendi: sic a posteriori externa & superiori ulceris parte sensim aucta cicatrice, ulceris superficies multum minuitur: in medio tamen videtur excrescere nimis: quare missa mucilagine, sola camphora sicca superpositis desuper plumaceolis siccis deligatur, & pergit ægra eandem, ac ante, medicamenti dosin absque minimo incommodo sumere.

4. Decembris cicatrix undique versus ulceris centrum extenditur, & ulceris apparens nimia elevatio, illa accedente, deprimitur, disparet: pes & crus naturalia sunt: color cachecticus in sanum mutatus est: carnes toto corpori augentur, firmæ sunt: vires sunt optimæ, & ægra bonam diei partem per cubiculum deambulat.

10. Decembris, heri post prandium caput grave factum est: nox fuit minus bona solito: hodie, præter capitis gravitatem, torporem conqueritur, & ait

se sensum tensionis & tumoris per totum corpus pati. Pulsus est plenus, solidus, parvus, minimè febrilis. Missus fit camphoræ internus usus. Ægræ jam in tertium mensem menstruis carenti vena in pede secatur: deligatio ulceris quod in superiori parte parva fungose excrescit, continuet, ut antè, camphora sicca fieri.

16. Decembris in superiori ulceris parte fungus mollis mediæ nucis juglandis magnitudine excrevit, cui sacrificato oleum camphoræ cum spir. nitri fortissimo paratum instillatur, illique plumaceolum eodem oleo imbutum superponitur. Reliquum ut ante deligatur: ægra denuo camphor. dr. j. cum nitri dr. β. incipit per diem sumere. Pulsus est collapsus, mollis, liber, & omnes functiones bonæ.

Ab applicatione olei camphoræ escharæ molles factæ sunt, fere sponte secedentes, & sic fungositate fere integre consumpta denuo camphora sicca
19. Decembris deligatio facta est.

26. Decembris, pulsus est pacatissimus, mollis, liber: omnes functiones bonæ: ut acceleretur ulceris cicatrifatio, denuo quotidie camphor. dr. j. β. absque nitro absument.

2. Januarii 1772. ulcus sensim magis magisque cicatrice obducitur. Datur ipsi purgans ; missus fit camphoræ internus usus ; circa medium Februarii coaluit ulcus ; optima sanitate fruitur & brevi post dimittitur.

CASUS VIGESIMUS SEXTUS.

PUELLAM 20. annorum , sanguinei temperamenti torosam , 17. Novembris 1772. in nosocomium curandam suscepimus.

Hæc puella variolas & morbillos ante pubertatem passa , alias semper sana , 16. ætatis anno menstruis prima vice gavisa est , quæ ab eo tempore sat copiose , regulariter fluxere : donec mense Junii hujus anni , fratre , ipsius uxore & tota ipsius familia morbo petechiali , quo durante custodis vices apud omnes egerat , extinctis , in magnum mœrorem lapsæ emanserit periodica mensium evacuatio , & puella eodem , quo illi , quibus inservierat , morbo putrido epidemico correpta fuerit.

Hoc morbo gravissime & diu decubuit : negligenter tractata fuit , & evasit intumescente pede sinistro : tumore cito

totum crus & femur ad coxam usque absque dolore occupante.

Sub finem Julii scabies purulenta in utraque manu & crure sinistro erupit, quæ post quindecim dies sponte disparuit, & brevi denuo erupit, aucto sensim cruris tumore, quod brevi maculis latis, cæruleis, fuscis, cito in ulcera abeuntibus notatum est, & gressus præ dolore factus est difficilior.

Ulcera tantum gluten viride tenax in fila ducendum dederunt: erant autem, dum in nosocomium suscepta fuit, horæ septem: tria superficialia in pede: quatuor profunda floreno majora, unum internam inferiorem, aliud mediam anteriorem, tertium externam, quartum internam superiorem cruris partem obsidebant; femur parum tumebat; crus valde tumidum, tensum, elasticum, frigidum, ab attactu valde dolens, colore fusco, maculis latis, cæruleis, hinc inde interspersis tinctum erat: color faciei flavofuscus: pulsus pacatus, mollis, æqualis, appetitus nullus, reliquæ functiones sat bonæ.

Data sunt illi quater in die camphoræ gr. xv. Ulceribus densum pulveris camphoræ stratum bis de die inspersum est, & totum crus & pes pannis mucilagine

camphorata vase clauso tepefacta imprægnatis, aliquoties in die renovandis, involuta sunt.

Tertia ab usu medicamenti die, crus valde collapsum erat: omnia ulcera pura suppurabant.

24. Novembris crus indolens molem & colorem naturalem denuo habet: omnia ulcera pulchre suppurant missa fit mucilago.

6. Decembris ulcera pedis & superius: internum cruris ulcus cicatrice obducta sunt: reliqua versus superficiem, assurgente fundo, optime continuant suppurare.

12. Decembris puella, quæ hucusque camphoram bene tulit, ait se heri vespere post medicamentum assumptum, multum capite incaluisse: lenes tendinum subsultus aliquoties passam esse: caput gravius esse solito. Pulsus est plenus, solidus, parvus: appetitus autem optimus & reliquæ functiones bonæ. Interno camphoræ usui supersedetur: ejus pulvere continuant deligari ulcera, & datur puellæ purgans.

19. Decembris ægra ab aliquot diebus anxietates, calores continuat pervices conqueri: pulsus ut ante: vena

hodie in brachio secta , eductus est sanguis omni nota bonus.

2. Januarii licet valde immorigera ægra a 15. diebus cruri nullo modo pepercerit , omnia ulcera coaluerunt , & ægra optime habens ex nosocomio discedit.

CASUS VIGESIMUS SEPTIMUS.

PUELLÆ 24. annorum, 15. ætatis anno prima erupere menstrua , quæ ordinario per 4. 5. dies fluentia , tempore & copia irregularia semper fuere.

A pueritia ad 18. ætatis annum , si variolas & morbillos facile exantlatos excipias, nullum morbum passa est : 18. ætatis anno febris continua , putrida sat diu decubuit , post quam usque ad 22. ætatis annum , licet menstrua æque irregularia fuerint , ac ante, sana vixit.

22. ætatis anno emanfere menstrua , fluor albus blandus adfuit continuus & in utroque inguine erupit bubo , qui nullis adhibitis medicamentis in suppurationem abiverunt , sponte aperti sunt & coaluerunt , manente fluore albo , benigno.

Ante biennium post usum balnei

aquæ dulcis frigore, lumborum doloribus & abdominis validis torminibus correpta est: multa materies fusca, tenuis, inodora ex vagina effluere incoepit: accessit vehemens cum capitis dolore & totius corporis magna lassitudine calor: vena secta, omnia symptomata cessarunt: continuavit autem fluxus materię tenuis, modo fuscę, modo viridis, minime urens: cui subinde menstrua sanguinis evacuatio sociabatur.

Sub finem Maii anni 1772. ad nos venit tota emaciata, coloris flavo viridis & ita debilis ut vix loco se movere posset. Omnes functiones læsę: hypogastrium valde dolens: materies ex genitalibus effluens copiosissima, tenuis, varie colorata, foetidissima.

Variis trium mensium spatio adhibitis magnum levamen habuit, quare credens omnia bene processura, non potuit diutius in nosocomio retineri.

Manfit per quinque septimanas extra nosocomium, & 8 Octobris rediit multo pejus habens, quam ante.

Dolores lancinantes in artubus, diu noctuque æquales, subinde recurrentes patitur: sub somno in pectore & collo multum sudat: debilissima est: tussitat: pulsus est debilis, parvus, laxus: ab

assumptis cibis angitur : cutis color valde cachecticus : hypogastrium, præcipue parte sua sinistra tumidum, tensum, durum, valde dolens : fluxus materiæ viridis fuscae copiosissimus, valde foetidus, vaginam tamen hucusque non excorians.

Omni arte usque ad 13. Decembris adhibita levamen huic miseræ adferre incassum conamur : omnia in deterius vergunt : & tantum foetorem spargit, ut fere impossibile sit illum sustinere.

13 Decembris præscribitur sequens medicamentum :

℞. Gummi. arabic. unc. β. solve in aq. pur. ℥ unc. vj. cui terendo admisce camphor. dr. vj. D. in vitro. Tepe fiat in aqua tepida vase clauso, & fiant inde mane & vespere injectiones in uterum & præter decoctum emolliens, pectorale sumat ægra quater in die camphor. gr. xv.

14 Decembris foetor multum minuitur, 15. vix foetor amplius adest : fluxus fit parcior, spissior : mollescit hypogastrium, minus dolet.

20. Decembris hypogastrium integre collapsum, molle, vix amplius dolens : foetor nullus : fluxus materiæ albescens valde paucus : sub injectionibus

518 *Camphoræ Vires.*

dolet in lumbis & medio quadrante horæ post injectiones, dolores lenes, urentes in utero patitur: dein absque dolore est: pulsus melioratur. Alvus naturalis: urina bona: appetitus nullus.

26. Decembris datur ipecacuanh. dr. ß. ob ventriculi repletionem de qua conqueritur, & inappetentiam: inde pluries vomit aquosa, pauco muco mixta: dispareret sensus repletionis: sequenti die erumpunt menstrua fuscantia, quæ per triduum pauca copia fluxerunt. Omissæ sunt hoc triduo injectiones: priorem camphoræ dosin continuavit sumere.

30. Decembris, incipit camphor. dr. j. ß. quotidie absumere: injectiones fiunt ut ante: color cachecticus in sanum mutatur: carnes renascuntur, firmiores fiunt: vires redeunt & mentis alacritas.

2 Januarii, omnia continuo in melius mutantur: appetitus est magnus. Conceditur carniū teneriorum usus: & dantur camphor. dr. ij. per diem absumendæ.

9 Januarii 1773. a camphora vertigines lenes, cito evanidas, conqueritur. Continuat bene habere: de putrido

Fluxu nihil superest. Hypogastrium molle, indolens est. In collo sex glandulæ intumescunt, & jam nucis juglandis magnitudinem adeptæ sunt. Missus fit camphoræ usus : & alia curandi via initur.

CASUS VIGES. OCTAVUS.

PUELLA 40. annorum, in pueritia a matre per plures annos frequenter pugno in nate dextra percussa fuit : ortus est inde tumor mobilis, parvus, qui sub repetitis ejusmodi percussionibus ante pubertatem jam caput infantis magnitudine æquabat.

18. ætatis anno prima ipsi erupere menstrua, quæ semper fuere pauca, valde irregularia. Hisque nunc jam a triennio penitus caret.

Post menstruorum primam eruptionem semper valetudinaria fuit : pressus tumor dolere cœpit : quare ab eo tempore, non nisi nati sinistræ insidere potuit.

Famulatu vitam sustentavit : donec tumore gangræna jam a pluribus diebus occupato & exhaustis viribus, laboribus domesticis impar malum, quod

hucusque præ pudore celaverat ; revelare coacta fuerit.

Paucis incassum adhibitis medicamentis 17 Novembris anni 1772. ad nostrum nosocomium delata est.

Gerebat tumorem atheromatofum valde crassum, ad poplitē usque descendentem, lata basi natem dextram & superiorem femoris partem occupantem, media parte inferiori lividam, frigidam : color corporis valde emaciati flavo viridis erat : magna per totum corpus laxitas : virium magna prostratio, alvus tarda : appetitus nullus : sitis mediocris : sudor frequens & multus ; pulsus tamen sat bonus, & respiratio naturalis.

Datur ipsi quater de die cortic. peruviani dr. j. Præscribitur diæta eupta, antiseptica : latus tumor antisepticiis diligenter fovetur : quibus non obstantibus gangræna sensim magis versus tumoris basin ascendit.

Vigesima Novembris expertissimus nostri nosocomii Chirurgus Dominus Wallner totam massam perfecte enucleando abstulit : & sollicite applicatis optimis medicamentis, ægra ut ante, cortice & aliis pergente uti, conatus est ad suppurationem ducere ulcus, quod 24 Novembris incoepit pus tenue dare.

A cortice valde anxia fit ægra : ait sibi omnia circa ventriculum & hypochondria constringi : frequentes habet vomendi conatus, qui, misso cortice, cito evanescunt.

1 Decembris multum suppurat ulcus : sed valde flaccida sunt omnia : pus tenue, viridescens : redditur prior corticis dosis, quam ægra repugnanter sumit : digestivo composito deligatur ulcus & desuper fomentum ex decocto corticis peruv. & aliis herbis antisepticis illi infusis paratum sæpius applicatur.

Pus his non mutatur in melius : imo 12 Decembris incipit foetere macula livida, unciam lata, sesqui-unciam longa, licet nunquam in dorsum decumbat ægra, os sacrum occupat, saturatissimo corticis peruviani decocto, cui alia antiseptica addita sunt, deligantur omnia, diligenter foventur. Usus corticis peruviani internus continuatur.

16 Decembris, omnia circum ulcus laxo tumore valde distenta : margines circumquaque nigri : ulcus 8. uncias parisinas longum, $5\frac{1}{2}$. uncias latum, quod cavitate sua caput infantis capere posset, copiosum pus valde tenue, viride, frustulis nigris mixtum, foetidissi-

mum dat : macula os sacrum occupans nigra est : ægra jam ab octiduo sudoribus frequenter diffluit. Pulsus est valde febrilis, vacuus, modo flaccidus, modo tensus, debilis : respiratio crebra, celerris, anxiosa, sæpe sublimis : lingua sicca, nigra : sitis vix ulla : oculi luridi : debilitas summa.

Dantur ægræ sexies per diem camphor. gr. xv. ulcus plumaceolis mucilag. N. 4. fortiori imprægnatis, superstrato multo camphor. pulvere deligatur, apparatu ter in die renovando : eadem mucilago muculæ nigræ ossis sacri applicatur.

17. Foetor minor : respiratio facilior : pulsus minus febrilis. Sumat ægra sexies in die camphor. scr. j.

18. Respiratio naturalis : pulsus mollis, solidus, æqualis, pacatissimus : vires meliores : lingua humida depuratur : sudor minuitur : appetitus redit ; totum ulcus & ipsius margines, excepta parte superiori adhuc gangrænosa, pus spissum, subflavum, minime foetidum dat : muscoli in fundo ulceris nudi exesi circumjacentium integumentorum tumor collabitur : loco muculæ in osse sacro ulcus adest ; quod jam aliquid puris dat.

22. Omnia pergunt optime procedere. Integumentis circumquaque penitus collapsis cavum ulceris ubique puri, optimum pus dantis valde minutum est : ulcus ossis sacri bene suppurat, implètur : vires crescunt : sudor paucior, minus frequens.

28 Decembris a quinque diebus neque de die, neque de nocte amplius sudat : pulsus volumine augetur, solidus, æqualis, fortis, minime febrilis : respiratio optima : omnes functiones bonæ : ulcus supra os sacrum cicatrifatur. Ulceris magni cavum renatis carnis impletum, marginibus fere æquale est.

9 Januarii 1773. jam a 4. diebus ex lecto surgit : robusta est, optime valet. Ulcus supra os sacrum coaluit : magnum natis ulcus, excepta parva parte mariani magnitudine, optima cicatrice obductum est : abstinet a camphoræ interno usu.

20 Februarii integre curata est : carnes & vires corpori renatæ sunt : brevi post dimittitur.



CASUS VIGESIMUS NONUS.

OPERARIUS 25. annos, natus torosus, robustus, temperamenti sanguinei, a pueritia semper sanus, morbo petechiali epidemico hoc anno, adulto jam vere, decubuit post quem optima sanitate iterum gavissus est.

Ultima Novembris noctu in fœno calente profunde sepultus noctem transegit: unde prima Decembris surgens, multum debilitatus erat, & oculus dexter multum intumuerat.

Tumorem hunc ingrato solummodo pruritu ipsi molestum per triduum neglexit: illo autem in valde magnam molem elato territus 4 Decembris ad nos venit.

Tumor palpebras valde distendens, superius ad medium dextræ partis frontis, inferius ad maxillam inferiorem usque extensus, durus, elasticus colore ex rubro fuscescente præditus erat. Pulsus mollis, liber, minime febrilis. Fomentum emolliens, resolvens ex althæa, verbasco, floribus sambuci, chamomillæ, addito sale ammoniaco diligenter

applicatur. Purgantia & alia revellentia adhibentur.

6 Decembris palpebræ nigræ sunt : reliquum tumoris lividum : tumor idem ac prius : dolor nullus. Statum oculi ob magnitudinem & tensionem tumoris palpebrarum æque parum ac ante videre possumus. Pulsus & respiratio non videntur læsæ. Reliquæ functiones bonæ.

Palpebræ hinc inde scarificantur : loca scarificata & totus tumor mucilag. N. 5. tegitur , sæpius renovanda. Dantur ægro sexies in die camphoræ gr. xv.

8. Decembris tumor collabitur : loca scarificata saniem & hinc inde aliquid puris dant.

9 Decembris loco saniei ubique in locis scarificatis pus tenue , flavescens adest.

12 Decembris linea , quasi cultro incisa in superiori orbitæ parte incœpta , supra superiorem nasi & externam malæ partem usque infra os zygomaticum descendens circulum magnum describit , & mortua integumenta a vivis separat : hinc inde cutis frustula abscedunt : tumor ubique multum collapsus : in gena & fronte color melior : oculus tamen hucusque non potest examinari.

14 Decembris cutis frustillatim con-

tinuat separari : suppuratio in locis cute orbis sat bona , copiosa : diductis palpebris oculus sanus invenitur. Omnes functiones continuant esse sat bonæ.

Gangrænosa integumenta sensim ita abscesserunt , ut 20 Decembris tantum frustulum fabam majorem anglicam magnitudine referens prope canthum oculi externum superesset , firmiter adhærens : frons naturalis ; cutis genæ viridescens consumpto panniculo adiposo a subjacentibus separata ad pollicis fere longitudinem : palpebrarum membrana interna integra : tarfi integri : inferior deorsum revolutus. Cœterum totum ulcus suppurat. Pulsus est plenus , fortis , subdurus. Capitis gravitatem conquæritur.

Tarsum palpebræ inferioris conatur Chirurgus in situ retinere : totum ulcus eadem mucilagine deligatur : vena educuntur sanguinis unc. xij. cujus insula debitæ feri quantitati innatans , optimæ consistentiæ , tenui crusta phlogistica tecta est , & æger a camphora abstinet.

22 Decembris suppuratio. ubique paucior , minus bona. Residuum gangrænosum prope canthum oculi externum immobile perstat. Dantur ægro

quotidie camphor. dr. ij. cum nitri
dr. β.

24 Decembris optima est ubique sup-
puratio : & gangrænosum in cantho
oculi residuum sensim minutum tendi-
nem tabo affecit : fibrillæ nigræ ab
hoc secedentes , simul cum reliquo ;
cultro auferuntur. Integumenta tempo-
ris dextri consumpto panniculo adiposo
a subjacentibus late abscesserunt , &
magnum sinum formant , versus can-
thum oculi apertum.

2 Januarii 1772. æger dictam cam-
phor. dosin optime fert ; a superiori or-
bitæ parte cicatrix versus tarsum , jam
duas lineas lata descendit. Sinus sup-
purant quidem , sed non minuuntur :
cultro dilatantur & omnia mucilag.
N. 5. deligantur.

12 Januarii integumenta sinuum sub-
jacentibus incipiunt uniri : sinus mi-
nuuntur : palpebra superior fere integre
cicatrice obducta. Æger quoad reliqua
optime habens continuat quotidie cam-
phor. dr. ij. sumere. Valde appetit.
conceditur carniū esus.

Perrexit æger quotidie camphoræ dr.
ij. absque incommodo sumere usque ad
initium Februarii , quo tempore , cum
omnia cicatrice obducta sint , missus sit

illius usus, juvenis torosus, robustus optime coloratus, quoad omnia optime valet.

C O R O L L A R I A.

CAMPHORA debite exhibita est omnium, quæ nota sunt, efficacissimum contra putredinem medicamentum, si dosi magnitudini mali adaptata porrigatur.

Putridam humorum dissolutionem sponte, vel a contagio natam cito sistit: naturalem, sanam sanguini crasin ita restituit, ut sub illius non admodum diu protracto usu morbosa corpora sanorum plethoricorum naturam, qualitates & signa induant.

Non habetur remedium, quod tam prompte, tam efficaciter gangrænam partium solidarum sistat, mortua a sanis tam cito separet.

Ubi acrimonia scorbutica, rheumatica, arthritica humores infecit specie quadam putredinis, vires vitales & animales labefactantis, ut inde in variis locis decubitus materiæ acris cum dolore & subin partium immobilitate fiant; camphora efficax est remedium.

Ulcera

Ulcerà inde nata in & externus camphoræ usus cito depurat, ad suppurationem ducit, curat.

Ulcerà cancroſa a ſpeciali humorum & ſolidorum degeneratione orta, extra glandulas ſita, conſumpta fungoſitate, cicatrice firma abducit, imo mammæ cancro putreſcente, omnes functiones lethalibus ſignis imbuente affectam 84. annorum vetulam, quæ moribunda ad nos delata fuerat, in & externo camphoræ uſu ultra duos meſes ſuſtinui: cito gangrenæ ſucceſſit ſuppuratio, pulſus flaccidus, debilis, ſoliditatem & robur acquiſivit, manſit autem mala reſpiratio. Poſt mortem inventi ſunt pulmones multis ſcyrrhoſis & vomicis materia mucoſa, nigra plenis obſiti, undique accreti. Pancreas parvum, duriffimum: numeroſæ meſenterii glandulæ faba majori craſſiores, ſcyrrhoſæ, &c.

Sudores a putrida humorum diſſolutione & inde relaxatis ſolidis ortos putredinem corrigendo ſiſtit. Sitim, calorem, febrim, vaſorum tenſiones, tendinum ſubſultus ab acri putrido producta mirabili promptitudine tollit.

Vires a putredine proſtratas cito reſtituit, humores ad debitam conſiſtentiam

& lenitatem, solidas partes ad sanam firmitatem reducendo.

Excretionem acris in humoribus hærentis, illorum motum irritatis vasis accelerantis cum sanguinis minus firmi crasi, sedando vel minuendo febrim, promovet.

Emphysemata in morbis putridissimis frequenter apparentia, ni jam integra humorum decompositio facta fuerit, cito dissipat, & magni illi tumores latas plagas profunde gangrænosas circumdantes sub usu camphoræ cito collabuntur.

Camphora non est remedium prophylacticum contra miasma epidemicum morbos putridos produciens, licet hujus miasmatis effectum, putredinem nempe humorum corrigat, vires sustineat, erigatque ad venenum ex corpore eliminandum.

Lue venerea laborantes a camphora, magna dosi data male habent: spasmi corripuntur convulsiones minitantes: excitatur inde in illis febris, & varia alia symptomata; si tamen in humoribus jam nata sit putredo, his etiam prodest.

Plethorici camphoram non ferunt, nocet omnibus firma sanitate gaudentibus.

Camphoræ secundum indicationem adhibitæ usus præter jam modo dicta alias adhuc cautelas requirit.

Si magna dosis in pulvere homini detur, cujus nervi non obtusi vel sensu in gravi morbo privati sunt, vix potest sumere: si sumat, fit ebrius, vertiginosus & spasms corripitur, ni magnus sit in primis viis & reliquo corpore putredinis gradus.

Camphora in nullo menstruo perfecte solvitur, tantum in aliquibus deliquescit, mucilaginosi optime miscetur.

Mucilagine involuta non simul & semel nervos oris, œsophagi, ventriculi &c. vasa resorbentia afficit, sed sensim extricata per oscula vasorum resorbentium secundas vias intrat & ibi effectus suos edit.

Mucilago nutrit, acre demulcet, emollit, relaxat, omnia lubrica reddit: hinc majoris vel minoris consistentiæ secundum indicationem parari debet, modo camphoræ admixtioni sufficiat, & sit blandum vehiculum præbeat.

Si præsentē gangræna pulsus sit fortis, durus, magnus, vel præ plenitudine parvus: si sanguis sit phlogisticus, licet pulsus sit mollis & liber videatur,

magna camphoræ dosi terribilia mala causare potest, imo moderata hujus medicamenti dosi hominibus sanguinem sic constitutum habentibus subinde non sine noxa exhibetur, licet noverit practicus miasma aliquod putredini in humoribus generandæ aptum cum illis circumducitur.

Camphora nempe, ut relatæ observationes demonstrant, nimis attenuatos & dissolutos humores inspissat, compingit &c. hinc ubi debita consistentia jam gaudent, vel nimia tenacitate ad inflammatoriam vergente peccant; patet hoc medicamentum, nisi minima dosi detur, nocere debere.

Ubi urgens malum camphoram poscit, præsentem aliqualem sanguinis adspersionem inflammatoriam dispositione, præmissa vasorum, si nimis plena sint, depletione, proportionata nitri dosi simul cum camphora exhiberi debet, quod humorum morbosam condensationem impedit: dum camphora desideratos in corpore effectus edit, facile autem patet nociturum nitrum, si humorum adsit dissolutio.

Ubi pulsus debilitas, vacuitas, flacciditas &c. & alia in respiratione aliisque functionibus gangrænæ signa adsunt,

ingentem camphoræ dosin facile & summa cum euphoria sumunt ægri, optimeque ferunt, & miraculi instar ex orci faucibus cito eripiuntur.

Hi iidem ægri, quibus magna camphoræ dosis tam benefecit, mutata sub ipsius continuato usu morbosa sanguinis crasi in consistentiam quæ sanis & robustis corporibus propria est, ab illa male afficiuntur, eamque non amplius ferunt, nisi prius depletis vasis cum nitro porrigatur.

Nonnulli tamen ex his magnam camphoræ dosin diu ferunt, post quam cutis color, corporis robur, pulius, respiratio & omnes functiones sanam solidorum fluidorumque constitutionem præ se ferunt.

Subiti, sæpe redeunt & plerumque cito disparentes calores, anxietates, capitis gravitates, aurium tinnitus, leves vertigines, magna pulsus plenitudo movent a camphora abstinendum esse, vel minori dosi, aut addito nitro, si morbi continuatio ipsius usum necessarium reddat, exhibendam esse.

Nisi præceps periculum subitam opem requirat, a dosi mediocri semper incipiendum: imo ubi unius diei spatio magna dosis, v. g. dr. ij. sunt absumen-

dæ : præstat ut in doses N. 8. vel plures dividatur , sic enim ægri facile sumunt & bene ferunt , qui a dr. β. una dosi sumpta subinde per aliquot minuta speciem ebrietatis , patiuntur & postea medicamentum minus libenter sumunt ; unicui habui , qui ne tam sæpe illud fumere deberet , sine incommodo diu dr. j. pro dosi , id est tripartita dosi dr. iij. camphoræ quotidie absumpsit , raro autem , credo , invenientur , qui tantam dosin uno haustu absque incommodo fumere possint. Videntur dr. ij. per diem contra pessimas externas gangrænas , quæ jam sanguinis massam infecerunt , sufficere , imo dr. j. β. dr. j. quotidie assumpta sæpe votis satisfaciunt.

Si vero pars interna gangræna jam sit destructa , tabus putridus in cavitates extra circulationis limites effusus omnia pessumdat , & si per injectiones ad illa loca pervenire nequeat camphora , lethalis putredinis effectus per os assumpta impedire nequit : potest tamen sanguinis putridam dissolutionem remorando vitam prolongare.

Injici potest camphora mucilagini mixta in intestina , in uterum , & in sinus omnes , ad quos patet aditus : sicque optimos effectus edit , ad paran-

dam mucilaginem injectionibus destinata-
tam sufficiunt scr. ij. dr. β. scr. j. gumm.
arabici ad aquæ unc. j. cui deinde major
vel minor camphoræ dosis pro ratione
magnitudinis mali admiscetur, ita tamen
ut semper attente observet Medicus,
quomodo ferat æger.

Dum mucilago externis ulceribus ap-
plicatur, si emolliendum, relaxandum
est, & magna substantiæ facta fuerit
consumptio, paulo spissior paranda est,
si contrarium obtineat, dilutior fieri
debet, & secundum indicationem cam-
phora magis saturari.

Ubi excrescentiæ hinc inde in ulce-
ribus adsunt, vel tota ulceris superficies
supra margines nimis excrescere videtur,
præstat siccum applicare camphoræ pul-
verem, parva tamen elevatio non est ti-
menda, cicatrix enim ab omni habitu
accedens omnia æqualia reddit, potest
in tali casu applicari mucilag. camphora
magis saturata.


Dum pulvis camphoræ externe appli-
catur, debet digitis tritus ulceribus inf-
pergi, in pixide enim asservatus cito in
moleculas coit, quæ ulceribus appli-
catæ corpora irritantia sunt, & cica-
tricem impediunt. Ubi excrescentiæ
magnæ sunt, solus pulvis camphoræ su-

perpositis plumaceolis siccis applicandus est.

Si pulvis camphoræ ad fungosas ex-
crescentias consumendas non sufficiat,
camphora spiritui nitri forti ad perfec-
tam saturationem mixta in oleum deli-
quescit, & lenissimum dat escharoticum
crustam mollem faciens, qua aliquoties
ablata, fungositas consumitur, & con-
tinuata dein pulveris camphoræ appli-
catione ulcus cicatrice obducitur.

Externus camphoræ usus locum habet
semper & ubicumque gangræna adest:
si sicca est, mucilagini mixta tepefacta
applicari debet, si humida densum pul-
veris stratum inspergitur, & pro ratione
indicationis, vel sicca plumaceola, vel
mucilagine camphorata imprægnata su-
perponuntur.

Hæc nunc de camphora: dabitur,
credo, postea iterum occasio de hoc
medicamento quædam dicendi.



FORMULÆ.

N. 1. ꝑ. Gumm. arabic. dr. j. solve
in aq. flor. tilixæ unc. iij.

dein terendo admisce

camphor. dr. β.

fyr. capill. vener. unc. j.

M. S. *Quater de die unc. j. detur super-*
potando vasculum emulsi vel decocti ali-
cujus.

vel

ꝑ. Amygdal. dulc. dr. iij.

fiat c. aq. pur. L. A. emulsio

colat. unc. iij.

adde terendo

camphor. dr. β.

fyr. capill. vener. unc. j.

M. S. *Usus ut prioris :* vel

ꝑ. Sacchar. cand. dr. vj.

solve in aq. pur. unc. iv.

dein terendo admisce

camphor. dr. β.

d. ii.

S. *Usus ut prioris.*

N. 2. ꝑ. Gumm. arabic. dr. ij.

solve in aq. pur. unc. ij. β.

adde terendo

camphoræ dr. j.

fyr. althææ. unc. j. β.

*M. S. Divisis dosibus uno die absumat :
vel*

℞. Aq. flor. tiliæ unc. v.

specier. diatragac. frigid. dr. j. β.

camphor. terendo admixtæ dr. j.

fyr. diacod. unc. j.

M. S. Usus ut prioris.

N. 3. ℞. Gumm. arabic. dr. ij.

solv. in aq. flor. tiliæ unc. ij.

adde terendo

camphor. dr. j. β

fyr. althææ. unc. ij.

*M. S. Divisis dosibus uno die absumat :
vel*

℞. Rad. salab. dr. j. β.

coq. c. aq. q. s. p. $\frac{1}{4}$ hor.

colat. unc. x. adde terendo

camphor. dr. j. β.

fyr. flor. rhæad. unc. ij.

M. S. Usus ut prioris.

N. 4. ℞. Mucilagin. gumm. arabic.

unc. ij.

camphor. terendo admixtæ dr. ij.

fyr. althææ. unc. ij. β.

*M. S. Divisis dosibus diei unius spatia
absumat : vel*

℞. Amygdal. dulc. unc. j. β.

fiat cum aq. pur. L. A.

emuls. colat. unc. iv.

adde terendo

camphor. dr. ij.

fyr. capill. vener. unc. ij.

M. S. *Usus ut prioris.*

N. 5. R. Mucil. gum. arab. lib. j.

camphor. terendo admixtæ

unc. j. ß. d. u.

Huic vase clauso tepefactæ intingun-
tur plumaceola & lintea pro deli-
gatione, vel

R. Mucilag. gumm. arabic. lib. j.

camphor. terendo additæ unc. iij.

d. u.

S. *Usus ut prioris,*

vel

R. Mucilag. gumm. arabic. unc. vj.

camphor. unc. ij.

Diligenter terendo misceantur.

d. u.

S. *Usus ut prioris.*

N. 6. R. Gumm. arabic. unc. j.

solv. in aq. pur. lib. j.

dein terendo admisce

camphor. unc. ß.

d. pro enemate

tepide injiciendo.

Quivis videt hasce formulas facill
opera multipliciter variari posse.

Finis Tomi II.

